

Mazmur

Allah el si erena ati, 'Mot nyanamap' tenen, seklamik yupu

Mazmur 1

**Malye winin ninye ap, teleb winin ninye ap,
wininamak ning ati nyabuk yupu**

¹Malye winilamice ninye arye, sik nyabice yupu ap, malye wininyak ning ap, kekebuka kum wininyak ninye ara, Allah arye melilamliba, teleb uk unamake. Tonda malye winin ning talibuka unyak ninye arye malye weik winilamak touk, kum wininyakce, teleb uk wininyak ninye ara, Allah arye melipliba, teleb uk unamake. Ati ara, Allah ati dib tenenyak ninye ara, Allah ati like tenebuka, nalibuka aku tunyak ninye ap, neika kum unamake. ²Bukni, sik Allah ati dib tenenyak ninye ara, sik patalul ning ara, Allah Yahweh^a arye, 'Wininamlulume, aning ara kum wininamlulume,' nyabuk yupu nirya atibuk, kanye deibikirye, moubuka kekenyake. Ara, keteng noutam talak babye, lukunyan talak babye, Allah Yahweh elce nyalilamsuk yupu nirya kekebikirye, 'Deiyok ara, aning ati

^a **1:2** *Yahweh* – Allah el si koproba ara, 'Yahweh' ulule. Allah arye Musa ati, ayupu lakak arye nyabuk (Keluaran 3:14). Ibrani yupu deice arye ahuruf 'YHWH' aning uk sekenyake. Ibrani yupu nyanyak ninye arye, 'Allah el si koproba lakak kum nyaptibye' tenen, ilil ulule. Ilil ulula ati ara, sikce huruf 'YHWH' aning uk sekenyake. Bukni, Allah arye Musa ati, "Kume na si ara, 'Yahweh' unune. Asi Yahweh bikmunce asi uk erebuka na ati kinamnululume," nyabuk. Ibrani kili sal arye huruf YHWH sekenyak bukni, 'Ahuruf uk sekipyop ura, ayupu nyana ara, walwal upsilyak' tenen, nunce 'Yahweh' sekenyabe. Indonesia Alkitab noutam ara, Allah el si Yahweh kum sekenyake. Sikda, 'TUHAN' sekenyake. Bukni, Indonesia Alkitab noutamak nirya, 'TUHAN' eipmunyop ura, 'Ara Allah el si Yahweh sekenyak sukum,' tenenamlulume. Allah el si Yahweh nyana ara, fia teleb uke. Tonda, laka nyana yupu nomor 49 dipdelulume.

nyabuk do?’ tenen, moubuka tenebikirye unamake. Aninye ara, Allah arye melilamliba, teleb uk unamake.

³Allah yupu moubuka tenelulnye bira, el unamle ning nirya ara, teleb uk unamle. Anye el unamle ning nirya ara, winipmanto ninye arye mek kup-kupak yo koubikiba paplirye, bok teleb kibuka paplirye, duk moun talak li nirya ara, batakna kumce, teleb kibuka duk moulule. Tonda ayo bok kolubuka kum saklamla atonun, Allah ati diba tenelulnye birye unamle ning nirya ara teleb uk unamle. Deiyok ara, Allah arye diksukumuk unyak ninye ati melilamliba, teleb uk unamake.

⁴Bukni, sik malye winin ning uk, tenebuka upra bace ninye ara, kumanya balirye pubuka dopliba, sing-singa lakuka balamle atonun unamake. Adeice arye sik ap, sik wininyak ning nirya ap ara, kum danamle. ⁵Ati ara, malye winin ning uk talibuka unyak ninye ara, Allah arye tukwak ninye im sirya, mutuku sirya nirya yupu lipsisikuka, wenepnamle talak ara, sik amalye winin ning uk, talibuka unyak ninye ara, weneplirye kum daneipnamle. Ara, Allah el mapu noutamak arye bokuka, yukak deiplirye, amalye wininyak ninye ati wenepnamle. Malye winin ninye ap, Allah ati diba tenebuka diksukumuk unyak ninye ap, neika kum unamake.

⁶Anyapmasin yupu ara, talye ati, kum nyapsine. Deiyok ara, el kanye talima lamapdongobuka arye, Allah amutam ulirye, diksukumuk ululnye bira, Allah Yahweh arye melibuka kalikilirye, aninye ati teleb ulilule. Bukni, malye winin ning uk tenebuka, upre bace ninye ara, wenebuka opnamle ati kintinililule. Sik malye winin ning uk talibuka unyak ninye ap, sik wininyak ning ap nirya ara, Allah Yahweh arye kum daneipnamle.

Mazmur 2

Allah arye ninye deiyoknye kina ati, wipdeibuk yupu

¹Yata ning deiyok ati, ninye ayala-ayala nirya tukwak im sirya mutuku sirya nirya, talibuka unyak nang nirya arye, ‘Allah ara, nun like,’ tenebuka, talye fil uk donyak do? Tonda amutuku-mutuku talibuka unyak nang arye tenebuka unyak ning nirya ara, talya-talya urdem uk kibuka unyake. ²Aning ara, sik ninye deiyok talibuka unyak nang ap, tonda weik-weik nang nirya ap, bulubuka wekikirye, Allah Yahweh ap, ‘Tukwak ninye lyepnamle’ tenen, wipdeibuknye ap ati, ‘Sik si yanipnamap’ tenen, yupu talinyake.

³Tonda, tukwak mutuku-mutuku nirya talibuka unyak nang arye, ‘Allah ap, elce wipdeibuknye ap, sikce nyasilye ning yupu ara, nun like. Ayupu ara, tapu koulongana atonun usulula ati, lopdongopnuyabe,’ tenenyake. Tonda, sikce, “Nun adib aryuk batakibirye, nun yuk

tenebibe ning uk, wininamabe,” nyanyake. ⁴Nyakiba, Allah el im deice weik buna teleb ning deice bululnye kekeplirye, aku tusulule. Tonda atenebuka nyanyaka ara, ‘Talye yupu nyanmaka,’ tenen, mangkau kibuka batakalule.

⁵Ati winiplirye, Allah el yu ning, sik nong deice deipnamle. Winiplyop ura, sik ilil upliba, lukdanamake. Deiyok ara, Allah el yu sik aninye deice deipliba, ilil weik upliba, sik nong ara, bir-bir anamake. ⁶Allah el si Yahweh arye nyapnamle. “Sion mutuku fia teleb ak, fia telebnye ulul mutuku noutamak ara, na arye wipdeiainsinye amutuku deipne. Ara, ‘Amutuku noutamak ara, na si fia erenamniyak’ tenen, Yerusalem mutuku noutamak deipne. ‘Anye bira, tukwak im sirya, mutuku sirya nirya unyak ninye, sik ninye deiyoknye, Raja unamle’ tenen, wipdeipse.” Allah arye nyabuk.

⁷Aninye deiyoknye birye nyapnamle.

Allah Yahweh arye na ti nyapnuk yupu ara nyapnune. Allah Yahweh arye nyapne. “Anda na mi koproba ulyame. Na Allah ara, an ni koproba na unune,” nyabuka, wibuka deipnuke. ⁸Ance na ti moropnunyame. Moropneminoyop ura, mutuku-mutuku nirya ap, amutuku noutamak unyak ninye nirya ap ara, na arye an ti arepkiniba, talibuka unamlame. Aripkinoyop ura, mutuku sirya, im sirya anirya ancuk talinamlame.

⁹Winipminoyop ura, ance fia kat ning bisining deice arye, sik wininyak ning nirya opminyeba, yanuka opnamle. Ance tuku tilibuka memelamak makau, coltaklamak atonun winibukapmince, sik malye wininyak ninye wenebuka oplopnamlame.

¹⁰Na Allah arye wipdeipse ninye deiyoknye birye, winipnamle ati, ‘Se, na kayapu tukwak talibuka umunye ninye deiyok nang nirya ara, nun ton wenebuka opsilyak’ tenen, anyapmasin yupu kekepmunce, moubuka unamlume. Tonda, anggun weik deiyok nang nirya ara, ‘Allah arye wenepsilyak’ tenen, akunum laka nyapsina anya arye, moubuka unamlume. ¹¹Winipmunyop ura, Allah yupu kekebuka umunce, Allah el si Yahweh ati, ilil tenebuka, el amutam umunce, el fil uk donamlulume. ‘Allah arye wenepsilyak’ tenen, weik ilil usululba umunce, nu Ni Koproba Allah ati, kanye delinamlulume.

¹²Aning atonun, anggunce Allah el Mi koproba ati, “Nun ni,” nyabuka, el amutam umunce, el dam yok sirim talibuka, yana kinamlulume. Wininamluma deiyok ara, ‘Allah el si Yahweh arye wenebuka kum opnamsil’ tenen, wininamlulume. Tonda, ‘Mankau arye Allah el yu nun deice deipsilyak’ tenen, moubuka wininamlulume. ‘Allah el Mi koproba arye, lyepnamsil’ tenen, el dam unyak ninye nirya ara, sik unamak ning nirya ara, teleb uk unamle.

[Minop talak seklamik buku noutamak ara, pasal 3 sampai 7 ton aubuk bukni, nunce aning kum sekupe. Ati pasal 8 arye dukdongobuka nyapra banamlulume.]

Mazmur 8

Raja Daud birye, “Allah el si Yahweh ara, fia teleb uk ulule,” nyabuka, mot sebuk yupu

¹Daud mot senmok deice arye nyabuk. ²Nun ni Allah Yahweh, ninye mutuku-mutuku nirya arye, an si uk erekinyake. Nun ni Allah an si Yahweh, anda nun Ninye Deiyoknye ulyame. An si ap, ance winilyam ning ap, fia teleb ulula anya arye, ninye kekebikirye, laka nyalbalamikiba, ninye im sirya, mutuku sirya nirya unyak ninye arye, kel bikinyake. Ninye arye, ‘Se, im noutamak ulul ning nirya ara, weik mambule,’ tenenyak bukni, dipkoprop aning nirya ara, mitik mambul uk ulule. Ance fia teleb winilyam ning ap, an ap, an dirin ap ara, dipkoprop fia mambul ulule.

³Ance, ‘Wininamake,’ tenelamlum touk, milo mapu babye, mitik ton akunum nepnin banyak mapu babye, an ti, “Se, nun ni Allah elda fia teleb uk ulule,” nyabuka, an si erekinyake. An si uk erekinyaka ara, talye ati kume. Ara, malye weik unyak ninye nirya, amitik mapu arye an si erekinyakba, kibicop ura, yupu kum nyapmanto unyake. Ara, malye wininyak ninye arye, ‘Allah nun like’ tenen, yanikinyak ninye ap, an olana atonun unyak ninye ap, tonda, ‘Allah arye wenesulula ati ara, nunce kwang dakna ati, el ulul ning ara, malye kilinamabe’ tenen, unyak ninye ap nirya ara, yupu nyapmanto kum unamake.

⁴Allah ance im kwepdeiplumce, wala ap, kurya ap nirya, kwepdeiplum ning nirya ara, na asing arye elinunce, ‘Se, aning ara fia telebe’ tenen, mambul kanye bonune. An mining taruk arye, im noutamak ulul ning nirya kwepdeiplumce, ‘Asukum uk unamle,’ tenelamlum touk, deiplumba, tuba aulul touk, na asing arye dinye talak ara, na arye ‘Se, aning ara fia telebe’ tenen, mambul kanye bonune. ⁵Im noutamak kwepdeaimlum ning ara, fia mambul ning ati ara, aning nirya eipnyop ura, utenenune. ‘Kume, ninye ati ance tenesiminye ning ara, ance yata ning deiyok ati, nun tukwak ninye ati melibuka kalikisilyam do? Tonda, ninye arye deibikcop ura, dadeipdanin balamica ani, unyak mapu nirya ara, ance yata deiyok ati, bico tenesimince, melibuka kalikisilyam do?’ tenenenune.

⁶Nun ni Allah, an ap, an im deice melin nang, sik malaikat nirya ap, dipkoprop weik mambul ululumce, aning-aning nirya deice tam ululume. Bukni, ninye tukwak ninye ara, mitiktonun arye, sik malaikat amutam kwepdeipsulume. Im deice ulul ning nirya deice tam ululba, nunda aning nirya amutam uk deipsulum bukni, nunda teleb kibuka kwepdeipsuluma ati, ton tam ninye arye, ton tam ninye ati, ‘Sikda telebe,’ nyabuka si erelanyake.

⁷Tonda, Allah ance ninye tukwak ninye kwepdeipsulumce, ‘Sikda tukwak mutuku ulul ning nirya talibuka deiyok nang unamak’ tenen,

aning nirya ara, nun amutam deipmunyeba, nun tukwak ninye arye, tukwak mutuku noutamak kam ulul ning aning-aning nirya, nun cuk talibuka, weik deiyok nang unyabe. Aning nirya ara, nun yan amutam ululba, nunda aning nirya deice tam atonun unyabe.

⁸Ati ara, ninye tukwak ninye amutam ululba, nunce deiyok talibuka, deice tam unyap ning ara ani. Ara, ninye arye weilamak kam ulul ning aning-aning nirya, talibuka deiyok nang unyabe. Ara, domba basam ap, sapi basam ap, ninye arye weilamak ning ap, tonda bai mutuku kam ulul ning ayala-yala nirya ap ara, ‘Ninye arye talinamake’ tenen, kwepdeiplumce, aning nirya nun amutam deiamsulumba, talinyabe.

⁹Tonda, maka im deice laklamle babye, laut mekwen fum tam ulul mekwen fum bal ap, laut mekwen noutamak kam ulul ning aning-aning nirya ap, laut mekwen noutamak balamuk ning nirya babye, ‘Ninye aniryuk talinamak’ tenen, ninye kwepdeipsulumce, aning nirya, nun amutam deiamsulume.

¹⁰Aning ati ara, nun ni Allah Yahweh, ninye im sirya mutuku sirya nirya arye, an si uk erekinyake. Nun Ni Koproba Allah Yahweh, anda nun Ninye Deiyoknye ulyame. An si ap, ance winilyam ning ap, fia teleb ulula ati ara, ninye kekebikirye, laka nyalbalamikiba, ninye mutuku-mutuku nirya unyak ninye arye, kel kinyake. Raja Daud birye nyabuk.

[Minop talak sekik buku ara pasal 9-13 ton aubuk bukni, nunce aning kum sekupu. Ati otam pasal 14 arye dukdongobuka nyapra banamlulume.]

Mazmur 14

**Mot nyana deiyoknye bira, Daud birye malye wininyak
ninye arye, malye wininyak ning ati, nyabuk yupu**

¹Allah ati, diba kum tenenyak nang ati ara, ‘Allah dipkoprop kum ulule,’ nyanyak bukni, ayupu nyanyak ninye ara, sik fia walwal nang arye nyanyake. Adeice, sikce wininyak ning aning-aning nirya ara, malye ning uk wininyake. Sik anang ara tonoknye babye, teleb kum ulule. Sik nirya malye uk wininyake. ²Allah el si Yahweh im deice arye, ninye tukwak mutuku unyak ninye ati, ‘Diksukum teleb kibuka, na tibuk eninyak do? Na wininye ning ap, na arye nyanye yupu ap ati, moubuka kel kinyak do?’ tenen, disulule.

³Bukni, mutuku-mutuku nirya, unyak ninye nirya ara, fia ton diksukum kibuka, teleb ton kum unyake. Tonoknye babye teleb kum ulule. Ninye nirya ara, malye ning uk tenebuka fil donyake. Allah ati balye tam kibuka batakirye, yuk talye ning uk dobolbanyake.

⁴Ninye malye ning wininyak nang nirya ara, beta kel kum kipnamak do? Malye ning uk talibuka unyak nang arye, din ning el si roti dilamak

touk, na mapu nirya ara onyake. Tonda, Allah el si Yahweh ati, ‘Naio melibuka lyesilyame,’ nyabuka, el ti kum moronyake. ⁵Malye ning uk talibuka wininyak ninye ara, aminyan talak weik ilil unamake. Ara, Allah ati diba tenebuka, diksukumuk unyak ninye ati, lyeproplirye, sik kan-kan unamle bukni, Allah ati diba kum tenenyak ninye ara, weik ilil unamake.

⁶Na Allah ati, diba kum tenebikirye, malye winin ning uk talibuka unyak ninye arye, na ti diba tenebuka, amutam unyak ninye arye, ‘Wininamabe,’ tenenyak ning ara, yupu sekelongonyake. Bukni, Allah Yahweh arye, el ti diba tenenyak ninye ati, fia kalikuka melinamle.

⁷Allah Sion mutuku arye yanamle ning ara, Israel yala ninye nirya yanuka lyepnamle. ‘Minopce lyepsutue’ tenen, Israel ninye arye fia moronyake. Winitalak ara, Israel ninye ikin uk unyak bukni, Allah Yahweh arye, ila tuba tonap sik ning nirya, teleb kibuka deiplyopop ura, Israel ninye nirya arye, kanye deipnamake. Aning atonun, Yakub birye deibukba, dadeipdanin, yangalamik ninye nirya arye, kanye deipnamake.

Mazmur 15

**“Allah an dam yangana ara, yatatonye yatu do?”
nyabuka, Daud mot deice arye nyabuk yupu**

¹Na ni Allah Yahweh, ninye ara, yata wirilamtinga deice arye, an un dam yating do? Tonda an unak fia teleb mutuku dup, Yerusalem mutuku ara, yatato ninye yanuka upting do? ²Anye bira malye winin ning kum winilirye, teleb diksukumuk ululnye, tonda dipkoprop yupu uk, nyabuka ululnye bira, an un dam yanuka uptue.

³Anye bira, el sitang deice arye, malye yupu kum nyapra balulnye. Tonda, deiyok kum upmalibuk, el kwit capu yuk nang ati, ‘Sik malye wininyake,’ nyabuka yu kum nyalulnye. Ton ning ara, ‘Na kayapu ati malye kipdeipnune,’ kum tenelirye, el kwit capu ati minina yupu kum nyalulnye bira, Allah an un dam yatue.

⁴‘Allah arye bataksilyak’ tenen, kanye lamapdongobuka unyak ninye ara, Allah ati diba tenebuka, unyak nang ati, “Telebe,” nyabuka si erelulnye bira, Allah un dam yatue. Tonda, anye birye, ‘Na ning ititipnyak,’ kum tenelul bukni, weilamlye touk winilule. Tonda, anye birye, sik malye-malye weik wininyak ninye ara, ‘Na like’ tenen, neika kum unyake.

⁵Winilirye, uang yo bok dobuka yuk nang ati areplirye, ‘Sikke ton tabakuka aripnamniak,’ kum tenelulnye bira, Allah un dam yatue. Tonda, malye kum winipmace nang ati, ‘Anye opdeipnamnile’ tenen, dekna arin ning aribikceba, kum dololulnye bira, Allah un dam yatue.

Ateleb fil donyak ninye ara, fia fi dobuka teleb uk unamake.

Mazmur 16

Daud mot sena deice arye, “Na arye Allah ati, fia diba tenebuka moronune,” nyabuk yupu

¹Na ni Allah ance kalikuka melipnilyame. ‘Ikin upnilyak’ tenen, an dam anyuk yanganune. Anda ninye melina deiyoknye ulyame. ²Ati ara, na arye an Yahweh ati, nyakunune. “Na Ni Koproba Allah, anda na deiyoknye unilyame,” nyabuka si erekunune. Yata ning do nirya, teleb ning talinun ning ara, ancuk arinilyame. Yuk yala ning nirya ara, talye ning uk ulul bukni, anda weik telebnye ulyame. ³Tukwak mutuku noutamak unyakce, ance, ‘Wininamlulume,’ nyapdeiamsulum yupu talibuka, diksukumuk unyak nang ara, fia kanye delinune.

⁴Tonda, kam una kum ning uk si erenyak ninye ara, ining ning bobuka aisa dam yangakiryte, si erenyak ninye ara, ikin weik kanye bobuka unamake. Sik nong deice ikin ning fia weik unamle. Sikce talye ning, aisa si erena ati, kam ning obuka, uku dongolbalamaka ara, na kum melibuka donamne. Tonda, sikce isa si nyanyak ning ara, na arye aisa si fia kum nyanamne.

⁵Na ni Allah Yahweh, aminyan talak teleb upnamnile ning ara, ancuk arenamnilama ati, an si uk erenamne. Na wininun ning ap, talinun ning ap nirya ara, ancuk kalikinilyame. Ati an si uk erenamne. ⁶Dipkoprop Allah ance aripnululum tuku ara, fia teleb ning uk aripnulume. Winipnuluma ati, na talima fum tam, fia weik arye kanye delikunune.

⁷Allah ance na ti, ‘Wininamlyame, teleb bisik ara ani,’ nyabuka peterenilyama ati, an si uk fia erenamkine. Fia lukunyan noutam babye, ance nyapdeipnululum yupu, tuba tenena uk unune. ⁸Na ara, Allah an ti, tuba tenena uk ununa ati ara, na kanye ara, anda na dam tuba tikuka melinilyame. Na dam anyuk unilyama ati, ikin ning na dam yatua babye, ‘Allah arye meliniliba, teleb aniryuk unamne’ tenen, kanye delinune. Ton ilil kum unulule.

⁹Ati ara, na talima fum tam teleb kanye deipniryte, na arye an ti kanye deibuka an si uk erenamkine. Tonda, ‘Na nong nirya, Allah atibuk aripnune,’ tenebuka aripnyop ura, na ara ilil una kum aryuk, fia kanye darapdongobuka unamne. ¹⁰Aning ara, urdem ati kum nyapne. Na dipnya babye, Allah ance kum bataknamnilame. Winipnimince, ance wibuka deipnululumnye, fia diksukum ubuka teleb uk ununye bira, dipnyop ura, tuku fum tam weipnica babye, nong ara kum lyupnamnile. Kam bukeipnamnilama ati nyapne.

¹¹Tonda, Allah ancuk kam una ati, diksukum bisik peterepnilyame. Winipniminyop ura, an dam anyuk yaniryte, fia kanye deibuka unamne. Winipniba, fin-fin ning, fia aunamle ning ara, ance na dam tabakuka arenamnilame.

[Minop talak sekik buku ara pasal 17-18 ton aubuk bukni, nunce aning kum sekupu. Ati otam pasal 19 arye dukdongobuka nyapra banamlulume.]

Mazmur 19

Daud mot sena deice arye, “Ninye arye, Allah kwepdeibuk ning eibikirye, el si uk erenyake,” nyabuk yupu

¹Allah ance kwepdeipnulumba, im noutamak ulul ning nirya ara, tukwak ninye eibikirye, an fia teleb unyak ning ap, weik dirina unyak ning ap ati, kel kibikirye, an si uk erekinyake. Ninye arye, im ap, im noutamak ulul ning nirya ap, eibice deice arye, ‘Se, Allah arye, fia teleb kibuka mambul fil dolule. Elda fia teleb uk ulirye, el mikip arye fil dolul ning nirya ara, fia teleb uk ulule,’ tenen, moubuka kel kinyake.

²Tonda, Allah ance im ap, im noutamak ulul ning nirya ap, kwepdeiplum ning nirya ara, urasin fia teleb ulye deice arye, Allah el fia teleb ulul ning nirya ara, laka nyasulule. Ara, ninye yupu deice arye nyalamak touk kum nyasinyak bukni, aning nirya urasin elinyak deice aniryuk, laka nyasulule. Aning atonun, lukunyan talak nirya babye, ninye arye im noutamak ulul ning eibikirye, moubuka tenebica deice arye, ‘Se, Allah ara dipkoprop weik mambulnye ulule’ tenen, kel kinyake.

³Ara, ninye nyalamak touk, kum nyasulul bukni, aning urasin deice aniryuk laka nyasulule. Tonda, ninye yupu ap, yuk lelim ap arye, kum nyasulul bukni, mutuku-mutuku nirya noutamak unyak ninye nirya, im noutamak ulul ning urasin eibice deice arye, Allah el teleb ulul ning ara, moubuka kel bikinyake.

⁴Keteng ap, wala ap, kurya ap nirya ara, ninye yupu nyalamak atonun, nyabuka kum laka nyasinyake. Tonda, tukwak ninye arye yupu nyanyaka ara, kum kekenyap bukni, mutuku-mutuku nirya unyak ninye arye, im noutamak ulul ning nirya eibice deice arye, ‘Se, Allah el fia teleb ulul ning ara, ani’ tenen, moubuka kel bikinyake. Mutuku-mutuku unyak ninye nirya babye, im noutamak ulul ning nirya elinyaka ati ara, adeice arye, Allah el ulul ning ton, sik nirya kel bikinyake.

⁵Allah arye keteng ara, kwepdeibuka im noutamak deibukba, fia aulule. Winipmanto ara, kil min kum dopmalinye, akil kum dopmalye talak arye, teleb kwerya ap, fia teleb butum aling ap, ongoplirye yaliba, el kayapu nang arye dilamak touk, berekelongon talak, keteng weleplirye yaliba, dirin weik ulule. Tonda, ninye bik-bik abuka bana weik kelye birye, ‘Bik-bik abuka, mikip asa arye binune’ tenen, kanye deibuka kintinililamle touk, berentam talak keteng kutukuka tiklirye, keteng duk-duk noutamak nirya, mikip arye balule.

⁶Keteng berentam talak ara, keteng yangan tam arye kutukuka tiklirye, keteng duk-dukan noutamak ara, bisik banmalya ani, sintam ara, omutuku keteng wengban tam kum ulule. Winilula anya arye, el balulul talak nirya ara, im sirya mutuku sirya nirya ulul ning ara, el tin aniryuk bupu pirilule. Tonok ning babye duknuptuba, keteng dirina ap, tin ap kum upnamle. Tukwak mutuku ulul ning nirya, keteng sinarya elule.

⁷Allah el si Yahweh arye, “Aning wininamlulume, aning ara fia kum wininamlulume,” nyapdeipsuk yupu nirya ara, fia teleb uk ulule. Ayupu moubuka kekebipyop ura, nun kanye ap, talima ap kam kilisulule. Ikin usilye talak ara, kanye talima kwa disulule. Allah Yahweh arye ninye ati, “Teleb winin bisik ani,” nyapdeiyamsuk yupu nirya ara, fia diksukum yupu ulula ati, nunce, ‘Ayupu ara, dib do, tilila do?’ tenen, kanye kum bokoltonamsile.

Allah arye ayupu nyalamuk touk, nong dipkoprop upra banamla ati ara, ayupu nirya ara, moubuka diba tenepnamabe. Walwal nang babye, Allah arye anyapdeiamsuk yupu, fia moubuka kekebikiryte, talibibyop ura, sik kel kibuka bakiryte, aminyan talak, sik babye kel ninye unamake.

⁸Allah Yahweh arye, ‘Wininamlulume,’ nyapdeiamsuk yupu nirya ara, diksukum una ati, nyapdeiamsuke. Anyapdeipsuk ning ara dipkoprop, aning moubuka kekebipyop ura, nun kanye talima fum tam arye weik kanye delinamabe. Allah Yahweh arye, “Wininamlulume, aning ara fia kum wininamlulume,” nyapdeiyamsuk yupu ara, dirina kilina deiyok ning ulula ati ara, ayupu moubuka diba tenebikyop ura, nun kanye talima fum tam dirin kilinamsile. Tonda, aning-aning nirya eibibiryte, ‘Teleb ning ani, malye ning ani’ tenen, teleb kibuka kel kinamabe.

⁹Ninye arye, nun ni Allah Yahweh ati, ‘Elda weik mambulnye’ tenen, ilil usilye ning ara, fia weik teleb ulule. Aning ara, fia ati aunamsile. Allah Yahweh arye, “Wininamlulume, aning ara fia kum wininamlulume,” nyapdeiamsuk yupu nirya ara, diksukum yupu uk ulule. Ayupu noutamak ara, malye winin ning tonok babye kum ulule. Allah Yahweh arye nyasilye touk, dipkoprop nong winipnamle.

¹⁰Allah arye nyapdeiamsuk yupu nirya ara, dekna weik ning, emas fia urasin teleb ning atonun kume. Ninye arye, ‘Se emas ara, weik mambul dekna ning,’ tenenyak bukni, dipkoprop emas ara mitik mambul uk ulule. Allah el nyasilye yupu ara, weik mambul ulule.

Tonda ninye arye mong mek dibikiryte, “Se, aning ara, to weik nyasulule. Aning ara fia telebe,” nyalamak bukni, aning babye mitik teleb uka. Allah arye nyasilye yupu ara, weik teleb ulule. Tonda mong mek moulamlak yung arye, mek dobuka, dilamak ning ara, teleb ulamle bukni, aning babye mitik teleb uka. Allah el yupu ara, weik teleb ulule. Mong mek ara, mitik teleb uka.

¹¹‘Mankau arye malye winibibiyak’ tenen, Allah yupu moubuka kekebibiryte, ‘Malye ning ani, teleb ning ani’ tenen, moubuka kel kibibiryte, malye winin ning batakibiryte, diksukum un ning uk, talibuka unamabe. Ara, Allah arye nyasilye yupu nirya, kekebuka fia talilamlenye bira, Allah arye anye biti, weik dekna ning arepliba, dopropnamle. Tonda, Allah el yupu uk moubuka taliliryte, diksukumuk ululnye bira, el winin ning nirya ara, teleb uk upra banamle.

¹²Yatanye birye, ‘Na malye unun ning ara, ani’ tenen, moubuka kel kiptu do? Kume, nun bidamang aryuk kum uptibye. Ati, ‘Se, nun ni Allah, na kanye talima fum tam malye unulul ning ati, namin kipnutumce, amalye ning nirya kilipnutume’ tenen, moropkine. Na kanye talima fum tam malye unilye ning kum eiptinya ati ara, ‘Mangkau arye malye winipnyeba, ancuk namin kipnamnilyam’ tenen, moropkine naio.

¹³Tonda, nai Allah, an amutam uniry, an fil uk donun bukni, na talima fum tam ara, malye ning tuba unilya deice arye, ‘Malye winin ning, ani,’ tenepne bukni, ‘Talye mangkau asa malye winipnyak’ tenen, nai ance melipniminya deice arye, malye kum wininamne. Na talima fum tam malye wininulul ning arye, ‘Bisibuka malye kipniliba, malye winipnyak,’ tenena ati, moropkine naio. An mikip aripnimince, melipniminya deice arye, weik malye winin ning kum kipniry, diksukumuk unamne. Ati, ‘Allah ance melibuka lyepronamnilam’ tenen, moropkine naio.

¹⁴Tonda, na moropkin ning ara ani. ‘Na ni Allah na arye nyanamne yupu ap, na talima fum tam arye tenenamne ning nirya ap, diksukumuk uptuba, ance na ti kanye deipnutum’ tenen, moropkine. ¹⁵Na ni Allah Yahweh, ance na ti melibuka kalikinilyame. Yata weik ikin ning do, aning-aning nirya, ‘Na dam yanuka ikin upnilyak’ tenen, an dam yanganune. ‘Ninye yuk nang arye opsicak’ tenen, weik mutuku yangan keil, donga duknubuka balamak touk, ‘Allah ance lypedopnamnilam’ tenen, an dam bik-bik abuka yanganune. Na ni Allah, anda na malye winin ning noutamak arye, wilibuka Lyelonilyama Deiyoknye uminya ati nyapkine. Raja Daud birye nyabuk.

[Minop talak sekik buku ara pasal 20-21 ton aubuk bukni, nunce aning kum sekupu. Ati otam pasal 22 arye dukdongobuka nyapra banamlulume.]

Mazmur 22

Raja Daud imun kanye bobukce, Allah ati morobukce, mot sebuk yupu

¹Se, na ni Allah, na ni Allah, yata ati batakanilam do? Na arye fia malye kanye bobuka, an tibuk na talima fum tam arye, ‘Melipnamnilyarya’ tenen, morona uk ukunune. Winibuka tenebuka morokunun bukni, ance na tam kum dilyanmanilame. Tonda, ance na ti kum melipmanilame. Pera atonun unmalame. ²Na ni Allah, keteng noutam talak nirya, na arye an ti weik arye malye nyanmane. Bukni, ance yupu ton tamubuka kum nyapmanilamce, yupu tana kum upmanilame. Ati lukunyan talak babye, mambul kanye bobuka, na arye an ti, tuba-tuba morokunune. Tonda, na kanye teleb kum unmanilba, malye kanye bobuka, morona uk ukunune.

³Bukni, na kele, anda nun ninye deiyoknye usimince, malye winin ning, tonok ning babye fia kum ukulule. Anda, fia telebnye uminya ati, Israel ninye ayala-ayala nirya arye an ti, mot nyabuka si erekinyakce, kikinyake. ⁴Tonda, nun apu yapu nirya arye, an tibuk 'Elda dipkoprop aulule. Nun Ni Koproba Allah arye, dipkoprop melinamsilarya' tenen, sik kanye an deice uk delilamkikce, an si erelamkike. Winilamkik talak ara, ance sik dam ulamlumce, sik ti melibuka lyelamsulume. Ance nun apu yapu kum bataklamsuluma ati ara, sikce, 'Se, yata ati batakasulul do?' tenen, malye kanye bobuka, kum ulamik.

⁵Sikce Allah an ti, "Se nun ni Allah, lyepsilyame," nyabuka morolamkik ning ara, kekebuka melilalume. Tonda, sikce an ti diba tenelamkik ati, sik morolamik ning kekebuka lyemromsulume. Ati sik ton malye kanye kum bolamikce, teleb kanye uk bobuka ulamik. An ti alye kum daklamik. ⁶Bukni, na ara ninye kume. Na ara, fia malinye ati ara, kuluma atonunye unune. Wininuna ati, yuk nang nirya arye na ti, "Elda malye unanye," nyabuka, yep-yep nyabuka nalilamnikce, aku tulamnike. Yuk ninye nirya arye na ti, 'Anye nun like,' teneninyake.

⁷Tonda, ninye nirya arye, na wininye ning ati, elininyakce, aku tubuka nalininyake. Atonun, sikce si bam bol fum tam murmurulakiry, 'Elda talinye' tenen, kisok kwakdu-kwakdu aninyake. Tonda, na ti malye yupu weik nyaninyake. ⁸Yuk ninye arye nyaninyake. "Nunce el ti mangkau kibuka batakipyeba, yata wiribuka unamle do? Anye birye, 'Allah Yahweh^b elcuk lyepnamnile' tenen, diba tenelula anya arye, Allah el si uk erelule. Winilula ati ara, Allah Yahweh arye, el ti kanye deibuka lyepnamle do, kum do? Elda Allah ati diba tenelulnye ati ara, nunda dina uk unamabe," nyabuka nalininyake.

⁹Sik diba tenena kum ninye arye, nyaninyak bukni, na ni Allah na kele. Diba, na ni Allah ance na nin mun fum bomnuk talak melilamnulumba, deiamnuke. Tonda, ance na nin melilamlumba, elce na ti moum dilamse talak arye, dipdongobuka teleb kibuka kaliklamnukba, teleb aryuk nepra balamse. ¹⁰Na nin mun fum bomnuk talak arye, dipdongobuka melilamnulume. Ati na deipnukba, nepse talak babye, na un ning nirya, an deice aryuk ulamsa ani, wini babye unamne ati, anda na deiyoknye Allah ulyame. Na arye an si uk, fia erenamkine.

¹¹Ati ara, na ni Allah ance kum bataknamnilyame. Na ara, fia malye winin ning kan-kan ununa ati ara, amalye winin ning na dam yaliba, ikin

^b 22:8 *Yahweh* – Allah el si koproba ara, Yahweh ulule. Ibrani yupu nyanyak kili sal arye 'Allah el si koproba ara, lakak arye kum nyaptipnye' tenen, ilil ulula ati ara, sikce huruf 'YHWH' aning uk sekenyake. Bukni, 'YHWH' ahuruf uk skipyop ura, 'Ayupu nyana ara, walwal upsilyak' tenen, nunce, 'Yahweh' sekenyabe. Indonesia Alkitab ara, Allah el si Yahweh ulul sukum ara, 'TUHAN' sekenyake. Ayupu bikna ati, laka nyan yupu nomor 49 dipdelulume.

kanye bobuka unamne talak nirya ara, yuk nang arye ton yanuka, fia kum melinamniake. Ati na ni, 'Na dam anyuk unamle' tenen, morokunune.

¹²Winipmanto ara, mutuku si Basan mutuku arye, weik bai sapi basam yim ning, yang belelamle ning nirya yangakiryeye, yanuka wariklamak touk, na mal olan nang yupa weika arye yanuka, 'Anye opnuyap' tenen, antanapdongobuka, wariklamniyake. ¹³Tonda, winipmanto ara, yu weik kuse atonun ning, bai tam fia yu ulul ning, el si ara, singa kus arye, el din ning obuka dipnulya ati, si akuka yangalamle touk kibuka, na mal olan nang arye, na ona ati, sikce na dam yakiryeye warikininyake.

¹⁴Winibuka yana warikininyakop ura, na mikip ara kum kipnin banulule. Winipmanto ara, mek kwepdeibikiryeye, diklobikiba baliryeye kum ulamle touk, na mikip kum kipnin banmanile. Winibuka unulule deice arye, na yok bir-bir anulule. Tonda, na talima fum tam ara, ilil weik unulule anya arye, uku bupu arye, lilin mek biliklamle touk unulule. Ati, ilil weik unulule ati ara, fia malye kanye bobuka unune.

¹⁵Tonda, kira tuku dobuka, keteng ak deipmakibuk, keteng bupu arye sesal lelamle touk, na mikip ara, akunum kum upnile. Na dilkorona ara, si maka dilkwetena kum upniliryeye, sesal lenulula ati, kat ning atonun unulule. Adeice arye, na sitang ara sesal lepniliba, yupu kum nyapmanto unune. Wininye talak ara, na ni Allah ance batakniminyeba, diamice nang butbuta deice malamak atonun unune.

¹⁶Na dam fia malye winin ning talibuka unyak nang, yu weik nang arye, buru tam yu kam atonun kibuka yakiryeye, na ti yanuka warikilyanganinyake. Winipnikiryeye, na yan ap, taruk ap, yanuka lukuninyake. ¹⁷Winininyaka ati, na din ning kum lilbitinyeye. Din ning kum dinuna ati ara, bol malye upniliba, na yok nirya ara, akunum laka upniliba nuktinyeye. Na ara, fia bol malye bonuna anya arye, yuk nang arye, 'Se' tenen, dininyake. Tonda, na mal olan nang nirya, na dam yanuka elininyakce, 'E, beta merekuka ikin ulule' tenen, malye yupu nyabuka, dina uk uninyake.

¹⁸Tonda, na butum aling ara, sikce bokuka dolonyake. 'Ara, sikce dopropnuce talak ara, el dopnul do, na dopnun do?' tenen, winin ning deice arye, 'Aning dopropnamap do?' tenen, winipdekiryeye, atenepmace touk upliba dololamake. Aning atonun winibikiryeye, na butum aling ara, ubula doloninyake.

¹⁹Sik yu nang arye, winipnamniak bukni, na ni Allah Yahweh ance na ti, bataknimince, pera mutuku atonun kum unamlame. Dipkoprop anda na Mikip Kilina Deiyoknye unilyama ati ara, 'Ance minop yanuka, melipnamnilam' tenen, moropkine. Na ni Allah ancuk mikip kilinamniyame. ²⁰Ninye on nang parang ya bobikiryeye, na dam yanuka opmanto uninyak ning ap, tonda yu weik kam arye, opmanto unulul ning ap nirya ara, 'Ance lyepnamniyame' tenen, moropkine. ²¹Tonda, kuse

atonun ning, el si ara, singa kuse, fia yu ning si fum tam wekmanto unun ning ara, ance lyepnamnilyame. Tonda, bai tam ulul sapi basam, yang belelamle arye, yanuka opmanto unilye ning ara, ance lyepronilyame.

²²Na ni Allah, ance lyepniminyop ura, na tam nang yanuka bulubuka, an si erena ati, yanuka wekice talak aryuk, na arye Allah an si fia erenamkine. An si erena ati, ninye nirya bulubice talak ara, ance lyepnamnilam ning nirya ara, sik kekenan ati, laka nyanamne. Winipyop ura, an si uk erenamkiyabe. ²³Ati ara, Allah Yahweh el ti diba tenebibirye, el ti ilil usilye ninye nirya arye, el si uk erenamabe. Tonda, nun apu koproba Yakub birye deibukba, dadeipdanin yanganyap nang nirya ara, Allah el si uk, erebuka kinamabe. Aning atonun, nun Israel yala ninye nirya arye, nun Ni Koproba Allah ati, “Elda weik mambule,” nyabuka, el si uk erebuka si erenamabe.

²⁴Ara, talye ati kum nyapsine. Deiyok ara, ninye imun kanye bobuka, unyak nang arye, Allah an ti ilil upliba, amutam unyakce, ikin ning weik dolonyak ninye ara, kum batakalyame. An ti, “Se, melipsilyame,” nyabuka, moropkice talak ara, ance nun ti mangkau kibuka kum batakasilyam bukni, nunce moronyap ning kekebuka melisilyama ati ara, an si uk erenamkiyabe. ²⁵Allah ance na talima fum tam arye, nyapdeiamnulum ning nirya ara, an mapu bulubuka wekmace sukum arye, laka nyanamne. Ara na arye, “Na Ni Koproba Allah ati, el si erepnamne,” nyabuka nyalin yupu deice arye, nukamkise ning ara, sik dam laka nyanamne.

²⁶Na arye nyanamne yupu ara ani. Yata ninye do nirya, sikce nun Ni Koproba Allah Yahweh ati, ‘Elcuk melinamsile. Nun patan ning ara, elcuk arenamsile’ tenen, an ti fia pi dobuka, ekinyak nang ara, an si erebikirye, si erenamkiyake. Ara, talye ati kume. Deiyok ara, ninye bona utotoa talina kum ninye, kanye lamapdongobuka arye, amutam uk unyak ninye ara, ance melipsiminyeba, dotalak din ning dibikiba bounamle. Ati ara, Allah arye melilul ninye nirya ara, el si uk fia erenyakce, kanye deibuka, teleb uk unamake.

²⁷Tonda, doryanamle talak ara, ninye mutuku-mutuku nirya noutamak unyak ninye nirya ara, sik malye winin ning batakikirye, Allah Yahweh ati, ila tuba tonap tenebikirye, el dam tamubuka yakirye, el si erena ati, gutam tuku dipdongobuka, el si uk fia erenamake. ²⁸Winibuka wininamaka ara, talye ati kume. Deiyok ara, Allah el si Yahweh, weik Kwemdina Deiyoknye aniryuk, aning-aning nirya ap, ninye mutuku-mutuku nirya ap, talisulule. Dan mutuku unyak ninye do nirya, Allah elcuk sik deice tam ulirye, weik ninye deiyok kibuka talisulule.

²⁹Aning ati ara, mutuku-mutuku nirya unyak ninye nirya arye, Allah el dam tamubuka yakirye, el si erena ati, gutam tuku dipdongobuka, el si uk fia erenamake. Ara, weik bona talin nang babye, talye amutam ubuka

bona utotoa talina kum ninye babye, aning-aning kum talinyakce, urdem dadipnamak ninye babye, sik nirya arye, Allah dam yakirye, el si erena ati, gutam tuku dipdongobuka, el si uk fia erenamake.

³⁰Nunce deibibyeba, dadeipdanin banamak mapu babye, “Nun Ni Koproba Allah arye, melibuka winilamsuk ning ani,” nyabuka laka nyanamabe. Winibibyop ura, Allah an si uk erebikirye, sikce ton mapu deibikcop ura, dadeipdanin, upre banamak ninye nirya babye, an si uk erenamkiyake.

³¹Dotalak unamak ninye arye, sikce deipnamak mapu ati, “Nun Ni Koproba Allah arye, fia diksukum ubuka, ninye winipmanto kum fil dolamsuk ning ara ani, ani,” nyabuka, laka nyanamake. Winipnamaka deice arye, sikce deibikceba, dadeipdanin banamak mapu nirya babye, sik nirya arye, Allah el si uk erenamake.

[Minop talak sekik buku ara, ayat 32 ton sekeibik bukni, dipkoprop Ibrani yupu deice arye sekeipsik ning noutamak ara, 31 ayat dem ubuk ati ara, nunce 31 ayat dem sekeibupu. Ayat nomor ara, yuk-yuk ulul bukni, yupu deiyok ara, aseku pu ning uk ulule.]

Mazmur 23

**Raja Daud birye, Allah el si Yahweh erena ati,
mot sena deice arye nyabuk yupu**

¹Allah el si Yahweh, elce na ti, domba basam weilamak atonun na ti melibuka kalikinulule. Ati ara, yata patan ning do nirya, elce kalikuka melinilya deice arye, na patanilye touk, Allah arye na ti fia arenamnille.
²Tonda, Allah elcuk na ti, fia teleb kibuka melinulule. Winipmanto ara, domba basam weina deiyok nang arye, sik domba basam bobuka, maning fia teleb kibuka palulak, bobinuka deibikirye, kalikuka dilbalamak touk, Allah arye na ti, na patan ning nirya melibuka arenulule. Tonda, domba basam weina deiyok nang arye, ‘Nun domba basam talye kanye bobuka, teleb mek dibikirye, kanye delinamak’ tenen, ona kum mek dam bobalamak touk, Allah elcuk, na bobuka teleb sukumuk bobiniliba, ilil kum arye teleb kibuka unune.

³Tonda, na imun kanye bobuka unun talak ara, Allah arye na ti melinilya deice arye, winiryuk kanye ap, mikip ap areniliba, kanye deibuka teleb uk unune. Tonda, Allah arye, ‘Anda diksukumuk uminyeba, yuk ninye eipkikirye, na si fia erenamniyake,’ tenelirye na ti, “Diksukum ban bisik uk binamlama ati, ateleb binamlam bisik ara ani,” nyabuka laka nyanululce, abisik deice uk bobanulule. Elce, “Adiksukum bisik uk binulyame,” nyalinulul touk banune.

⁴Aning ati ara, na mal olan nang arye, na opmanto upnamniak talak ara, na ara imun kanye bobuka, kunukna atonun mutuku binamne

talak babye, na ton ilil kum unamnile. ‘Se, yata malye ning, na nong deice upniliba, ikin unamne do?’ tenen, fia kum tenenamne. Ara, talye ati kume. Deiyok ara, Allah ance na dam yanuka umince, na ti tuba melinilyame. Na dam fia neika ulyame.

Tonda, winipmanto ara, domba basam weina deiyok nang arye, sik domba ati, ‘Nun domba basam, yuk tam, opmanto mutuku bicak’ tenen, kama bobikirye, sik domba basam nong deice yakuka teleb bisik noutam kilamak touk, Allah ance na ti kalikuka melinilyamce, peterenilyame. Winibuka unilyama ati ara, na ara ilil asa una kumce, teleb kanye deibuka unune.

⁵Tonda, na mal olan nang wekuka dinmacak arye, Allah ance na patan ning nirya, weika arye arinilyame. Winipmanto ara, weik kwalya kwalipmince, na ti arinilyame. Ara, weik mambul nang yukubikceba, din ning weika arye dilyangalamk touk, wininiminyeba, na olan nang eibikirye, ‘Se’ tenen, unamake. Tonda, ninye arye, ‘Anye nun weik ninye deiyok kibuka unamsil’ tenen, fia teleb minyak mek, anye el kisok deice likeibiceba, anye ninye deiyoknye Raja ulamle touk, ance fia teleb kibuka kipdeipnininba, fia teleb uk unune. Ati ara, yata ning do nirya, na patanilye touk, weika arye tabakuka ariniminyeba, na dam yanganiliba, kanye deibuka teleb uk unune.

⁶Fia weika arye melinilyama ati, na kele, anda fia teleb uk kilinamnilama anya arye, fia teleb uk unamne. Na kam unamne talak noutamak nirya ara, ance na ti bico fia tenenamnilyame. Tonda, batakna kum aniryuk, fia teleb kibuka melinamnilame. Aning ati ara, na tukwak mutuku noutamak kam unamne talak nirya ap, doryanamle talak nirya ap, teleb aryuk fia darabuka, Allah Yahweh an aik dam fia unamne.

Raja Daud arye, mot nyana deice arye, ayupu nyabuk.

Mazmur 24

Daud arye, Allah el si Yahweh ati, mot nyabuka, el si erebuk yupu

¹Tukwak mutuku ap, tukwak mutuku noutamak ulul ning ap nirya ara, Allah Yahweh el ning anya arye, elcuk aning nirya talilulba, fia darabuka ulule. Aning atonun, im sirya mutuku sirya nirya noutamak unyak ninye nirya babye, Allah Yahweh arye talilulba, el amutam unyake. ²Aning ara, talye ati kum nyapne. Deiyok ara, Allah el dem arye tukwak mutuku nirya dobuka, weik laut mekwen deice deibukba, tukwak mutuku amutam mutuku yangan keil ara, laut mekwen fum tam deibukba aulule. Tukwak mutuku ulul amutam yangan keil, amu duk-duk mekwen fum tam, ikuka deibuka anya arye, fia aulyeba, lokuka yukak kum binmanto ulule.

³Yata wiribuka ululnye birye, Allah Yahweh el ulul mutuku deice welebtitu do? Yata wiribuka ululnye birye, Allah el fia teleb aik fum tam binuka tiktü do? Allah ulul sukum ara, malye ning tonok ning babye, fia kum ulul mutuku ulula anya arye, talye ninye arye anyaik dam talye mangkau asa kum bingene. ⁴Allah el dam binmanto ninye ara, nyapnune. Sikda, sik taruk arye malye winin ning talibuka, fia kum unyake. Tonda, sik talima fum tam, malye ning tonok ning babye kum ululba, fia diksukumuk unyake.

Tonda, talye ning ap, isa ap ati, 'Nun ni ani,' nyabuka, talye tilila ning ati, si kum erenyake. Tonda, aninye arye, tilila yupu deice arye, 'Dib yupu nyanyabe,' nyabuka, tenepce arye, tilila yupu fia kum nyanyake. Ato unyak ninye ara, fia diksukumuk unyaka ati ara, Allah el dam yatinge.

⁵Aninye ara, sik dam ara, Allah aulirye, Allah Yahweh arye, sik ti fia teleb kibuka delinamle. El fin-fin ning sik ti arilule. Allah arye sik Lyena Deiyoknye ulula ati ara, dipkopropa sik ti, 'Aninye ara, akunum teleb kibdeipsa ati, diksukumuk unyaka ati ara, kum wenepnamsine,' nyabuka teleb kilinamsile.

⁶Aning niryä laka nyapmasin touk, teleb kibuka unyak ninye arye, 'Nun Ni Koproba Allah, el si uk erenamabe,' tenebuka diksukumuk unyake. 'Allah el si erenamap' tenen, el dam yanganamake. Nun apu kopropa Yakub birye deibukba, dadeipdanin yangalamik Israel yala ninye niryä ara, Allah ance aninye ati, fia melibuka kaliklamlume. Diksukum unyak ninye aniryuk, 'Nun Allah dam yanuka ubirye, el si uk erenamabe,' tenebuka, unyak ninye uk, Allah el si uk erenamake.

⁷Allah el si erena aik fum tam fil dona deiyok nang arye, anyaik weik cang foka bublan, minop talak domik ning ara, pala kibuka kukeipsulumba, weik pala bisik laka uplyop ura, nun Ninye Deiyoknye, Raja yalirye, el si eren anyaik weknamle. ARaja ara, el mikip ap, el dirin ap, fia weik ulula anya arye, elda fia mambulnye ulule. Acang foka bublan kukeipsulumba, nun fia teleb Rajanye birye, anyaik weknamle. ⁸Weik Ninye Deiyok kina ati, mikip weik ap, fia teleb ap, weik mambul ululnye bira, yatanye do? Kume, elda yuknye kume, nun Ni Koproba Allah el si Yahweh uk, Raja ulule. Elda fia mikip weiknye ulirye, aning-aning niryä talilule. Allah Yahweh winilirye olanmakce talak niryä ara, el weik mikip ulirye, el mal olan ninye niryä ati, malye kiplirye obuka siryä dakalilule.

⁹Aning ati ara, Allah el si erena aik fum tam, fil dona deiyok nang arye, anyaik weik cang foka bublan, minop talak domik ning ara, pala kibuka kukeipsulumba, fia weik bisik laka uplyop ura, nun Ninye Deiyoknye, weik mambul ulul Raja yalirye, el si erena ati, anyaik weknamle. ¹⁰Weik Ninye Deiyoknye, weik mambul ulul Raja nyapmanye

bira, ‘Yatanye do?’ tenena meme. Ara, nun Ni Koproba Allah Yahweh, im deice unyak yin talin nang, sik malaikat nirya ap, aning-aning nirya ap, elcuk aning nirya talibuka, deice tam ulule. Elda weik mambul weik ulirye, nun ni Weik Deiyoknye Raja ulirye, talisulule.

Raja Daud mot nyana deice arye nyabuk.

[Minop talak sekik buku ara pasal 25-26 ton aubuk bukni, nunce aning kum sekupu. Ati otam pasal 27 arye dukdongobuka nyapra banamlulume.]

Mazmur 27

“Allah arye melisilyeba, teleb uk unyabe,” nyabuk yupu

¹Daud birye nyabuk. Allah ance na dirina kilina ap, na lyena ap Deiyoknye ulyame. Ara, weik kat foka cang arye erebuka dolamak touk, Allah Yahweh ance erebuka uminyeba, na ara an amutam unune. Ati ara, yuk nang nirya ati, ton bir-bir apnilirye, ilil kum unamnile. ²Na mal olan nang arye, ‘El opnamap’ tenen, yanuka warikininyak nang ara, sik babye anang uk, keil yan dum dukliba, sakuka olamle atonun, upnamle. Tonda, na mal olan nang arye, ‘Opnyabe,’ tenepnetenga babye, sik anang uk saknamake.

³Tonda, ‘Na yanuka warikuka opnamap’ tenen, yin nang yanamake. Tonda na ti mal olyanamniake. Winipnica babye, ilil kum upnamnile. ‘Allah anjuk melipnunil ca,’ tenepnirye, ilil kum unamnile.

⁴Ati ara, na ni Allah Yahweh, el ti fia tuba-tuba moronun ning ara, tonok ning ara ani. Na kam unamne talak nirya ara, Allah Yahweh el si erena aik dam anyuk uniry, ‘Na lyelonamnile,’ nyabuka moronune. Tonda, Allah Yahweh el urasin fia teleb ulul ning ara, ‘Fia dinamne’ tenen, moronune. Tonda, el si eren aik dam uniry, tuba-tuba dinamna ati moronune.

⁵Ara, urdem ati kume. Na kanye imun ning upnile talak nirya ara, ‘Allah arye na ti kalikuka melinamnile’ tenen, unune. Ara, ikin ning nirya, na dam yanamle talak nirya ara, Allah arye melibuka lelipdongopniliba, el amutam unamne. Allah arye melibuka lelipdongopnilirye, na bobuka mutuku deice delilbinamnile.

⁶Winipnilyop ura, na mal olan nang kan-kan arye, Allah arye erebuka dopnamnile. Na mal olan nang nirya ara, malye kipnamne. Ati ara, na weik kanye deipnirye, na ni Allah dam ‘Telebe,’ nyabuka, el si eren ati, teleb arin ning arilyanganamne. Winipnirye, Allah Yahweh el tibuk mot deice arye, nyapnirye si erenamne.

⁷Ati, na ni Allah Yahweh, na arye an ti moropkinyop ura, bico tenebuka kekenamnilyame. ⁸Na ni Allah na talima fum tam arye, ‘Allah el si erepnune,’ tenepe talak nirya ara, na adib aryuk tenebuka, an si

uk erenamkine. ⁹Ati ara, na batakanina meme. Na arye moropkinye talak nirya ara, an urasin tamuna meme. Ance na ti yu upkiliba, urasin malye bonina meme. Aning ara, ancuk lyelonilyamnye ati, ‘Na batakniminyak’ tenen, moropkine. ‘Tonda na ara, an amutam fil donanye ununa anya arye, na arye an ti, nyapnamne ning ara, kekebuka mangkau kipniminyak’ tenen, nyapkine. Anda, na ni Allah, na Lyena Deiyouknye unilyama ati nyapkine.

¹⁰Na nin ap, na ni ap ara, sikce bataknitiringa babye, Allah Yahweh ance kum bataknamnilame. Na moropkinye talak nirya ara, Allah ancuk melinamnilame. ¹¹Na ni Allah Yahweh, ance, ‘Teleb una bisik ara ani,’ tenen, teneminye ning uk peterenilyame. Tonda, diksukum bisik ara ani, teneminye ning uk peterenilyame. Aning ara, talye ati kume. ‘Na mal olan nang fia weik unyakce, malye kipnicak’ tenen, nyapkine.

¹²Na ti na mal olan nang arye, ‘Optibye,’ tenenyak nang, sik deice Allah ance deipminba, ‘Opnicak’ tenen, moropkine. Tonda, sik anang arye, ‘Na deice tilila yupu nyabuka, ikin ning na dam deipnicak’ tenen, moropkine. Tonda, anang arye, ‘Anye opnuyap,’ nyaninyaka ati, na ni Allah, ‘Ance kalikuka melipnamnilam’ tenen, moropkine. ¹³Dipkoprop, Allah ance na dam, bico tenebuka melipniminyop ura, na keke, ‘Na tukwak mutuku kam unamne talak noutamak ara, ance eibuka, teleb diksukum winin ning uk, arenamnilame,’ tenepne. Ara, an Allah Yahweh arye, teleb kilinamnilama ati nyapne.

¹⁴Ati ara, na arye Allah atibuk diba tenen, ‘Moubuka mikip arye talinamne. Ilil kum deice aniryuk ulamnirye, dilamnirye, Allah el si Yahweh arye, fia melinamnile,’ nyabuka, Daud birye nyabuk.

[Minop talak sekik buku ara pasal 28-31 ton aubuk bukni, nunce aning kum sekupu. Ati otam pasal 32 arye dukdongobuka nyapra banamlulume.]

Mazmur 32

**“Nun malye wininyap ning nirya, Allah el dam laka nyabibyeba,
namin kipsilirye, lyepdopnamsile,” nyabuk yupu**

¹Ayupu ara Daud birye, ‘Mot nyanamake’ tenen, peterebuk ning ara, ani.

²Allah arye meliplitiba, teleb uk unamak ninye ara ani. Ara, ninye malye ning wininyak ninye, Allah dam yakirye, “Se, nunda malye wininyap ning ani. An ap, an yupu ap ati, yanikinyabe,” nyabuka, yanuka laka lebigiba, Allah arye sik malye winin ning nirya, namin kilirye, kum kipdeiplirye, aninye nirya ara, fia kanye delinamake. Allah arye sik malye wininyak ning, tuba kum tenenamla ati ara, sikda fia kanye deibuka unamake.

³Allah arye melipliba, teleb uk unamak ninnye ara ani. Ara, malye winin ning weik winilamik bukni, Allah Yahweh arye, sik malye winilamik ning ati, akunum kilibukce, sik malye winilamik ning nirya, kum kibdeiamukce, ila tuba tonap aning ati fia kum tenelule. Dipkoproba, aninye ara, weik kanye deibuka, kil-kil asa arye unamake. Aninye ara, tilila yupu nyana kum aniryuk, tenepce arye una ap, duknubuka malye winina ap, fia kum unyakce, diksukumuk unyak ninnye nirya ara, fia weik kanye delinamake.

Bukni, na malye wininye ning kum laka nyalamse talak ara, atalak noutamak nirya, aning uk tenelamsirye, ikin kanye bobuka ulamsebuk, bol malye weik bolasiba, na mikip kum danin balamnuk. Atalak noutamak nirya ara, fia malye nyabuka, engena uk ulamsirye, bol malye uk bolamse.

⁴Tonda, atalak noutamak ara, na wenena ati, Allah an mikipnye taruk arye, na nong deice talilamnulumba, ikin weik ulamse. Winipmanto ara, keteng deiplye talak, keteng bupu arye, talye dawamlye mekwen celamle touk, an taruk na nong deice delilamnulumba, ikin weik ulamse ati, na mikip ara, kum kipnin balamnulumba, mikip ara, mitang uk ulamse. (Sela)^c

⁵Winibuka ikin weik ulamsa ani, kum winipmanto ulamse talak ara, “Akunama, na malye wininye ning nirya, tuba kum duknunamne. Na malye wininun ning ara, ani, ani,” nyabuka, an dam lakak arye laka nyapkise. Na arye, “Malye wininun ning nirya, na ni Allah Yahweh, el dam anyuk laka nyanamne. Aning nirya ton kum duknunamne. El ti yaniptapnirye, elce nyanilye yupu kum kekenuna ara ani,” nyabuka lakak arye nyapse. An dam laka nyapkisiba, anda kekepnulumce, na malye winilamse ning nirya kilibuka kum kipdeipnulume. Winipnuluma ati, aminyan talak nirya ara, ance na ti, ‘Ance malye ulamlum ning ara ani,’ nyabuka, kum wenepnamnilyame. Akunum teleb kipdeipnuluma ati, aning tuba kum tenenamlyame. (Sela)

⁶Ati ara, Allah ance nun kekena ati, lo tuba aupmasye talak ara, an ti, ‘Nun malye ning namin kipsimince, teleb kipdeipnamsilame,’ nyabuka moronamabe. Ara, ‘Allah arye nyasye touk, wininamabe’ tenen, teleb kibuka diksukum unyak ninnye arye, an ti moropkicop ura, ance sik morobice touk, wininamsilame. Winipmanto ara, ninnye kum tenebice talak, mek weik arye oplye talak ara, mutuku kon deice unyak ninnye ara, weik mek adib aryuk, sik aik nirya palibuka kum daklamle Aninye ara, mek kum dilule.

Aning atonun, nun malye wininyap ning akunum namin kipsimince, teleb kipdeipsiminba, aminyan talak weik ikin wenena ning, tukwak

^c 32:4 Sela nyalamik ning ara, Ibrani yupu deice arye, ‘Selah’ sekamik. Ayupu deiyok ara, ‘Anyapmap yupu ara, mambul weik anya arye, moubuka teniplulume’ tenen, ‘Selah’ seklamik.

ninye dam yalyop ura, nun melipsiminba, diksukum unamap ninye ati, kum oplonamsilame. Aning ara, nun dam kum yanamle.

⁷Na ni Allah anda na ti, 'Ikin ning doplyak' tenen, melibuka lyenilyame. Ance na ti, 'Kanye imun ning, el deice uplyak' tenen, na dam umince lyenilyame. Ance na opmanto talak nirya melibuka lyenilyama ati ara, yuk ninye eibikirye, na dana-dana tam yakirye, an tibuk fia kanye deibikirye, "Se, Allah arye, nun kwit lyelolula ati ara, aning ara fia telebe," nyabuka, kanye lon mot nyanyake. An ti si erekinyake. (Sela)

⁸Na ni Allah Yahweh arye nyasulule.

Na arye, "Abisik uk binamlulume," nyabuka, peteresinye bisik uk banamlume. Ara, 'Sikke talibuka unamak ning nirya ap, sik kam unamak talak nirya ap, fia teleb uk unamle' tenen, "Abisik uk banamlume. Awinin ning ara telebe, aning ara malye ning," nyabuka peterenamsine. Winipsiniry, anggun ti kalikuka melipsiniba, diksukum bisik uk banamlume.

⁹Aning ati ara, kuda basam do, sapi basam do, anggunce kum pataplye ning awaplyop ura, fia malye weik upliba, ninye yupu kekena ap, diksukum bisik bana ap, fia kum unyake. Kekena kumce malye weik wininyaka ati ara, ninye arye, 'Kume, na tenepnye touk winipnamnil,' tenebikirye, asapi basam u fum bisik tapu kirikikirye, lipdobikiba, talye kanye bobuka balamle. Bukni, sikda akekena kum ning winilamak touk, kum wininamlulume. Anggunda, fia moubuka tenepmunce, na nyasinnye yupu kekebuka, aning uk talibuka unamlume.

¹⁰Anggun nirya moubuka tenenamlume. Malye wininyak ninye, sik dam ara, ikin ning ap, imun kanye ning ap, dem uk yaliba dolonyake. Bukni, yata ninye do nirya, sikce Allah Yahweh el tibuk, diba tenebikirye, 'Elce dipkoprop yupu uk nyasulula ati ara, ayupu uk kekebuka unamabe,' tenenyak ninye ara, Allah weik arye bico tenelirye, aninye ati batakna kumce, fia melilule.

¹¹Aning ati ara, anggunce Allah Yahweh atibuk, diba tenepmunce, el yupu moubuka kekepmunce, fia diksukumuk ululum ninye nirya ara, fia kanye deibuka teleb uk unamlume. Yata ninye do, sik kanye talima fum tam malye ning kum upmal bukni, malye ning nirya bataklumce, diksukumuk ululum ninye nirya ara, kanye deibuka pin-pin asa arye umunce, Allah el si erena ati, yupu weik arye, "Telebe," nyabuka nyanamlulume. Winipmunce, anggun nirya kanye talima namin asa ululumce, kanye teleb arye unamlulume. Raja Daud birye nyabuk.

Mazmur 33

**Mot sena deice arye, "Israel ninye talibuka ulyam
Allah ara, fia telebe," nyabuk yupu**

¹Se, anggun malye ning nirya bataklumce, diksukumuk ululum ninye nirya ara, nun Ni Koproba Allah Yahweh ati, kanye deipmunce, mot

nyabuka, Allah el si erenamlulume. Teleb kibuka unyak ninye arye, Allah ati, “Anda fia telebe,” nyabuka, mot senyaka ara fia telebe. ²Allah Yahweh, el si erena ati, mot senamlum talak ara, mot selamak ning el si ara, kecapi deice arye, mot nyanamlulume. Aning atonun, mot selamak ning bilkong el si ara, gambus, tapu tagu barye, tapu sepuluh uplye ning dobuka, Allah ati, “Telebe,” nyabuka, aning deice mot nyamunce, el si erenamlulume. ³Tonda kanye lon mot, winiryuk mot aning-aning nirya wibukapmunce, Allah ati si erenamlulume. Mot selamak ning el si ara, kecapi dobuka, weik kel deice arye teleb kibuka mot nyanamlulume.

⁴Allah el yupu deice arye nyasilye yupu nirya ara, dipkoproba uk ulule. Elce nun ti, “Wininamsine,” nyabuka nyalisilye touk, aning nirya fil dobuka teleb uk usulula ati ara, elce nyasilye yupu nirya ati ara, diba fia tenenyabe. Allah elce wibuka deiamsuk ninye ara, fia kum batakasulul bukni, elce nyasilye touk, fil dobuka usulule. ⁵Malye winina fia kum dib aryuk, teleb un ning nirya ara, Allah arye kanye delilule. Tonda, ninye yu kanye bolana kumce, ninye yupu lipsisikuka bokolina ati, ninye winilamice touk, fia diksukumuk bokuka lipsisikna ara, Allah arye kanye delilule. Tukwak mutuku-mutuku nirya ara, Allah arye nun ti bico tenebuka, weika arye melisulul ning ara, fia langdibuka ulule. Allah arye bico tenesilirye, melisulul ning ara, fia kum batakalule. Fia ati bico tenesilirye, teleb ulisulule.

⁶Allah Yahweh arye el kanye aniryuk, yupu nyapdeibukba, adib aryuk, im deice ap, im noutamak ulul ning nirya ap, kwepdeibuk. Im noutamak ulul ning nirya ara, keteng ap, wala ap, kurya ap nirya ara, Allah Yahweh arye, ‘Kwepdeipnune,’ tenebukce, yupu nyapdeibukba, adib aryuk, laka ubuk. ⁷Tonda, Allah arye weik pala laut mekwen nirya bulubukabukce, tonokak deibuk. Atonun laut mekwen nirya bulubukabukce, ‘Amek ara, asukum uk unamle’ tenen, weik laut mekwen delinak yuk kwepdeibukba, amek ara yukak kum bitue. Asukum uk ulule.

⁸Aning ati ara, ninye mutuku-mutuk nirya Allah ati ilil unamsile. Tonda, nun Ni Koproba Allah atibuk, “Se, elda weik mambulnye ulule,” nyabuka, nun tukwak mutuku unyap ninye nirya arye, el tibuk si erenamabe. ⁹Ara, talye ati kume. Deiyok ara, Allah elce, “Aning-aning nirya winitalak upnule,” nyabukba adib aryuk, aning-aning nirya anyapmok touk, kikliman kibuk. Aning atonun, elce ayupu nyabuk talak aryuk, aning-aning nirya lakak kibukce, fia darabuka ulule. El yupu nyabuka deice aniryuk, aning ayala-ayala nirya kwepdeibukba, lakak kibuk.

¹⁰Ninye im sirya mutuku sirya nirya arye, ‘Nun mikip aniryuk wininamabe,’ tenenyak ning nirya ara, Allah arye kum kibuka delilule. Dan mutuku ninye do nirya, ninye tukwak ninye ayala-ayala nirya arye, ‘Winiptibye,’ tenenyak ning nirya, Allah arye kum kibuka delilule.

¹¹Bukni, Allah Yahweh arye, ‘Wininamne,’ tenelye ning nirya ara, dipkoprop winilirye fia ati unamle. Atonun, Allah el kanye talima fum tam tenelye ning nirya ara, dipkoprop tenelye touk ululba, aning ara, kum kum danamle. Elce dolul ning ara, fia aunamla ati ara, ninye arye mapu deibikceba, dadeipdanin banamak ninye nirya babye, Allah arye fil dolul ning elinamake.

¹²Yata mutuku unyak ninye do nirya, ninye mutuku-mutuk nirya arye, “Nun ni Allah ara, Yahweh ulule. Elcuk talisiliba, nunda el amutam unamabe,” nyabuka unyak ninye nirya ara, Allah arye melilamliba, sikda kanye deibuka teleb uk unamake. Tonda, Allah arye, ‘Sikda na tenen ninye unamake’ tenen, wibuka delilul ninye ara, el mapu koproba unyaka ati ara, melipliba sikda teleb uk unamake. ¹³Tukwak mutuku-mutuk nirya noutamak unyak ninye nirya ati, Allah Yahweh im deice ulirye disulule. ¹⁴Tonda, Allah el im deice ululak arye, tukwak mutuku unyak ninye nirya ati, ‘Yata wininamak do?’ tenen, disulule.

¹⁵Allah arye tukwak mutuku noutamak im mutuku-mutuk nirya unyak ninye, anggun kanye talima elce kwepdeipsuka ati ara, nun tenenyap ning ap, wininyap ning nirya ap ara, akunum tenelirye, kel bikisulule. Ninye talima fum tam ulul ning, elcuk disulula anya arye, nun wininyap ning nirya eipsilirye, kel bikisulule. Nun kum duknuptibye.

¹⁶Tonok mutuku ninye arye, ‘Omutuku unyak ninye ap, sik ninye deiyoknye Raja ap, olbinuyabe,’ tenebikirye, olbinmating buk, otam mutuku ninye deiyoknye birye, ‘Sik opnikcak’ tenen, el yin talin nang yupa fia weik kintinipdeiptua babye, kum lyepdatue. Aning atonun, el amutam yin talinanye birye, ‘Na ara mikip weiknye anya arye, na mining mikip deice arye yuk nang obuka lyepdatinye,’ teneptua babye, anye babye, el mining mikip aryuk kum melibuka lyepdatue.

¹⁷Tonda, kuda basam weik arye neplirye, el mikip weik uptua babye, anggunce, ‘Kume nun kuda basam balye deice bukibirye, nun mal olan nang ati, obuka sirya daktibye,’ tenena meme. Kuda basam mikip weik ning aupmatua babye, el mikip deice arye, nun kum lyepdatibye.

¹⁸Nun mikip deice arye kum lyepdatibye bukni, dipkoproba Allah ati lilil tenebikirye, ‘Elda weik mambule. El amutam uk unamabe’ tenen, el tibuk talibuka unyak ninye ara Allah Yahweh elce elilulce, melibuka lyelolule. Tonda anggun aninye ara, ‘Allah Yahweh arye kum bataknamsile. Elda, bico tenesilirye, fia melibuka lyelonamsil’ tenen, el tibuk kintinibuka dina uk unyak ninye ara, Allah arye fia melibuka kalikilule.

¹⁹Allah arye aninye ati, ‘Uk dina do, ninye olana do, ikin ning arye do, na tenen ninye oplyak’ tenen, fia melibuka unamle. Atonun, ‘Din ning kum upliba, din ning patana deice arye, dibikcak’ tenen, el na tenen ninye ati, fia melibuka kalikilule.

²⁰Ati ara, nun nirya arye, ‘Nun ni Allah Yahweh arye melibuka lyelonamsil talak ara, dan talak arye yanuka lyepdopnamsil do?’ tenen, kintinibuka dina uk unamabe. Winipmanto ara, ninye arye mal olalbalamak talak ara, ‘Yuk nang mal dobikiba, opsilyak’ tenen, kelapye dobuka lelipdakirye, olbalamaka atonun, nun Ni Koproba Allah arye, nun ti melibuka lyesulule. ²¹Diba Allah ap, nun ap, kanye talima dukdongobuka unyaba deice arye, fin-fin asa deice uk unamabe. Ara, talye ati kume. Nun ni Allah, elda malye ning tonok ning babye, kum winilirye, el si ara fia mambul weik ulule. ‘Elcuk melibuka lyelonamsil’ tenen, el tibuk, diba tenebibirye, el talibuka unyabe. “Allah elda dipkopronnye ulule,” nyabuka, el si uk erenamabe.

²²Nun ni Allah Yahweh, ‘Nun batakna kumce, fia bico tenesimince, teleb kibuka melinamsilam’ tenen, moropkiyabe. Ara, nunce an ti, ‘Nun ni Allah, el dem arye melibuka lyelonamsil’ tenen, an tibuk kintinibuka dina uk unamkiyabe. Winibuka tenebibirye, an tibuk talibuka unamap talak nirya ara, ‘Ance melibuka teleb ulinamsilam’ tenen, moropkiyabe naio.

Mazmur 34

“Allah arye teleb kibuka melinulula ati ara, Allah ati kanye deibuka el si uk erenamne,” nyabuka, mot sebuk yupu

¹Ayupu nirya ara, Daud birye mot sena deice arye nyabuk. Ara, minop talak Israel ninye talibuka ulamuk ninye deiyoknye Abimelek birye, ‘Daud opnun,’ tenebuk talak, Daud birye ayupu nyabuk. Ara, Daud talye motona talilamle nang, kanye fia moubuka tenena kumce talye kanye bobuka unyak touk, kanye walwal asa una atonun kibuka ulamukba, Raja Abimelek birye, Daud ati, ‘Motona talinanye ulula ati, elda daunamle’ tenen, dobuka dopkwetebuk.^d

²Raja Daud birye, nyabuk. Se, na ni Allah Yahweh, asum-asum nirya, na ni Allah ati, “Anda fia telebe,” nyabuka, mot senirye, an si atibuk fia erenamkine. Tonda, tuba-tuba Allah el si ati si donirye, mot senamne ning ara, fia kum bataknamne. ³Na kanye talima fum tam nirya arye, na ni Allah Yahweh ati, “Elda fia teleb uk ulule. El ulul ning atonun ning, yuk nang arye ton fia kum unyake. Elda tonoknye ulule,” nyabuka, el si fia erenamne. Winipniba, ikin fil arukunyakba, imun kanye bobuka unyak ninye kekebikirye, sik babye fin-fin kanye bobuka unamake.

⁴Ati ara, anggun nirya na dam yanganamlume. Yamunba nun nirya arye, “Allah el weik mikip arye ulul ning nirya ara, fia teleb uk ulule,” nyabuka, Allah el si uk erenamabe. Aubirye, Allah el si erebibirye, neika

^d 34:1 Ayupu ara, buku 1 Samuel pasal 21 dipdelulume.

si erenamabe. Winibuka ulamipya ani, ninye weika arye, tonap tabakuka kekebikirye, 'E, diba Allah elda fia mambulnye ulule,' tenebuka unamake.

⁵Na ara, 'Na ni Allah Yahweh arye fia melinamnil' tenen, Allah ati morolamse bukni, elce na morolamse ning nirya kekebuka aryamnuke. Na ikin ning weik ulamnukba, imun kanye bobuka ulamse ning nirya ara, elce lopdeipnuke. Winipnukba, na ilil ulamnuk ning nirya ara, akunum kum kipdeipnukba, teleb kanye bobuka ulamse. ⁶Tonda, kanye imun deice daunyak ninye nirya ara, 'Allah arye melipnamsilarya' tenen, sik kanye nirya, el deice uk deibikirye, el ti diba tenenyak ninye ara, pin-pin asa arye kanye deibuka unamake ati ara, sik urasin ara teleb uk unamle. Tonda, sik aninye nirya arye, aminyan talak ilil upliba, alye fia kum dakaldanamake.

⁷"Na ni Allah Yahweh, na melipnilyame," nyabuka morolamsiba, Allah kekelamnukce, na morolamse touk ubuka, lyelamnukce. Na ara, amutam ununye bukni, ikin ning weik winilamse ning nirya ara, elce lopdeipnukba, na ikin uamnuk ning nirya kum daneipnukba, teleb kanye bobuka unune. ⁸Sikda Allah el ti, 'Weik Mambulnye ulula ati ara, el uk talibuka unamabe' tenen, Allah ati ilil tenebikirye, el si uk erenyak ninye ara, Allah Yahweh el im deice fil donanye malaikat, sik dam ulule. Aninye dam kalikiliryne, sik weik imun upmalye ning nirya ati, melibuka lyelolule.

⁹Dan ninye do nirya, Allah Yahweh el winilye ning nirya moubuka dipdemunce, anggun babye kel bikinamlume. Allah Yahweh arye winilye ning nirya ara, fia teleb uk winilule. Ati, yata ninye do nirya sikce, 'Se, Allah el dem arye kalikuka melinamsil' tenen, Allah el amutam uk unyak ninye nirya ara, Allah arye meliliba, sik teleb uk unamake.

¹⁰Ati ara, Allah arye wipdeiyamsuk ninye nirya arye, el atibuk, 'Se, nun ni Allah Yahweh, weik mambulnye ulule. Elda fia telebe' tenen, el amutam unamabe. Ara, talye ati kum nyapne. Allah Yahweh ati, ilil upliba, 'Elda weik mambulnye ulula ati ara, el amutam uk unamabe' tenen, unyak ninye nirya ara, sik kam una ati, patalul ning nirya arilule. Sik kam una ati patalul ning nirya, kum kum danamle.

¹¹Aning atonun, bai tam ulamle weik kuse atonun ning, weik yu ning, el si ara, singa kuse, el din ning ton kum upliryne, din kum diplyop ura, mikip kum ulule. Bukni, nun Ni Koproba Allah Yahweh ati, si erebuka ukiryne, 'El dem aniryuk lyenamsil' tenen, el amutam uk unyak ninye nirya ara, teleb ning ati kum patalule. Sik kam una ati, teleb ning nirya arepliba, kanye imun ton kum ulule. Aning nirya ara, sik dam fia aunamle.

¹²Se na mapu, na dam yamunce, na arye nyapsinye yupu moubuka kekepnululume. Nunce, 'Se, nun ni Allah Yahweh, elda weik mambulnye ulule ati, elda fia teleb' tenen, 'El amutam uk unamap,' tenenyap ning nirya ara, na arye peterenamsine. Peterepsinyop ura, anggunce Allah Yahweh, el si uk erebuka, si erenamulume.

¹³Dan ninye do nirya, anggun kan-kan noutamak arye, ‘Nunda lo tuba upsiliba, kam unamap talak nirya, teleb kanye deibuka unamabe. Tonda, nun kam unamap talak ara, weik lo aripsutuba, keteng tamun weika arye, tonap kam uptibye,’ tenen, patasulul ninye nirya ara, na arye nyapnusin yupu moubuka kekenamlume. Anggunce teleb unamlum ning ara ani.

¹⁴Anggun sitang deice arye, ‘Malye yupu tabipyak’ tenen, fia moubuka kalikelanamlulume. Tonda, anggun sitang deice arye, tilila yupu ap, tenepce arye nyana yupu ap, fia kum nyanamlulume. ¹⁵Tonda, yata malye winin ning do nirya, ‘Malye kum winiptibye’ tenen, malye winin ning nirya ara batakmunce, diksukum un ning uk, talibuka unamlulume. Winipmunce anggun ap, anggun kayapu ap ati, olana ap, yupu si dalana ap, kum dib aryuk, yuk ninye ap ansinibuka kanye talima dukdongobuka, neika unamlulume. Anggunce, ‘Se, yuk ninye ap, ansinibuka teleb kibuka neika unamabe’ tenen, fia pi dobuka, diksukumuk unamlulume.

¹⁶Dan ninye do nirya, malye un ning nirya ara, batakirye, Allah ati diba tenebuka, diksukumuk unyak ninye ati ara, Allah Yahweh arye fia tuba kalikilule. Winilula ati ara, ikin ning sik dam yaliba, “Nun ni Allah, nun kanye imun upmasila ati, melipsilyame,” nyabuka morobikce talak ara, adib aryuk kekebuka melilule.

¹⁷Bukni, malye ning uk talibuka unyak ninye nirya ati ara, Allah el yu ara, sik nong deice deiplirye, sik wenena ati ikin ning weik arilule. Winibuka winilul ning ara, talye ati kume. Allah arye tenelul ning ara, ‘Sik amalye wininyak ninye wenebuka oplyop ura, sik anang dibikiba, yuk ninye mutuku-mutuku nirya arye, sik amalye ulamikce ninye ap, malye ulamikce ning ap nirya ara, adib aryuk luba kinamake’ tenen, amalye un ninye ati wenelule.

¹⁸Malye ning nirya batakuka, diksukumuk ukirye, Allah el amutam unyak ninye ara, sikce, “Se, nun ni Allah Yahweh, melipsilyame,” nyabuka morobikce talak nirya ara, Allah kekeplirye, sik morobikce ning atonun uk, kibuka melilule. Sik ikin ning weik ulamlya noutamak, elce lyebuka doproplirye, sik ikin ulamlye ning nirya, kum kipdeipliba, teleb kanye bobuka unyake. ¹⁹Ninye ikin ning dopdobikirye, kanye talima uk dipliba, imun kanye bobuka unyake. Wininyak talak ara, kanye lamapdongobuka unyak ninye arye, tenelamak ning kum winipmanto kibikirye, ‘Se’ tenen, malye kanye bolamak talak ap, fia engena uk ulamak talak ap, Allah Yahweh arye, ‘Sik talima fum tam melipnamle’ tenen, sik aninye dam ulirye lyelolule.

²⁰Dipkoprop, Allah ati diba tenebuka, diksukumuk unyak ninye nirya babye, weik imun ning, sik dam ton fia weika arye yaliba ngalukunyake. Bukni, aning nirya ara Allah Yahweh elce kekebuka elilule. Eiplirye, sik

aninye dam ulirye, lyelolule. ²¹Allah arye, sik diksukumuk unyak ninye ati, sik nong nirya ara, melibuka dilule. Tonda, ‘Sik yok babye, tonok ton kum copname’ tenen, Allah arye aninye ati, fia moubuka kalikilule.

²²Tonda yu kanye bobuka, fia malye winin ning uk, talibuka unyak ninye ara, sikce amalye ning uk wininyaka deice arye, sik bidamnye uk olanamake. Sik bidamnye malye unyaka deice arye dipnamake. Tonda, Allah ati dib tenebikirye, diksukumuk unyak ninye ara, yuk nang arye sik ti wilibuka deibikirye, ‘Aninye nun like ati ara, olbinuyabe,’ tenebuka, unyak ninye nirya ara, Allah arye sik aninye ati, wenebuka oplonamlarya.

²³Allah el ti dib tenebikirye, el amutam ukirye, el fil melibuka donyak ninye ati ara, teleb kipdeiplirye, lyelonamle. Yata ninye do nirya, ‘Kume, nun Ni Koproba Allah Yahweh, el dem arye lyenamsl’ tenen, el amutam unyak ninye nirya ara, Allah arye aninye ati, wenebuka kum opnamle. Wenena ning sik dam ton, fia kum delinamle. Aninye ati, teleb uk ulinamle.

[Minop talak sekik buku ara, pasal 35 sampai 36 ton aubuk bukni, nunce aning kum sekupu ati, otam pasal 37 arye dukdongobuka dem yininamlulume.]

Mazmur 37

“Malye wininyak nang ati, ‘Se’ tenen, malye kanye bobuka, kum unamlulume,” nyabuk yupu

¹Raja Daud arye nyabuk. Sik malye winin ning uk talibuka wininyak ninye arye, malye ubikiba eipmunyop ura, anggunce, ‘Se, yata wiripnamap do?’ tenen, malye kanye bobuka kum unamlulume. Aning atonun, sik malye ning uk talibuka malye weik unyak ninye, eipmunce, ‘Se, sik malye unyaka deice arye, talinyak ning ara, nun babye ton taliptibye’ tenen, se tenen mambul kirikna meme. Sik malye unyak ninye arye wininyak ning nirya ap, talinyak ning nirya ap ati, ‘Se, na babye ton droptinye,’ tenena fia meme.

²Ayupu nyapmasina deiyok ara, talye ati kum nyapsine. Deiyok ara ani. Winipmanto sik amalye unyak ninye ara, maning like tonok betekuka tiklirye, teleb kibuka papmalya ani, keteng tin deiplirye, tingting apyop ura, adib aryuk koulolamla atonun, sik malye winin ning uk talibuka wininyak ninye nirya ara, ouku fia kum upre banamake. Tonda, ninye arye wa wibuka din yala ning kouamikiba, mok kum celamlirye, adin bok ning deice kum opliba, el bok koululolamle touk, amalye unyak ninye babye, ouku fia kum upra banamake. Fia kum unamake.

³Anggunda, malye wininyak ninye ati, ‘Anang ara, teleb wininyake,’ kum tenenamlum bukni, tukwak mutuku noutamak unamlum talak nirya

ara, ‘Allah elcuk melinamsil’ tenen, anggun Ni Koproba Allah Yahweh atibuk, diba tenepmunce, diksukum fil uk donamlulume. ⁴ Anggunce, ‘Nun Ni Koproba Allah Yahweh, elda fia mambulnye ulula ati, el tibuk fia kanye deibuka unamabe,’ tenepmunce, Allah arye, ‘Aning telebe,’ tenelye ning uk, talibuka unamlulume. Winibuka umunyop ura, anggun talima fum tam arye, fia ‘Se,’ tenepmunba, teninmamunye touk, Allah arye arenamsile.^e

⁵Ati ara, anggun nong nirya bobuka, Allah el ti arepmunce, utenenamlulume. ‘Allah elcuk kalikuka melinamsil’ tenen, el tibuk weika arye dib tenepmunyop ura, Allah arye anggun ti, melinamsil ning ara, laka nyapnusine. Ara ani. ⁶Yuk nang arye anggun ti, deiyok kum upmasilibuk, lululan yupu deice arye, ‘Sik malye unyake,’ nyabuka, ikin ning anggun nong deice delinamsiyak bukni, anggunce Allah ati, diba tenepmunyop ura, aminyan talak anggunce diksukumuk ululum ning nirya ara Allah arye lakak kipdeipnamsile. Winipsilyop ura, yuk ninye nirya arye, ‘Se, sikda dipkoprop teleb nang uk unyake’ tenen, kel biknamake.

Winipmanto ara, keteng duk-duk talak, keteng mil fia weika arye ulamle touk, aminyan talak Allah arye, anggun teleb umunye ning lakak kipsiliba, ninye nirya arye eibikirye, kel biknamake. Anggunce teleb uk ulamlumba, yuk nang arye diba kum tenelamsiki bukni, aminyan talak Allah arye, anggun teleb ulamunye ning nirya ati, lakak kipdeipnamle talak ara, ninye nirya arye, kel biknamake.

⁷Ati ara, malye unyak ninye nirya, sikce fil dopra bakce talak arye, ‘Aning winipnamabe,’ tenelamik touk, nong akunum uplyop ura, anggun diba tenelulum ninye arye, ‘Se, yata deiyok ati, sik tenenyak ning nong upliba dolonyak do?’ tenen, malye kanye bobuka, kum unamlulume. Sik malye nang arye, ‘Malye winin ning uk talibuka unamabe,’ tenebikirye, yupu sisikinyak ning akunum winibikcop ura, anggun diba tenelulum ninye arye, ‘Se,’ tenen, malye kanye kum bonamlume.

Aning kum wininamlum bukni, anggunce tuba diba tenemunce, ‘Allah ara, dan talak melipnamsil do?’ tenen, kanye talima lamapdongobuka arye, amutam uk umunce kintinibuka dina uk unamlume. Ulamunya ani, dipkoprop Allah el tenebuk sum, akunum uplyop ura, el tenebuk touk nong upnamle. Anggun diba tenelulum ninye arye, ‘Allah arye minopce melipsutuba, teleb uk uptibye,’ tenena kume. ‘Allah el tenebuk talak uk, teleb kipdeipnamsile’ tenen, teleb kanye bobuka unamlume.

^e 37:4 *Anggunce patan ning arenamsile* – “Anggun patasilye ning Allah arye arenamsile,” nyabuk ning deiyok bitinye ulule. Tonok ning ara, akunum sekupu. Bitinye ning ara, ani. Ara, Allah arye anggun kanye talima noutamak fil doliba, aminyan talak ara, teleb ning uk patanamsile. Ara, Allah arye, ‘Aning teleb,’ tenelul ning uk patasiliba, teleb winina ning uk talibuka unamlume.

⁸ Anggun diba tenelulum ninye nirya arye, yu una ap, yuk nang ati derelana ap, kum unamlume. Atenemunye ning nirya ara, batakumumce, balye tam kibuka, teleb un bisik uk banamlulume. Anggun yu upsiliba derepdamunce, ‘Se, yata ati do?’ tenepmunyop ura, aminyan talak ikin ning ap, malye winin ning ap, upnamsile. Ati ara, yu una ap, derelana ap, fia kum unamlume.

⁹ Anyapmasin yupu nirya ara, talye ati kum nyapsine. Deiyok ara ani. Sik malye winin ning uk talibuka unyak ninye ara, Allah arye tenebuk talak, akunum uplyop ura, Allah arye amalye wininyak ninye nirya ati, adib aryuk kum daneipnamle. Bukni, yata ninye do nirya, anggunce, ‘Kume, Allah Yahweh elcuk melipnamsilarya,’ tenebuka unyak ninye ara, Allah arye arepliba, sik anang arye, amutuku nirya talibuka unamake.

¹⁰ Ati ara, tenipnamlulume. Sik malye winin ning uk talibuka unyak ninye ara, Allah arye kum kipdeipliba, epdenamap bukni, ton kum eipnamabe. Like mitiktonun ton, daulamipyani, Allah tenebuk talak akunum uplyop ura, amalye winin ninye nirya, kum daneipnamle.

¹¹ Bukni, sik kanye talima erena kumce, kanye lamapdongobuka amutam uk ubuka, diksukum unyak ninye ara, anyaripnamle mutuku talibikiba, Allah arye aning nirya talye tabakuka arepliba, fia teleb uk kibuka unamake. Yuk ninye ap kanye talima dukdongobuka neika unamake. Fia malye kanye bobuka kum unamake.

¹² Malye winin ning uk talibuka unyak ninye nirya arye, diksukumuk unyak ninye ati, ‘Sik anang ara, yata wiriptipya deice arye optibye do?’ tenenyake. Tonda, ‘Anang ara, yata wiribuka opnamap do?’ tenen, sik malye wininyak ninye arye, anggun teleb umunye nang ati, yu kanye bobikirye, malye yupu nyasinyake. ¹³ Bukni, sik amalye wininyak nang ati, Allah elcuk tenelya ara, ‘Akunum dipna dam unamak nang’ tenen, Allah arye amalye wininyak ninye ati, nalibuka aku tulule. Ara, talye ati kume. Elce, ‘Aninye ati ninye yupu lipsisikuka bokeipnirye, aninye wenebuka opnamne talak ara, akunum dam upmala,’ teneplirye, aninye ati aku tulule.

¹⁴ Sik amalye wininyak nang arye, ‘Talye bona utotoa talina kum ninye ap, aning-aning nirya kum talinyakce, aning nirya patalul ninye ara, opnuyap’ tenen, ninye on parang ya dobuka kintininyake. Tonda, ‘Sik bona utotoa talina kum ninye nirya oplopnyuyap’ tenen, mal pina gum-gum tam yin tapu deice dinikinyake. Wininyaka deiyok ara ani. Ara, ‘Diksukum un ning uk talibuka, unyak ninye nirya ara, nun like. Aninye nirya ara, oploptibye,’ tenenyake.

¹⁵ ‘Diksukum unyak ninye ap, bona utotoa talina kum ninye ap, opnuyap’ tenen, kintinilyak bukni, sik mining abolamak tace ning arye, sik bidamnye aryuk uk oilanamake. Tonda, sik abonyak yin nirya ara, lakuka saknamle.

¹⁶ Ati ara, na arye nyapnusin yupu ara, moubuka kekeplulume. Allah atibuk diba tenebuka unyak ninye arye, talinyak ning ara, mitiktonun ulule. Bukni, sik malye winin ning uk talibikirye, talye lukparabuka

unyak nang arye, talinyak ning ara, fia weik ulule. Sikda bona weik talin nang unyake. Bukni, Allah el kanye ara, 'Diksukumuk unyak ninye ara, fia teleb uk unyake. Sik malye wininyak ninye arye, bon ning weik talinyak bukni, fia malye uk wininyaka ati ara, na lik,' tenelule. Ati, Allah arye utenelule. 'Sik bona utotoa talina kum unyak bukni, diksukumuk unyak ninye ara, teleb unyake. Malye ubica deice arye, bona utoutoa talin nang unyak ninye ara, fia malye uk unyake,' tenelule.

¹⁷Anyapmasin yupu ara, talye ati kum nyapsine. Deiyok ara, ani. Sik malye wininyak nang, sik mikip deice arye talinyak ning nirya ara, Allah arye aninye weneplirye, kum kipdeipnamle. Bukni, Allah atibuk diba tenebuka diksukumuk unyak ninye ara, Allah el weik mikipnye birye, aninye ati erebuka melilamliba, teleb uk unamake. Allah arye diksukum unyak ninye melibuka kalikilula ati nyapsine.

¹⁸Sik diksukumuk unyak ninye ara, malye winin ning tonok ning babye kum wininyaka anye arye, Allah el si Yahweh arye, aninye ati, fia moubuka elilulce, kel bikilule. Ati ara, Allah arye sik anang ati, arenamle ning ayala-ayala nirya ara, fia kum kum danamle. Allah arye sik menenga ning arepliba, aninye ap, aning ap, fia aunamle. Aninye ara, kum kum danamake, fia aunamake.

¹⁹Diksukumuk unyak nang, sik dam weik imun ning yanamle talak ara, fia ikin upliba, sikce, 'Se, yata wiripnyap do?' tenen, imun kanye bobuka, sik diba tenyamik ning, kum batakanyake. Fia ikin ning weik uplya babye, batakna kumce fia kanye deibuka teleb uk unamake. Tonda sik din patan talak unyaba babye, aninye sik unamakak ara din ning tuba aupna uk unamle.

²⁰Bukni, sik malye winin ning uk talibuka unyak ninye ara, sik dam kanye imun ning yanamle talak ara, fia ikin upliba, Allah arye aninye nirya, fia kum daneipnamle. Tonda, nun Ni Koproba Allah Yahweh^f ati, 'Nun like,' tenenyak ninye ati, Allah arye kum kipdeiplirye, sirya daknamle. Winipmanto ara, dolkua palamlya noutamak arye, kita ning mouplyop ura, urasin fia teleb ulamle bukni, keteng panaplirye, bupe weik uplyop ura, minopce kolouplirye, akait ning akapsaklirye, kum ulamle touk, sik anang babye, kum danin banamake. Ara, daunmaca ani, uku pakanmalyak, tulum weleplirye, kum ulamle touk, sik malye wininyak ninye ara, minopce kum upra banamake.

²¹Malye ning uk talibuka unyak ninye arye, yuk nang sik ning ati, 'Na kwit, an ning ton aryamninyeba, aminyan talak, na ning dobuka, an ning punupnamkine,' nyabuka, tilila yupu nyaltakanyak bukni, dipkoprop, sikce tia talak ati dolonyak ning nirya ara, tamubuka kum arinyake. Bukni, sik diksukum unyak nang ara, sik kayapu nang arye pataplyop ura, sik patan ning kanye teleba arye tabakuka arinyake. Bico

^f **37:20** *Yahweh* – Allah el si koproba ara, Yahweh ulule. Indonesia Alkitab noutam ara, Allah el si Yahweh ulul sukum ara, TUHAN sekenyake. Ayupu bikna ati ara, laka nyan yupu nomor 49 dipdelulume.

tenebuka arinyak ning ara, mitiktonun arye kum arinyak bukni, weika arye tabakuka arinyake.

²²Allah arye teleb uk kibuka delinamle ninye ara, sikce amutuku nirya talibuka unamake. Bukni, Allah arye, ‘Sik anang ara, malye uk wininyaka anya arye, na like,’ tenenyak nang ara, amutuku noutamak kum unamake. Yakuka yukak deiplirye, aminyan talak, aninye nirya kum daneipnamle.

²³Yata ninye do nirya, diksukum bisik uk banyak ninye ara, Allah arye aninye ati, melibuka kalikilule. Allah arye aninye ati melipliba, sik unamak ning nirya ara, teleb uk upliba, nong upnamle. Deiyok ara, Allah arye aninye fia moubuka talilirye, teleb uk unamake. ²⁴Winipmanto ara, Allah arye melibuka talinamle ninye ara, banamak bisik noutamak arye, yan dum keil duknamle bukni, tukwak sakuka poulbikiba kum opnamle. Deiyok ara, ‘Aninye sakuka oplyak’ tenen, Allah arye anang ati, sik taruk moubuka talilule.

²⁵Ara, talye kum nyapne. Na kam ulamse talak arye, dipdongobuka wisi deipse talak nirya uniryne elinuna ara, Allah el ti diba tenekirye, diksukumuk unyak nang ara, sik anang ati kum batakalule. Fia moubuka tuba kalikilule. Tonda, sik anang deibikba, dadeipdanin yanganyak mapu nirya ara, Allah arye batakliba, ‘Yuk nang arye arenamsiak’ tenen, talye luba kibuka dilamak nang atonun, kum unamake. Allah arye aninye ap, sikce delinyak mapu ap ati, aning-aning nirya, talye tabakuka arilule.

²⁶Allah atibuk diba tenebuka, diksukumuk unyak ninye arye, sik yuk nang ati, “Na ning tia ati, dopropmaminya ani, tamubuka aripnamnyame,” nyabuka, weika arye arinyake. Tonda sikce yuk nang ati talye arinyak ning ara, mitikanun kum arinyak bukni, aning nirya tabakuka arinyake. Ati ara, sikce delinamak mapu ara, Allah meliplirye, amapu nirya ara, teleb uk unamake.

²⁷Ati ara, malye unyak ning, aning-aning nirya batakmumce, teleb ning uk talibuka unamlulume. Winipmunyop ura, adeice arye anggunce deipmunyeba, dadeipdanin banamak ninye arye, aunyap mutuku nirya talibuka unamake. ²⁸Aning ara, talye ati kum nyapsine. Deiyok ara ani. Sik diksukumuk unyak ninye ara, Allah el si Yahweh arye, sik aninye ati, weik arye bico tenelirye fia melilule.

Tonda, yata ninye do nirya, nun Ni Koproba Allah ati, ‘Elda weik mambulnye ulula anya arye, el amutam uk ubirye, elce nyalul yupu moubuka talibibirye, diksukumuk unamabe’ tenen, teleb uk unyak ninye nirya ara, Allah arye fia kum bataknamle.

Aninye ap, sikce deibikceba, dadeipdanin banamak ninye babye, Allah arye aninye nirya ati, fia kalikuka melinamle. Bukni, sik malye winin ning uk, talibuka malye uk wininyak ninye ap, sikce deibikceba, dadeipdanin banamak ninye nirya babye, Allah arye aninye ati,

wenebuka oplyop ura, sik nirya kum upra banamake. ²⁹Allah ati diba tenebuka, diksukumuk unyak ninye ara, fia ati amutuku talibuka unamake. Tonda, sikce deibikceba, dadeipdanin banamak ninye nirya babye, aunyap mutuku noutamak nirya, talibuka fia ati unamake.

³⁰Diksukumuk ululnye birye, yupu nyalula ara moubuka teneplirye, weik kel yupu uk nyalule. Aning atonun, anye birye nyalul yupu nirya ara, teleb yupu uk nyalule. Ara, ninye arye winilamak touk ubuka, diksukum kibuka yupu lipsisikuka bokolilule. Talye yupu ap, tenepce arye nyan yupu ap ara, fia kum nyalule. ³¹El anye bira, Allah arye, “Aning ara, wininamlulume, aning ara fia kum wininamlulume,” nyapdeiyamsuk yupu ara, fia moubuka kanye talima fum tam deibukce ulule. Allah el dipkoprop yupu uk tenebuka ulula ati ara, el ulul ning nirya, teleb uk ulule. Winipmanto ara, alap arye fitikuka saknabuk, kum olamla atonun, teleb uk ulule. Aning atonun, toupne dama arye, dongobikiba, kum kwirilsaklamle touk, ulule. Malye winin ning talibuka, kum ulula ati ara, elda mangkau kanye bobuka, malye kum winilule.

³²Malye winin ning uk talibuka unyak ninye arye, sik diksukumuk unyak ninye ati, ‘Se, anang ara, nun like ati, lo dan talak ton uptuba, aninye optibye do?’ tenen, tuba kalikinyake. ‘Anang optipy’a’ tenen, patalyeba, duknunyakce, sik diksukum unyak ninye ati, fia dina uk unyake. ³³‘Diksukum unyak ninye optipy’a’ tenen, fia kalikinyak bukni, Allah el si Yahweh arye, sik diksukum unyak ninye ati, ‘Ara, na tenen ninye unyake’ tenen, tuba-tuba melibuka kalikilula ati, sik malye ning uk talibuka wininyak ninye arye, yanuka kum optinge.

Tonda, malye wininyak ninye arye, sik diksukumuk unyak ninye ati, tomobuka ninye yupu lipsisikuka bokolina deiyok nang dam bobinamak bukni, ‘Anang tapu koubuka wenena aik dongobibyeba, aminyan talak sik deiyok nang arye oplopnamak’ tenen, unamake. Bukni, Allah arye sik diksukum unyak ninye ati, fia melibuka kalikilula ati ara, sik yupu lipsisikuka bokolina deiyok nang arye aninye kum oplopnamake.

³⁴Ati ara, ‘Allah Yahweh elcuk melinamnile,’ tenepmunce, el nyapdeiyamsuk yupu anyuk moubuka talimunce, fia pi dobuka dukdongobuka unamlulume. Winipmunyop ura, Allah arye anggun erebuka deipsiliba, anggunce amutuku nirya talibuka unamlume. Tonda, aminyan talak, Allah arye sik malye winin ning uk talibuka wininyak ninye ati, weneplirye opliba, fia kum kipdeipnamle talak ara, anggun asing arye eipnamlume.

³⁵Na arye ton elilamse ning nyapnusine. Malye winin ning uk talibuka ulamuknye bira, fia yu weik ulamukce, yuk ninye nirya ati, bico tenena kum dib aryuk, ikin ning weik, sik nong deice delilamukba, elilamse. Winipmanto ara, ninye arye yo yala fia teleb ak koubikiba, paplirye fia teleb kibuka tiklirye, weik arye palamle touk, amalye ulamuknye birye,

malye weik winilamuk bukni, elce, 'Aning winipnamne,' tenyamuk ning nirya ara, nong ubukba bona utotoa talinanye weik ulamuk.

³⁶Bukni, el amalye ning uk talibuka ulamuknye minopce dibukba, el aik dam ton binuka epdese bukni, amalinye ton fia kum ulamuka anya arye, kum eipse. 'Anye bira tuba kam ulul do, kum do?' tenen, el anye biti epdese bukni, ton kum epdanumu. Elda akunum dibukba, kum ubuka atia. Ati, 'Se, sik malye wininyak ninye ara, fia aunamake,' tenena meme.

³⁷Sik malye wininyak ninye uk, tenena meme. Teleb ning ara, sik diksukumuk unyak ninye ati moubuka dinamlulume. Sikda malye winin ning, tonok ning babye kum wininyaka anya arye, yuk ninye arye, 'E, sik malye wininyake,' kum nyapmanto unyake. Na dipkoprop nyapsine. Kanye talima lamapdongobuka arye ululnye bira, yuk ninye nirya ati, 'E, kanye deipdabirye, kanye talima dukdongobuka, teleb kibuka neika uptibye,' tenelula ati ara, Allah arye anye atonun ninye nirya ati, melilamliba, aminyan talak, sikda fia teleb uk unamake.

³⁸Bukni, sik malye winin ning uk talibuka unyak ninye nirya ara, Allah arye wenebuka oplirye, kum daneipnamle. Aminyan talak, sik teleb kibuka kum unamake. Tonda, sikce deibikceba, dadeipdanin banamak ninye ap, sik yala ninye nirya ap ara, kum upre banamake. Aminyan talak sik nirya kum upnamake.

³⁹'Nun ni Allah ara, fia mambulnye ulule' tenen, diksukumuk unyak ninye ati, Allah el si Yahweh aniryuk lyesulule. Tonda, weik imun ning sik dam yanamle talak ara, Allah arye sik ti, melibuka lyepnamle. Winipmanto ara, ninye arye, 'Nun mal olan nang arye opsicak' tenen, keil aik fum tam duknubuka balamak touk, sik diksukumuk unyak ninye arye, ikin ning sik dam yalyop ura, 'Allah aniryuk melibuka lyepnamsil' tenen, Allah el dam anyuk banyake. El amutam uk ubicop ura, Allah Yahweh arye anesala ati fia melilule.

⁴⁰Allah el si Yahweh aniryuk, sik diksukumuk unyak ninye nirya ati, fia melibuka lyelosulule. Tonda, malye ning uk talibuka unyak ninye arye, sik diksukumuk unyak nang ati, 'Ikin ning sik nong deice deibibirye, opnamabe,' tenesimyaka babye, Allah arye nun ti melibuka lyebuka dolyanamstile. Ara, talye ati kume. Deiyok ara, sik diksukumuk unyak ninye arye, 'Kume, nun Ni Koproba Allah Yahweh, elcuk lyepnamsil' tenen, el dam anyuk bikirye, el amutam uk unyake. Ati ara, Allah arye aninye ati, wibuka lyepnamle.

Raja Daud mot nyalamuka deice arye, ayupu nirya nyabuk.

[Minop talak sekik buku ara pasal 38-39 ton aubuk bukni, nunce aning kum sekupu. Ati otam pasal 40 arye dukdongobuka nyapra banamlulume.]

Mazmur 40

Allah ati, 'Telebe,' nyana ap morona ap ati nyabuk yupu

¹Daud birye mot nyana deiyoknye el si Kor biti, amot deice arye nyabuk.

²‘Na ni Allah el si Yahweh, ‘Na ikin unilye ning ati, melipnamnil ca’ tenen, moropsirye, dina uk ulamsebuk, na moropse yupu kekepnuke. Allah atibuk, ‘Melipnilyame,’ nyabuka moropsiba, kekepnuke, akunum melipnuke. ³Na ara, malye ning arye bental wetepmanak fia bulamnukba, Allah arye dobuka lyepnuke, lake deipnuke. Tonda, ikin weik ulamnuka ati ara, winipmanto ara weik bental fum wekamsiba, Allah arye dobuka, mutuku yangan keil deice deipnuke. Melibuka lyepnuke, teleb ak deipnuka ati ara, winipmanto ara, winitalak ara, teleb kat tuku deice dobuka deipnukba teleb banune.

⁴Winipnukop ura, Allah arye na talima fum tam winiryuk mot aribuka peterepnukba, amot deice arye, nun Ni Koproba Allah atibuk, “Anda fia telebe,” nyabuka mot deice arye el si erenune. Winipniba, ninye yuk nang niry a eibikirye, ‘Se,’ tenebikirye, ilil upliba, Allah el si Yahweh atibuk, diba tenebikirye, el si uk erenamake.

⁵Yatanye do, kanye talima eren ap, tilila yupu nyana ap, kum ulirye, ‘Allah el si Yahweh, elcuk lyelonamnil’ tenen, Allah atibuk, diba tenebuka ululnye bira, Allah arye melilamliba, el winin ning niry a ara, teleb uk unamle. Fia kanye delinamle. Atonye bira, elce talima erena deice, kwalilamak ninye ati, ‘Melipnamniak’ tenen, kum morolule. Tonda, talye ning ap, isa si ap erenyak ninye, sik isa si erenyak touk, kum ulule. Tonda, aninye ap neika kum ulirye, ‘Sikda teleb unyake’ tenen, kum morolul bukni, Allah Yahweh atibuk, diba tenebuka ulule.

⁶Nun ni Allah Yahweh, ance ninye kum winipmanto ning ap, fia mambul fil ap, aning-aning niry a akunum domlum ning ara, nunce eibuka, kum nunkmanto unyabe. Tonda, ance nun ti, ‘Aninye ati winibuka melinamne,’ tenesimince, arenamsilam ning ara, nunce kum nukuka kel biktibye. Ance nun ti teleb kilinamsilam ning niry a ara, dipkoprop kum nuktinye. Ance nun ti melyamsulum ning ap, aminyan talak teleb kilinamsilam ning ap ara, fia weik ulula ati ara, nukdetinya babye, aning niry a ara, kum nukmanto unune.

⁷Allah ance teneminye ning ara, ninye arye, ‘Se, nun malye winin ning kum kibuka deipsuturye, lyepsutu’ tenen, ining ning obuka weika arye dobuka, uku dongolyanganamniake. Aning uk na kanye delinune’ tenen, kum ulyame. Tonda, an si erena ati, ‘Teleb arin ning weika arye boyanganamniake’ tenen, kum patakulule. Ance na ti akunum laka nyalamnulumce, melipnuluma deice arye, moubuka kekepsirye, akunum kel bikse. Ara, ‘Sik malye winin ning kilina ati, kam ning obikirye, uku dongobuka, arilyanganamniake,’ kum tenelyame. Bukni, weik mambul ning ara, ance nun ti, ‘Na yupu moubuka kekebikirye, na dobolyanamniake’ tenen, patakulule.

⁸Na arye aning akunum kel kipsa ati, winitalak ara, na yanmance, an dam aunmane. Ance nyapdeiamlumba, an yupu buku noutamak,

na ti akunum sekeipnik ning ara, nyapnukine. ⁹Ara, na ni Allah ance, 'Wininamlulume, aning ara kum wininamlulume,' nyapdeiamsulum yupu nirya ara, na kanye talima fum tam akunum deipse. Ati ara, ance, 'Wininamle,' tenelamnulum touk, aning uk pataniliba, 'Ayupu uk talibuka, diksukumuk unamne,' tenenune.

¹⁰Na ni Allah Yahweh, an kele. Ance, 'Diksukum un ning ara ani,' nyabuka laka nyapdeipnulum yupu nirya ara, tonok ning babye duknubuka, kum batakanune. Ninye nirya arye an si eren ati, bulubuka wekenyak aik fum tam arye, ance nyasiminye yupu nirya, lakoprop kibuka laka nyanune. Ninye nirya wekenyak sukum laka nyanune. Tonok ning babye kum batakanune.

¹¹Allah ance nun ti, diksukum ubuka teleb uk un ning ap, tonda ninye ati bico tenebuka, lyen yupu nyapdeiyamsulum ning ap ara, 'Na arye kum nyanamne' tenen, na kanye talima noutamak uk kum duknune. Yuk nang kekenmace arye, ayupu nirya lakoprop kibuka laka nyanune. Ance, 'Wininamne,' nyapsulum yupu nirya ara, dipkoprop ulyame. Tonok ning babye kum batakalyame. Afil nirya sirya dakalyame. Tonda, 'Ninye tukwak ninye weik lyepnamne' tenen, kintinipsulum ning babye, ayupu ton kum batakanune. Ance bico tenesimince, fia dipkoprop yupu nyasiminye ning nirya ara, lakak aryuk laka nyaniba, an si eren ati bulubuka yangan ninye, yuk ninye weika arye kekenyake.

¹²Aning ati ara, na ni Allah Yahweh, na malye winin ning ati, adib aryuk talye wenebuka oplopnutum bukni, 'Bico tenenimince, lyenamnilam' tenen, moropkine. Tonda, an dipkoprop nyasiminye yupu ap, ance bico tenesimimye ning ap deice arye, na ti kalikiniminyeba, 'Na dam ikin ning kum yanganamnila' tenen, moropkine. Anda weik mikipnye birye, melinamnilame. Na ti batakna meme.

¹³Naio, 'Ance melibuka kalikinamnilame,' nyabuka moropmakin ning ara, talye ati kum nyapkine naio. Weik ikin ning ap, malye winin ning ap, kanye imun ning aning-aning nirya ap, fia weik ulye noutamak unune. Tonda, na arye malye wininye ning tuba tenenya deice arye, imun kanye bopne. Na malye wininye ning arye lelipniliba, 'Teleb bisik ani' tenen, moubuka beta kel kum bikmanto unune. Winipmanto ara, na kisok potong kum nukmanto unilye touk, na malye winin ning, fia weik unulul ati ara, na kanye talima fia ikin unulule. Na kanye talima noutamak mikip kum unulule ati ara, kum winipmanto unune.

¹⁴Aning ati ara, na ni Allah Yahweh, kanye deipnutumce, 'Na ikin unilye ning noutamak arye, lyepnimince, teleb sukumuk deipnamnilayame' tenen, moropkine. Na ni Allah Yahweh, 'Ance minopce na dam yanuka melinamnilam' tenen, moropkine. ¹⁵Winipniminyeba, 'Anye opnuyap,' tenenyak nang, na mal olan nang kel kibikirye, ilil ubuka bai sakikirye, yuk-yuk bindopnamake. Ance melipniminya deice arye, 'Na mal olan nang nirya, alye dakdanamak' tenen, moropkine. Yata nang

do nirya, na ti, ‘Anye el ap, el ulul ning nirya ap malye kipnamle. Elce talilul ning nirya, malye uptuba, kum danamle,’ tenenyak ninye nirya, malye min kipdeiptiniba, ‘Alye dakdanuka bataknikirye, tamubuka bindopnamak’ tenen, moropkine, na ni Allah.

¹⁶Na ikin ning dopropne talak ninye yuk nang arye, ‘Beta merekuka ikin ning dopropmale,’ nyabuka nalininyak nang ara, ‘Alye weik dakdanamak’ tenen, moropkine nai Allah. ¹⁷Bukni, yata ninye do nirya, Allah an tibuk, tuba diba tenebuka unyak ninye nirya ara, ‘Ance teleb kibuka deipminba, sik nirya fin-fin kanye bobuka unamak’ tenen, moropkine.

Tonda, ‘Allah el dem arye lyebuka dolyanamsile’ tenebuka unyak ninye nirya ara, ‘Pin-pin kanye bobuka unamak’ tenen, moropkine. Tonda, aninye arye, ‘Ninye tukwak ninye mutuku-mutuku nirya unyak ninye nirya ati, nun ni Allah el si Yahweh fia erenamake’ tenen, laka nyanamake. Sikce, “Allah Yahweh, aning-aning nirya deice tam talibuka, fia mambul weiknye ulule,” nyabuka, el si uk fia erenamake.

¹⁸Na ara, aning-aning nirya talibuka unanye, fia kum unune. Talye bona utotoa talina kumnye ununa ati ara, aning-aning nirya ati weik arye se tenenune. Ati ara, ‘Na ni Allah, el si Yahweh arye, na ti tenepnuturye, melipnutu’ tenen, moropkine. Na ni Allah na ikin unulule noutamak arye melibuka lyenilyama anye arye, ancuk minopce yanuka melipnilyame. ‘Yuk talak yanuka melipnamkinarya, kum tenenamnyam’ tenen, moropkine. Atalak aryuk yanuka melipnilyame, naio. Daud birye nyabuk.

[Minop talak sekik buku ara pasal 41 ton aubuk bukni, nunce aning kum sekupu. Ati otam pasal 42 arye dukdongobuka nyapra banamlulume.]

Mazmur 42

‘Allah ati dib tenenamap’ tenen, nyabuk yupu

¹Daud mot deice arye, sik Korah yala nang ati nyabuk. ²Winipmanto ara, rusa basam mek patapliba, kang-kang abuka mek din dam balamle touk, na Ni Koproba Allah an ti, ‘Se,’ tenenune. ³‘Na ni Allah, anda kam deiyoknye uminya ati ara, an ti weik arye ‘Se,’ tenenune. Yata sum na an un dam yatirnye eipkitinye do? tenenune.

⁴Tonda, na ikin unilye talak ara, ninye yuk dib tenena kum nang arye nyaninyake. An Ni Koproba Allah ara dan ukulul do?’ nyabuka asipnikiba, keteng noutam ap, lukunyan ap nirya, ‘Se’ tenen, mambul kirikna deice uk unune. ⁵Na ikin unilye talak ara, engena deice arye tuba tenenune. Se, nai Allah, na ap, ninye weik ap, an si eren aik dam bana ati, na arye deiyok koubuka, ninye dobuka balamse. An si erena aik dam

balamupu talak ara, na ap aninye nirya ap, fin-fin kanye bobuka, mot deice arye an ti, ‘Telebe,’ nyabuka, balamupu. Winitalak ara, ikin weik unulul bukni, minop talak ulamse ning ara, tuba tenenune.

⁶Na arye, na bidamang ati, tenelanune. Yata deiyok ati, na teniltona uk unun do? Tonda, yata deiyok ati, kanye talima engena uk unun do? Ati ara, na ara Allah ninye lyelina deiyoknye ati, diba tenepnirye moronamne. Moropneba lyepnilyop ura, na arye na Ni Koproba Allah, el si uk fia erenam narya. Ati ara, Allah atibuk dib tenena uk unamne.

⁷Na kanye talima uk dipnilyak tenen ati, ance minop talak melilamnulum ning ara, ila tuba fia tonap tenenamne. Yordan mek pu ak bukuk mutuku, Hermon mutuku arye dipdongobuka, Misar mutuku dam amutuku deice nirya ara, fia teleb kibuka melyamnulum ning ara, tuba tenenamne. Na ni Allah ance na ti, lyepromnulum ning ati, tuba tenepnirye, tuba tamubuka tonap kanye deipnamne.

⁸Winipmanto ara, mek lum sakuka, ninye deice siknilongolamle touk, tonda weik laut mekwen deipwelebuka lontik-lontik aplirye, ninye siknilongolamle touk, na kanye imun unilye ning ara, atouk unulule.

⁹Ikin weik unulul bukni, keteng duk-duk noutamak nirya ara, na ni Allah ance, bico tenebuka melinilyame. Wininiminye ning ati ara, lukunyan noutamak ara, Allah an si erena ati mot nyakunune. Na ni Allah, anda na Kam Una Deiyoknye uminya ati, kanye lon mot nyapnirye, Allah an tibuk morokunune.

¹⁰Ikin weik unulula ati, na arye na ni Allah ati, nyanune. Anda weik keil bulamle atonunye melinilyame. Engena deice arye, ‘Se, na ni Allah, yata deiyok ati, lubakipmanilam do?’ nyabuka morokunune. Yata deiyok ati, ance bataknulumba, na mal olan nang arye ikin ning na deice delininyak do? ‘Sikce opmanto uninyaka ati ara, fia imun kanye bobuka, tuba engena deice uk unamne do?’ tenen, morokunune. ¹¹Ara, talya ati kum nyapne. Na mal olan nang arye, ‘An ni Allah ara dan ulul do?’ nyabuka, nalininyaka ati ara, na yok ara pun deipliba, ikin weik ulamle touk unulule.

¹²Aning ati kanye talima uk diniliba, ‘Yata deiyok ati winininyak do?’ tenen, teniltonune. Bukni, na arye na bidamang ati, utenelanune. Yata deiyok ati, na teniltona uk unamne do? Tonda, yata deiyok ati, kanye talima fum tam engena uk unamne do? Ati ara, na ara Allah ninye lyelina deiyoknye ati, dib tenepnirye moronamne. Moropneba lyepnilyop ura, na arye na Ni Koproba Allah, el si uk fia erenamne. Ati ara, Allah an tibuk, diba tenena uk unamne. Daud birye nyabuk.

Mazmur 43

¹Na ni Allah, an ti diba kum tenekinyak ninye arye, na ti tilila minina yupu nyaninyaka ati ara, ance yanuka melipnilyame. Allah anda, na

tam kipmince, na ti, ‘Optibye,’ teneninyak ninye ap, tonda minin yupu nyaninyak ninye ap, malye winin ning weik wininyak ninye ap nirya ara, ‘Allah ance kum daneipnamlyame’ tenen, moropkine. ²Na ni Allah anda, ninye melina deiyoknye ulyame. Winipmanto ara, ‘Yuk nang opsicak’ tenen, kwarabuka bikirye, weik keil foka doamikca dam duknulbalamak touk, ‘Lelipdongopnamnil’ tenen, na ara minopce kwarabuka, an dam duknulyanganune. Bukni, yata deiyok ati bataknulum do? Winipnulumba, na mal olan nang arye, sik yu kanye na deice delinikiba, kanye imun deice uk unun do?

³Ikin asa ununa ati ara, na ni Allah an mikip ulin ning ap, ance diksukum yupu nyanilyam ning ap, aripnininba, adeice arye, ‘Teleb un bisik ani’ tenen, kel kiptinye. An dirina ap, an dipkoprop yupu ap dopdeipnininba, na ti melipnininba, diksukumuk ulamnya ani, ance wipdeiyamlum mutuku, weik teleb mutuku Allah an un dam yanamne. ⁴Na ara, an un dam yanyop ura, Allah an si erena ati, arilyangakinyabak, yaniryte si erenamkine. Na ni Allah, an ti kanye deibuka fin-fin kanye bokunune. Wininunce, bilkong el si, kecapi deice, kanye lon mot nyapniryte, na ni Allah, an si uk erenamkine. Na ni Allah, anda na Ni Koproba ulyame.

⁵Winitalak ara, na kanye talima uk diniliba, ‘Yata ning ati unutul do?’ tenen, teniltonune. Bukni, na arye na bidamang ati, utenelanune. Yata deiyok ati, na teniltona uk unamne do? Tonda, yata deiyok ati, kanye talima teniltona uk unamne do? Ati na ara, Allah ninye lyena deiyoknye ati, diba tenepniryte moronamne. Moropneba lyepnilyop ura, na arye na Ni Koproba Allah, an si uk, fia erenamne. Ati ara, Allah an tibuk, diba tenena uk unamne. Daud birye nyabuk.

[Minop talak sekik buku ara pasal 43-45 ton aubuk bukni, nunce aning kum sekupu. Ati otam pasal 46 arye dukdongobuka nyapra banamlulume.]

Mazmur 46

“Allah arye ninye ati, bicoe tenesilirye, melisulule,” nyabuk yupu

¹Mot nyana ati deiyoknye bira, Daud deiyok kipnaba, sik Korah mutuku deipkirikdop nang nirya ara, Allah ati mot nyabuka, si erelamik.

²Nun ikin usilye talak nirya ara, nun ni Allah ance melisimince, mikip arisilyame. Allah ance lelilongosilyame. Allah anda ninye kanye imun upsilye ning babye melisilyamnye. ³Ati ara, mutuku lulukna lulukliryte, fia weik mutuku dup bukuka, nirya tobukapliryte, weik laut mekwen deice teiklye talak babye, nunda imun kanye bobuka, ilil kum upnamsile.

⁴Tonda, weik laut mekwen lelim weik tapliryte, mutuku dibuka sikniplya babye, ilil kum upnamsile. Tonda, weik mutuku lulukna

doplirye, mutuku dup nirya long-long aplya babye, ilil kum upnamsile. Akunuma nyana ati, Sela^g nyapne.

⁵Bukni, Allah arye kintinipdeibuk mutuku, el unak ara, fia teleb mek amutuku noutamak pu dobuka biyuke. Winibukce, mek taruk bokukce, dana-dana biyuk mek nirya ara, amutuku unamak ninye eibikirye, kanye delinamake. Amutuku ara, malye ning ton kum ulirye, fia teleb mutuku ati ara, aning-aning deice tam erepra ulula deiyoknye, Allah ara, amutuku ulule. ⁶Allah weik mikipnye bira, amutuku noutamak fia aunamla ati, amutuku ara, fia kume kum danamle. Afia upnamle. Ara, berentam talak babye, Allah arye amutuku tuba melinamle.

⁷Tukwak mutuku-mutuku nirya unyak ninye arye, mal olanmakirye, weik lelim nyapliba, ngaluklamak touk winibuka ngalukunyake. Ton tam ninye arye, yuk tam ninye ati, obuka sirya dakikiba, kum danalule. Allah arye tenepsilye sum, akunum kplyop ura, el yupu weik arye nyapliba, tukwak mutuku nirya, atu atonun ubuka kum danamle. ⁸Bukni, nun ni Allah Yahweh ara, aning-aning nirya talilirye, im deice yin talin malaikat nirya, sik weik deiyoknye ulule.^h Allah ara, Weik Erebuka Eitamnye ulirye, nun ap neika unyabe. Ara, Yakub birye deibukba, dadeipdanin, yangalamik ninye, fia kalikuka melyamuk touk, tuba melisulule. Ikin ning, nun dam yangasulul talak ara, Allah ance tuba lelilongosilyame. Akunuma nyana ati, Sela nyapne.

⁹Ati ara, tukwak ninye nirya arye Allah el si Yahweh mikip arye fil domuk ning ara, dilyalulume. Allah arye tenelye talak akunum kplyop ura, tukwak mutuku nirya kum daneipnamle. ¹⁰Ninye yu deice arye mal olalamaka ara, Allah arye, 'Akunuma,' teneplye talak ara, yupu sekelule. Tonda ninye sik olan yin ap, mal ap nirya lakuka, batakalule. Tonda ninye ona ati, ketelinyak yo tace nirya kau kibuka celtakalule. Tonda, 'Mal dobikiba, na nong deice yanuka biknilyak' tenen, lelilongon ting aning babye, dobuka uku dongolule. Allah ara fia weik mikipnye ulula atia.

¹¹Allah Yahweh arye, ninye tukwak ninye nirya ati nyasulule. Anggunce, ngalukuka malye yupu nyamunye ning nirya ara, tunim aplulume. Na ara Allah Yahweh ununa ati, na si uk kel kipnululume. Yata ninye do, mutuku-mutuku nirya daunyak ninye nirya arye, na si uk kel biknumunce, na si uk erenamnulume. Tonda, mutuku-mutuku nirya ululum ninye arye, na si uk erebuka, si erenamnululume.

^g 46:4 *Sela* nyalamik ning ara, Ibrani yupu deice arye, 'Selah' sekamik. Ayupu deiyok ara, 'Anyapmap yupu ara, mambul weik anye arye, moubuka tenenamulume' tenen, 'Selah' seklamik. ^h 46:8 *Sik weik deiyoknye* Ayupu noutamak Allah Yahweh el si ati, Ibrani yupu deice arye, 'Yahweh Sebaot' nyabuka sekik. Bukni, 'Lik ninye asi deiyok biknamak' tenen, asi deiyoknye laka sekupu.

¹²Nun ni Allah Yahweh ara, aning-aning nirya talilirye, im deice yin talin malaikat nirya, sik weik deiyoknye ulule. Allah ara, Weik Erebuka Eitamnye ulirye, nun ap neika unyabe. Ara, Yakub birye deibukba, dadeipdanin, yangalamik ninye, fia kalikuka melyamuk touk, tuba melisulule. Ikin ning nun dam yangasulul talak ara, Allah ance tuba lelilongsilyame.

Akunuma nyana ati, Sela nyapne. Daud birye nyabuk.

Mazmur 47

**“Allah ara ninye ap, aning-aning nirya ap,
deiyoknye ulule,” nyabuk yupu**

¹Korah yala ninye arye, mot deice arye nyabik. ²Tukwak mutuku-mutuku nirya ululum ninye nirya ara, kanye deibuka taruk bokmunce, Allah atibuk si erenamulum. ³Allah el si Yahweh ara, aning-aning nirya talibuka, deice tam ulirye, weik erenanye ulule. Allah arye, mutuku-mutuku nirya unyak ninye talibuka ninye deiyoknye, Raja ulule. Allah ara fia weik mambulnye ulule.

⁴Allah arye nun Israel ninye ati, wipdeipsukce, weika arye melyamsuka deice arye, yuk yala ninye nirya ara, malye kibububa, nun amutam uk unyake. Ara, nun ni Allah melyamsuka deice arye, yuk yala ninye nirya nun amutam deipsuke. ⁵Allah arye, ‘Israel ninye na tenen ninye unamak’ tenen, el mapu kipsukce, nun unamap mutuku babye, kintinipdeipsuke. Nun apu koproba Yakub birye deibukba, dadeipdanin yangalamik ninye nirya ara, Allah arye kintinipdeipsuk mutuku, tuba talibuka unyabe. Amutuku noutamak ara, kanye deibuka unyabe. Akunuma tenena ati Sela nyapne.

⁶Nun ni Allah arye fia weik mambul mutuku welebuk talak ara, nun ninye nirya arye weik kanye deibuka, weik yupu deice arye el si erebuka dinmapu. Nun Ni Koproba Allah, el si Yahweh ara, weik mambul mutuku welebuk talak ara, cang bilkong el si, terompot dobuka pong-pong abuburye, el si erebuka dinmapu. ⁷Ati ara, nun Ni Koproba Allah atibuk kanye deibibirye, kanye lon mot nyanamabe. Ara, Allah ara nun ninye deiyoknye, Raja usilirye, talesulula ati, el tibuk, “Nai anda weik teleb ulyame,” nyabuka, el si erebibirye, kanye lon mot nyanamabe.

⁸Ara, talye ati kume. Allah ara, mutuku-mutuku nirya unyak ninye ayala-ayala nirya ara, sik fia ninye deiyoknye Raja ara, Allah el tonok ulule. Allah arye mutuku-mutuku nirya unyap ninye talesulula ati ara, el tibuk, “Nai anda weik teleb ulyame,” nyabuka, kanye deibibirye, kanye lon mot nyanamabe. Fia el tibuk kanye deibibirye el si erenamabe. ⁹Allah ara im deice ulirye, ninye deiyoknye mambul bun ning deice buklirye,

ninye ayala-ayala nirya ati talilule. Fia teleb ak buklirye, mutuku-mutuku nirya unyak ninye nirya ara, talibuka usulule.

¹⁰Ninye tukwak mutuku talibuka unyak deiyok nang nirya ara, tonok kanye bobuka dukdongobikirye, bulubuka yanganyake. Nunda Allah arye wipdeipsukce, el mapu kipdeipsuk ninye ap, yuk ninye ayala-ayala nirya ap, neika unamabe. Nun apu koproba Abraham ati, fia kalikuka melyamuknye Allah atibuk, yuk yala ninye nirya ap, nun ap, neika kanye deibibirye, el si uk erenamabe. Ara, urdem ati kume. Dan mutuku do nirya, mutuku-mutuku unyak fia weik deiyok nang nirya ara, nun Ni Koproba Allah el dem arye, adeiyok nang nirya talilule. Weik Rajanye bira, Allah el tonoka ati, yuk deiyok nang nirya ara, el amutam uk unyake. Nun apu yapu nang si erepra yangalamik Allah ara, ninye deiyok nang mutuku-mutuku nirya ap, nun ap arye, el si uk erenyabe. Allah ara, weik eren deiyoknye ulula ati, yuk ning nirya ara, el amutam uk ulule. Daud birye nyabuk.

[Minop talak sekik buku ara pasal 48-50 ton aubuk bukni, nunce aning kum sekupu. Ati otam pasal 51 arye dukdongobuka nyapra banamlulume.]

Mazmur 51

Daud birye, “Na malye winipse ning ara, na ni Allah ance namin kipnamnilame,” nyabuka morobuk yupu

¹Raja Daud birye, mot nyana deiyoknye Kor ati, mot nyabuk. ²Raja Daud birye, ninye el si ara Uria domuk kil, el si Batsyeba ubula dobukba, Allah el yupu laka nyalamuknye nabi Natan birye Daud biti, “Ance Uria domuk kil dopluma deice arye, fia weik malye winiplume,” nyabuka wenebukba, Daud birye, ‘Na malye winipse’ tenen, amot deice nyabuk.

³Daud birye nyabuk. Diba na ni Allah, na malye winipse ning ton ati, adib aryuk wenebuka oplopnutum bukni, anda fia batakna kum dib aryuk, bico tenesiminye uminya ati ara, ance na ti bico tenenimince, na malye winipse ning ara, ‘Lyebuka kilipnamnilyame’ tenen, moropkine. Ance nun tukwak ninye nirya ati, fia weik arye bico tenesiminye deice arye, ‘Na malye winipse ning ara, namin kipnimince, kum kibuka deipnamnilayame’ tenen, moropkine.

⁴Winipmanto ning ara, ninye arye nininga uamlye butum aling mek likikiba, fia teleb ulamle touk, na ni Allah, ance na malye winipse ning ton nirya ati, kilipnimince, kum kipdeipnamnilyame. Tonda, na kanye talima fum tam malye winipse ning ara, ance kilipra wipdonoknimince, teleb uk kipdeipnamnilame.

⁵Na nyapmakin yupu ara, talye ati kum nyapne. Na malye winipse ning ara, na arye akunum kel kipmana ati, laka arye lak nyapkine.

Tonda, na malye wininun ning ara, fia tuba tenena uk ununa anya arye, mambul kanye bonune. ⁶Na ni Allah, na malye winipse ning niryra ara, an dam malye winipsirye, an tibuk yanipkise. Ance, ‘Aning ara winina meme,’ nyapdeiyamsulum bukni, amalye teneminye ning uk, na arye talye luba kibuka winipse.

Ati ara, ance na ti, “Fia malye winiplume,” nyabuka wenepnimince opnutuma babye, anda fia diksukumuk ulyame. Na dipkoprop malye winipsa ati, na arye yata yupu tamubuka nyapkitinye do? Kume, ance, “Aning ara, malye ning, aning ara teleb ning,” nyabuka yupu lipsisikuka bokolina deiyoknye ulyame. Anda fia diksukumnye uminya ati, wenepnetuma babye, anda dipkoprop ulyame, nyapkine.

⁷Dipkoprop na nin mun fum tam bomnuk talak arye, na talima fum tam uamnuk malye ning ara, fia awamnuk. Aning tuba palyamnuk touk, na nin birye, na deipnuk talak arye dipdongobuka anoutamak niryra babye, malye ning tuba talibuka unune. Na ara, talima malinye ununa atia. ⁸Bukni, na ni Allah ance na ti teneniminya ara, “Tuba malye ukilya babye, nong bol deice uk, teleb un ning tenena kume. Bukni, ‘Ninye kanye talima fum tam arye, fia diksukum un ning uk tenebuka patapliba, fia teleb uk unamle,’ tenenilyame. Utenemince, ‘Weik kel bikna deiyok ning uk wininamle,’ teneniminye touk, aning uk na kanye talima fum tam aripnininba, moubuka kel biknirye, teleb uk unamne.

⁹Tonda na malye wininun ning niryra ara, Allah ance hisop yoⁱ taruk, mitik ning dobuka lyebuka kilipniminyeba, fia diksukumuk unamne. Winipnimiyop ura, na nong ara, fia malye unilye ning niryra ara, teleb kipdeipnamnilame. Winipmanto ara, fia kurun ning el si kapas kurulamle touk, na malye wininun ning niryra kum kibuka deipniminyeba, na fia teleb uk unamnile.

¹⁰Winibuka, ance teleb kibuka deipniminyop ura, ila tuba tonap kanye deibuka unamne. Tonda, na malye winipsa ati, ance kel biknulumce, ‘Elda malye winibuknye,’ tenebuka wenepnulumce, fia weik ikin ning aripnuluma deice arye, imun kanye bobuka unun bukni, ‘Ance aikin ning dobuka lyepnulumce, kum kipdeipnulumba, ila tuba tonap teleb unamne’ tenen, moropkine. ¹¹Na ni Allah ance, ‘Na malye wininun ning niryra ati, fia tenena uk kum unamnilame’ tenen, moropkine. Tonda, na malye winipse ning ara, ance aning uk, fia kum tenenamnyame. ‘Na malye wininye ning niryra ara, ancuk kilipnimince, kilipnamnyame’ tenen, moropkine.

¹²Winipniminyop ura, na ni Allah ancuk na kanye talima fum tam malye wamnilye ning kum kipdeipnimince, talima winiryuk ning

ⁱ 51:9 *hisop yok* – Minop talak ara, Allah arye Israel kili sal ati nyabuk. Anggun malye winin ning kilina ati ara, tonok yo taruk, el si hisop, mitiktonun dobuka, kam un ning opmunce, ining likuka, ‘Nun malye ning kilipnamsil’ tenen, puruldonokonamlulume,’ nyabuka ati, Daud birye ayupu nyabuk.

punubuka aripnamnilyame. Tonda, ance mikip aripnininba, na kanye tenen ning ap, na nong noutamak ap nirya ara, mikip kipnininba, amikip deice arye, ila tuba tonap, diksukum winin ning kum bataknamne. Fia an uk talibuka uniryte, teleb kanye uk bobuka unamne. ¹³Se na ni Allah, na malye wininun ning wenena ati, na ni Allah an dam arye, dobukapnimize, kum donoknamnilyame. Tonda, an Dib Kanye na nong noutamak aripnulumba, unulul ning ara, 'Allah ance an Dib Kanye ila tuba tamubuka kum dopropnamnilam' tenen, moropkine.

¹⁴Minop talak Allah ance na ti lyepromnulumba, na kanye deibuka winilamse touk, 'Winitalak babye, ila tuba tonap, talima melipnimize, teleb kibuka deipnutumba, kanye deibuka unamne' tenen, moropkine. Ance na fin-fin ning aripnininba, dopropnyopda, na kanye talima lamapdongobuka arye uniryte, 'Na ni Allah atibuk, talibuka unamne' tenen, an ti kum bataknamkine. Wininunce, an nyalininim touk, dukdongobuka unamne.

¹⁵Wininamne talak ara, Allah ance, "Winibuka unamlame, ateleb bisik banamlame," nyabuka nyalininiminye yupu nirya ara, na arye ayupu dobuka, sik malye wininyak ninye ati peterepniba, kekebikirye, sik malye wininyak ning nirya, batakikcop ura, tuba tamubuka an tam uk kilonamkiake. ¹⁶Diba na ni Allah, na arye fia malye winipsa ati, na mal olan nang arye, na kwit Uria obikba dibuka ati, el ining ara, na deice unulule. Anye obika deiyoknye bira, na uk unune. Ati ance na lyelonamnilame. Lyepdopniminyop ura, ance diksukum kibuka unyak ning atibuk, na arye an si erena ati, "Na lyelonulul Allah ara, diksukumuk ulule," nyabuka, mot nyana deice arye, an si uk erenamkine.

¹⁷Diba na ni Allah, anda na Weik Deiyoknye unilyama ati ara, ance na sitang ap, na nyanye yupu ap nirya talinimize, teleb kipdeipnulumba, na yupu teleb unilya deice arye, yupu teleb kibuka nyaniryte, an si uk erepniryte, mot nyabuka si erenamkine.

¹⁸Ninye arye an si erena ati, asum-asum nirya, ining ning obuka an ti arikinyak ning ara, kum patakulule. 'Kam ning obuka, na dam boyanganamlulume,' nyapnutumba, aning obuka boyakitinye bukni, aning kum nyapnuluma ati, kam ning ap, yuk teleb ning ap, kum boyanganamkine. Aning atonun, nun malye ning kilina ati, kam ning obuka, uku dongolyanganyap ning ara, kum patakulule. Ati na babye, ining ning obuka, an si erena ati, uku kum dongolyanamkine. Aning ara, Allah an kum patakulula ati ara, aning dobuka, aripkitinya babye, ance, 'Aning ara telebe' tenen, kanye deibuka kum dolonalame.

¹⁹Na ni Allah, dipkoprop an patakilye ning ara, 'Ninye mutuku-mutuku nirya, sik malye winibikirye, se, nun malye wininyabe,' tenebikirye, 'Kanye talima amutam kipedakiryte, ikin kanye bonyak touk bobuka, na dam boyanganamniake' tenen, patakulule. Bukni, ninye talima eren

deice arye kwalinyakce, an dam yanganyak ning ara, an kum patakulule. Bukni, yata ninye do nirya arye, ‘Na kanye talima fum tam lyunulul ning nirya lyeprnamnil’ tenen, an dam yanuka laka nyabicop ura, ance, ‘Elda malye ululnye’ tenen, kum bataknamnilame. Kanye talima nimalye dakeiyam kibuka ululnye biti, kanye deipmince, anye biti lyeprmince, teleb kibuka delinamyame.

²⁰Diba na ni Allah, ance, ‘Sion mutuku ati weik kanye deipne’ tenen, fia teleb kibuka delinamsilyame. Winipminba, Yerusalem mutuku weik cang keil antapdongobuka domik foka ara, yuk mutuku ninye arye uluplopmik bukni, ‘Ance melimseminba, ila tuba tamubuka, lipsisikuka donamap’ tenen, moropkine.

²¹Yerusalem mutuku weik cang keil foka lipsisikuka dobipyop ura, Allah an si erena ati, ining ning obuka boyanganamkiabe. Ara, diksukum una ati, kam ning obuka, uku dongolyanganamap ning ara, ‘Fia telebe’ tenen, ance kanye deibuka dolonalame. Anyarilyanganamkiap ning nirya ara, obukabibirye, nong nirya sekibirye uku dana ap, ura nong kipman nirya ap bobuka, arilyanganamkiabe. Tonda, sapi basam yim ning obukabibirye, Allah an si erena ati, min arye keil yangabuka deiamikce, kintinipdeiamik sukum boyabirye, uku danamabe.

[Minop talak sekik buku ara pasal 52-60 ton aubuk bukni, nunce aning kum sekupu. Ati otam pasal 61 arye dukdongobuka nyapra banamlulume.]

Mazmur 61

Allah arye aning-aning nirya tabakuka aresulul ning ati, Daud birye telebe nyabuka, Allah el si erebuka mot nyanmok yupu

¹Mot nyana deiyoknye Daud, elce bilkong ning, el si kecapi dobuka, Allah ati si erenmokce, mot nyanmok. ²Na ni Allah na moronmakin ning nirya ara, ance moubuka kekepnilyame. Tonda ance eipnince, moubuka kel kipnilyame.

³‘Na ni Allah, na arye an ti, “Melipnilyame,” nyabuka moropkine ning ara, an dam arye kum morokunune. Fia yukak arye morokunune. Wininuna anya arye, ance na moropnukin ning, kum kekepniminyop ura, ‘Yata deiyok ati kum kekenulul do?’ tenen, teniltona uk uniryne, malye kanye bonune. Na kanye talima mitang unulule. Tonda, Allah ance na bobuka, yuk mutuku binuka deipnininba, fia darabuka unamne. Ara, abinuka unamne mutuku ara, ‘Weik arye erebuka, bukuk mutuku fia teleb sukumuk binuka, dobuka deipnamnilame’ tenen, moropkine.

⁴Aning ati ara, Allah an mikip arye, kalikuka meliniminba, an amutam unune. Adeice arye, ‘Na mal olan nang arye opnikcak’ tenen, winipmanto ning ara, ance fia kat keil aik dobuka, kintinipdeipnince,

lelipdongopnamnilyame. Winipnininba, kanye lamapdongobuka, dakeiyam asa an amutam unamne. ⁵An mikip arye kalikuka melipnininba, na kam unamne talak nirya ara, wininyeba na ni Allah an mikip arye, talipniminya deice arye, teleb uk fia darabuka uniryte, an pol amutam uk fia unamne' tenen, moropkine. 'Aning ara, dipkoprop nong upnamle' tenena ati, Selah nyapne.

⁶Aning ati ara, na ni Allah an ti, "Wininamkine," nyabuka, na arye nyalin yupu, an dam akunum nyamkise ning ara, kekepnulume. Aning kekepniminyop ura, fia teleb ning arenamnilame. Ara, yata ninye do nirya, sikce an Allah ati, 'Elda weik mambule' tenen, diba tenebikirye, Allah ati ilil ulul ninye ati, ance teleb ning arilalam atonun, na babye atonun kibuka, akunum arinilyame. ⁷Ati ara, na ara Israel yala ninye ati, weik ninye deiyok talibuka Raja ununye bira, na kam una ati, lo weika arye aripnininba, 'Na aryuk dordeipdanen, banamak ninye nirya talinamne' tenen, moropkine.

⁸Tonda, winipnirye amutuku nirya ara, 'Na aryuk fia ati talinamne' tenen, moropkine. Ara, Allah ance na ti, 'Elda Israel ninye talibuka unamle ninye deiyoknye,' tenelamnuluma ati, wibuka deipnininba, na arye, 'An dam ninye deiyoknye fia unamne' tenen, moropkine. Allah ance bico tenepnimince, erebuka deipnininba, na ara an amutam fia kanye lamapdongobuka unamne. Winipniminyeba, 'Na mal olan ninye arye, kum yanuka opnamniak' tenen, moropkine.

⁹Winipniminyop ura, na arye Allah an si erena ati, mot teleb-teleb nyaniryte, fia an uk si erenamkine. Adeice arye, asum-asum nirya, an si kinamkine. Wininunce an ti, "Wininamkine," nyabuka, nyalin yupu deice nyapdeiamkise ning nirya ara, na aryuk wininamne. Na arye, batakna kum dib aryuk, aning uk wininamne. Daud birye nyabuk.

[Minop talak sekamik buku ara, pasal 62 ton aubuk bukni, nunce aning kum sekupu ati, otam pasal 63 dukdongobuka nyapra banamlulume.]

Mazmur 63

"Allah el uk fia tuba tenebibirye, el si uk fia erenamabe," nyabuk yupu

Mot nyana deiyoknye Daud, Yehuda tam noutamak bukni, ninye ton kum ulamikak, fata mutuku-mutuku ulamukce, Allah ati, "Melipnilyame," nyabuka morobukce, amot nyalamuk.

¹Na ni Allah an tibuk, si erekunune. Yuk ning ati, 'Na ni,' nyabuka kum talinune. Anda na Ni Koproba Allah tonok unilyama ati ara, na arye an ti pataniliba, lukunyan talak nirya, 'Yata nyapnunid do?' tenen, kekebuka ekunune. Winipmanto ara, tin weik mutuku mek kum ululba, ninye arye mek fia patalamle touk, an ti fia 'Se,' tenenune. Tonda, miklamle tuku arye 'Mok opnutue,' tenelamle

touk, Allah an ti na arye fia patanmanilba, mikip kum unune. Na kanye talima ap, nong ap nirya arye, an ti pataniliba, an ti fia tenekunune.

²Na ni Allah, an si erena aik fum tam binuka ulamse talak ara, an weik mikip ap, weik erebuka fia teleb ulyam ning ap, peterelamnulumba, eibuka kel kiamse. ³Na ni Allah, ance na ti bico tenenimince, melinilyam ning ara, weik mambule. Bukni, na kam una ara, mitik mambul uka. Ati ara, na arye an ti, “Allah ara, fia teleb uk ulule, elda weik mambule,” nyabuka, an si uk fia erenamkine. ⁴Na kam unamne talak nirya ara, Allah an tibuk, ‘Telebe,’ nyanamkine. An ti moronamkine talak nirya ara, na taruk an dam erepdeipnirye, an si deice arye moronamkine.

⁵An tibuk weik kanye deipnirye, fin-fin upniliba, si erenamkine. Ara, ance na kanye talima fum tam tenen ning ara, fia teleb un ning uk aripniminba, teleb ning uk tenenuna ati nyapne. Winipmanto ara, ninye arye, fia teleb din ning kwalibuka dibikirye, din boupliba batakikca deice arye, fia kanye deibuka, teleb ualamak touk, ance meliniminya deice arye, fia kanye delikunune. ⁶Na mapmanye talak babye, an tibuk tuba tenenamkine. Tonda, lukunyan talak noutamak nirya babye, fia an tibuk tuba tenekunune.

⁷Ara, Allah anda, na patanulul ning nirya ati ara, ance tuba melinilyama ati, an amutam uk unamne. Winipmanto ara, maka arye el mi dobuka, el pol amutam deiplirye, kalulongolamle touk, Allah an erebuka, im deice tam umince, an pol arye pakudongolamnulumce, kalikiniminba, an amutam uniry, an ti kanye lon mot nyanirye, si erenamkine. ⁸Na kanye talima ap, nong ap arye, an Allah ati fia moubuka talinamkine. Winipkiniba, an sirik tam taruk arye, ‘Teleb uk unamle’ tenen, moubuka talinamnilyame.

⁹Bukni yuk nang arye na ti, ‘Anye bira nun like ati ara, el opnamabe’ tenen, dobolbaninyak nang, sik nirya ara, ance aninye ati, wenebuka oplopnamlyame. Opminyop ura, amalye ning uk talibuka unyak ninye ara, tukwak ninye dipmakibuk, binuka unamakak, anang babye nyapdeipnamlume. ¹⁰Ance sik wenena ati, lo arepminba, sik aninye ara, mal olanmacak arye, obikiba dipnamake. Adepnamak nang ara, buru tam talye kam unyak ning, bai kam atonun ning, yu ning yanuka, sik dipmace ninye nong dobuka, dipropnamake.

¹¹Sikda wininamak bukni, na ara ninye deiyoknye Raja arye, na Ni Koproba Allah an ti, kanye deibuka, an si fia erenamkine. Sik tilila yupu nyanyak ninye ara, Allah arye sik si bam bol tunipdongopliba, yupu kum nyapmanto unamake. Bukni, yata ninye do nirya, “Nun winibuka unamabe,” nyabuka, nyalin yupu nyanamak talak ara, ayupu nyanamake. “Allah el si deice arye, nyalin yupu nyanyaba ati ara, dipkoprop diba tenenamsilyame,” nyanamake. Allah atibuk diba tenebikirye, fin-fin upliba, teleb kanye deibuka, Allah el si fia erenamake.

[Minop talak sekam buku ara, pasal 64 ton aubuk bukni, nunce aning kum sekupu ati, otam pasal 65 nyapra banamlulume.]

Mazmur 65

Allah ati si dobirye, 'Telebe,' nyanamap yupu

¹Mot nyana ati deiyok kinanye, Daud elce mot nyabuk. ²Nun nirya arye "Nun ni Allah an tibuk, nun deiyoknye fia teleb ulyame," nyabuka, Sion mutuku noutamak arye, an si uk fia erenamkiyabe. Tonda, nunce an ti, "Nun Ni Koproba Allah, el si uk erebibirye, el yupu kekebuka unamabe. El amutam ubirye, el fil uk donamabe," nyabuka, nyalin yupu deice arye nyabupu touk, dipkoprop aning uk talibuka unamabe.

³Ara, talye ati kume. Allah ancuk, ninye tukwak ninye arye moronyap yupu nirya ara, kekebuka melisilyame. Ati ara, tukwak mutuku noutamak unyak ninye nirya arye, an ti, 'Allah elcuk lyesilirye, fia melinamsile' tenen, nun Ni Koproba Allah, an dam anyuk yanganamabe. ⁴Nun malye ulamupu ning nirya ara, fia weik ulamsuk buk, nun imun kanye bobuka ulamuburye, 'Se, yata wiriptibye do? Yatanye birye, melibuka lyepsutu do?' tenelamupu bukni, Allah ance nun malye ulamupu ning nirya, namin kibuka lyesilyame.

⁵Ati ara, Allah ance, 'Na si erena aik dam yanganamak' tenen, wipdeipsulum ninye nirya ara, fia weik arye kanye deibuka unamake. 'Na dam yakirye, na si uk erebuka unamak' tenen, akunum welisilyam ninye nirya, nun an dam yabirye, aning-aning nirya kintinipdeipsulum ning uk, talibuka ubirye, weik kanye deibuka unamabe. Ara, Allah an si erena aik, an uminyak fia teleb sukum, yanuka unamabe. Ati nun nirya arye, fin-fin kanye bobuka unamabe.

⁶Allah ance fia kum batakasilyame. Nunce, 'Nun Ni Koproba Allah melinamsil' tenen, moronyap yupu nirya ara, ance kekebuka melisilyame. Ance nun ti, 'Dauplye' tenen, fia kum batakasilyame. Anda, dipkoprop nun Lyena Deiyoknye ulyame. Tonda Allah ancuk ninye arye kum winipmanto fil domince, nun ti lyesilyame. Tonda, yata ninye do nirya, dan aanyak ninye babye, fia pera mutuku noutamak daanyak ninye nirya babye, 'Allah elcuk melibuka lyebuka dolyanamsile,' tenekinyake. Ara, mutuku sirya, im sirya daanyak ninye babye, weik laut mekwen deice, kapal laut deice bukuka balamak ninye nirya babye, aning uk tenekinyake.

⁷Allah, anda weik mikip deice arye, im sirya mutuku sirya nirya ap, mutuku kon ap, kwepdeiplumba bukuk. Ara, 'El weik mikip talibuka ulula deice arye, weik mutuku nirya kwepdeibukba, bukuk' tenen, ninye arye ani tenebuka eibikirye, kel biknamake. ⁸Ancuk weik laut mekwen longteng-longteng alamle ning ap, mek langdibuka weik arye welelamle ning ap ara, an mikip deice arye, amekwen mikip kum kililyame. Aning atonun, tonda yata mutuku unyak ninye do nirya, Allah ancuk, ninye

mutuku-mutuku nirya daunyakce, ‘Olana uk uptibye,’ tenenyak bukni, ance aninye nirya mikip kum kipdeipminyeba, tunimabuka unyake.

⁹Winibuka ance weik mambul fil dopminyeba, mutuku-mutuku daunyak ninye nirya arye, Allah an tibuk ilil ululba, an si uk erenyakce, winilikinyake. Ara, ance sik dam ninye kum winipmanto ning uminyeba, sik aninye nirya eibikirye, ‘Se,’ tenen, an tibuk si erebuka winilikinyake. Tonda mutuku-mutuku daunyak ninye nirya, ance weik mambul fil dopminyeba eibikirye, Allah an tibuk si erekinyake. Ara, keteng yangalye tam ap, keteng wekelbalye tam ap, mutuku-mutuku nirya danoutam unyak ninye nirya arye, an ti, ‘Se’ tenen, an kina ati, weik yupu nyabuka, an si erekinyake.

¹⁰Allah ancuk, tuku nirya ara, moubuka kalikimince, ‘Mikroplyak’ tenen, mok arepminba ceplirye, tuku namin upliba, ninye arye, wa wibuka koulamak ning, aning-aning nirya palule. Winibuka paplirye, din ning ayala-ayala nirya, nong fia weik ulule. Tonda, mek balya babye, Allah ance arepminba, mek weika arye balirye olule. Allah ance arisiminye mek nirya ara, fia dipkoprop kum cepropnamle. Ance mek teleb kibuka arisiminyeba, ninye arye wa wibuka koulamak ning, ayala-ayala nirya ara, teleb kibuka palule. Aning nirya babye, Allah ancuk, “Wininamle,” nyalisiminye touk ulule.

¹¹‘Ninye arye, wa wiamikce tuku mikroplyak’ tenen, Allah ance namin kililyame. Tonda, tuku bum miklamle ning nirya ara, namin kina ati, mok arepminba, mok cebuka mek dikilyame. Tonda ninye arye, tuku deice wa wibuka, din yala ning ayala-ayala nirya dokikiba, dokolul ning ati ara, yating arepminba, teleb kibuka palule. ‘Ninye arye koulamak ning nirya, teleb kibuka papnamle’ tenen, mok arepminba, teleb kibuka weik arye papliba, ninye weika arye linyake.

¹²Aning ara, Allah an kanye teleb deice arye, ‘Aketeng tamun, aketeng tamun nirya, ninye arye wa wibuka koubikirye, libuka dinamak’ tenen, kintinisilyame. Mutuku-mutuku nirya unyak ninye ati, Allah ancuk dilyamce, aning-aning nirya tabakuka arelyame. Ancuk meliseminba, kat tuku ululak babye, ninye arye wa wibuka koulamak ning, aning-aning nirya teleb kibuka palule.

¹³Tonda, Allah ancuk fia fata mutuku bukni, domba basam ap, tonda, kambing basam ap nirya ati, mutmuta kabu fia weika arye arepminba, kanye deibuka dinyake. Winisiminya deice arye, amutuku kon nirya ara, teleb uk ululba, ninye arye kanye deibuka, weik yupu arye, an ti, “Telebe,” nyabuka si erekinyake. ¹⁴Mutmuta batu palamle mutuku nirya ara, domba basam ap, kambing basam ap arye, fia weika arye unyake. Tonda, weik mutuku lu noutamak nirya ara, yakong atonun ning, el si ara kandum, fia weik ulule. Aulula ati, aning nirya arye, weik arye kanye dibuka, mot senyake. Raja Daud mot sena deice arye nyabuk.

[Minop talak sekamik buku ara, pasal 66 ton aubuk bukni, nunce aning kum sekupu ati, otam pasal 67 nyapra banamlulume.]

Mazmur 67

**Allah arye aning-aning nirya tabakuka arisilya
ati, el si erena mot sebik yupu**

¹Mot weina deiyoknye Daud birye, bilkong len ning, el si kecap talibuka, Allah ati si erelamukce, mot selamuk. ²Nun malye unyap ning nirya ati, Allah adib aryuk wenebuka opsutu bukni, ‘Allah aniryuk nun ti bico tenesilirye, aning-aning nirya tabakuka, arenamsil’ tenen, moronyabe. Ati ara, ‘Nun Ni Koproba Allah arye, nun ti teleb tenebuka, weika arye melinamsil’ tenen, moronyabe. Allah arye teleb tenepsilyop ura, nun teleb kanye bon ning nirya, Allah aryuk nun ti aresulule.

³Na ni Allah ance, “Aning wininamlulume, aning ara kum wininamlulume,” nyabuka nyapdeiyamsulum yupu ap, ance mambul fil dolulum ning nirya ap, ‘Mutuku-mutuku nirya daunyak ninye kel biknamake’ tenen, moronyabe. Tonda an mikip arye, damutuku-damutuku im sirya mutuku sirya nirya unyak ninye ati, tuba lyesilyame. ‘Winibuka uminyeba, ninye nirya arye eibuka kel bikikirye, an si fia erenamkiyake’ tenen, moronyabe.

⁴Winibuka an mikip arye lyeptsiminyeba, im sirya mutuku sirya nirya unyak ninye eibuka, kel bikikirye, Allah an ti, “Nun ni Allah fia teleb ulule,” nyabuka, ‘An si uk erenamkiyake’ tenen, moronyabe. Diba, im sirya mutuku sirya daunyak ninye nirya arye, an tibuk, “Nun ni Allah fia teleb uk ulule,” nyabuka, an si erenamkiyake.

⁵Mutuku im sirya mutuku sirya nirya, daunyak ninye nirya arye, an ti, “Telebe,” nyabuka, an si erenyakce, an tibuk weik kanye deibuka, mot nyanyakce, si erenamkiyake. Ara, urdem ati kume. Allah ance, im sirya mutuku sirya unyak ninye nirya ati, diksukum ubuka umince, ninye yupu lipsisikisilyame. Tonda, nun ni Allah anda tukwak im sirya, mutuku sirya nirya unyak ninye, sikce talibuka unyak ning nirya, moubuka elisimince, ‘Wininamake,’ tenesiminye touk, teleb kilisilyame. Aning nirya ara, nun Ni Koproba Allah ance, ‘Wininamake,’ tenesiminye touk, unyabe. Ati ara, im sirya mutuku sirya nirya, daunyak ninye arye, an tibuk fia kanye delinyakce, weik kanye deibuka, mot nyanyakce, si erenamkiyake.

⁶Mutuku im sirya, mutuku sirya nirya, unyak ninye nirya arye, eibuka kel bikikirye, an tibuk fia si erenamkiyake. Winibuka sikce, “Se, nun ni Allah fia teleb ulule,” nyabuka, ‘An tibuk si erenamkiyake’ tenen, moronyabe. Diba, im sirya, mutuku sirya nirya, unyak ninye arye, an tibuk, “Nun ni Allah elda fia teleb uk ululnye,” nyabuka, an si uk erenamkiyake.

⁷Mutuku im sirya, mutuku sirya nirya, unyak ninye nirya arye, an tibuk, “Telebe,” nyabuka, an si erenyakce, kanye deibuka mot nyanyakce, si erenamkiyake. Winibuka ubicop ura, nun Ni Koproba Allah kanye delisilirye, tuba melisilyeba, ninye koulamak ning ayala-ayala nirya,

fia teleb kibuka panamle. Ninye arye, wa wibuka koulamikce ning niryaya teleb kibuka panamla ara, urdem ati kume. Deiyok ara, nun Ni Koproba Allah arye, nun ti bico tenesimince, aning-aning niryaya tabakuka arisilyamba, aning niryaya weika arye linyabe.

⁸Nun ni Allah arye, nun ti, ‘Bico tenesilirye, teleb kibuka melisilya deice arye, aning-aning niryaya tabakuka arenamsil’ tenen, moronyabe. Winibuka aning-aning niryaya, weika arye arisilya ara, im sirya mutuku sirya, daunyak ninye ara, ance fil dominya ning ati, eibuka kel bikikirye, an tibuk si erenamake. Tonda, im sirya, mutuku sirya daunyak ninye niryaya arye, nun Ni Koproba Allah ati, ilil tenebuka, unamake. Raja Daud birye nyabuka, mot sena deice arye morobuk.

[Minop talak sekamik buku ara, pasal 68 ton aubuk bukni, nunce aning kum sekupu ati, otam pasal 69 nyapra banamlulume.]

Mazmur 69

‘Ikin ning doprobiby talak, Allah arye lyepdopnamsil’ tenen, Allah morobuk yupu

¹Mot weibuka nyana deiyoknye, Daud birye kita teleb arye mouplirye, lalamle bunga el si bakung, amot nyalamik ning deice arye, Kor biti nyabuk.

²Na ni Allah na arye an ti moropkine. Ara, na fia ikin weik unulule. Winipmanto ara, weik mekwen noutamak weksiba, na ngang dam welebuka deibukce, dipmanto upse. Ati, na ni Allah, ‘Ance lyeproprilyam’ tenen, moropkine. ³Tonda, na weik bental mutuku noutamak dongolbinila ati, na yanibuka tikmantoak ton, fia kum upmanile. Tonda, weik karwu mekwen deiamlye mutuku noutamak, weknye talak ara, mek onmalya mikip arye, welebuka mekwen kum-kuma noutamak, bobuka dongolbanulule.

⁴Wininilye talak ara, na arye, “Na ni Allah ance na yanuka melipnilyame,” nyabuka moronmakinibuk, na din korokna fia sekuka mitang unulule. Tonda, ‘Na ni Allah dan talak arye, na yanuka melipnamanil do?’ tenen, atalak ara, dipra unmanibuk, na asing uk fia weik dinulule.

⁵Na deiyok ton kum bukni, na ti, ‘Optibye’ tenen, yu teneninyak nang ara, yupa ara fia weik unyake. Winipmanto ara, na kisok deice potong papnuk ning atonun unyake. ‘Deiyok ara, aning,’ tenena kum aniryuk, sikda weik mikip nang unyaka ati ara, na ti, ‘Anye obuka kum daneiptibye,’ teneninyak ninye niryaya, fia kum nukmanto unyake.

Tonda, sik ning ton na arye ubula dolona kum bukni, “Tamubuka aripsilyame,” nyaninyake. Nyapnikiba, na ning uk, talye dobuka, sik

anang ati, talye arenune. ⁶Aning ara na ni Allah an kele. Na malye wininun ning nirya ara, an dam ton fia kum duknunune. Tonda, na malye wininun ning nirya ara, na ni Allah ance dina uk unilyame. Ati kum duknubkitinye.

⁷Na ni Allah, yuk ninye an ti diba tenenyak nang, ‘Na malye winipse ning ton ati, sik alye dakdacak’ tenen, moropkine. Ara, sikce Allah an tibuk, ‘Melinamsilarya,’ tenebuka, unyak ninye nirya ara, na malye wininun ning ati, ‘Alye dakdacak’ tenen, moropkine. Tonda, anda na ni Allah Yahweh ulyame. Anda aning-aning nirya deice tam talibuka umince, weik mikip erenanye ulyame. Tonda, im deice yin talin malaikat nirya, sik weik deiyoknye ulyame. Allah anda nun Israel ninye ati, fia kalikuka melilamsulumnye ati, morokunune.

⁸Na ni Allah, an si erenye ning ati, sik malye nang arye na ti, yep-yep abuka, malye nyaninyake. Tonda, an tibuk tenebuka unyeba, malye nang arye na ti, nalininyakba, alye fia weik dakalanune. ⁹Na ara ikin weik uniliba, na urasin ara tamupnuka ati ara, na du yapu ap, na kwit capu ap nirya, aunyak bukni, ‘Nun kwit Daud aunmale,’ kum teneninyake. Adeice, yuk mutuku arye tikilyangan nang atonun kibuka unune. Tonda sikce na ti, ‘Bai tamnye ulul do?’ teneninyake.

¹⁰Uteneninyak bukni, na arye Allah an si eren aik ati, ‘Weik mambule,’ tenenuna ati ara, fia mambul kanye bobuka unune. Yuk nang arye, Allah an ti, malye nyabuka nalikinyake. Winibuka, na Ni Koproba Allah, an ti nalikinyaka touk, sik aninye nirya arye, na babye nalibuka, wana ap nalibuka aku tuna ap uk nyaninyake.

¹¹Na ara Allah an tibuk din dina kum deice arye, engena uk uniry, an si erena uk unune. Bukni, wininye talak ara, sik malye wininyak ninye nirya arye, “Anye bira yata ning ati ulul do?” nyabuka, aku tupnikiry, talak doninyake. ¹²Tonda, aning atonun, malye winin ning nirya ati, na arye malye kanye bopna arye, an morona ati, malye butum aling, nong ongopniry, an si erenmaniba, sik amalye winin ning atibuk talibuka unyak nang arye, “Yata ning ati unmal do?” nyabuka talak doninyake.

¹³Sik weik kota kibuka asik domikce, bublan wekelbana ati, potokeiamik bisik bublan dam bunyak nang arye, na ti yapyap abuka nalininyake. Tonda, sik ninye kanye wangalamak mek din nang nirya arye, sik mot nyana deice arye, na ti malye nyabuka nalininyake.

¹⁴Bukni, na ni Allah Yahweh an ti moropkine. Ara, Allah ance tenebuka, ‘Arup ara melipnamne,’ tenepniminyop ura, ‘Melibuka lyepropnalama,’ tenena ati, nai an ti moropkine. Tonda, na ni Allah ance weik arye bico tenepnimince, melinamnilame. Ara, ance ‘Atalak melipnune,’ tenepnemenye talak ara, fia kum bataknamnilame. Dikprop asum-asum nirya lyelonamnilame.

¹⁵Ati ara, na weik bental mekwen noutamak dongolbinamnil talak ara, na yanibuka tikmantoak ton kum upnamle ati, ance lyepnamnilyame. Tonda, weik karwu mekwen deiyamlya noutamak weknye talak ara, ‘Mek oplya mikip arye weleplirye, na dobuka weik mekwen deibuka, num-num noutamak dongolbinilyak’ tenen, “Lyeproprnilyame,” nyabuka moropkine. Na ti yu weik upliba, mal pininyak nang arye, ‘Opnuyabe’, tenepnice talak ara, Allah ance na kum bataknamnilyame. ‘Adip aryuk lyelonamnilame’ tenen, na Ni Koproba Allah ati moropkine.

¹⁶Winipmanto ara, ‘Mok ceplirye, mek deibuka obukaplirye, siknibuka bobalamle touk, na babye atonun, winibuka opnilyak’ tenen, moropkine. Na batakniminyeba, weik mek oplya mikip weleplirye, na bobuka weik laut mekwen deibuka, kum-kuma noutamak dongopniliba, ‘Amekwen amu dadipnyak’ tenen, moropkine. Tonda, ‘Ninye yuk nang arye, weik karwu tuku fum tam palibuka, na dopkwetepnikirye, na deice tuku arye siknipnicak’ tenen, na Ni Koproba Allah an ti moropkine.

¹⁷Na ni Allah Yahweh, ance weik bico teneniminya deice arye, amoropne ning nirya, kekebuka melipnilyame. Anda fia teleb uk umince, ninye ati weik arye kanye talima fum tam kanye deibuka bico tenebuka, melilyamnye uminya ati, ‘Na babye lyepnamnilam’ tenen, moropkine.

¹⁸Aning ati ara, imun kanye ning na dam akunum yanmanila ati, Allah ance eibuka, luba kum kipnamnilame. Atalak aniryuk eibuka, na dam yamince eibuka, lyeproprnamnilame. Ara, Allah ancuk ninye ati ara, talima se tenebuka, weik bico ukukulnye ati, moropkine.

¹⁹Malye winin ning uk talibuka unyak nang, na mal olan nang arye, opnikcak ati ara, an adib aryuk yamince, na yanuka lyeppronilyame.

²⁰Allah ance na ti, kel kinilyame. Ara, na mal olan nang nirya arye na ti, ‘Anye obuka, kum kipdeipnamabe,’ tenenikirye, na ti yep-yep abuka, talak doninyak ninye nirya ara, ance akunum kel kilyame.

²¹“Elda malye ululnye,” nyaninyaka deice arye, na ara, ‘Yata ning ton winipsa ati, nyaninyak do?’ tenen, teniltonirye, na kanye talima fum tam ara, uk fia weik dinulule. Winipniliba, ‘Na ti bico tenen, na kanye talima melin nang arye melipnitinge’ tenen, enun bukni, fia ton kum eipse. Ati, na kanye talima melina nang ton kum ukirye, “Na ap neika ubuka, kum melininyaka atie,” nyabuka morobuk.

²²Tonda, na din ning patapniliba, din ning ap, mek ap arininyak ning nirya ara, na dipna ati, yu weik ning likdongobuka arininyake. Aning atonun, din mek pataniliba, ‘Mek diptinye,’ tenepnye talak ara, yuk nang arye luma mek kwebuka arininyake.

²³Na ti, ‘Anye bira, nun like,’ teneninyak nang, sik din ning delinyak ning ara, fia teleb-teleb ning uk kintinibuka delinyake. Wininyak bukni, na arye Allah ati moropnyop ura, sik ateled din kintinilinyak ning ara, sik bidamang atenenyaka deice arye, kanye imun un ning, sik dam

yangalule. Aninye ara, ‘Nun akunum teleb uk unyabe’ tenen, fia kanye delilanyak bukni, sik adin ning kintinilinyaka deice arye, sik bidamang nong uk, wena tapu wepmakcak, kapang mana mangkau kanye bobuka, balibuk youlamle touk, malye ulilanyake.

²⁴Na ni Allah, an ti moropkin ning ara, sik malye unyak nang ara, ‘Sik asing kun ning arepminba, teleb asa arye kum elinamak’ tenen, moropkine. Tonda, sik amalye unyak nang ara, Allah ance ikin ning, sik nong deice deipminba, ikin arye kum binmanto ubikirye, ‘Amnya kanupdongonuka banamake’ tenen, moropkine.

²⁵Na ni Allah an yu teneminye ning ara, aninye sik nong deice deipminba, weika arye weik uku dilamle touk, unamle. ²⁶Winipminba, aninye sik aik dobuka, unyak mutuku nirya ara, oldem uk uplirye, bipla papnamle. Amutuku noutamak ara, aik ap, ninye ap, ton fia kum unamake.

²⁷Na ni Allah, aning ara talye ati kum nyapkin. Deiyok ara, an mapu dib tenebice nang ati, “Malye upmale,” nyabuka, nun nong deice ikin ning deipsikirye, nalibuka akutusinyak nang ara, sik wenena ati ikin ning delilyame. Tonda, an mapu wenepminba, sik nong deice ikin ning ulul ning ati, amalye unyak nang arye, aku tubuka malye nyasinyaka ati, ‘Aninye ara, weik arye wenepnam’ tenen, moropkine.

²⁸Sik malye unyak ning nirya ara, mangkau kibuka batakminba, sikda fia ati malye-malye uk winipra bakiba, weik upra bana telebe. ‘Sik amalye unyak nang ara, malye un ning uk, tonap tabakminba, fia atibuk malye winiprabana uk unamake’ tenen, moropkine. Sik aninye ati, ila tuba tamubuka lyepmince, teleb kibuka kum delinamyame. Yuk nang ara, lyepnam bukni, sik anang uk ara, kum lyepnalame. Ati, na arye na ni Allah an ti moropkine.

²⁹Allah ance, aninye sik si ton, Kam Buku deice kum sekelinalame. ‘Amalye ninye sik si ara, kiliplopnamlame’ tenen, moropkine. Allah an ti diba tenebuka diksukumuk unyak ninye, sik si sekelilyam buku noutamak ara, amalye unyak ninye, sik si ton kum sekelinalame.

³⁰Sik amalye unyak nang arye, na nong deice weik ikin delinica deice arye uk, diniliba imun kanye unulule. Ati ara, ‘Na ni Allah ance lyepropnimince, erepdeipnamnilame’ tenen, moropkine. ³¹Winibuka ereipnemenyeba, na mot sena deice arye, an si uk erenamkine. Tonda, na mot senamne deice arye, an ti, ‘Elda fia weiknye ulule,’ tenebuka, an si uk erebuka, weik arye telebe nyanamkine.

³²Aning winibuka winikinyop ura, Allah ance, ‘Aning ara, fia dipkoprop teleb ning arepmanile,’ tenenamnilame. Bukni, weik yim sapi basam obikirye, an arina ati, boyatinya babye, ‘Aning ara, mitik teleb uka,’ tenepnutume. Tonda, weik yim sapi, el yan kala sirya ning ap, el kisok deice yang belelamle ning ap, akepman yanuka aripkitinya babye, ‘Aning ara, mitik mambul uka,’ tenepnutume. Bukni, na kanye

talima nirya arye, an tibuk moubuka kenekinirye, mot nyana deice, an si erekinyop ura, 'Ara fia telebe unmale,' tenepnutume.

³³ Aning atonun, na arye an si erenamkina deice arye, sik talye kankan daunyak ninye, aning eibikcop ura, kanye deibuka pin-pin asa arye unamake. Atonun, yata ninye do nirya, Allah an si erenyakce, 'Elcuk lyelonamsile' tenen, diba tenebuka, unyak ninye nirya ara, fia kam uk unamake.

³⁴ Ati ara, na ni Allah, anda sik bona utotoa talina kum nang, kanye lamapdongobuka arye, talima darapdongobuka amutam unyak nang, morokinyakce, nyakinyak yupu nirya ara, kum batakalyame. Adip aryuk kekebuka melisilyame. Tonda, an mapu koproba wenena aik fum tam ulamikce nang arye, morokikcop ura, ance kekebuka kum batakalyame. Aninye arye moropkice touk, kekebuka lyelolyame.

³⁵ Na ni Allah an tibuk, im deice ubuk ning ap, tukwak mutuku ubuk ning nirya ap, tonda weik laut mekwen amutam ulul ning ap, tuku deice noutamak ulul ning ap nirya arye, 'An tibuk, si erebuka kinamkiyak' tenen, 'Se,' tenenune. ³⁶ Aning ara talye ati kum nyapne. Nun Ni Koproba Allah ance, Yerusalem mutuku nirya ara, lyebuka teleb kipdeipnamsilame. Tonda, Yehuda yala nang, sik unamak mutuku babye, lipsisikuka teleb uk kwepdeipnalame. Winipminba, an mapu aning eibikirye, sik amutuku yakirye, sik mutuku koproba kibuka, yanuka talibuka unamake.

³⁷ An ti dib tenebuka, an amutam unyak ninye, sikce deibikiba, dadeipdanin banamak ninye nirya babye, amutuku uk talibuka unamake. Tonda, Allah an ti diba tenenyak ninye nirya arye, 'Allah el si ara weik mambule' tenen, kanye deibuka, an si uk erekinyak ninye nirya ara, amutuku uk talibuka unamake. Daud birye nyabuk.

[Minop talak sekik buku ara, pasal 70 sampai 71 ton aubuk bukni, nunce aning kum sekupu. Ati otam pasal 72 dukdongobuka nyapra banamlulume.]

Mazmur 72

Ninye deiyoknye Raja Salomo birye, Israel ninye, sik weik ninye deiyok kibuka talipnamuka ati, Allah morobuk yupu

¹ Ninye deiyoknye Raja Salomo birye Allah ati nyabuk. Na ni Allah ance, "Aning wininamlulume, aning ara kum wininamlulume," nyapdeiamsuk atonun kibuka, ance deipnamsilam ninye deiyoknye Raja ara, 'Elce ninye yuk ninye nirya ati yupu teleb kibuka bokeipnamle' tenen, moropkine. Ance el ti, aning uk peterepmince, an fia weik kel kina deiyok ning areptumba, 'Nun talipnamsil Rajanye, teleb kibuka uturye, ninye deiyoknye Raja kibuka talibuka unamle' tenen, moropkine. Ance

el wibuka deipluma ati ara, ‘Ance Raja biti, diksukum kibuka fil dona deiyok ning peterepnamlam’ tenen, moropkine.

²Winipminba, ance, ‘Na mapu koproba unamak’ tenen, wipdeiamsulum Israel ninye ati, Raja birye, “Aning wininamlulume, aning ara kum wininamlulume,” nyabuka, an mapu ati diksukum kibuka talinamle. Ayupu deice uk, elce tenebuka sik aninye wenepmalyani, lipsisikuka teleb ulinamle. Tonda, ikin weik ning dopdobikirye, imun kanye bobuka unyak ninye, elce melibuka fil dopra banmalyop ura, sik nirya teleb kanye bobuka unamake.

³Fia diksukumuk upra banmalyani, adeice arye nun unamap mutuku ap, nun talibuka unamap ning ap, wa wibuka kounamap ning nirya ap ara, paplirye moulamlyani, nong fia teleb uk upra balyop ura, amutuku noutamak unamak ninye nirya babye, teleb uk unamake. Tonda, elce ninye deiyok talibuka unamle ning nirya, teleb uk uprabanmalyop ura, ‘Elce talinamle ninye nirya babye, fia teleb uk unamak’ tenen, moropkine.

⁴Tonda, sik amutuku unyakce, ikin weik ning ululba, fia ikin kanye bobuka unyak ninye nirya ati, ance melipminba, elce ninye deiyok talibuka, Raja unamla ati ara, sik aninye ati melibuka teleb ulinamle. Malye unyak nang arye, an mapu ati, ‘Opnuyabe,’ tenebuka yanganamak talak ara, elce sik mal olan nang ati olbisinamle. Tonda, bona utotoa talina kum ninye arye, delinyak mapu nirya ara, elce melinamle. Winiplirye talye bona utotoa talina kum ninye ati, sik nong deice ikin ning delinyak ninye nirya ati, elce obuka sirya daklirye, nirye daknamle. ‘Wininamle’ tenen, moropkine.

⁵Na ni Allah, ance nun ninye deiyoknye Raja ati melipminye deice arye, amutuku ninye fia talinamle. Ara, elcuk amutuku ara talyamlyani, dotalak yata keteng eibina oubina kinamle talak nirya ara, aRaja aryuk ninye deiyoknye kibuka talinamle. Winilirye adeipdanin banamak ninye nirya babye, elcuk talinamle.

⁶Elcuk aninye talinamle talak ara, winipmanto, wa wibuka kouamicak mok ceplirye, adeice sakliba, koun ning teleb kibuka palamle ning atonun, Allah ance el ti melipminya deice arye, elce talinamle ninye nirya ara, teleb uk unamake. Tonda, mok weika arye ceplirye, koun ning bok deice saklibuk, koun ning paplirye, urasin teleb kilamle touk, ance melipminya deice arye, ‘Nun Raja arye talinamne ninye nirya ara, teleb uk unamak’ tenen, moropkine.

⁷Na ni Allah, ance el ti melipminya deice arye, elce talinamle ninye arye, diksukum teleb un ning uk, fia ati upra banamake. Tonda, nun mutuku noutamak fil donamap ning nirya ara, ‘Awala-awala nirya mapbabiba, fia teleb uk upra balamlyani, sirya dakna talak babye, tuba teleb uk unamsil’ tenen, moropkine.

⁸Na ni Allah, ance nun ninye deiyoknye ati melipminya deice arye, elda ninye deiyoknye Raja kibuka talinamle talak arye, talinamle mutuku ara, keteng yangan tam arye dipdongobuka, keteng wekelban tam nirya ap, taliplibaba, lo weik unamle. Ara, atam weik laut mekwen dam arye dipdongobuka, otam laut mekwen dam tam nirya ara, elce talinamle. Winipliba anoutamak nirya ara, fia weik mutuku unamle. Aning atonun, keteng yangan tam biyuk weik mek, el si Efrat mek dam arye, dipdongobuka, keteng wekelban tam nirya ara, mutuku-mutuku nirya, 'Ance melipminba, elcuk amutuku nirya talinamle' tenen, moropkine.

⁹Tonda, mek mitiktonun ulul mutuku, fata mutuku noutamak, daunyak ninye ayala-ayala nirya ara, tonokak uk kum unyakce, amutuku unmana batakuka, omutuku unmana kinyakce, bana uk unyake. Awinyak ninye ara, nun ninye deiyoknye Raja dam yakiryne, el si erena ati, yanuka gutam tuku dipdongobuka kanupdongobuka, si erenamake. Aning atonun, el mal olan nang babye, el dam yakiryne, el si erena ati, yanuka gutam tuku dipdongobuka kanulongonamake. Aning atonun, aninye nirya arye yanuka, el si erebuka, el yan amutam uk unamake.

¹⁰Winibuka, elce amutuku nirya talinamle talak noutamak ara, keteng wekelban tam, mutuku si Tarsis mutuku noutamak ninye deiyok talibuka unyak ninye ap, laut mekwen noutamak bukni, mekwen deibuka sekdongobuk mutuku unyak ninye nirya, el dam yakiryne, elda ninye deiyoknye Raja unamla ati, sik talibuka unyak teleb ning nirya dobuka, el dam yanuka arilyanganamake. Tonda keteng yangan tam, Arab mutuku ap, Etiopia mutuku ap, weik ninye deiyok kibuka, Raja talilamik nang nirya arye, nun mutuku talipnamsil Raja atibuk si erekirye, teleb ning bobuka, el dam arilyanganamake.

¹¹Tonda mutuku yuk-yuk nirya bukni, mutuku-mutuku nirya talibuka weik ninye deiyok kibuka talyamika, Raja nang nirya arye, el atibuk kinamake. Winibuka unyakce, sik anang nirya ara, el amutam unamake. Sik nirya arye, el fil uk donamake.

¹²Atalak ara, ninye arye, 'Aninye ara mambul kume,' tenebuka batakikirye, fia imun kanye fil arukunyakbuk, ikin kanye bobikirye, mitang asa kibuka unyak ninye nirya ara, elce lyeproprnamle. Tonda, amutam unyakce, bona utotoa talina kum ninye arye, 'Nun weik mambul usulula ati, yatanye birye melibuka lyepsutu do?' tenen, elinamak bukni, sik melipmanto nang ton kum eibicop ura, nun Raja biti morolyanganamake. El ti, "Melipsilyame," nyabuka, moronamak ninye nirya ati, elce teleb kibuka meliplirye, lyelonamle.

¹³Deiyok ara, elda ninye deiyoknye Raja kibuka talinamlanye birye, sik ur talye kankan ninye ap, bona ning fia kum talinyak ninye ap ati, bico ululba, sik imun kanye bobuka unyak ninye ati, elce melibuka lyelonamle. Aning atonun, yu nang arye, 'Sik ur talye bona utotoa talina kum ninye ap, mikip kum ninye ap, daoplopnamabe,' tenenyakba, imun kanye bobuka daunyak ninye nirya babye, elce lyelonamle.

¹⁴Yuk nang arye, sik talye kankan ninye ati, ikin ning sik nong deice deibikirye, “Adip aryuk fil talye dopsululume,” nyabuka, yu yupu deice arye, arukunyakbuk, imun kanye bobuka, unyak ninye nirya ara, el ninye deiyok kibuka, unamlenye birye, amutuku nirya talinamle talak ara, sik aninye nirya ati lyeplirye, kanam asa kilinamle. Winipliba, sik unamaka ara, teleb uk unamake. Talye kankan ninye nirya ati, weik arye bico tenelula ati, nyapne.

¹⁵Elda, nun ninye deiyoknye kina ati, yanamlanye bira, fia kam uk unamle. Winipliba, arin ning ati, bobuka yanganamak nang arye nyanamake. “Nun deiyoknye, anda teleb uka. Fia kam unamlame. Ati ara, Arab mutuku si ara, Syeba mutuku arye fia dekna weik kat ning, el si emas boyanganamkiabe,” nyabuka arilyanganamake. Tonda, ninye nirya arye, ‘Allah arye anye biti, fia melilamliba, teleb uk unamle’ tenen, el ti tuba-tuba moronamake. Asum-asum nirya ara, el si erena ati, teleb yupu uk nyanamake.

¹⁶Tonda, aninye deiyoknye birye amutuku talinamle talak noutamak ara, Allah arye melilamliba, amutuku noutamak nirya ara, gandum wa fia weik panamle. Tonda, amutuku kon deice wa wibuka koulamak gandum nirya ara, nong fia weik akunum uplyop ura, kumanya yalirye, pupliba, gandum bok nirya kamupliba dakalsakanamle. Tonda, sik amutuku noutamak nirya ara, sukun tuku uk unamle.

Ara, Libanon mutuku, teleb sukun tuku ulamlaba, duk moulamle yo ayala-ayala nirya, duk weik moulamle touk, nun mutuku babye atonun unamle. Amutuku noutamak unamak ninye nirya babye, yupa fia weika arye deibuka, tabakda bagibuk, aninye yupa ara, talye bai mutuku palamle mutmuta atonun, kibuka unamake. Winibuka unamak talak, sikce wa wibuka kounamak ning nirya ara, teleb kibuka papliba, libuka dinamake. Aning nirya, ‘Winibuka unamle’ tenen, Allah ati moronamabe.

¹⁷Sik amutuku unamak ninye nirya arye, ayana talipnamsilanye, weik ninye deiyoknye Raja ati, si erebikiba, fia aunamle. Tonda, ayanamlanye, el si tuba auplyeba, el tibuk, “Nun deiyoknye ani,” nyabuka, el ti si fia erenamake. Keteng sinarya aupnamle talak nirya ara, el tibuk kinamake.

Aninye deiyoknye, fia teleb unamla deice arye, mutuku-mutuku nirya unyak ninye, ayala-ayala nirya ara, teleb uk ulilulba, weika arye tabakikirye, teleb unamake. Elce, tukwak mutuku noutamak unyak ninye nirya ati, teleb kililirye, melilamliba, tukwak mutuku ninye nirya arye, “Diba, elda fia telebnye ulule,” nyabuka, el ti si fia erenamake.

¹⁸Ati, na Raja Solomo arye na ni Allah Yahweh an ti, telebe nyabuka, an si erekunune. Atonun, sik Israel ninye nirya arye, an si uk erenamkiyake. Ara, “Israel ninye ati, fia melibuka kalikisulul Allah, el si Yahweh, elcuk, weik mambul fil, fia ninye winipmanto kum fil uk dolule. Yuknye ton, el mambul fil dolul touk kum doptue,” nyapne. ¹⁹Na ni Allah Yahweh, anda fia telebnye uminya ati ara, an si ara weik mambul si ukulule.

Ati, ninye im sirya mutuku sirya nirya arye, an si uk fia erenamkiyake. Winipkikiba, an si ara, fia aunamle. Tonda, ance im sirya mutuku sirya nirya, talipminba, tukwak mutuku unyak ninye nirya arye an si uk erekinyakba, 'Allah an weik mikip ap, ance fia mambul fil dolulum ning ap, an fia teleb uk ulyam ning ap aryuk, tukwak mutuku nirya langdipnamle' tenen, moronyabe. 'Aning ara, fia dipkoprop nong upnamle' tenen, Amin nyapne. Akunuma.

²⁰Ninye deiyok kibuka talyamuknye, Isai el mi Daud amot yupu sebuka deice arye, Allah ati morobukce, sirya dakuk.

Mazmur 73

Kanye talima erelan ninye ati, nyabuk yupu

¹Allah arye el na tenen ninye, Israel yala ninye ati, bico tenelirye, teleb ulilule. Dipkoprop malye una kumce, kanye talima diksukum upliba, teleb uk ubuka unyak ninye nirya ati, Allah arye fia weik kanye delilirye, teleb ulilule. ²Bukni, min talak ara, na kanye akunum teniltona upnuka deice, na dib tenelamse ning ara, walwalapmanto upnuk. Winipmanto ara, alap weik uplye bisik, ninye mangkau kanye bobuka bakibuk, alap arye opmanto ulamle touk, ulamse.

³Winilamsa deiyok ara, ani. Na arye, sik kanye talima erebuka kwalina uk unyak ninye, fil dobuka dolon ning weika dolokirye, kanye deibuka teleb uk unyakba, elinunce, 'Se, sik anang ara, kanam asa uk unyak bukni, na ara yata deiyok ati, ikin asa uk unun do?' tenelamsa deice arye, yu upnukce, na dib tenepse ning, walwalapmanto upnuke.

⁴Walwal asa ulamse talak tenelamse ning ara, ani. Se, sik kanye erepdakirye, kwalibuka unyak nang ara, sik nong ton uk, weika arye kum dilule. Sik nong nirya teleb ubuka mikip asa arye, fia teleb uk unyake. ⁵Tonda, nun yuk talye daunyap ninye nirya ara, weik imun ning nun dam yaliba, ikin kanye bobuka ulamnyap bukni, nun ikin ulamap touk, sik anang ara ikin weik asa kum unyake. Sik wininyak ning nirya ara, teleb uk ulula ati ara, sik kanam asa uk unyak bukni, nara, fia mambul kirikuka ikin fil uk donuna anya arye, 'Se, yata deiyok ati ikin unuluk bukni, sikda kanam asa uk unyak do?' tenen, ulamse.

⁶Yuk nang ikin ning dololamak touk, sik anang ton kum dolonyake. Ati ara, sik kanye talima erelanyak nang, ikin ning sik nong deice kum ulula ati, talya dem uk unyakce kwalibuka karye onyake. Wininyakce, ikin ning dolonyak ninye ati, tuba-tuba yu yupu nyana ap, ona ap unyake. Sikda, talima erepdakirye, yu unyak ara, kum duknunyake. 'Nunda teleb nang uk unyap' tenen, lak noutam anyuk unyake.

⁷Sik malye wininyak ninye, sik talima fum tam ara, malye winin ning uk langdipliba, alye una kum dib aryuk, sikce, 'Malye winin ning uk

talibuka, talye lukparabuka wininamabe. Nun tenebibye touk, unamabe,' tenebikirye, adeice arye, malye uk unyake. Sikce, 'Malye winin ning uk unamabe,' tenenyaka ara, fia weik ulula ati ara, kum nukmanto ulule. ⁸Sik yupu talye-talye nyannyaka deice arye, yuk ninye nirya ati, aku tubuka nalibikirye, yep-yep abuka, kinyakce, malye uk unyake. Kanye talima erena deice arye, kwalinyakce, yuk talye ninye nirya ati ara, 'Nunce nyanyap yupu kum kekepsumunyop ura, nunce anggun deice, ikin ning weika arye, delinamsiabe,' nyabuka kwalilanyake.

⁹Sik anang arye yupu nyannyaka ara, "Im deice ulul ning ap, Allah ap ara, talye ning uk ulule. Aning nirya ara, mambul kum bukni, nunda weik mambul unyabe. Tonda, tukwak mutuku ulul ning nirya ara, nun bidamang ning uka," nyabikirye, yuk ninye nirya ati, "Sikda malye ninye uk unyake," nyabuka malye yupu nyalbanyake.

¹⁰Nyabicop ura, yuk talye-talye daunyak ninye babye, Allah diba tenenyak ninye babye, anang sik yupu kekebikirye, 'Sik anang ara dib nyanmasiake' tenen, sik nyanyak yupu uk kekebuka dobolbanyake. ¹¹Sik akwalinyak ninye arye nyanyak yupu ara ani. "Allah el im deice erebuka ulirye, aning nirya talibuka ululnye bira, nun unyap ning nirya eibuka, beta kel kum kisulule. Im deice uk ulula ati ara, Yata wiribuka arye, nun wininyap ning eibuka, kel biksutu do?" nyabuka, malye yupu uk unyake.

¹²Sik fia malye ning uk talibuka unyak ninye arye, wininyak ning ara, akunum laka nyapmasin atia. 'Yata wiripnamsil do?' tenena kum dib aryuk, sik ur talye kanye bobuka unyake. Kanye imun ning aning-aning nirya ara, sik dam yalirye ikin kum ulule. Tonda, sik talinyak ning nirya babye, tabakuka dolokirye, weik uprabaliba, bona utotoa weik talin nang uk unyake.

¹³Aning nirya elilamsa ati, minop talak arye tenelamse ning ara ani. Se, sik malye uk unyak ninye ara, sik kam unyak talak nirya, talye kanye deibikirye, bona utotoa talin nang uk unyake. Bukni, na ikin unulule. Ati ara, 'Na kanye diksukumuk unirye, malye winipnyak' tenen, kalikilanun ning ara, urdem ati wininune. 'Deiyok ton kum ulule,' tenelamse. Tonda, yuk nang eibikirye, 'Anye dipkoprop malye kum winilule, tenepnamnyak' tenen, malye winilamse ning nirya bataksirye, teleb uk ulamse. Winipmanto ara, malye ning nun taruk deice dupsiliba, taruk mek iliklamap touk, malye un ning nirya bataksirye, teleb uk ulamse. Bukni, 'Aning babye, talye ati winipse,' tenelamse.

¹⁴Na kanye fum tam tenelamse ning ara, 'Atalak-atalak nirya ikin ning uk, na dam yanganulule. Aning atouk, berentam talak nirya ara, kanye ikin ning, na dam pio weik yanganulule. Wininilya ara, Allah arye weneniliba, ikin unulul do?' tenen, malye kanye bobuka ulamse. Ati, na kanye ikin deice uk ulamse.

¹⁵ Aning atouk winibuka tenelamse bukni, na tenelamse ning ara, yuk ninye kekepmanto ak, lak arye kum nyalamse. Na ni Allah, na arye an mapu, diba tenekinyak ninye ati, ayupu atouk lak noutam akunum nyamtinyop ura, dipkoprop na arye an mapu ati, fia malye ulilamtinye. Ara, amalye yupu deice arye an ap, an ti diba tenekinyak ninye ap ati, yanipmanto kilamse bukni, ayupu lak noutam arye kum nyalamse.

¹⁶ Bukni, 'Anyapmase yupu nirya ati, aning nirya piribuka kel biknune' tenen, winilenmase talak ara, na fia kanye ikin uamnuk ati, beta kel kum biklamse. Aning nirya tenilelamsirye, ikin ulamnukba, imun kanye bobuka ulamse. ¹⁷ Winilamsa ani, aminyan talak, Allah Yahweh el si eren aik binuka, wekse talak ara, sik malye un ning, wininyak nang aminyan talak winipnamak ning ara, moubuka kel bikse. Ara, aminyan talak Allah arye, amalye unyak ninye nirya ati, wenebuka oplirye, kum daneipnamle ning ara, moubuka kel bikse.

¹⁸ Na ni Allah, dipkoprop ance, amalye unyak ninye sik banamak bisik nirya ara, alap uk kipdeipmince, moul kiplopminba, abisik uk bakirye, sakuka opliba, dibini uk unamake. Sik wininyak ning ap, sik talinyak ning nirya ap ara, kum danamlarya. ¹⁹ Ance amalye un ning uk, talibuka unyak ninye ati, wenepnamal talak ara, adib aryuk aninye obuka minopce kum daneipnamlyame. Winipmanto ara, mek oplirye aning-aning nirya bobuka, minop bobalamle touk, sik nong deice adib aryuk, ikin ning deipnamlyame. Winipminba, amalye unyak ninye minopce oppminba, dibikirye sirya daknamlyame.

²⁰ Winipmanto ara, ninye arye lengdar mabikirye, aning-aning ayala-ayala nirya elinyak bukni, mapmakca ani, bukikirye, adib aryuk sik asum lengdar deice arye eipmakce ning, lak noutam kum upliba, kum eipmanto ati ara, luba kilongolamak touk, wininamake. Ara, Allah Yahweh, ance aninye sik wenena ati, yanamlam talak ara, sik malye unyak ninye nirya adib aryuk kum daneipnamlyame. Lengdar mapmakca ani, bukikirye, luba kilongolamak touk kibuka, an adib aryuk aninye ati wenepmince, kum daneipnamlyame.

²¹ Minop talak arye, amalye un ninye, sik winilamak ning elilamse talak ara, 'Se, sikda kanam asa aryuk unyake,' tenelamsirye, na talima fum tam ara, yo tace ning luksiliba, nong fum tam weksilirye, uk weik dilamsil touk, winilamnuk. Na kanye talima fum tam ara, yu weik upnukbuk, malye kanye bobuka ulamse. ²² Winibuka ulamse talak ara, na ni Allah an dam ara, na ara fia walwalnye atonun kibuka ulamse. Tonda, talye bai tam kam ulul ning, moubuka kum tenepmanto ulamak touk kibuka, an dam ulamse. Kanye bona kum unyak ninye atonun, ulamse.

²³ Winibuka fia malye weik ulamse bukni, winitalak ara, na teleb kanye bobuka unune. Na ara, na ni Allah an dam anyuk tuba unye talak

ara, ance na taruk sirik tam ning talipnimince, teleb kibuka melinilyame. An dam anyuk, fia aunamne. ²⁴Ance na ti, “Wininamlyame, aning ara, kum wininamlyame. Teleb ning ara ani, malye ning ara ani,” nyabuka, peterelamniminya ani, na sirya talak akunum dipnyop ura, an doproprnimince, an weik dirin ap, fia teleb kibuka ulyam ning ap dam ara, im deice deipnamnilame.

²⁵Se na ni Allah, anda im deice uminyeba, an tibuk patanulula anya arye, akunuma. Yatato ning ton patapnutu do, kume. Kume, an ap neika unanam ca. An tonok ati se tenenune. Aning atouk, tukwak mutuku unamne talak ara, an tibuk pataniliba, se tenekunune. Tukwak mutuku noutamak aunamne talak ara, yuk ning ton fia kum se tenenune. Allah an tibuk fia se tenenune.

²⁶Na nong ap, kanye tenen ning ap nirya ara, mitang uk uprabalirye, aminyan talak kum uamnilya babye, na ni Allah ancuk na talima fum tam mikip kilinilyame. Diba na ni Allah ancuk, kalikuka dinememce, winitalak arye doryanamle talak nirya, fia ati lyelonamnilame. Ati ara, yuk ning kum bukni, an tonok pataniliba, unune.

²⁷Bukni, yata ninye do nirya, an ti, ‘Nun like’ tenen, lik upliba, an dam arye, yukak sakuka banyak ninye nirya ara, sik bidamnye arye akunum malye winililanyaka ati ara, ance aninye wenepmince, kum daneipnamlyame. Aninye ara, minop talak, ‘Nun ni Allah el amutam unamabe,’ tenelamik bukni, winitalak ara, yuk kanye tenepmakce, ‘Elda nun like’ tenen, an yaniltakinyaka ati ara, sik anang ara, adib aryuk wenepmince, obuka kum daneipnamlyame.

²⁸Bukni, na ara fia dipkoprop na ni Allah, an dam anyuk unamne. Aning uk tenebuka ununa ara, teleb uka. Na kanye talima fum tam arye, akunum tenepse. Ara, Allah Yahweh arye aning-aning deice tam talibuka ulirye, Weik Erena Deiyoknye ulirye, ‘Wininamne,’ tenelye touk, aning nirya dipkoprop ululnye bira, ‘El dam anyuk unamne. El dib aryuk melibuka lyelonamnile’ tenen, unamne. Na ni Allah, ancuk tuba kalikuka melinilyamnye uminya ati ara, ance mambul fil dolulyam ning nirya ara, yuk ninye sik kekena ati, laka nyabuka peterelbanamne.

[Minop talak sekik buku ara, pasal 74 sampai 79 ton aubuk bukni, nunce aning kum sekupu anya arye, otam pasal 80 arye dukdongobuka yinipnin banamlulume.]

Mazmur 80

Israel ninye lyena ati, Allah morobuk yupu

¹Mot wibuka sena deiyoknye, Asaf birye kita oulamle ning, el si ara, Bunga Bakung deice libuka nyanmok.

²Diba na ni Allah, anda Israel ninye ati, basam weilamak touk, nun melina ati, fia kalikuka melisilyamnye uminya ati ara, nunce moropkiyap ning,

moubuka kekenamlyame. Tonda, Yusup birye deibukba, el yala ninye arye, dadeipdanin banyak ninye nirya ap ara, ‘Ancuk talipmince melinamlam’ tenen, moropkine. An uminyak ara, an fil don nang, sik malaikat si ara, Kerub dana-dana tam bukikirye, anda anoutamak ulyamnye birye, an nong nirya ara, dirina weik mil dang-dang akululnye, an ti moropkine.

³An mikip ap, dirina ap ara, Manasye yala ninye ap, Benyamin yala ninye ap, Efraim yala ninye ap, deice delinamsilyame. ‘Tonda an mikip ara, nun deice yan deipsimince, ancuk yanuka lyelonamsilam’ tenen, moropkine.

⁴Diba nun ni Allah ancuk, nun malye unyap ning nirya kum kipdeipsimince, an dirina aripsiminyeba, teleb uk unamabe. Tonda, ninye ati bico tenesimince, nun talima tamubuka delinamsile. Winipsimince, lyepsiminba, teleb uk unamabe.

⁵Na ni Allah Yahweh ara, aning-aning nirya taliplumce, im deice yin talin malaikat nirya, sik weik deiyoknye ulyamce, an mapu nirya arye an ti, “Nun yan melipsilyame,” nyabuka morokinyak ning ati, dan talak arye kekepnamsilam do? Nun malye ulamupu ning ati, Allah ance derepsulum ning ara, yata talak tonap atonun derepnamsilam do? ⁶Winipmanto ara, ninye arye roti kwaning dobuka, sik mapu arelbalamak touk kibuka, Allah ance, nun an mapu ati, kanye imun ning uk arisiminyeba, fia engena uk unyabe. Nunda, engebuka asing maka deicuk unyabe.

⁷Naio ance, nun ti ikin weik ning weik aripsimince, bataksulumba, nun unyap mutuku bukni, nun kayapu dana-dana tam, daunyak nang nirya arye, nun ti, yep-yep abuka nalisinyake. Nun mal olan ninye arye, ‘Obuka daluptibye,’ tenesinyakce, kanye deibuka aku tusinyake.

⁸Ati ara, nun ni Allah Yahweh ara, aning-aning nirya taliplumce, im deice yin talin malaikat nirya, sik weik deiyoknye ulyame. Ancuk nun malye wininyap ning nirya, kum kipdeipsimince, an dirina aripsiminyeba, teleb uk unamabe. Tonda ninye ati bico tenesimince, nun talima tamulinamsile. Winipsimince, lyepsiminba, teleb uk unamabe.

⁹An na tenen ninye, nun Israel yala ninye ara, Mesir mutuku ulamupuba, ance anggur tapu yala dobuka, yukak koulamak touk, an mapu dobuka, yuk mutuku ninye ulamik mutuku noutamak koupnamsilame. Yuk mutuku ninye aning-aning nirya, amutuku ulamik bukni, Allah ance dobuka donoklumce, nunda amutuku noutamak punubuka deipsulume.

¹⁰Nun ni Allah, ance anggur tapu yala teleb ning, Mesir mutuku arye dobuka boyalumce, tuku palibuka teleb kipdeiplumce, koupmalumba, pabukce, amutuku nirya akunum langdibuk. Ara, ance tuku kwepdeipsiminba, anggur tapu yating tuku fum tam bilirye, bongobuka weik balamle touk, nun Israel ninye amutuku noutam weik akunum unyabe. ¹¹Winibuka deice, atapu taruk aniryuk bokukce, mutuku dup dana-dana nirya ara, siklipdongobuk. Tonda amutuku tiklamuk yo, el si ara aras yo nirya ara, anggur tapu pabukce, kwatibuka siklipdongobuk.

¹²Atapu el taruk ara, bongobuka binamukane, keteng yangan tam weik laut mekwen kup-kup tam biyuk. Tonda el bok mouse sirya ara, otam keteng kumulban tam, weik pera mutuku, Efrat mek biyuka dam biyuk. Ara, nun Israel ninye aniryuk, amutuku noutamak ara, akunum fia weik koubupe. ¹³Na ni Allah, ance atapu duk ati, keil foka wipdongoplum ning ara, yata deiyok ati, uluploplumba, ninye yuk nang banmakirye, atapu duk talye dakalonyak do?

¹⁴Afoka ara, bai basam arye yanuka pirilamukani, daklobukba bai tam ulamle ning, ayala-ayala nirya, talye wekuka yangakirye, yanuka dinyake. Ara, nun Israel ninye ati, yuk mutuku nang arye, wekuka yanuka osinyaka ati, nyapkine. ¹⁵Ati ara, nai Allah Yahweh, aning-aning nirya taliplumce, im deice yin talin malaikat nirya, sik weik deiyoknye ulyamnye ati ara, 'Im deice arye ance nun tam tamubuka, yanuka dipdesimince, melipsutum' tenen, moropkine. Winipsimince, an mapu nun unyap ning nirya ati, moubuka kel kinamsilyame. Nunda ance na tenen anggur tapu atonun nang unyaba ati, nyapne.

¹⁶Aning ara, talye ati kum nyapkine. Nun, an mapu nirya ara, anggur tapu atonun ninye unyaba anye arye, adib aryuk lyepnamsilyame. Tonda an bidamnye, sirik taruk arye talibuka kouamlumnye, anggur tapu yating ara, moubuka kalikinamlyame. Nunda, ninye arye mapu deibikirye, moubuka kwangnalamakba, nelamak atonun, nunda Allah ance moubuka kwaknalamsulumba, nebupa ati, moropkiyabe.

¹⁷Winyamsulum bukni, winitalak ara, Allah ance bataksulumba, ninye yuk nang arye, an anggur tapu kwini buka uku dongolamak touk, winipsiake. Tonda, ance nun ti yu upkukce, bataksulumba, kum danin banmasile. ¹⁸Ance wibuka an sirik taruk tam deiamsulum nang ara, ance fia ati melinamsilame. Nunda, Allah ance deibuka kwaknalamsulumba, nebupu nang ati ara, 'Ance tonap mikip aripnamsilyame' tenen, moropkine.

¹⁹Winipsiminyop ura, nun an dam arye leibuka, yukak kum binamabe. An dam anyuk fia unamabe. Tonda, ance nun unamabak tuba melipsiminyop ura, nunce an tibuk, kanye deibuka, an si uk erenamkiyabe. ²⁰Diba nun nai Allah Yahweh, aning-aning nirya taliplumce, im deice yin talin malaikat nirya, sik weik deiyoknye ulyamnye, ance nun malye unyap ning nirya, kum kipdeipsimince, an kanye teleb deice aniryuk dinamsilame. An dirina ap, mikip ap aripsimince, lyepdopsiminyop ura, nun nirya ara, teleb uk unamabe, Daud arye nyabuk.

[Minop talak sekik buku ara, pasal 81 sampai 83 ton aubuk bukni, nunce aning kum sekupu anye arye, otam pasal 84 arye dukdongobuka nyapra banamlulume.]

Mazmur 84

“Allah el un dam bana ati tuba se tenenune,” nyabuk yupu

¹Mot sena ati deiyok kouna nang ara Korah yala nang arye nyabik mot. Mot si Gitit nyalamik mot atonun nyabik. ²Na ni Allah an un

dam yangana ati tenenun ning ara, yata wiribuka do? Fia weik kanye delinune. Na ni Allah Yahweh, ance aning-aning nirya taliplumce, im deice yin talin malaikat nirya, sik weik deiyoknye ulyame. ³Ati nara, 'Allah Yahweh an si eren aik dam yatinye' tenen, na kanye talima fum tam arye fia 'Se,' tenenune. Wininunce na nong ap, kanye ap dobukapnirye, Allah an kam una deiyoknye deice uk deibuka, 'Ancuk melipnilyame,' nyabuka an si uk erekinirye, morokunune.

⁴Allah ance kukalima maka, 'Talye balulul,' tenenyap maka babye, ance aik kintinililyame. Tonda kukalima maka, 'Im deice talye lakalul,' tenenyap maka babye, Allah ance sik manak kintinililyame. Tonda, sik aik donak ara, an ti ining ning obuka uku dongolyangan aik dam anyuk, sik mi delinyake. Na ni Allah Yahweh anda, aning-aning nirya taliplumce, im deice yin talin malaikat nirya, sik weik deiyoknye ulyame.

Tonda, "Allah anda na ninye deiyoknye Raja ulyame," nyabuka, moropkine. ⁵Fia dipkoprop na ni Allah, an un dam unamak nang ara, fia teleb uk unyakce, asum-asum nirya an si uk erebikirye, mot uk nyabuka kisal dokinyakce unamake. Akunama tenena ati, 'Selah,' nyapne.

⁶Na ni Allah ance mikip arepminba, fia teleb uk unamak nang ara, weik kanye deibuka pin-pin asa arye unamake. Wininyaka deice arye, Allah an si erenukiak talak ara, sik urasin ara, 'An fia na tenen mutuku, Yerusalem mutuku tam uk dilbibirye, an si erenamkiyabe,' tenebuka unyak ninye ara, fia teleb uk kilinamlyame. ⁷Allah an si erena ati, sik aninye bisik kabul deiyok koubuka banmakibuk, minop talak Israel ninye arye, engelamik mutuku, Baka mutuku bisik bikirye, amutuku noutamak bica babye, ance aninye melipminba, amutuku urasin tamuplirye, mek kutukuka balamle atonun kibuka, deipnamlame. Tonda amutuku noutamak bakibukni, Allah arye mok arepliba ceplirye, aminyan ara, amutuku mekwen weik deipnamle.

⁸Sik aninye Sion mutuku bana ati, bisik banmace talak ara, nun ni Allah ance mikip arepminba, mikip kibikirye, mikip kipyop ura, Sion mutuku dam binamake. Sion mutuku banyak talak ara, Allah el dam wekelbinamake.

⁹Na ni Allah Yahweh anda, aning-aning nirya talilulce, im deice yin talin malaikat nirya, sik weik deiyoknye ulyame. Anya arye, 'Na arye an ti moropkine yupu ara, kekepnilyame' tenen, moropkine. Tonda, 'Yakub birye deibukba, dadeipdanin, yangalamik ninye ati, Allah ance kalikuka melilamlumnye kekepnamnilam' tenen, moropkine. Akunama tenena ati, Selah nyapne. ¹⁰Tonda, nun ni Allah, ance nun deiyoknye Raja melibuka talipminba, elda fia diksukumuk unamle. Tonda, 'Ance akunum wipdeiplumnye bira, talipminba, elda an amutam ulirye, fia teleb uk unamle' tenen, moropkine.

¹¹Weik teleb ning ara, tonok sum Allah an si erena aik dam yanutinyop ura, weik telebe. Bukni, yupa weik seribu sum ara, talye yukak daunmatinya babye ara, teleb kume. Tonda, na ara an si eren aik bublan

dam, kalikna fil doptinye babye, weik telebe. Bukni, malye wininyak nang, sik teleb aik binuka utinya babye, aning teleb kume.

¹² Aning ara talye ati kum nyapne. Allah anda aning-aning deice tam talibuka weik erenanye umince, keteng dirin ulamle touk an dirina ara nun deice delisilyame. Tonda, Allah anda erebuka umince, nun ti kalikisiminyeba, nun mal olan nang nun dam kum yanganyake. Tonda, an amutam ubibyeba melisilyame. Allah Yahweh arye, tuba-tuba aning-aning tabakuka arisiminyeba, yuk mutuku ninye arye, nun ti kisinyake.

Yata ninye do nirya, malye una kum aryuk, diksukumuk unyak ninye ati, nun ni Allah Yahweh ance, wininyak ninye ati, aning-aning nirya tabakuka arisilyame. Allah ancuk nun ti bico tenepsimince, fia weik teleb ning tonok ning babye, ton kum batakasilyame. Aning nirya tabakuka arisilyame.

¹³ Na ni Allah Yahweh anda, aning-aning nirya taliplumce, im deice yin talin malaikat nirya, sik weik deiyoknye ulyame. Dan ninye do nirya, an tibuk diba tenekinyak ninye ara, ance teleb kipdeipminba, weik kanye deibikiryne, pin-pin asa arye unamake. Daud arye nyabuk.

[Minop talak sekamik buku ara, pasal 85-86 ton aubuk bukni, nunce aning kum sekupu ati, otam pasal 87 nyapra banamlulume.]

Mazmur 87

Allah arye wipdeibuk mutuku Yerusalem ati, mot nyabuk yupu

¹ Korah el deibukba, deipdanin balamik ninye arye nyalamik mot ara ani. Allah elce, 'Amutuku deice na si deipnamne' tenen, wipdeibuk mutuku, malye ning tonok babye fia kum ulul mutuku ubuk. Amutuku deice ara, Allah Yahweh arye dobuka deibuk mutuku, weik kota kintinipdeibuk. ² Israel ninye unyak mutuku noutamak nirya ara, asik weik adolamik bukni, amutuku nirya ara mitik mambule. Bukni, Allah Yahweh arye, Yerusalem mutuku ati ara, 'Amutuku weik mambul mutuku ubuk,' tenelule. ³ Se, Yerusalem mutuku noutamak ululum ninye ara, kekeplulume. Allah el si erena aik, sik weik asik kota noutamak ulula ati ara, ninye nirya arye, sik kota ati, weik mambul yupu nyanyakce si erenyake. Akunama tenena ati Selah nyapne.

⁴ Fia pera mutuku unyak ninye ara, Mesir mutuku ninye ap, Babel mutuku ninye ap ara, Yerusalem mutuku ati akunum kekebuka kel kiamika ati ara, aninye si sekelina noutamak uk sekuka deipnamne. Tonda, Filistea mutuku unyak nang ap, Tirus mutuku unyak nang ap, Etiopia mutuku unyak nang ap, amutuku-amutuku unyak ninye nirya ap ara, Yerusalem mutuku ati kekebuka kel kiamika ati, sik babye, 'Yerusalem mutuku unyak ninye noutamak uk, tabakuka unamabe' tenen, patalule.

⁵Aning ati ara, Yerusalem mutuku ati, ninye nirya arye, “Nun babye amutuku unyak ninye uptibye,” nyanamake. Tonda, yatanye do nirya, Yerusalem mutuku noutamak arye, deibicenye bira, yuk ninye nirya arye, el ti si erenamake. Allah Yahweh aning-aning nirya deice tam talibuka Weik Erenanye birye, Yerusalem mutuku unyak ninye nirya ati, fia teleb ulinamle.

⁶Winiplirye, Allah el si Yahweh arye, ninye im sirya mutuku sirya nirya dobuka, sik si sekeipnamle talak ara, aninye dipdelirye, Yerusalem mutuku noutamak arye deibik ninye ati, ‘Aning ara, weik mambul mutuku, Sion mutuku noutamak arye, deipsika,’ nyaplrirye, sik si sekeipnamle. ⁷Winiplyop ura, sik aninye nirya arye, ‘Yerusalem mutuku ara nun deiyok mutuku’ tenen, malye kanye bonyakce, Allah el si uk erebuka mot nyanamake.

[Minop talak sekamik buku ara, pasal 88 ton aubuk bukni, nunce aning kum sekupu ati, otam pasal 89 nyapra banamlulume.]

Mazmur 89

**Allah arye tukwak ninye ati, fia weik arye
bico tenesulula ati, mot nyabik yupu**

¹Amot ara, ninye ton el si Etan, Ezrahi yalanye birye nyabuk mot ara ani. ²Na ni Allah Yahweh ance nun ti bico tenesiminya ati, na arye winitalak arye doryanamle talak nirya, an si uk fia ati erenamkine. Ara, mot nyana deice aniryuk nyanamkine. Nyanamkina ara talye ati kume. Ance nun ti batakna fia kum dib aryuk, fia weik arye bico tenesimince, fia moubuka teleb kilisiminya ati, nyanamne. Tonda, ayupu bobuka, nunce deibibyeba, dadeipdanin banamak ninye, sik dam laka nyabuka peterenamne.

³Ance nun ti bico tenesimince, melisilyam ning ara, ton fia kum kum danamle. Fia ati aupnamle. Winipmanto ara, im deice ulul ning nirya, fia aubuk touk, Allah ance nun ti bico tenesiminya ara, fia ati aupnamle. Bana kum, fia darabuka aubuk touk, an mikip ara atonun ukulule. Ara, Allah ance, ‘Na tenena ninye, fia kalikuka melinamne,’ nyabuka, nyalin yupu im deice arye, akunum nyapdeiamsuluma atia.

⁴Ance nyapdeiamsulum yupu ara, nun apu koproba Daud binyak, ance wipdeiyamlumnye el ti nyapdeiamlume. Ance nyapdeiamlume. “Na arye wipdeipsinye, na amutam fil dolulnye Daud biti, fia kalikuka melinamne,” nyabuka, nyalin yupu nyapdeiamlume. ⁵Tonda, “Daud ance deipminba, dadeipdanin banamak nang arye, an taliplum ning nirya, sikce fia talinamake,” nyabuka, nyalin yupu ton nyapdeiamlume. Tonda, “Daud an ap, ance deipnalam nang ap nirya ara, weik ninye deiyok nang

bun ning deice, bukikirye, amutuku ninye nirya fia talinamake. Ara, doryanamle talak nirya ara, yuk yala nang arye, Israel yala ninye ara, kum talinamake. Akunuma nyana ati, Selah,” nyapne.

⁶Nun ni Allah Yahweh, ance weik mambul fil weik donyaka ati ara, im deice tam kwepdeaimlum ning ap, im deice unyak nang malaikat ap arye, an si uk fia erekinyake. Im deice umince ninye kum winipmanto ning nirya ulyamnye ati, im deice unyak nang nirya arye, kanye deipkikirye an tibuk si erekinyake. ‘Allah Yahweh arye, ‘Wininamsine,’ nyasilye yupu nirya ara, tonok ning babye batakna kumce, aning nirya fil dosulule. Nun tibuk moubuka kalikisilirye, teleb ulisulule,’ tenebikirye, an si uk fia erekinyake.

⁷Diba, nun ni Allah Yahweh, an uminya mutuku im deice ara, Allah an uminya atonunye ton kum ulule. Tonda, im deice unyak malaikat nirya babye, an touk ton kum unyake. Allah Yahweh an uminya atonunye ton, fia kum ulule. ⁸Allah an fil donyak malaikat, fia weik mikip nang, im deice unyakce, Allah an tibuk ilil ululba, diba tenekinyakce, an si uk erebuka si erekinyake. Sik im deice unyak malaikat nirya ara, weik mambul nang unyak bukni, nun ni Allah Yahweh anda, fia weik mambulnye ulyame. Sik im deice unyak malaikat nirya ara, an dam anyuk antanapdongobuka unyakce, an si uk erekinyake.

⁹Diba nun ni Allah Yahweh, anda aning-aning nirya deice tam talibuka weik kwemdinanye ulyame. Allah Yahweh anda, aning-aning nirya taliplumce, im deice yin talin malaikat nirya, sik fia weik deiyoknye ulyame. Allah an uminya atonunye ton kum ulule. Yatanye, an mikip uminya atonunye ton ulul do? Fia kume. Ance, ‘Wininamne,’ nyabuka, nyalisilyam yupu nirya ara, tonok ning babye batakna kumce, fia dipkoprop usilyame.

¹⁰Tonda na ni Allah ancuk tenepmunyop ura, laut mekwen deibukce mikip welelul bukni, ancuk kalikuka dilyame. Anya arye, ance tenepminye touk, mek langdibuka, fia weik arye langdipmalyane, ila tuba tamubuka mitik kiplirye kololamle. ¹¹Weik laut mekwen deibuka noutamak, weik mek fum bal ikan, el si ara Rahab, daulamuk ning babye, Allah ancuk obuka sice bukloplume. Tonda, Allah an weik taruk mikip deice arye, an mal olan dam ninye nirya, akunum malye kibuka, yuk-yuk yakdonoklume.

¹²Im deice ap, im deice ulul ning nirya ap, tukwak ap, tukwak mutuku noutamak ulul ning nirya ap ara, ancuk kwepdeipluma ati ara, an bidamnye aryuk, aning ayala-ayala nirya talibuka ulyame. Ara, an ning uk ulule. Tonda, tukwak mutuku ap, tukwak mutuku noutamak ulul ning nirya ap, tonda tukwak noutamak unyak ninye nirya ap ara, ancuk kwepdeipluma ati, tuba talilyame.

¹³Tonda, Allah ancuk eitam ap, outam ap nirya, kwepdeiplume. Winipluma ati ara, Tabor mutuku unyak ninye ap, Hermon mutuku unyak ninye ap nirya arye, an

tibuk kanye deibuka winilikinyake. Amutuku unyak ninye arye, mot nyabuka, an si atibuk erekinyake. ¹⁴Allah an taruk weik mikip deice arye, ninye kum winipmanto ning nirya ulyamnye. Tonda, an taruk tatang deice arye weik mikip fil dolyame. Tonda, an sirik tam taruk, fia weik mikip anya arye, erebuka dolyame.

¹⁵Allah ance, aning-aning nirya ara, weik mikip arye erebuka dolyamce dilyame. Ance aning nirya erebuka dopluma amutam aik, ayukumna yo atonun ara, fia diksukum una ap, fia dipkoprop yupu nyana ap, ulule. Tonda, ance nun ti batakna kum dib aryuk, weik arye bico tenesilyam ning ap, ance, 'Wininamsine,' nyapsulum touk winisiminye ap nirya ara, aning uk ulule. ¹⁶Yata ninye do nirya ara, kanye teniltona kum dib aryuk, fin-fin kanye bobuka, Allah an si uk erenamkiak ninye ara, ance fia teleb uk kilinamlyame. Allah Yahweh ance, an weik dirin ning ara, sik aninye nong deice deliminyeba, adirin deice arye, an dam anyuk yanganamake.

¹⁷Aninye nirya ara, an si ati tuba tenebikop ura, winitalak arye doryanamle talak nirya, fin-fin kanye bobuka teleb uk unamake. Tonda, an fia diksukum teleb uk uminya ati, fia kanye deibuka unyake. ¹⁸Ati, ance nun lyepsulumce, an fia weik dirina dobuka, nun deice delisilyame. Tonda, ance nun ti kanye deipsuluma deice aryuk, nun mikip aripsimince, teleb kibuka delisilyame.

¹⁹Aning ati ara, nun ninye deiyoknye Raja ara, nun ni Allah Yahweh ance wibuka deiplumce, aripsulume. Atonun, nun Israel ninye wibuka akwamsuluma deiyoknye bira, nun ni Allah an tonok Weik Erena Deiyoknye ulyame. Allah an dam ara, malye un ning tonok babye, fia kum ukulule. Anda, fia Telebnye dem aniryuk, nun Israel ninye ati, kalikuka melisilyame.

Allah arye Raja Daud ati, 'Na tenena ninye, Israel yala ninye talinamle' tenen, wibuka deiamuka ati, nyabuk yupu

²⁰Minop talak an yupu lak lena deiyoknye tonok ati, lengdar manna deice arye, yanuka nyapdeiamlume. Ara, "Talye daunmace ninye kankan arye, tonoknye ton na arye wipdeipnirye, na arye nyapniba, anda na yupu lak lenanye birye, el kisok deice minyak mek dikeipminba, Israel ninye sik deiyoknye unamle," nyapdeiamlume. "Anye Daud bira, ninye noutamak daulamlyani, na arye erepdeipniba, ninye deiyoknye kiplirye, Israel ninye talibuka unamle," tenen, nyapdeiamlume.

²¹Tonda, ayupu ton nyalamlume. "Na arye, na fil donanye Daud akunum wipdeipsa ati, ance el kisok deice minyak mek dikeipnulyame," nyapdeiplume. ²²"Ati tuba-tuba na weik mikip taruk arye melipniba, el babye mikip asa arye unamle. Atonun, na arye Daud talipniba, na amutam uk mikip arye fil donamle. ²³Na Allah arye Daud biti melipnyop ura, el mal olan nang arye kum yanuka obuka sirya daknamake. Tonda, malye winina nang arye, el ti kum yanuka malye kipnamake. Na arye Daud biti melipnyop ura, yuk mutuku ninye deiyok nang arye, el ti, 'Nun si erena ati, uang yo bok weik aripsilyame,' nyabica babye, kum arenamle."

²⁴Ati el mal olan nang nirya ara, na arye obuka kum kipdeipnamne. Tonda, el ti, ‘Opnuyabe,’ tenenyak nang nirya, obuka sirya daknyop ura, yata nang arye el ti mal penamak do, kume nyapne. ²⁵Winipnirye fia ati, na arye el atibuk bico tenebuka melinamne. Winipniba, elce na ti tuba si erenilyop ura, na arye el ti mikip weika arye aripneba, yuk mutuku ninye deiyok kibuka unyak nang nirya ara, elcuk erebuka talinamle.

²⁶Na Allah arye el ti, mikip weika arye aripneba, Daud birye talinamle mutuku ara, keteng kumulban tam deibuk fia weik laut mekwen arye dipdongobuka, keteng yangan tam Efrat mek ap, Tigris mek ap, otam nirya ara talinamle. Anyapman mutuku nirya ara, el ti aripneba, elcuk talinamle. ²⁷Atalak ara, Daud birye na ti nyanamle. “Anda na Ni Koproba Allah ulyame. Anda na ni Allah umince, na ti melibuka lyenilyame. Ton winipmanto ara, na ni Allah anda weik keil bulamle atonun kibuka uminyeba, na ara an amutam unamne,” nyanamle.

²⁸“Na Allah arye, anye Daud ati, na mi koproba dunye atonun kipdeipnamne. Winipdeipniba, Daud elce mutuku-mutuku nirya ninye deiyok kibuka unyake nang nirya ara, amu kibuka, elda fia deice tam arye, talibuka unamle. Na Allah arye Raja Daud ati, ninye deiyoknye kibuka erepdeipniba, yuk mutuku nang nirya, sik deice tam erenanye unamle. ²⁹Tonda na arye, ‘El tibuk fia bico tenebuka melinamne,’ nyapdeamsi touk, tuba-tuba melipniba, mikip arye unamle. Tonda, na Allah arye, Daud biti, ‘Wininamkine,’ nyalilamse yupu nirya ara, dipkoprop fia unamle ati, aning ara, kum kum danamle.”

³⁰Elce amutuku-amutuku nirya talinamle talak arye dipdongobuka doryanamle talak nirya ara, Daud birye deipliba dadeipdanin, banamak nang aniryuk, el bulye sukum punubuka bunamake. Ara, na im deice uniryte tukwak mutuku nirya talinamne talak nirya, Daud el yala nang arye, amutuku nirya talinamake.

³¹‘Wininamake,’ tenepse bukni, elce deipliba, dadeipdanin banamak ninye nirya arye, na nyapse yupu yanibuka bataki kop ura, dipkoprop sik anang ati wenepnamne. Na arye, ‘Wininamlulume, aning ara kum wininamlulume,’ nyapdeiyamse yupu, bataki kirye, yanibikop ura, na arye anang ati wenepnamne. ³²Sikce, ‘Allah nyapdeiamsuk ning ara, ani’ tenen, moubuka kum tenebikirye, talye-talye tenebuka winibicop ura, aninye wenepnamne. ³³Ara, na arye sik ti wenebuka opnamana deiyok ara, sik aninye arye na yupu yanibuka bataki kirye, malye unamake dekna ati, ikin weik ning aripneba, dopropnamake. Ara, sik aninye ara, kama arye kulabuka opnamne.

³⁴Anggun malye winin ning ati, wenepnamsin bukni, Daud birye deipliba, dadeipdanin banamak ninye ara, na arye fia bico tenenamne. Winipnirye Daud biti, ‘Winipnamkine,’ nyapdeiamse ning ara, kum bataknamne. Tuba tenebuka melinamne. ³⁵Na arye el ti, ‘Winipnamkine,’

nyabuka, nyalilamse ning ara, ton min kum kum kipdeipname. Tonda anyapdeiamse ning ara, tonok ning babye na babye ton tamubuka kum dopropnamne. ³⁶Tonap, arup arye dukdongobuka nyapsin ning ara, dipkoprop fia ati aupnamle. Allah na ara, Fia Telebnye ununa deice arye ayupu nyapsine. Na arye Daud biti, 'Wininamkin,' nyabuka, nyalin yupu deice nyalilamse ning ara, talye kum nyaplomse. Anyalamse ning ara, tuba tenenamne.

³⁷Ara, elce deipliba, dadeipdanin banamak ninye nirya arye, sik ni koproba Daud birye talilamuk ning uk, talepdanen banamake. Tonda sikce na dam unamak ning ara, keteng deiplirye, amutuku noutamak nirya dirina ulamle touk, Daud el yala nang arye, amutuku noutamak nirya talibuka, ninye deiyok nang unamake. ³⁸El yala nang arye amutuku talilbanamak talak nirya ara, yata im deice ulirye, el dirina fia ati, aklamle touk, ubuka ninye deiyok nang kibikirye, taliprabanamake. Akunuma nyana ati, Selah nyapne. Allah arye nyabuk.

³⁹Nyabukop ura, amot nyabuknye, el si Etan birye tamubuka nyabuk. Nun ni Allah arye ayupu nirya nyapdeiyamsulum bukni, winitalak ara, ance nun ninye deiyoknye Daud biti, akunum derepmalame. Winipmalama deice arye, ance wipdeiplumnye Daud ati, 'Na like,' tenebuka batakmalame. ⁴⁰Ance an amutam fil donanye biti, "Winipnamkine," nyabuka, nyalin yupu nyalamlum ning ara, akunum bataklume, tenepne. Winiplumce, el ninye deiyoknye kina ati, kisok deice deiamuk ning ara, dobukaplumce, ance bental fum bisik dongoplume.

⁴¹Tonda, el ulul mutuku weik cang keil foka domik ning ap, kat ning deice arye, deibuka teleb aik domik ning nirya ap ara, ance ulubuka kum kipdeiplume. ⁴²Winipluma deice arye, abisik banyak ninye nirya arye, el na tenen ning nirya alubuka dolonyake. Wininyakce, sik kwit capu yuk nang ati binuka nyabikiba, sik nirya arye el ti, nalibuka aku tunyake.

⁴³Ance el mal olan nang ati mikip arepminba, 'Obuka sirya daknamabe,' tenenyake. Winipluma ati, el mal olan nang nirya teleb kanye bobuka unmake. ⁴⁴El ninye ona ati, bolamuk parang ya ara, Allah ance, si kau kipdeiplume. Tonda, elce, 'Na mal olan nang olbinune' tenen, kintinilye talak ara, Allah ance kum melilyame.

⁴⁵Tonda, el mikip arye talyamuk ning nirya ara, ance kum kipdeipmalame. Tonda, el weik ninye deiyok kibuka bululak ara, ance dobuka talye tukwak donokmalame. ⁴⁶El kamnye atonun tuba ulamtu bukni, Allah ance el kam tuba una ouku ara, tamubuka mitiktonun kiplumba, wisinye atonun akunum ulule. Tonda, alye dakalan ning uk, el deice deiplumba, alye asa uk unmale. Akunuma nyana ati, Selah nyapne.

⁴⁷Na ni Allah Yahweh, yata barye talak nirya arye, na dam arye leibuka yukak kipropnalam do? Ance na ti, yata talak karin ton nirya, duknupnamnilam do? Tonda yata talak karin ton nirya, an yu ara uku buk dilamle touk kibuka, na deice

deipnininba, dinamnili do? ⁴⁸Na ni Allah na moropkin ning ara, na kam una ati ouku ara, lo weik kum upnile. Tonda, Allah ance kwepdeipsulumba unyap kili sal nirya ara, mikip kum ninye uk unyabe. Nun kam unyap talak nirya ara, 'Aning ara mambule, winibuka unamabe,' tenena kumce, talye kanye bobuka unyabe.

⁴⁹Ati, yatanye ton dipna kumce, kam tuba upra banamle do? Tonda, yatanye ton, 'Na ara kum dipnamnanye' tenen, lyepdandoptu do? Aning ara kum winipmanto ati, akunuma nyana ati, Selah nyapne.

⁵⁰Diba na ni Allah Yahweh, an min yuma talak arye, nun ninye ati, 'Na tenena ninye unyake,' tenelamsulumce, weik arye bico tenelamsulum ning ara, akunum lubakipsulum do? Tonda, nun apu koproba Daud ati, "Wininamkine," nyabuka, nyalin yupu nyamlum ning ara, kum dukdongopnamsilam do? Aning ara, akunum batakmasilam do?

⁵¹Diba na ni Allah Yahweh, ance fia tenepnamlyame. Na an amutam fil donanye bira, yata deiyok ati bataknulumba, alye weik dakalanun do? Anyapne ning ara, talye ati kume. Yuk mutuku ninye ayala-ayala nirya arye na tibuk, yep-yep abuka, ikin ning na nong deice delininyaka ati nyapne. ⁵²Tonda, nai Allah Yahweh an ti, 'Nun like,' tenekinyak ninye arye, ninye deiyok kina ati wipdeiplumnye Daud ati, sikce malye yupu nyabuka yep-yep anyake. Ara, dan sukum do nirya, el banmalebuk eibikirye, yep-yep abuka nalina uk unyake.

⁵³Bukni, ikin unilya babye, na ni Allah Yahweh, an si atibuk, fia erebuka kinamkine.

Telebe akunuma ati, amin nyapne.

Mazmur 90

"Allah elda, ninye unyakak ati, melinanye ulule," nyabuk yupu

¹Allah el fil donanye Musa arye, Allah ati morobukce, mot sebuk.

Diba na ni Allah Yahweh,^j anda nun damak umince, minop arye melilyangalamsuluma ani, fia ati melipnin banamsilame. ²Tonda, mutuku-mutuku nirya min kum kwepdeialum talak arye aulalume. Tukwak mutuku ap, mutuku-mutuku nirya ap, min kum kwepdeialum talak ara, anda akunum aulalume. Allah an Kam Una Deiyoknye anya arye, fia ati, auna uk unalame. Atalak arye diprongobuka dounamle talak babye, kam fia ati unalame. ³Na ni Allah ancuk ninye isin arelamsulum ning ara, tuba tamubuka dopropsiminba, dibinyabe. Dibipyop ura, nun nong bobuka, kwepdeiyamsulum tuku deice uk, binuka deipsicop ura, atuku atonun dananyabe.

^j 90:1 *Yahweh* – Allah el si koproba ara, Yahweh ulule. Indonesia Alkitab noutam ara, Allah el si Yahweh ulul sukum ara, TUHAN sekenyake. Ayupu bikna ati ara, laka nyan yupu nomor 49 dipdelulume.

⁴Na ni Allah, ance tenelyam ning ara, keteng tamun yupa fia weik seribu tahun kiplye ura, ‘Ara tonok sum atonun uple,’ tenelyame. Tonda, keteng tamun yupa weik seribu tahun uplye babye, tonok sum atonun tenelule. Tonda keteng tamun yupa weik seribu tahun uplye babye, ara tonok lukunyan atonun tenelule.

⁵Ance ninye isin aripsulum ning tamubuka dopropsiminye talak ara, winipmanto ara lendar mabikirye, kanye nep-nep alamak atonun unyabe. Tonda maning kwapu bongobuka tikaplya ani, sesal selolamleto, nun ninye babye lik tonok kam unmapya ani, adib aryuk dibinyabe. ⁶Ara, berentam talak dolkua nirya papliba, el urasin teleb ubuka tiklamle bukni, keteng deipliba, keteng bupu arye, sintam ara, kolulamle. Dolkua koluldolamle tonun, nun ninye babye adib aryuk dibinyabe.

⁷Na ni Allah, nunce malye ubibyop ura, an yu upkiliba, nun isin aripsulum ning ara, minopce tamubuka dopropsiminye ura, talima nebum-nebum alamsil tonun, unyabe. Malye ubibya deice, ance nun ti yu tenepsiminye talak ara, adib aryuk kum danalisilyame. ⁸Na ni Allah, nun malye wininyap ning nirya ara, ancuk kel bikisilyame. Tonda, ‘Ninye arye kum dinmaniake’ tenen, malye unyap ning nirya ara, an asing arye eibuka, akunum kel bikisilyame. Anda dirina weiknye ulyama anya arye, nun malye wininyap ning kum dungnuptibye.

⁹Malye weik unyaba deice arye, Allah an yu upkiliba, nun kam una ati lo ara, mitik bumang uk arisilyame. Aketeng tamun, aketeng tamun nirya upnin balamipya ani, sirya talak ara, isin aripsulum ning tamubuka dopropsiminye ura, malye nyabuka ngalukibirye, adib aryuk dibinyabe.

¹⁰Nun kam una ati, keteng tamun lo aripsulum ning ara, tujuh puluh tahun uk (70) kipdeipsulume. Mikip arye unyap nang ara, keteng tamun delapan puluh tahun (80) unyabe. Bukni, aunyap talak nirya ara, teleb ton kum unyabe. Kanye imun ning ap, uk din dina deice uk upnin balamipya ani, sirya talak ara, ance isin aripsulum ning ara, tamubuka dopropsiminye ura, dibina uk unyabe. Nunce tenenyaba ara, ‘Fia kam uk unamaba,’ tenenyap bukni, minopce dibinyabe.

¹¹Yatanye birye ton, Allah ance nun malye unyap ning ati yu tenesiminye ning ara, moubuka kel biktuo do? Ati ara, Allah ance ninye tukwak ninye malye wininyap ning ati, weik yu weik ukulule anya arye, tukwak ninye nirya ara, an tibuk ilil weik unamsile. ¹²Ati ara, na ni Allah ancuk nun ti, “Anggun kam unamlum talak ara, lo weik kum anya arye, moubuka nukuldenamlulume. Ara, ‘Malye ubipyak’ tenen, atalak-atalak nirya ara, fia moubuka unamlulume,” nyabuka peterepsiminba, nun kel bikibirye, aning uk talibibirye, moubuka unamabe. Winibibya deice arye, kel bikna deiyok ning, kel bikibirye unamabe.

¹³Na ni Allah Yahweh, dan talak nirya arye, ance nun ti tonap yu kanye bonamsilam do? ‘Nun ti yu tenesiminye ning ara, batakmince,

tamubuka bico tenepsimince, lyepropsutume' tenen, moropkine. Nunda an amutam uk unyaba anya arye, bico tenepsilyame.

¹⁴Na ni Allah, 'Ance nun ti bico tenepsimince, an teleb un ning asum-asum lukunyan nirya weik arye arenamsilam' tenen, moropkine. Winipsiminba, nun kam unamap talak nirya ara, an tibuk si erebuka ubirye, pin-pin asa mot senamabe. Bico tenepsimince, melipsiminnye ura, kil-kil kanye bobuka, teleb uk unamabe.

¹⁵Na ni Allah nun malye winibupu dekna ati, ikin ning aryamsulumba, dololamupu ning nirya ara, 'Apununa ati, kanye teleb bon ning weik arye arenamsilam' tenen, moropkine. ¹⁶Na ni Allah, ance ninye winipmanto kum fil dolyam ning ara, an amutam fil donyap nang, nun damak winipsiminba, eibuka kel kipnamabe. Ance, ninye kum winipmanto fil, weik mambul fil ton, nunce deipnamap mapu ati, opminba eibuka kel kipnamake.

¹⁷Diba na ni Allah Yahweh, ance nun bico tenepsimince, melipsiminnye ura, kanye deibuka teleb uk unamabe. Tonda, ance nun ti, melipsiminnye ura, 'Nun fil donamaba nirya ara, teleb aryuk nong upra banamsile' tenen, moropkine. Nun babye mikip adib aryuk, kum uptibye anya arye, 'Allah ance mikip aripsiminba, fil teleb ubuka donamabe' tenen, moropkine. Musa arye Allah ati morobuk.

Mazmur 91

**'Allah Yahweh, elcuk kalikuka melinamsil' tenen,
moronyak ninye ati, nyabuk yupu**

¹Allah ara, aning-aning deice tam talibuka weik erena ap, weik mikip ap ululnye birye, el amutam unyak ninye nirya ati, kalikuka melipliba, aninye ara imun kanye bona kum dib aryuk, kanye deibuka teleb uk unamake. Allah aning-aning nirya deice tam talibuka, im deice yin talin nang, sik malaikat nirya talibuka Weik Deiyoknye ulule.^k Ati, yata ninye do nirya, Allah el amutam unyak ninye arye, fia ilil asa kum dib aryuk, kanye deibuka teleb uk unyake.

²Na arye, na ni Allah el si Yahweh ati nyanune. Na ni Allah ance na ti winipmanto, weik keil aik domica noutamak ulamak touk, na ara an erebuka uminyeba, na ara an amutam unamne. Aning ara talye ati kume, na arye an Allah ati, 'El bidamnye aryuk melibuka kalikniliba, ikin ning

^k 91:1 *Weik Deiyoknye* Ayupu sekupu ara, Ibrani yupu deice, 'Yahweh Sabaot' sekik. Indonesia Alkitab noutamak 'TUHAN' sekenyake. Bunki, 'Lik ninye nirya 'Yahweh Sabaot' sekik ning, ayupu deiyoknye kel biknamak' tenen, nunce ayupu deiyoknye laka kibuka sekupu.

na damak kum yanamnila anya arye, elce fia lyelonamnile,' tenebuka unune.

³Yata ninye do nirya, Allah ati dib tenebice ura, aning-aning nirya ara, sik opmanto ning dungnubuka yanganamle ning babye, Allah arye yupu sekliba, aning arye kum opsutue. Winipmanto ara, ninye arye maka wena wemikiba, mangkau yo duk dobuka diliba, youlule. Youpliba ninye arye doprobikirye, batakanyak atonun, Allah arye el ti dib tenenyak ninye ati, melibuka lyelonamsile. Tonda weik kanye imun uk ninye weik dilamliba, ninye mutuku-mutuku nirya yupa weik arye dibinyak uk ayala-yala nirya, nun dam yanganamle ning babye, Allah arye, 'Na tenena ninye auk diplyak' tenen, kalikuka lyepdopsiliba, teleb uk unamabe.

⁴Winipmanto ara, ayam mapu sik nin birye dobuka, el pol amu deibuka irilamle tonun, Allah arye el ti dib tenenyak ninye nirya dobuka, el damak deilinamle. Tonda, sik nirya ara, Allah el weik mikip arye erebuka uliba, el amutam uk unamlume. Winipmanto ara, el pol mikip arye, anggun nong iripdongopsiliba, kanye lamapdongobuka nimalya asa arye, el amutam unamlume.

Winiminye ura, Allah arye fia kum bataknamlsile. Winipmanto ara, ninye arye mal oldan talak, 'Mal biksilyak' tenen, ting kinikkikirye, kelapye dobuka, mal pibalamak touk, Allah el mikip arye nun ti, melibuka kaliksilibuk, opmanto ning nun damak yalya babye, kum opnamlsile. Aning atonun, Allah arye, 'Ikin ning na amutam unyak ninye damak yalyak' tenen, el mikip arye nun ti, fia melibuka kalikinamsile. Ati, el amutam uk unamlume.

⁵Fia melibuka kalikinamsile ati, lukunyan talak babye anggun opmanto ning ap, Isa Mutuku Dongonye ap ati, ilil kum unamlulume. Tonda, keteng duk-duk talak mangkau daunmabip bukni, 'Ninye olamak nang arye, mal arye opnamsiak do?' tenen, ilil kum unamsile. ⁶IniPLYE talak ninye dipne uk yanamle ning ap, keteng noutam talak yanganamle ning ap ati, ilil kum unamsile. ⁷Atalak ara, ninye yupa weik seribu nang auk dilamle deice arye, anggun dam dibikce babye, anggunda auk disuta babye, anggun kum dipnamlume. Tonda, ninye yupa weik tagu barye ribu nang (10.000), anggun sirik tam yanuka dipnamak bukni, anggun Allah el amutam unamlum ninye ara, mitik dila babye ton kum saknamlsile.

⁸Anggun winibuka unamlum talak ara, anggun asing arye amutuku nirya dinmalumba, 'Sik amalye winilamak ninye, sik wenena ati, dolonyak dekna ati ara, ikin ning doprobikirye dibinyake' tenen, eipnamlume. Utenepmunce, sik malye unyak ninye dipnamaka ara, anggun asing arye elinamlume.

⁹Anggunce, 'Allah ara, aning-aning deice tam talibuka weik erena ap, weik mikip ap ululnye bira, elcuk lyelonamsile' tenen, el ti dib tenepmunce,

el amutam uk umunyop ura, Allah Yahweh arye, fia melibuka kalikinamsile. Tonda, na ti fia melibuka kalikinululnye, Allah Yahweh arye, anggun babye ton kalikuka melinamsile. ¹⁰Winibuka melipsiliry, kaliksilyop ura, anggun unamlumak ap, anggun asik ap niryra ara, weik ikin ning ton anggun damak usilibuk, fia kum dopropramlume. Tonda, anggun unamlumak ara, kanye imun ning anggun damak yanuka, anggun nong deice kum upnamsile.

¹¹Imun kanye bona ning yalya babye, anggun nong deice kum upnamsile, nyapmasina ara, talye ati kum nyapsine. Deiyok ara, Allah arye el amutam im deice fil don nang sik malaikat weik arye dopdeipliba, anggun damak tuba yanuka melibuka kalikinamsiyake. Tonda, anggun unamlum mutuku ap, banamlumak niryra ara, sik malaikat melipsikirye, “Winiplulume,” nyapsikibuk, sik amutam uk unamlume. ¹²Amalaikat Allah fil donanye birye, anggun ti melibuka kalikinamsiyak talak niryra ara, malaikat arye anggun taruk ap, yan ap, niryra talibuka ulamsikiba, anggun keil yan dum ton kum duknamsile.

¹³Malaikat arye anggun ti, akunum melipsice ura, bai tam weik yu kus, el si ara singga kus, dungnubuka ulamlyak bimunya babye, si tobuka kum opnamsile. Tonda, ninye on kwatima dungnubuka ulamlyak bimunya babye, si tobuka kum opnamsile. Ati ara, ninye si topliba diplomak kwatima ap, weik yu singga kus ap, talye mangkau kibuka yanipnamlume babye, kum opnamsiyaka ati nyapsine.

¹⁴Allah el si Yahweh arye nyabuk. Dipkoprop na wipdeiamsinye birye, na tibuk kanye deilinulula ati, na arye el anye bira lyelonamne. Lyeproprniba, elda na amutam uk uliba, na ara el dam uk fia unamne. Ara, el anye birye, na si uk erenulula anye arye, na arye el ti fia melibuka kalikinamne. ¹⁵Anye bira, el ikin ning dopropliry kanye imun uplye talak niryra ara, elce, “Na ti melipnilyame,” nyabuka moropnilyop ura, na kekepniry el ti, fia kalikuka melinamne. Tonda, anye bira, el ikin ning dololamlye ning ati, lyepniry, el dobuka ereipnamne. El anye bira, erebuka deipnyop ura, yuk ninye niryra arye, el tibuk si erenamake.

¹⁶Erebuka deipnyop ura, el kam una ati, keteng tamun weik arye tonap aripneba, el fia kam unamle. El anye bira fia kam unamle talak ara, na arye el ti lyelonamne. Tonda, na arye ninye lyelonun ning niryra ara, elce eibuka kel kinamle.

[Minop talak sekamik buku ara, pasal 92 ton aubuk bukni, nunce aning kum sekuba ati, otam pasal 93 nyapnin banamlulume.]

Mazmur 93

Allah elda weik deiyoknye kam fia unamle nyabuk yupu

¹Allah el si Yahweh arye aning-aning deice talibuka weik deiyoknye ulule. Winipmanto ara, tukwak mutuku weik ninye deiyok nang, Raja weik

nang arye, fia urasin teleb butum aling ongobikiba, ninye eibikirye, “Se, elda telebe,” nyalamak touk, Allah elda, fia teleb ulirye, fia mikip weiknye ulule. Ulula ati, ninye mutuku-mutuku nirya unyak ninye arye, ‘Elda weik mambulnye ulule’ tenen, unyake. Allah Yahweh arye, aning-aning nirya ap, tukwak mutuku nirya ap, kwepdeiamukce talibuka, aning nirya fia darapdongobuka unamle.

²Nun ni Allah, anda aning-aning nirya, min kum kwepdeiyalum talak arye, an uk ulalume. Tonda fia tuba aunalame. Minop talak dorapce, aminyan yanamle talak babye, ancuk aning-aning nirya talibuka, weik deiyoknye fia aunalame.

³Se, nun ni Allah Yahweh, laut mekwen mek kup-kup ak ara, mek kait mikip arye weleplirye, lelim weik lelamle bukni, amek mikip ara, mitik uka. Anda fia weik mikipnye ulyama ara, mikip fia weik ulyame. ⁴Mek oplirye banmalya ani, lelim weik nyalirye banmaleba, ninye kekebikirye, ‘Se, amek uanmal ning ara, mikip weik onmale,’ tenenyake. Bukni, dipkoprop olamle mek ara, mikip mitik uka. An mikip arye winilyam ning nirya ara, mikip fia weik arye ulyame. Nun ni Allah Yahweh, an uk im deice umince, aning-aning nirya mikip arye talimince, weik erenanye ulyame.

⁵Nun ni Allah Yahweh, ance, “Wininamlulume, aning ara fia kum wininamlulume. Teleb una ara, ani,” nyapdeiyamsulum yupu nirya ara, fia ati aunamle. Tonda, an si erenyap aik ara, fia teleb uk ulule. Malye ning tonok ning babye kum ulule. An si erenyap aik, fia teleb uk ulirye, fia aunamle.

[Minop talak sekamik buku ara, pasal 94 ton aubuk bukni, nunce aning kum sekuba ati, otam pasal 95 dukdongobuka nyapnin banamlulume.]

Mazmur 95

“Allah elda aning-aning nirya deice tam talibuka, Weik Erenanye ulirye, nun ti melibuka kalikisulule anya arye, el si erebuka mot senamabe,” nyabuk yupu

¹Nun nirya ara, kil-kil kanye deibuka, nun ni Allah Yahweh el ti, mot sebibirye, el si uk erenamabe. Allah elda, nun lyelosulul anya arye, weik yupu deice arye mot sebuka el si erenamabe. Mutuku yangan keil weik mikip arye bulamle atonun, Allah el babye, aning atonun weik mikip arye lyesulule. ²Aning ati ara, nun nirya arye, el damak bulubuka wekibirye, kanye deibuka, el ti, “Telebe,” nyabuka mot senamabe. Tonda kanye deibibirye, mot sena ati, pong-pong ana ap, mot sena yuk ning ap deice arye, “Allah ulul ning nirya ara fia telebe. Elda weik mambulnye,” nyabuka, Allah el si erebuka, si eren mot senamabe.

³Allah Yahweh el si erenamapa ara, talye ati kume. Deiyok ara, nun Ni Koprop Allah el si Yahweh, elda aning-aning nirya deice tam erebuka,

talibuka Weik Deiyoknye ulula anya arye, talye ning bukni, ninye arye, 'Nun ni,' nyabuka, si erenyak Isa Mututku Dongonye ap, isa mer nirya ap, yuk mikip ulul ning aning-aning nirya ap, el amutam uk unyake. Allah elda, mikip weik ubuka erenanye ulule.

⁴Tukwak mutuku ap, tukwak mutuku noutamak ubuk ning ayala-yala nirya ap, tukwak mutuku amutam uliba, ninye arye kum elinyak ning ap, tonda mutuku deice ulul ning ap nirya ara, elcuk kwepdeiamukce, talilule. Tuku amutam arye diprongobuka, weik mutuku deice ubuk ning nirya, elcuk kwepdeiamukce, talibuka ulule. ⁵Aning atonun, weik pala laut mekwen ap, tukwak mutuku nirya ara, Allah elcuk kwepdeiamukce, talibuka ulule. Aning-aning nirya talibuka weik deiyoknye ulule.

⁶Aning ati ara, Allah Yahweh elcuk, nun nirya kwepdeiamsuk anya arye, nun nirya arye gutam tuku dipdongobuka, nun ni Allah Yahweh el si atibuk erenamabe. ⁷Deiyok ara, talye ati kume. Nun Ni Koprop Allah elda, nun weik deiyoknye ulule. Nunda, el amutam uk ulamipibuk, elce nun ti moubuka kalikisulule. Winipmanto ara, domba basam weina deiyok nang arye, sik domba basam moubuka kalikin makirye, sik din ning ati, mutmuta maning teleb ak deibikirye, teleb ubuka weilamak touk, nun ni Allah arye, nun Israel yala ninye nirya ati, 'Na tenena ninye' tenen, melibuka kalikisulule.

⁸Allah arye nyasulule. Atalak noutamak, na Allah arye nyasinye yupu nirya, kekepmunyop ura, ayupu moubuka talepmunce, dobolbanlulume. Anggun deipkiripdop nang, Meriba mutuku noutamak ulamikce, 'Nun lik' tenen, kat kanye bomik touk, kum unamlulume. Aning atonun, mek fia kumak ati, ninye kum unyakak, weik fata mutuku, el si ara Masa mutuku noutamak, anggun apu yapu yangalamikce, malye yupu weik nyapnin yangalamik tonun, kum nyanamlulume.

⁹Anggun apu yapu nirya ara, na arye fia mambul fil weik dolamsa deice arye, sik ti melilamse ning nirya ara, moubuka elilamik bukni, aning nirya ati moubuka tenena kum arye, sik amutuku bisik bitinye yangalamik talak ara, anggun apu yapu arye na ti, malye ulamika deice arye, na ti asildelamnik. Ara, na arye sik damak ati, ninye winipmanto kum ning, winipnin yangalamsiba, sikce na ti asilelamnik.

¹⁰Awinilelamnik ning ara, keteng tamun yupa tonok keba odeikin, 40 puluh tahun noutamak nirya, anggun apu yapu bisik yangalamik talak ara, malye weik ulamika anya arye, na arye sik ti yu ulamnukba fia malye kanye bolamse. Tonda, na arye sik ti nyalamse. "Na arye nyalilamse yupu ap, diksukum ubuka winilamse ning ap ara, moubuka kum tenyamikce, talye kanye bobuka, malye upnin yangalamikba, yu ulamnuk.

¹¹Ati ara, na arye sik aninye nirya ati, fia yu ulamnuk. Winibuka, 'Aninye ati teleb kiliseneba, sik ilil tenena kum arye, teleb kanye bobuka unamake,' nyabuka, nyalilamse yupu ara, 'Aninye ati fia kum arenamsine,' nyapdeiamse." Allah arye nyabuk.

Mazmur 96

**“Tukwak mutuku unyak ninye nirya arye, Allah Yahweh
el si erena ati, mot senamlume,” nyabuk yupu**

¹Tukwak mutuku ululum ninye nirya ara, nun ni Allah Yahweh, el tibuk winiryuk kanye teleb mot semunce unamlulume. ²Tonda, tuba-tuba el si uk ereipmunce, “Anda fia telebe,” nyabuka, kanye lon mot senamlume. Allah el si Yahweh ulina atibuk unamlume. Ara, elce nun malye ulamupu ning ap, malye wininyap ning nirya ap ati, lyelosulule ati, el si erebuka teleb kilinamabe. ³Ati, ‘Ninye mutuku-mutuku nirya kekenamak’ tenen, el fia teleb ulul ning ap, weik mikip arye fil dolul ning ap ati, laka nyanamlulume. Ara, yata ninye do, ayala-yala nirya arye, ‘Allah el mambul weik ulul ning ati kekenamak’ tenen, Allah arye ninye kum winipmanto ning ulye ning nirya babye, yuk yala ninye nirya kekenmakce sukumak laka nyanamlulume.

⁴Yuk ninye im sirya, mutuku sirya kekenamakak nyanamlumak ara, talye ati kume. Deiyok ara, Allah el si Yahweh weik erenanye ulula atibuk, teleb kilinamabe. Yuk talye ning ap, Isa Mututku Dongonye ap ati, ‘Nun ni koprop,’ tenekirye, ilil ubuka unyak bukni, Allah ara aning-aning nirya deice tam ulirye, weik erenanye ulula anya arye, el tibuk, ilil weik upliba, el si fia erenamlume. Ara, talye ati kume. Isa si erenyaka ara, Allah el mikip atonun ning ton kum ulule.

⁵Ninye mutuku-mutuku nirya arye, sik bidamang taruk arye puturubuka delilamak ning memepdeibikirye, ‘Nun ni ani,’ tenen, aning talibuka, el ti si erenyake. Tukwak mutuku talibuka si erenyak isa mer nirya ara, talye aulul ning urasin atonun, ubuka deibikirye, si erenyake. Bukni, nun Ni Koprop Allah Yahweh arye, im deice ulul ning nirya kwepdeiamuke.

⁶Allah elda fia teleb ulirye, elda weik erena ap, weik mambul weik ap ululnye ulule. Tonda, el si erena aik fum bisik, el aulula anya arye, anyaik wekuka dinyap talak nirya ara, ‘Se, nun ni Allah ara, dipkoprop fia mikip weiknye ulirye, elda, weik teleb ulirye, el mambul ulya ara, laka kum nyaptibye’ tenen, unyabe.

⁷Ati ara, nun tukwak mutuku noutamak unyap ninye ayala-yala nirya arye, nun ni Allah el si Yahweh ati, “Se nun ni Allah ara, dipkoprop fia mikip weiknye ulirye, elda, weik teleb ulirye, el mambul ulya ara, fia teleb uk ulule,” nyabuka, el si erenamabe. ⁸Allah el ap, el si ap, weik mambulnye ulula anya arye, nun tukwak mutuku noutamak unyap ninye nirya arye, el si erena atibuk, el si adib aryuk erenamabe. Tonda, Allah el si erena ati, nun nirya arye teleb arin ning dobuka, el si erena ati, el si eren aik damak boyabirye, arenamabe.

⁹Nun tukwak mutuku unyap ninye mutuku-mutuku nirya, Allah Yahweh ati, se, nun ni Allah, malye ning tonok ning babye kum ulirye, fia diksukumuk ulule. Elda fia etekdopnye ulule. Ati ara, ninye mutuku-mutuku nirya unyak ninye nirya arye, el tibuk, 'Se, weik mambulnye ulule' tenen, ilil asa ubibirye, sirim talinamsile.

¹⁰Nun dib tenenyap ninye nirya arye, sik yuk yala ninye mutuku-mutuku nirya unyak ninye nirya, kekenamakak arye, "Nun Ni Koproprop Allah, el si Yahweh ara, aning-aning deice tam talibuka, ninye deiyoknye ulule," nyabuka, laka nyalbanamabe. Allah arye, tukwak mutuku nirya kwepdeibukba, fia darabdongbuka uk unamle. Allah tenyamuk talak akunum uplyop ura, tukwak mutuku noutamak unyap ninye nirya arye, wininyap ning nirya ati, "Teleb ning ani, malye ning ara ani," nyapliirye, elce ninye yupu bokuka, wilibuka deipnamsile. Ara, ninye nirya winilamak touk, diksukumuk ubuka, yupu bokeipnamsile.

¹¹Im deice ap, im noutamak ulul ning ap, tukwak mutuku-mutuku nirya ulul ning ap, ninye nirya ap arye, kanye deibuka unnamlume. Tonda, weik pala laut mekwen deibukak babye, laut mekwen noutamak ulul ning nirya arye, Allah atibuk weik yupu deice arye nyapnunce, el si erenamllume. ¹²Atonun mutmuta palamle mutuku ulul ning nirya babye, tonda ninye arye, wa win dam koulamap ning damak ulul ning nirya babye, weik yo tikamlye noutamak ulul ning nirya babye, aning ayala-yala nirya, weik yupu arye Allah ati, el si erebuka kinamake.

¹³Nun nirya arye, Allah Yahweh ati, el si erebuka kinamapa ara, talye ati kum wininamabe. Deiyok ara, Allah yanamle talak ara, nun yupu bokeiplirye, wilipdeipnamsila ati, el si erenamabe. Tukwak mutuku-mutuku nirya noutamak unyap ninye nirya ati ara, ninye fil donyap ning ati, apil-afil donyap touk, "Teleb ning ani, malye ning ani," teneplirye, nun wenena ati yupu bokdeipnamsile. Winibuka yupu bokeipnamsil talak ara, malye una kum aryuk, tonda, tilila yupu nyana kum dib aryuk, fia diksukum ubuka yupu bokeipnamsile. Allah arye nyasilye yupu, el dipkoprop yupu deice arye, yupu lipsisikuka bokeipsilirye, wenepnamsile. Ati, Allah el tibuk el si fia erenamabe.

[Minop talak sekamik yupu ara, pasal 97-99 ton aubuk bukni, nunce aning kum sekuba ati, otam pasal 100 dukdongobuka nyapnin banamlulume.]

Mazmur 100

"Allah el tibuk, 'Elda fia teleb ulule,' nyabuka, mot deice arye senamlulume," nyabuk yupu

¹Nun tukwak mutuku im sirya, mutuku sirya noutamak unyap ninye nirya arye, Allah el si Yahweh¹ atibuk, kanye deibuka mot senamabe.

¹ 100:1 *Yahweh* – Allah el si kopropa ara, Yahweh ulule. Indonesia Alkitab noutam ara, Allah el si Yahweh ulul sukum ara, TUHAN sekenyake. Ayupu bikna ati ara, laka nyan yupu nomor 49 dipdelulume.

²Allah ati kinamapop ura, weik kanye deibibirye, el si erebuka teleb kilinamabe. Winibuka unamap talak nirya, kanye deibibirye, el dam uk yanuka, kanye lon mot, fia teleb ning arye, el si erebuka, mot senamabe.

³Tonda, nun moubuka tenepnamnyabe. Allah el si Yahweh ululnye bira, Allah tonok ulule. Allah elcuk nun tukwak mutuku ninye nirya kweipdeipsuk. Kwepdeipsukce, nun nirya ara, Allah el ning uk unyaba ati, elcuk moubuka talisulule. Domba deiyok nang arye, sik domba basam bobuka mutmuta palamle mutuku, teleb ak deibikirye, kalikuka dilamak touk, Allah Yahweh arye, nun ti bico tenepsilirye, melibuka kalikisulule.

⁴Ati ara, el si erena aik bublan wekelbanamap talak nirya ap, el si erena aik dam ninye wekenak bulubuka wekelbanamap talak nirya ap, Allah el ti, “Se, anda fia teleb uk ulyame,” nyabuka, teleb yupu nyana deice arye banamabe. Anyaik dam ap, anyaik koprop ap, wekelbinamap talak nirya ara, Allah ati, “Se, ance bico tenebuka melilamsulum ning nirya ati, telebe nyanmakiyabe. Anda fia teleb uk ulyame,” nyabuka, mot sena deice arye, nun Ni Koprop Allah el si atibuk, teleb kilinamabe.

⁵Ara, talye ati kume. Deiyok ara, Allah Yahweh ara, teleb uk ulirye, nun ninye ati bico tenepsilirye, fia tuba melisilya ara, fia kum bataknamisile. Allah arye, “Wininamsine,” nyabuka nyalina yupu deice nyasilye touk, fia dipkoprop winilule. Minop talak dorapce deibikba, dadeipdanin yanganyap ninye nirya ati, tuba-tuba tenesilirye, melisulule.

[Minop talak sekamik buku ara, pasal 101-102 ton aubuk bukni, nunce aning kum sekuba ati, otam pasal 103 dukdongobuka nyapnin banamlulume.]

Mazmur 103

Sisinanye Raja Daud arye, Allah ati, mot sena deice arye “Telebe,” nyabuk yupu

¹Na Daud arye nyapne. Na kanye talima noutamak, fia moubuka tenipna arye, na Ni Koprop Allah el si Yahweh atibuk, “Se, anda fia teleb ulyame,” nyabuka, el si erebuka kinamne. ²Na kanye talima noutamak fia moubuka tenipna arye, na Ni Koprop Allah, el si Yahweh atibuk, kanye deipnirye, el si uk erebuka kinune. Allah arye na ti, bico tenenilirye, teleb kibuka melinilya ara, fia kum batakanamne. Aning ara, fia tenina uk unamne.

³Na malye wininun ning nirya ati, namin kinilirye, kum kibuka deiplyop ura, lyenulule. Tonda, na uk talepmanilye ning nirya, kum kipdeiplirye, kwetepnilyop ura, tuba tamubuka tonap teleb kilinulule. ⁴Allah arye kum melipnutop ura, dipkoprop malye unyak ninye dibikiba, balamak sukumuk bitinye bukni, Allah elcuk lyenulule anya arye, dipnyop ura, diplomik ninye unyakak ara, kum binuka unamne. Na ara, kam uk unamne. Tonda, Allah arye bico tenenilirye, melinilya deice arye, tuba-tuba teleb kilinulule.

⁵Allah aryuk teleb ning ayala-yala nirya arenilya deice arye, teleb uk kilinulule. Winibuka kam una deiyok ning arenilya deice arye, minopce min kum dipnamne. Maplye maka keteng tamun weik arye kam ulamle touk, Allah melinilya deice arye, keteng tamun yupa weik kam unamne. Kam una deiyok ning arenilya deice arye, winitalak ara, kamnye ulamle touk, kiliniliba teleb uk unune.

⁶Yata ninye do nirya, yuk nang arye, sik nong deice ikin ning weik deibikirye, ikin fil delinyakba, imun kanye bobuka unyak ninye nirya ati ara, Allah el si Yahweh arye melilule. Ara, malye una kum dib aryuk, diksukum ubuka melilule. Tonda, yuk nang arye, sik amutam unyak ninye ati, 'Anang ara yanibibiba, malye kanye bonamake,' tenenyak bukni, Allah arye, 'Sik amutam unyak ninye ara, lyepnirye teleb ulinamle,' tenenilirye melinulule.

⁷Minop talak ara, Allah arye nun apu koprop Musa biti, "Winibuka unune. Teleb binamlum bisik ani," nyabuka, Musa dam yanuka laka nyalamukba, el tenelye ning nirya, Musa kekelamukce, nun apu yapu, sik Israel yala ninye ati, laka nyalbalamukba, kekebuka kel biklamik. ⁸Allah el si Yahweh arye ninye nirya ati, kanye talima arisiliba bico tenenanye ulula anya arye, nun malye wininyap ning ati, wenebuka oplopsutu bukni, minopce yu kum tenesulule. Aning kum bukni, bico tenepsilirye, tuba-tuba nun ti yamubuka aresulule.

⁹Tonda, nun tukwak ninye arye, malye wininyap ning ati, fia tuba-tuba ati, yu upliba kum wenesulule. Tonda, elce, "Anggun malye ululum ninye ara, malye weik winilulum ning ara, ani," nyabuka, tuba-tuba kum wenesulule. ¹⁰Nun malye wininyap ning ati ara, talye mangkau kibuka wenepsuturye, obuka kum kipdeipsutue. El nyasilye yupu yaniltana uk, wininyap ning nirya dekna ati, weik ikin ning nun nong deice deipsutu bukni, aning babye kum winisulule. Bico tenebuka melisulule. Amalye un ning nirya, malye ulamap atonun, kum wenesulule.

¹¹Allah arye minopce kum wenesulula deiyok ara ani. Ara, Allah ati ilil uliba, el amutam uk unyak ninye ati, elce tuba-tuba bico tenesulule. Tukwak mutuku outam, im deice ara eitam, anutamak weik lo aupmalye touk, Allah arye, bico tenesulul ning ara, kum nukmanto. Nun ti batakana kum dib aryuk, fia weik arye bico tenepsilirye, tuba-tuba melisulule.

¹²Tonda, keteng yangan tam arye, keteng wekelben tam fia pere ulamle touk, nun malye winipmapye ning ara, dobuka delilbalule. Nun malye ning namin kipsilirye, lyepsilyop ura, nun malye wininyap ning dobuka, fia yukak donokolbalule. ¹³Winiplirye, nun ti ara, sik ni yapu arye, sik mapu ati, bico tenelamak touk winisulule. Ara, Allah Yahweh atibuk ilil upliba, el amutam unyak ninye nirya ati, weik arye bico tenesulule.

¹⁴Ara, talye ati kume. Allah arye bico tenesilye ning ara, ‘Tukwak mutuku unyak ninye ara, kanye talima mikip ninye kum unyake. Sikda mikne tuku dopropsa deice arye, sik apu koprop Adam kwepdeiyamsa anya arye, sikda, mikip kum, malye ning uk talibuka unyake,’ tenesulule.

¹⁵Nun tukwak mutuku unyap ninye nirya ara, nun kam un talak ati ara, bumang uk unyabe. Winipmanto ara, mutmuta pabuka tikamlya ani, anutamak arye mutmuta kita tia talak uk opmalya ara, keteng bupu arye tin upliba, sesal leplirye, kum ulamle atonun unyabe. ¹⁶Mutmuta kita oplirye, aupmale bukni, kum yanuka, dopliba, mutmuta kita, tia opmalye ning selal lebuka, dakalsaklamle. Akapsaklyop ura, aminyan talak ara, ninye arye, ‘E, mutmuta kita obuk ning ara, asukum wamuk’ tenen, eibuka kum bikinyak tonun, nun ninye babye, dibipyop ura, yuk ninye minopce lubakisinyake. Dortalak yanamle keteng tamun noutamak ara, yuk nang arye, “Anye bira, asukum ulamuk,” nyabuka laka kum nyaptinge.

¹⁷Bukni, Allah ati ilil upliba, el amutam uk ukirye, el ti talinyak ninye ara, aninye ati ara, Allah el si Yahweh arye, sik ti bico tuba tenepsilirye, melisulule. Tonda, aninye arye deibikiba, dadeipdanin banamak mapu babye, Allah arye diksukum kibuka melipsilirye, sik ti teleb ulinamle. Aninye ati, fia kum bataknamle.

¹⁸Aning atonun, yata ninye do nirya, Allah arye, “Wininamsine, angguncne wininamlume,” nyabuka, nyalina yupu deice deiamsuk yupu ap, tonda elce, “Wininamlulume, aning ara fia kum wininamlulume. Teleb una ara ani,” nyapdeiyamsuke yupu nirya ap, ayupu atibuk moubuka tenebikirye, aning uk talibuka dobolbanyak nang ati, Allah arye fia tuba-tuba bico tenebuka melinamle. Aninye ati, fia kum bataknamle.

¹⁹Nun Ni Koprop Allah Yahweh ara, aning-aning deice tam ulirye, weik deiyoknye ulirye, aning nirya talilule. Aning-aning nirya ara, el amutam uk ulule. Allah elcuk aning ayala-yala nirya talibuka, im deice uk ulule.

²⁰Aning ati ara, Allah el im deice fil talibuka donyak nang, sik malaikat nirya ara, Allah elce, “Winamlulume, amutuku binuka fil donamlulume,” nyalilul yupu nirya, kekepmunce, anyalye touk fil dobuka ululume. Anggunda, weik mikip malaikat ululume. Allah aryuk, “Wininamlyame,” nyabuka arisilye yupu nirya ara, kekebuka ululume. Ati, anggun malaikat-malaikat nirya babye, Allah Yahweh, el si uk erenamlume. ²¹Anggun im deice ululum malaikat nirya, Allah el amutam uk umunce, Allah nyasilye touk, ayupu moubuka kekepmunce, el fil uk dolulum malaikat nirya arye, Allah Yahaweh el tibuk, “Anda fia teleb ulyame,” nyabuka, el si erebuka kinamlulume.

²²Tonda, Allah arye kwepdeiamuk ning nirya ap, kwepdeiamukeny ninye nirya ap arye, Allah Yahaweh el tibuk, “Anda fia teleb ulyame,” nyabuka, el si erebuka kinamlulume. Allah arye, aning-aning deice

tam talibuka ulirye, Weik Erenanye ulula anya arye, el amutam ulul ning nirya arye, Allah ati “Se, anda fia teleb ulyame,” nyabuka, el si erenamlume. Tonda, na Daud arye nyapne. Na kanye talima noutamak, fia moubuka tenipna arye, na Ni Koprop Allah el si Yahweh atibuk, “Se, anda fia teleb ulyame,” nyabuka, el si erebuka kinamne.

Mazmur 104

**“Nun nirya arye, Allah Nun kwepdeibsuknye ati,
si erebuka, kinamap,” nyabuk yupu**

¹Na ni Allah Yahweh, anda weik erenanye ulyame. Ati na kanye talima nirya, an deice deipnirye, “Anda fia teleb ulyame,” nyabuka, an si uk erekunune. Se, na ni Allah Yahweh, anda fia mambul weik ulyame. Winipmanto ara, ninye arye fia teleb butum aling ongopmakirye, urasin fia teleb ulamak touk, anda weik erena ap, fia mambul una ap, urasin fia telebnye ap, ulyame. Ati an si uk erenamkine.

²Nun ni Allah el dirina weiknye ulule. Ninye arye urasin teleb butum aling ongolamak touk, el deice dirina weik ulule. Tonda, ninye arye, kanam aniryuk butum aling bol dobuka, tia yanuka una ati, doltakna aik tapu bibiktalebuka, kiriklamak touk, anda im deice ulul ning nirya kwepdeiplumce, teleb kipdeiplume.

³Tonda an ulyamak, im deice ara, ninye arye weik cang aik alip tam dobuka welebalamak tonun, ance an ulyamak nirya, im deice dipdongobuka doplume. An aik nirya ara, im noutamak ap, tukwak mutuku ap ulamle mek nirya, outam aulyeba, ance doplum asik ara, aning nirya deice tam, im deice arye doplume.

Winipmanto ara, ance tukwak mutuku yangaminye talak ara, an bisik ara, dua deice atikmince, banumin talak ara, dua deice bukminba, kum arye bobuka bakulule. Dua ap, kum ap ara, an amutam ulirye, ance, ‘Winipnamle,’ tenepminye touk, an fil uk dolule. ⁴Aning-aning nirya talibuka ulyama anya arye, kum ap, uku ap ara, an amutam bukuka ulula anya arye, ance, ‘Winipnamle,’ tenepminye touk, an fil uk dolule. Tonda bebeya lakna ara, an melina ning uk ulule.

⁵Tukwak mutuku-mutuku nirya dobuka, weik mutuku yangan keil deice deiplume. Ninye arye aik dopnuce talak, ayukumna yo ikildaralamak atonun, ance, ‘Tukwak mutuku nirya long-long aplirye, kum kum danamle’ tenen, tukwak mutuku amutam mutuku yangan keil deiplumba, fia darapdongobuka, fia ati aunamle. ⁶Ance aning-aning nirya, min kum kwepdeiplum talak ara, tukwak mutuku deice weik mekwen deiamukba, tukwak mutuku lakak kum wamuk. Weik mutuku dup babye, mekwen noutamak karu fum tam wamuka anya arye, mutuku dup babye kum eipmanto wamuk.

⁷Winibuka uamuk bukni, nun ni Allah ance mekwen ati, “Dana-dana tam kipropyame,” nyabuka, weik yupu deice arye nyaplumba, amekwen nirya dana-dana tam kiprobukba, tukwak lakak ubuk. Liman olamle touk, ance weik yupu deice nyaplumba, mekwen nirya ara, adib aryuk minopce dana-dana tam kiprobuk. ⁸Mek obuka balamukak ara, mutuku konak arye, pu dobuka lyu tam balamuk. Ara, ance, ‘Weik mekwen asukum uk deipnamle’ tenen, kwepdeiyalum touk, mekwen balamuk arye, deibuk.

⁹Ancuk mek delilbinamukak akunum kintinibuka deiyamlum touk, asukum uk tuba ulule. Tonda, ‘Asukum uk deipnyop ura, deibuka langdibuka kum dinipnamle’ tenen, kwepdeiyalum touk, weik pala laut mekwen ap, yuk mekwen ap ara, ‘Aunamle,’ tenyamlum touk deiplume. Awiniplum ning ara, ‘Mek langdepsaklirye, ninye ulamica damak yanuka deiplirye, diplyak’ tenen, winiplume.

¹⁰Aning winiplum ning ara, Allah ancuk mutuku bulamla amutam bisik botoeiplumba, mek panabuka yangalule. Mek panabuka yangalirye, dana-dana tam mutuku dup aupmalya ara, noutam ara, mek balule. ¹¹Winiplum ati ara, ‘Bura tam talye kam daunyak ning nirya, mek uk dinamak’ tenen, winiplume. Aning atonun, bai tam ulul ning, keledai basam nirya babye, ‘Mek pataplye talak, mek dibikirye unamak’ tenen, areplume.

¹²Maka ara ayala-yala nirya yo taruk deice aik dobikirye, ‘Yo poula damak ukirye, yupu tanamak’ tenen, kwepdeiplume. ¹³Tonda, im deice mutuku arye mutuku dam mok dolkwetelyame. Winipmince, tukwak mutuku nirya ara, ance kwepdeipnulum ning, aning-aning weik betekuka, teleb uk palule.

¹⁴Ninye arye weinyak kam ulul ning yala nirya, sapi basam do, domba basam do, aning nirya ati, ‘Sik dinamak’ tenen, mutmuta arelyame. Aning atonun, ninye ati ara, ninye arye wa wibikiba, koulamak ning aning-aning nirya arisilyame. An melisiminya deice arye, tuku noutamak arye, din ning aning-aning nirya palirye, butukiliba, bobuka dinyabe. Winisiminya deice arye, tukwak mutuku deice kam ulul ning, aning-aning nirya ara, din ning dinyake.

¹⁵Tonda, anggur yo dokamica ani, ninye arye dakuka dibicop ura, kanye deibuka teleb unyake. ‘Zaitun yo duk telel doprobikirye, sik asok deice likikiba, urasin teleb unamle’ tenen, zaitun yo duk moulamle yo ton, aripsulume. Tonda, ‘Ninye tukwak ninye nirya din ning dibice ura, sik nong mikip upnin banamle,’ tenen, roti din ning babye, yuk din ning aning-aning nirya babye, arisilyame.

¹⁶Allah Yahweh, elcuk Libanon mutuku wabum yo, el si ara, kepyal yo nyalamak yo kouamice dam ara, mok weik arye areliba, teleb ubuka palule. ¹⁷Ayo dupak, mitik maka ayala-yala nirya, sik aik donyake.

Tonda, cang yan ap, kurun pol ap ulul maka, el si ara, tanggung maka, weik cang yo dupak, sik aik donyake. ¹⁸Weik arye erebuka bukuk mutuku dupak bai tam kambing keil si deice balirye aulule. Tonda, 'Mutuku bukдика amutam keil amutam unamak' tenen, mutuku dup keil deice balamle ning, el si ara ayam mana (pelanduk) kwepdeiplume.

¹⁹Allah ance wala kwepdeipluma ara, 'Ninye arye, e, ara li talak ani, bupu li ani, mok celye li ani, yuk li talak nirya ara uple' tenen, kel bikna ati wala kintinibuka deiyamsulume. Tonda keteng babye binuka weknulye talak ara, keteng el balye bisik kel anye arye, abisik uk kum ulule. ²⁰Allah ance inina ning aripsuluma ara, asum-asum nirya inilamle. Akunum iniplye talak ara, bai tam ulamle ning keteng noutam banyak ning ara, bukuka lukunyan banyake. ²¹Tonda, bai tam ulul weik kus atonun ning, el si ara singa kus, 'Na din ning ton, Allah arye kintinibuka deipnuk ning ton, diptinye' tenen, weik yupu nyapliye elbalule.

²²Wininmake bukni, bereklyop ura, asinga kus nirya, keteng noutam talak sik dungnubuka malamak sukumuk, tamubuka malbanyake.

²³Lukunyan noutam balamle ning ara, sik malamak sukum tamubuka bice ura, ninye tukwak ninye nirya bukikirye, sik fil dopra banyake. Afil ayala-yala nirya donmaca ani, akunum iniplyop ura, sik fil batakirye, tuba tamubuka sik asik malbanyake.

²⁴Se, nun ni Allah Yahweh, ance fil dolyam ning aning-aning nirya ara, fia weik awinilyam ning ara, ninye arye kum nuktibye. Anda dipkoprop weik kel bikna deice arye, aning-aning nirya kwepdeiyamsulume. Winibuka winipsulumba, tukwak mutuku noutamak nirya, ance kwepdeiyamsulum ning, ayala-yala nirya weik aulule. ²⁵Aning atonun, Allah ancuk, weik pala laut mekwen kintinibuka deiplumba, mekwen amu unyak ning mitik ning ap, weik ning ap, mekwen amutam tuku deice balamak ning ap, mekwen noutamak balamle ning ap, fia weik unyake. Aning nirya ara, fia kum nukmanto.

²⁶Tonda laut mekwen fum tam, weik nong weik mekwen fum bal el si ara, Lewiatan, ance kwepdeiplumba, laut mekwen noutamak arye, mikip dobuka balule. Tonda, ance kwepdeipsulum laut mekwen deice tam, ninye dobikirye, weik mek lia yo, el si ara, kapal laut, akapal fum tam wekikirye, laut mekwen deice banyak ning babye elinyabe.

²⁷Yata yala kam ulul ning do nirya, sik nirya ara, Allah an tibuk, 'Yata talak arye nun din ning aripnamsil do?' tenen, fia kintinibuka dikinyake. ²⁸Ninye do, yuk kam ulul ning ayala-yala nirya do, ance nun din ning aripsuluma ara, nunce bulubuka dinyabe. Tonda, ance kintinipsulum ning, an taruk arye bibiktalebuka areseminba, tukwak mutuku kam ulul ning nirya arye, nun din ning dibipyop ura, bousulule.

²⁹Bukni, nun ni Allah, ance nun nirya ati, lik ukilye talak ara, bataksimince, nun ton kum dilyasiminye talak ara, nun ilil weik upsiliba, imun kanye bobuka unyabe. Tonda, ninye do, yuk kam ulul

ning do, ance nun isin dopropsiminnye talak ara, adib aryuk dibinyabe. Akunum dibipyop ura, ninye babye, yuk talye kam ulul ning babye, tuba tamubuka tuku uk dongolbanyabe.

³⁰Bukni ance nun ap, yuk talye kam ulul ning ayala-yala nirya ap ati, ‘Mapu deibikiba, kam unamaka,’ tenepsimince, isin tuba aripsiminnye talak ara, mapu ton deibibyeba, kam unamake. Ance kam una deiyok ning aripsiminnye deice arye, talye kam ulul ning do, ninye do, mapu deibibyeba, dadeipdanin, banamak mapu ap, kam ulul ning deipdanin banamak mapu ap arye, tukwak mutuku-mutuku nirya binuka unamake. ‘Winibuka-winibuka,’ tenesiminnya deice arye, tukwak mutuku nirya teleb ulisilyame.

³¹Ati nun ni Allah an si ara Yahweh, an fia teleb winilyam ning ap, weik mikip arye fil dolyam ning ap, ninye nirya arye an ti, “Elda fia telebe,” nyabuka, an si erenamkiyak ning ap nirya ara, ‘Aning nirya fia ati aunamle’ tenen, moropkine. Tonda, anda Allah Yahweh, ance kwepdeiyalum ning dimince, ‘Aning nirya ati kanye deibuka teleb unalam’ tenen, moropkine.

³²Se, nun ni Allah anda talinye kume. Tukwak mutuku dilyamin talak ara, mutuku nirya lulukulule. Tonda weik bulamle mutuku nirya yanuka bol piptyop ura, asukum arye uku diplirye, weik tulum welelule.

³³Aning nirya ati ara, na kam unamne talak ara, Allah Yahweh, el tibuk kinmanirye, mot senamne. Tonda, na tuba aunman talak ara, Allah ati, “Anda fia teleb uk ulyame,” nyabuka, kanye lon mot senmanirye, kinamne. ³⁴Atalak-atalak noutamak nirya, na kanye talima noutamak tenenamne ning nirya babye, Allah dinilirye, kel biknilyop ura, ‘E, el tenelul ning ara, teleb uk ulule, tenepnilirye, kanye delinamnile’ tenen, moronune. Ara, talye ati, kum nyapne. Na ni Allah Yahweh, el tibuk, na kanye delinuna ati nyapne. El melinilya deice arye, kanye deilinune.

³⁵‘Ninye malye ning uk talibuka unyak ninye nirya ara, tukwak mutuku arye kum daneipnamle’ tenen, moronune. Aning atonun, yu tenebuka malye kanye bonyak ninye nirya babye, ‘Allah arye aninye wenebuka, kum daneipnamle’ tenen, moronune.

Na ni Allah Yahweh, anda Weik Erenanye ulyame. Ati na kanye talima nirya an deice deipnirye, “Anda fia teleb ulyame,” nyabuka, an si uk erekunune. Nun tukwak ninye nirya arye, Allah ati, “Anda fia teleb uk ulyame,” nyabuka, ‘Kanye lon mot senmabirye, teleb kilinamabe’ tenen, moronune.

Mazmur 105

Allah el ti dib tenen nang ati, nyabuk yupu

¹Allah ati ‘Telebe,’ nyapmunce, el weik mambul yupu nyabuk ning ara, ninye mutuku-mutuku nirya ukcak, laka nyanamlulume. ²Allah el

tibuk, kanye lon mot sena deice arye, “Allah elda ninye kum winipmanto ning nirya, fil dolulnye,” nyabuka, el si uk erebuka nuknin banamlumba, ninye nirya arye, ‘Ayupu ara mambul yupu’ tenen, kel kipnamake.

³Allah el nong ara, fia telebnye ulule. Ati, nunda el na tenen nang unyap anya arye, nunda kil-kil kanye bobuka unamabe. Anye atonun, yata ninye do nirya, Allah ati si erenyak nang nirya ara, kanye deibuka, fin-fin asa arye unamake. ⁴Nun Israel ninye nirya arye, Allah Yahweh el tibuk, asum-asum nirya si erebibirye, “An weik mikip ara nun aripsimince, nun dam uminyop ura, adeice arye nun mikip uk unamabe,” nyabuka, asum-asum nirya moronamabe.

⁵Allah arye ninye kum winipmanto fil dolamuk ning ap, “Aning uk moubuka talipnamlume,” nyapdeiamsuk yupu ap, ninye yupu bokeiyamsuk ning nirya ara, moubuka tenepmunce, talibuka unamlume. Tonda, fia luba kum kipnamlulume. ⁶Se, Allah el amutam ulamukce, el fil donanye Abraham arye deiamsukba, dadeipdanin yangalulum ninye nirya ap, tonda Allah arye, wibuka deiamukce, akuamuknye Yakub birye deiamsukba, dadeipdanin yangalulum ninye nirya ap arye, Allah elce ninye kum winipmanto fil dolamuk ning ap, tonda, “Aning uk moubuka talinamlulume,” nyamsuk yupu ap, aning uk moubuka talipmunce, tenenamulume. Fia kum luba kipnamlulume.

⁷Allah Yahweh elda, nun ninye deiyoknye usulula ati, elce nun ti, “Aning ara wininamlulume, aning ara kum wininamlulume,” nyapdeiamsuk yupu ara, tukwak mutuku-mutuku nirya unyap ninye ati, nyapdeiyamsuke yupu ara, nun dam fia aunamle. Aning uk talibuka unamabe.

⁸Allah elce nun ti, “Wininamsine,” nyabuka nyalina yupu deice arye nyapdeiamsuk yupu nirya ara, ton kum luba kipnamle. Fia tuba tenenamle anya arye, tonok ning babye kum bataknamle. Ayupu nirya ara dipkoprop nong upnamle. Tonda, Allah arye, “Aning ara wininamlulume, aning ara kum wininamlulume,” nyapdeipsuk yupu nirya ara, fia ati aunamle. Minop talak arye aulamuka atonun, atalak babye aunamle. Doryanamle talak babye, fia ati aunamle. Kumu kum danamle. Fia aunamle.

⁹Allah Yahweh el nyalina yupu ara, nun apu Abraham ap, Isak ap, sik damak nyapdeiyamuke. Allah Yahweh arye, “Winipnamsine,” nyabuka nyalin yupu ara, Abraham el dam nyapdeiyamuke. Ayupu ara, dipkoprop Abraham el mi Isak deice yanuka dukdongobuk. Ati, ayupu fia tuba-tuba tenelule. ¹⁰Tonda anyapdeiyamuk yupu uk, ‘Tuba aupnamle’ tenen, ila tamubuka Allah arye Yakub el dam yayukce, “Minopce nyapkise yupu ara, dipkoprop nong upnamle,” nyabuka, tuba tonap nyapdeibuk. Ara, Israel ninye nirya arye, ‘Ayupu uk fia moubuka tuba-tuba tenena arye, teleb kipdeipnamsine’ tenen, yanuka nyapdeibuk. ¹¹Nyabuk ning ara, Allah arye sik Abraham ap, Isak ap, nun Israel ninye ap ati, “Kanaan

mutuku aripsiniba, anggun mutuku atonun umunce, fia ati amutuku talibuka unamlume,” nyapdeibuke.

¹²Minop talak, Allah el mapu Israel ninye, Mesir mutuku ulamik talak ara, ninye asik nang atonun ulamik. Sik Israel nang Mesir mutuku ulamik nang nirya ara, sik yupa mitikanun uk ulamik. Weik kum ulamika anye arye, yuk mutuku ninye nirya arye sik ti, ‘Daubikce, aninye ara mambul kume,’ nyabuka tenelamik. ¹³Sik Israel ninye ara, tonok mutuku uk kum ulamik bukni, amutuku-amutuku nirya, sicuk pakalilamikba, ton mutuku ulamna ani, batakuka yuk mutuku binuka ulamik, amutuku arye lopdakuka, yukak balamik. Adeice arye, sik aninye nirya ara talye bisik bana uk ulamik. Tonok sukumuk darapdongobuka kum ulamik.

¹⁴Winilamik bukni, Allah arye sik anang nirya ati, kum namin kimukba, yuk mutuku ninye arye sik Israel ninye dam, ikin ning ton kum delilamik. Tonda, ‘Sik aninye ikin ning deipnamak’ tenen, sik Ni Koproba Allah Yahweh arye, dana-dana tam weik ninye deiyok kibuka talyamik nang, Raja-Raja ati, “Sikke na mapu ikin ning delina kume,” nyabuka, yupu seklamuk. ¹⁵Allah arye yuk mutuku ninye deiyok nang ati nyalamuk. “Sik Israel yala ninye ara, na arye wepdeipse nang anye arye, sik ti ton kum dupnamlulume. Tonda, na yupu nyapdeipneba, laka nyan nang, nabi-nabi nang, sik dam ikin ning ton kum delinamlume,” nyabuka yupu seklamuke.

¹⁶Tonda, minop talak, Israel ninye arye talibuka ulamik mutuku nirya ara, din patan ning li aribukba, amutuku weik din patalamuk. Winibukce, amutuku noutamak din dilamik ning nirya ara, kum kipnin balamukba, ikin weik ubuk. Allah elce, sik dina dilamik ning aning-aning nirya doprobuk.

¹⁷Bukni, tonoknye Yusup tonok ara, ‘El minopce Mesir mutuku binuka unamle’ tenen, Allah arye wipdeiyamuk. Ati, Allah arye tenelamuk touk, Yusup el du yapu arye, Mesir nang dam dekit ura, minopce binamukce, Mesir nang sik fil melibuka donanye kibuka, fil melibuka ulamuk.

¹⁸Atalak, anye bira Yusup el yan ara, kat tapu arye fia koupdongamik. Tonda, el ngang dam ara, ikin ning rantai besi arye karakeiyamike.

¹⁹Winyamikba, Mesir mutuku ninye deiyoknye, ikin kanye bobuka ulamukce, Allah arye nyalamuk yupu ati, ‘Aning winipnamle do? Yata ning wiripnamsil do?’ tenen, mambul kanye bobuka, ulamuk bukni, Allah arye Yusup biti melyamuk deice arye, Yusup elce, “Doryanamle talak ara, aning winipnamle, aning ton winipnamle,” nyabuka laka nyabuk. Yusup birye laka nyabuk touk, aning uk dukdongobuk. Winibuka ati, Mesir mutuku deiyoknye birye, ‘Se, dipkoprop Allah Yahweh arye nyalul yupu ara, dipkoprop ulule’ tenen, bikuk.

²⁰Aning kel bikuka deice arye, Mesir mutuku ninye sik weik ninye deiyoknye birye, Yusup biti tapu koubuka wenena aik dongamika ara, “Lopdeiplulume,” nyabukba, lobdeibukce, adib aryuk wenena aik noutamak arye, lopdongamikba, teleb ubuka ulamuk.

²¹Yusup akunum lopdeibikba, Mesir mutuku ninye, sik weik ninye deiyoknye birye, Yusup akunum doprobukop ura, Yusup erepdeibuk. Erepdeibukce, nyabuk. “Yusup na talinun bona ning yala nirya ap, tonda na aik dam kalikina ap deiyoknye bira, elcuk kalikilirye, talibuka unamle,” nyabuka, Yusup wepdeibuk.

²²Nyabukop ura, Yusup elcuk, Mesir mutuku talyamuknye birye, nyabuk. “Ancuk, na aik fil don nang ap, wisi-wisi nang nirya ap ati, ance kel bikamlum weik kel bikna deiyok ning peterenalyame,” nyapdeibuk. Tonda, “Yusup elcuk, na fil don nang nirya ap, amutuku noutamak talyamik nang, wisi-wisi nang ap nirya, sik deiyoknye umince, sik anang nirya yupu bokdeipmince, lipsisikilinamyame,” nyapdeibuk.

²³Winibuk talak ara, Yusup el li koproba, Yakub Kanaan mutuku batakukce, Mesir mutuku biyuk. Mesir mutuku biyukce, ninye asiknye atonun binuka ulamuk. Ara, tikilban nang atonun ubuka binuka ulamuk. ²⁴Allah arye Yakub el mapu weik kibuka deipnin balamukce, mikip arelamukba, fia mikip weik ulamika anya arye, sik olan nang arye, yanuka kum obuka bisipmanto ulamik. Israel ninye ulamik mutuku dana-dana tam ulamik ninye ara, mikip mitik asa arye ulamik bukni, Israel ninye ara, mikip weik asa arye ulamik.

²⁵Allah arye Mesir mutuku ulamik nang ati, kanye tamupdeibukba, sik anang arye, el mapu koprop Israel yala ninye nirya ati, derebuka malye yupu nyabuka, weik ikin ning sik nong deice delilamik. Tonda, Allah el mapu Israel ninye sik ti, tilila yupu nyaplobuka, ikin ning deililamikce, amutuku ninye ati, ‘Minina yupu nyabibya deice arye, amutuku ninye nirya arye, Israel ninye ati, ‘Nun lik’ tenenamake’ tenen, talye yupu uk nyalamik. Tonda, Mesir mutuku ninye arye, sik Israel ninye ati tilila yupu uk nyalamik.

²⁶Winilamikba, Allah Yahweh, el melinanye Musa ap, el du Harun ap, Allah elce wipdeiyamukce, ‘Israel ninye melinamdak’ tenen, dopdeibukba, sikda Mesir mutuku birik. ²⁷Sik abitinye nang ara, Allah arye akunum wipdeibukba, sik anang arye, Mesir mutuku noutamak birikce, ninye arye kum winipmanto fil yala nirya ap, tonda ninye winipmanto kum fil yala nirya ara, Allah arye, ‘Winipnamrake,’ tenyamuk touk, binuka winilamdikce, fil dolamdik. Allah arye, ‘Winipnamdake,’ tenelamuk touk, mambul fil binuka dolamdikba, amutuku ulamik ninye nirya arye, ‘Se, dipkoprop Allah, el mikip deice arye fil dolul ning’ tenen, kel bikamik.

²⁸Weik mambul fil dobuka ulamdik talak ara, Allah arye, “Aning ara wininamdurume. Winipdumunyop ura, ikin ning yanuka winipnamle ning ara ani,” nyabuka, nyaiamuk touk winibuk. Allah Yahweh arye Mesir mutuku noutamak nirya ara, kunukne ning uk aribukba, kunukna uk ubuk. Kunukna noutamak ulamik bukni, adeice arye kum kel bikamikce, mandipna kanye bobuka ulamikce, “Allah arye nyalul yupu ara, kum kekenamabe,” nyabuka, el yupu yanilamik.

²⁹Allah elce nyapdeiamuk yupu kum kekepmanto ulamika ati, Allah arye sik wenena ati, elce, ‘Teleb ulul mek nirya ara, tamubuka ining uk danule,’ tenebuk ura, Mesir mutuku noutamak balamuk mek ap, mekwen ap nirya ara ining uk dayuk. Ining ubuka deice arye, amutuku mek noutamak ulamik mekwen fum bal, ikan ayala-yala nirya ara, debuka sirya dakik.

³⁰Mesir mutuku ninye ara, tuba mandipna kanye uk ulamikba, Allah arye aribukba, yakai ayala-yala nirya, weik yupu nyabikce, amutuku yanuka wekuka landibik. Tonda, yakai aniryuk Mesir mutuku ninye sik ninye deiyoknye un damak, fia teleb ak nirya babye, biyikce wekuka langdibik. ³¹Winibuk bukni, Mesir mutuku ninye tuba mandipna kanye uk bobuka ulamikba, Allah Yahweh elce amutuku noutamak ati, “Bum ap, suma ap, weik arye weklulume,” nyabukba, yupu lelim weik arye nyabuka, amutuku noutamak yanuka wekik. Winibika deice arye, Mesir mutuku nirya ara, suma ap, bum ap, sik uk fia weik ubuk.

³²Tonda, Mesir mutuku noutamak ara, Allah Yahweh elce, ‘Dekne duk-duka puru mok cepnamle’ tenen, nyabukce, dopkwetebukba, kubuka, tukwak mutuku sakuk. Adekne duk-duka puru mok tukwak sakalamuk talak ara, tuba-tuba bebea lakna uk unmok. ³³Wininmok talak ara, anggur tapu ap, kwarang yo ap nirya ara, metebuka tukwak uk sakalamuk. Winibukce, Mesir mutuku nang, sik yo ayala-yala nirya ara, metebuka tukwak uk sakanmokce, sirya dakuk.

³⁴Winibuk bukni, Mesir mutuku ninye arye, tuba mandipna kanye uk ulamikba, Allah elce sul kwising yukubukba, sul kwising yupa ara, kum nukmanto, weik arye amutuku noutamak yanuka langdibik. ³⁵Winibikce, asul kwising uk nirya panabuka yayikce, amutuku ninye sik koulamik ning ayala-yala nirya, bok deice yanuka amubikce, dibuka sirya dakik. Tonda, amutuku ninye sik dina ati, tuku deice koulamik ning nirya ara, dibuka sirya dakedongobik.

³⁶Tonda, aning nirya akunum bukni, sik Mesir mutuku ulamik ninye ara, mandipna kanye uk ulamikba, Allah elce, Mesir mutuku ulamik ninye, sik min yuma sal mapu nirya ara, oplobuk. Ara, amutuku ulamikce, kil dopdanuka delilamik min yuma mapu nirya ara, obuka sirya dakuk. Mesir mutuku ninye arye, sik min yuma mapu ati, ‘Nun mapu mikip unamaka deice arye, teleb uk unamabe,’ tenelamik bukni, Allah arye min yuma mapu nirya obuka sirya dakuk.

³⁷Weik ikin ning aning-aning nirya, Mesir mutuku ninye sik deice akunum deibuk ura, Allah Yahweh el mapu Israel ninye ara, Mesir mutuku arye bobuka biyuk. Abobuka banuyik talak ara, Mesir mutuku ninye arye, ‘Minop bitinge’ tenen, Israel ninye ati, urasin teleb ning, dekna weik ning emas ap, perak ap aribikba, bobiyik. Ara, sik weik mikip ap, kil-kil deice ap aniryuk biyik. Israel ninye ayala-ayala nang nirya, neika biyik talak ara, tonoknye babye, anye bira mikip kume, mitang ati nyabuka kum batakuk. Sik nirya mikip arye bindobik.

³⁸Atalak ara, sik Mesir mutuku ninye arye, Israel ninye ati, ‘Se, sik Israel ninye arye opnamsiyak do?’ tenen, kanye imun deice ulamikce,

ilil ulamuk. Winibuka ulamika ati, Israel ninye biyik talak ara, sik Mesir mutuku ninye ara, kanye teleb ubuka ulamik.

³⁹Israel ninye ara, Mesir mutuku batakuka, bisik balamik talak ara, Allah el mapu melina ati, keteng noutam ara, Allah Yahweh arye dua arepnaba yanuka lelipdongopne ura, sikda amutam balamik. Tonda lukunyan talak ara, Allah arye uku weisa arepnaba, sik bisik banak ara, dirina upnaba, adeice eipna arye, yanibuka balamik.

⁴⁰Winibuka melibukba balamik talak ara, Israel ninye arye Allah ati “Se, nun dina ara, tup ning ton patapsil ati, melipsilyame,” nyabuka morobikop ura, maka el si puyu maka, weik tonun langdibuka arepnaba, sikce obuka dilamik. Tonda “Nun dina ati roti ning patapmasile,” nyabuka morone ura, Allah arye roti kwaning, el si ara mana, im deice arye dopkwetepnaba, dobuka, dipna arye boupnop ura, sik bisik balamik.

⁴¹Tonda, “Mek patapsile ati, mek aripsilyame,” nyabuka, Allah ati morobik ura, mutuku bukamuk noutamak arye, keil deice debukba, mek panabuka sakuk. Atalak ara, mek gumak, fia pata mutuku noutamak ulamik bukni, amek ara, mutuku patak arye panabuka yayukce, mikip arye biyukba, kwebuka dilamik. ⁴²Awinilamuk ning nirya ara, Allah arye el fil donanye Abraham biti, ‘Winipnamkine,’ nyabuka nyalin yupu nyapdeiyamuk ning ara, kum luba kiyamuk. Aning ara, tamubuka tenibukce, amambul fil nirya dolamuk.

⁴³Utenebukop ura, Allah Yahweh el mapu ati, kil-kil kanye bobuka meilyamukce, bobuka balamuk. Abobuka balamuk talak ara, Allah elcuk wipdeiyamuk ninye nirya ara, kil-kil kanye bobuka ulamikce, weik yupu nyalamikce, kanye deibuka ulamik.

⁴⁴Bisik balamik talak ara, Allah arye melyamukba, balamika ani, elce, ‘Aripnamsine,’ nyapdeiamuk mutuku biyik ura, sik amutuku mince ninye yala nirya arye talibuka ulamik ning, Allah nyaiamuk touk, el mapu koprop Israel ninye ati, amutuku arelamukba, binuka ulamik. Tonda, yuk mutuku ninye talibuka wilamik wa dam nirya ap, sikce, ‘Nun na dokola’ tenen, moubuka deililamik dekna weik ning nirya ara, Allah arye Israel ninye ati, mikip arelamukba, yuk mutuku talyamik ninye nirya, obisibuka balamikce, amutuku ning nirya dololamik. Sik Israel ninye arye, aning-aning nirya talibuka ulamikce, sik mutuku ap, bona ning ap atonun ubuka talyamik.

⁴⁵Allah Yahweh arye amambul fil dolamuk ning nirya ara, urdem ati kum fil dolamuk. Deiyok ara ani. Ara, winipniba, kel bikikirye, “Aning ara wininamlulume, aning kum wininamlulume,” nyapdeiyamse yupu nirya ara, ‘Dib nyamsuke,’ tenebikirye, ‘Aning uk talibuka dukdongobuka unamak’ tenen, afil dolamuk. Ati ara, ninye nirya arye Allah ati, ‘Se, anda fia teleb ulyame,’ nyabuka, el si uk erenamylume. Daud arye nyabuk.

[Minop talak sekamik buku ara, pasal 106 ton aubuk bukni, nunce aning kum sekuba ati, otam pasal 107 dukdongobuka nyapnin banamlulume.]

Mazmur 107

**“Allah Yahweh fia teleb uk ululnye ati, mot sena
deice arye si erenamabe,” nyabuk yupu**

¹ Allah Yahweh el tibuk telebe nyanamabe. Allah elda fia diksukum teleb uk ulirye, nun ti bico tenesulul ning ara, kum kum danamle. Fia ati aupnamle. Ati ara, el tibuk si erenamabe. ²Se, na kayapu, yata ninye do nirya, anggun tuba-tuba weik kanye imun ning, anggun damak yangalamukba, Allah Yahweh anggun ti melibuka lyepromsukce, teleb kipdeiyamsuk ninye nirya ara, Allah elce meliamsuknye nirya ati, anggun kayapu yuk ninye dam binuka, laka nyanamlulume.

³ Anggunda yuk-yuk mutuku, fia pera mutuku, yuk ninye noutamak bobinamsikba, ulamlumce, ninye asik nang atonun ubuka ulalumba, Allah elce akunum lyepsukce, bulubuka deiamsuk. Ara, keteng yangan tam ap, keteng wekelban tam ap, tonda utam ap, eitam ap, dana-dana mutuku nirya ap, dabinuka ulalumba, bulubuka tonok sukum deipsuke. Ati Allah el si erebuka kinamlulume.

⁴ Tonda, ninye kum unyak mutuku, mok ap, mek ap kum ati, bupu weik arye ninye kum ulamik mutuku, weik mutuku binuka aulamika ani, lopdakuka ortam mutuku binuka unmana ani, asukum batakuka yukak balamik. Adeice arye, tonok mutuku uk kum ulamik, balsusuna uk ulamik talak ara, ‘Weik asik dolamik mutuku bana ati, bisik ara asukum, asik unyakak ara asukum’ tenen, kum kel biklamik. Talye bana uk ulamik. ⁵Sik aninye ara, winilamika deice arye, din ning patana ap, mek patana ap, ubukba, adeice arye sik aninye ara, dipmanto ulamik. Sik kankan noutamak ara, ton nang diplamik. Winilamika deice arye, sik yupa ara, mitik kipnin balamik.

⁶ Atalak ara, sik imun kanye bobuka ulamikce, Allah Yahweh ati, ‘Se, nun ni Allah melipsilyame,’ nyabuka morolamik. Nyabuka morobikop ura, sik kanye imun wamuk ning ara, akunum lyeprobukce, teleb kipdeibuk. ⁷Allah arye sik aninye ati ara, kalikuka melilamukce, diksukum una bisik uk bobuka balamuk. Aninye bobuka balamuka ani, aminyan talak ara, weik asik teleb ning, weik kota mutuku bobuka balamukce, ateleb mutuku noutamak deibukba, teleb uk ulamik.

⁸ Ati ara, Allah Yahweh elce kanye talima areplibuk bico tenen, melilul ninye nirya ara, Allah el tibuk, “Telebe, anda weik telebnye ulyame,” nyabuka, el si erebuka kinamake. Tonda, Allah el si Yahweh arye tenebuka fil dolul ning nirya ara, ‘Se, aning ara, ninye arye kum upmanto ning winilula’ tenen, el tibuk, “Telebe,” nyanamabe. ⁹Ara, urdem ati kume. Deiyok ara, mek patanmalye ninye ap, dina patanmalye ninye ap, elce yamubuka areliba, dibice ura boulule. Ati ara, Allah el tibuk, “Telebe, anda weik telebnye ulyame,” nyabuka, el si erebuka kinamake.

¹⁰Ton ninnye ara, yu nang arye malye kibuka bisibikce, aninye tomobuka, wenena aik noutamak dabinuka deiamikce, weik kat tapu, rantai besi arye tapu koupdongamikba, imun kanye bobuka daulamik. Aninye nirya ara, kuna noutamak uk daulamikce, fia ikin kanye bobuka ulamik. ¹¹Wenena aik daulamik ninnye nirya ara, talye ati kum wenena aik kum ulamik. Deiyok ara, Allah el yupu deice arye, ‘Aning wininamlulume, aning ara kum wininamlulume,’ nyapdeiyamuk ning ati, sikce, moubuka kum talyamikce, yaniltalamikba, Allah elce yuk nang deice mikip aribukba, sik amalye ulamik ninnye nirya ara, yuk mutuku nang arye, sik nong deice ikin ning deililamikba, kanye imun kanye uk, bobuka ulamik. Tonda, Allah Yahweh aning-aning nirya talibuka deice tam, erebuka ululnye birye, im deice yin talibuka unyak malaikat nirya, sik weik deiyoknye ulul bukni, elce nyalamuk yupu nirya ati ara, ‘Nun like, aning kum wininamabe,’ nyabuka, moubuka kum talilamikce, yaniltalamikba, Allah arye aninye ati wenelamuk.

¹²Allah Yahweh el yupu kum kekelamikce, malye winilamik ninnye nirya ati, fia ikin ning, sik nong deice deiamukba, sik talima noutamak uk dilamukba, imun kanye bobuka ulamikce, yuk mutuku ninnye arye, sik ti, “Weik ikin fil donamsulume,” nyapdeibikba, weik ikin fil dolamik. Winilamik bukni, sik nong nirya mikip ara, mitang ubukba, tuku deice sakuka poulbalamik talak nirya ara, ‘Se, yata nang arye yanuka, melibuka lyepsitinge do?’ tenen, elamik bukni, sik yuk nang arye melibuka kum lyelolamik. Sik nirya ara, ikin uk ulamuk. ¹³Ikin kanye bobuka ulamikba, ikin uk ulamuk. Ikin kanye bobikce, Allah atibuk, “Melipsilyame,” nyabuka, malye lebuka morolamik. Malye kanye bobuka, morolamik talak ara, Allah kekebukce, sik ti lyeprobukce, teleb kipdeibuk.

¹⁴Allah ati morobikop ura, kunukne noutam ulamik ning ap, kat tapu arye koupdongamik ning ap ulamika ara, Allah aniryuk atapu loplobuka, lyeprobukce, tuba tonap aninye teleb kipdeibuk. ¹⁵Ati ara, Allah Yahweh elce talima aribukba, bico tenen, melilamuk ninnye nirya arye, Allah el tibuk, “Telebe, anda weik telebnye ulyame,” nyabuka, el si erebuka kinamake. Tonda, Allah el si Yahweh arye, tenebuka fil dolul ning nirya ara, ‘Se, aning ara, ninnye arye kum winipmanto ning ulula’ tenen, el tibuk, ‘Telebe,’ nyanamake.

¹⁶Allah ati, “Telebe,” nyapnamaka ara, urdem ati kume. Deiyok ara, Allah el weik mikip deice arye, kat ning el si tembaga deice arye, moubuka domik bisik bublan tirikdongamse ning nirya ap, tonda kat ning arye bisik bana noutamak dobuka, lelipdongamse ning nirya ara, akunum dakuka batakuk.

¹⁷Tonda ton ninnye ara, sik babye malye ulamika dekna deice arye, fia walwal nang winilamak touk winilamik. Winibuka ulamikba, sik malye weik ulamika deice arye, weik ikin uk dilamukba, weik ikin ning dololamikce, fia imun kanye bobuka ulamik. Ara, sik bidamang malye

ulamik ning deice arye, sik aninye dam, weik ikin uk ap, ikin ning ap, yayukba dopdobikce, weik kanye imun ulamik. ¹⁸Weik kanye imun uk dilamukba, sik aninye ara, dipmanto ning dina ayala-yala nirya, eibike babye, dukmantopu ulamikce, kum dobuka dilamik. ‘Din ning aning-aning nirya ara, nun like’ tenen, batakklamikce, ikin weik ulamik. Winilamika deice arye, sik dipmanto ulamik.

¹⁹Ikin ulamikba, mambul kanye bomikce, Allah atibuk, “Melipsilyame,” nyabuka, malye nyabuka morolamik. Malye kanye bobuka morolamik talak ara, Allah kekebukce, sik ti lyeprobukce, teleb kipdeibuk. ²⁰Aninye ara, sik kanye imun uk delamuk ning arye, sirya dakmanto ulamik bukni, Allah elce nyabuk yupu adib aryuk, auk loprobrukce, aninye ati kam bulilamuk. Uk arye dipmanto ulamik bukni, Allah elce, ‘Na tenena ninye kum ubicak’ tenen, kwetepdeibukce, tuba tonap teleb kipdeibuk.

²¹Ati ara, Allah Yahweh elce kanye talima aribukba, bico tenen, melilamuk ninye nirya arye, Allah el tibuk, “Telebe, anda weik telebnye ulyame,” nyabuka, el si erebuka kinamake. Tonda, Allah el si Yahweh arye tenebuka fil dolul ning nirya ara, ‘Se, aning ara, ninye arye kum upmanto ning ulula’ tenen, el tibuk ‘Telebe,’ nyanamake. ²²Tonda, sikce Allah Yahweh ati, weik kanye deibikirye, “Telebe,” nyabuka, ining ning obuka el si erena ati, boyanuka arenamake. Aning atonun, tonda Allah elce ninye kum winipmanto fil dolul ning nirya bobuka, yuk ninye damak laka lebuka, peterepra banamake. Ayupu laka lelbanamak talak ara, Allah ati kibuka don mot wibikirye, yuk ninye sik damak laka nyalbinamake.

²³Ton ninye ara, weik laut mekwen deice balamle kapal bobuka, balamik ninye babye, talye ati kum winilamik. Ara, ‘Bona ning ayala-yala nirya, nun laut mekwen deice balamle ning, el si ara kapal laut, fum tam yuk pera mutuku bobibirye, dekiyop ura, dekna ning weik arye dolonamabe,’ tenelamik. Tonda, ‘Nun dina dibibirye, kam unamabe’ tenen, sik dina ati, weik laut mekwen deice uk fia balamikce, mekwen fum bal ikan ati, ena uk ulamik.

²⁴Ati, sik weik laut mekwen deice, kapal arye bukuka balamik nang ara, Allah Yahweh arye, ninye kum winipmanto fil, weik mambul fil, laut mekwen deice domuk ning ara, sik asing arye eililamikce, kel biklamik. Tonda weik laut mekwen noutamak ubuk ning nirya babye, laka ulamukba, eibuka kel biklamik. ²⁵Ara, Allah arye “Winipnamlume,” nyaiamuk touk, weik mikip kumanya balamukce, laut mekwen deice yanuka, pubukba, mek ara longteng-longteng alamukce, weik mek talin-talin deibukce, welelamuk.

²⁶Laut mekwen deibuk noutamak arye, mek talin-talin deibuka welebukop ura, mekwen deice bukuka balamuk kapal ara, mek mikip arye erebuka alip tam bobinmoka ani, tamubuka mekwen deice uk, yanuka batakukba, amekwen deice kapal bulamik ninye nirya ilil weik

ulamuk. Minop talak ara, ilil kum ninye ulamik bukni, mekwen arye sik ti dipmanto ubuk talak ara, ilil weik ubukba, sik tenelamik ning ara, ‘Se, dipkoprop talyeto mekwen dipmandasile,’ tenen, ilil weik ubukba, sik kanye nirya ara, ilil ulamuk. ²⁷Adeice arye, sik aninye nirya ara, kisok dokbo balamukba, yu mek weik arye dipmakiba, kisok biri-biri aplirye, kanye wangalamak touk ubuk. Winibukba sikce, ‘Winipnamabe,’ tenepmek kanye nirya ara, wangapsinibukba adib aryuk luba kilamik.

²⁸Ikin ulamikba, mambul kanye bomikce, Allah atibuk, “Melipsilyame,” nyabuka, malye lebuka morolamik. Malye kanye bobuka morolamik talak ara, Allah kekelamukce, sik ti lyelamukce, teleb kililamuk. ²⁹Ara, kumanya mikip weik arye balamuk ning ati, ‘Tunim aplyame,’ nyalamukba, kumanya Allah el yupu kekelamukce, adib aryuk tunim alamuk. Winibukba, weik mek talin-talin welelamuk ning babye, tunim alamuk.

³⁰Kumanya akunum kum danop ura, sik anang kanye delilamikce, ‘Nun binamap mutuku ani,’ tenelamik ning ara, Allah arye melyamukba, balamik. ³¹Ati ara, Allah Yahweh elce kanye aribukba, bico tenen, melilamuk ninye nirya arye, Allah el tibuk, “Telebe, anda weik telebnye ulyame,” nyabuka, el si erebuka kinamake. Tonda, Allah el si Yahweh arye tenebuka, fil dolul ning nirya ara, ‘Se, aning ara, ninye arye kum upmanto ning ulula’ tenen, el tibuk telebe nyanamake.

³²Tonda, sik aninye arye Allah Yahweh ninye kum winipmanto ning mambul fil dolamuk ning nirya ara, yupu bobuka, yuk ninye ati, laka nyalbinamake. Tonda, Allah el yupu talibuka, fil donyak nang, sik wisi-wisi nang ara, ninye yupu bokolina ati, bulunyakak laka nyalbinamake.

³³Tonda, Allah arye weik mambul fil dolamuka ara ani. Yata mutuku ninye do nirya, el yupu yanibikirye, fia malye weik ubicop ura, Allah arye aninye ikin ning arilule. Winipmanto ara, mek balamuk ning nirya, kum kipdeipliba, celolamle. Mek pu dobuka balamle ning nirya babye, Allah arye nyaplyop ura, amek pu cebuka, sesal lepdeipliba, tuku nirya kat uk kililule. ³⁴Aning atonun, yata mutuku ninye do nirya, el yupu yanibikirye, fia malye weik ubicop ura, sukun tuku nirya kum kipdeiplirye, mok ap, mek ap kum ati, bupu weik arye ninye kum ulamik mutuku tuku uk yanuka punulongolule. Amutuku tuku deice, tuku fum tam arye, garam atonun ning panapliba, palamle ning ayala-yala nirya, kum papmanto ulule. Aning ara, amutuku unyak ninye arye, malye unyaka dekna ati winilule.

³⁵Bukni, yata mutuku ninye do nirya, Allah arye nyalul yupu moubuka kekebikirye, teleb ubuka diksukumuk ubicop ura, Allah arye aninye ati melilule. Ara, pata mutuku ara, tuba tamubuka mekwen delinak kililule. Aning atonun, keteng bupu arye mek nirya cepropliba, mikne tukwak arye, tuba tamubuka mek pu kipnamle. ³⁶Winiplye talak ara, dina patanmalibuk unyak ninye ara dobuka, teleb kililul mutuku deipliba, teleb ubuka unamake. Aninye nirya ati, winiryuk mutuku ton kintinipliba, aninye nirya arye, weik asik dobikirye, amutuku uk unamake.

³⁷Tonda, sikce wa wibuka dokonamak ning ap, tonda anggur tapu duk wa wibuka kounamak ning ap nirya, nong kplyop ura, libuka tonok sukum bulubuka, deipnin balamikiba, fia weik upnamle. ³⁸Allah Yahweh arye sik aninye ati melilamliba, sik mapu delina ati ara, weik tabakuka aripnin baliba, delinamake. Winipnin banamaka deice arye, sik mapu nirya, fia weik deipnin banamake. Tonda, sikce talibuka weinamak kam ning ayala-yala nirya babye, fia weik upnin banamle.

³⁹Bukni, yuk mutuku ninnye arye, Allah el na tenen ninnye ati yanuka, obisibikirye, sik aninye yupa fia weik obuka sirya dakikirye, Allah el ti dib tenenyak ninnye mitikanun sirya tuba batakicop ura, Allah arye abataknamak ninnye ati melilule. ⁴⁰Yuk mutuku ninnye arye, Allah el na tenen ninnye ati, ikin ning weik dobuka sik nong deice akunum deibikcop ura, Allah Yahweh arye, sik yuk mutuku deiyok talibuka unyak nang nirya ati ara, kanye talima mitang kipdeipliba, yuk nang sik amutam unamake. Unamak talak ara, Allah arye sik aninye ati, “Ninye fia bana kum mutuku, fia fata mutuku bisik bimunce, tonok mutuku kum binuka unamlum bukni, amutuku uk binuka, yanuka kilamunce, lu tamupdanuka binamlume,” nyabuk.

⁴¹Bukni, Allah el ti dib tenenyak ninnye, sik imun kanye bobuka unyak ninnye noutamak, unyak ninnye nirya ara, Allah Yahweh arye lyeoproplirye, teleb kilinamle. Wininamle talak ara, bona utoto talina kum ninnye ati, Allah weik arye meliplya deice arye, sikce deibikiba, dadeipdanin banamak ninnye ara, sik tam ninnye nirya ara, ninnye yupa fia weik upnin banamake. Winipmanto ara, domba basam mi deipliba, weik ulamle touk ubuka weik upnin banamake. ⁴²Fia diksukumuk ubuka unyak nang ara, aning eibikirye, kanye deibuka finfina asa arye unamake. Bukni, sik malye winin ning uk talibuka unyak ninnye ara, yupu tana kumce si bam bol tirikdongobuka unamake.

⁴³Yatanye do, weik kel bikna deice arye, fia moubuka kel kipmantonye bira, anyapman yupu nirya teneplirye, moubuka kel kipnamle. Tonda, el anye birye, ‘Allah ara dipkoprop aulule. Allah Yahweh arye nun tukwak ninnye ati, weik arye bico tenesilya ara, fia kum kum danamle’ tenen, moubuka tenenamle. Daud birye ayupu nyabuk.

[Minop talak sekamik yupu ara, pasal 108-109 ton aubuk bukni, nunce aning kum sekuba ati, otam pasal 110 dukdongobuka nyapnin banamlulume.]

Mazmur 110

Allah Yahweh arye ninnye deiyoknye tonok wipdeibukce, nyabuk yupu

¹Allah Yahweh arye, na ninnye deiyoknye ati nyabuk. “Anda na sirik tam yanuka bukminba, na arye an oldan ninnye nirya obuka bisipnirye, aninye nirya dobuka, an yan amutam uk deipnamkine. An oldan ninnye nirya dobuka, an yan amutam deipkiniba, aninye sik nong deice yanipdongopnalame.” Allah arye nyapdeibuk.

²Allah Yahweh arye na deiyoknye ati nyabuk.

Ance Sion^m mutuku talibuka uminye buk, na arye mikip tonap arepkiniba, amutuku arye diprongobuka otam mutuku nirya ancuk talinamlame. Ance talinalam mutuku nirya ara, pala fia weik mutuku upliba, an oldan ninye, sik unyak mutuku babye, ancuk talimince, sik ninye deiyoknye unalame.

³An oldan ninye ati, obuka bisipnalam talak ara, ance talilyamba, an amutam unyak ninye nirya ara, sik kanye teniltona kum dib aryuk, an dam yakirye, an ap, sik ap, neika ansinibuka yuk mutuku ninye ati, olbinamlume. Winipmanto ara, lukunyan talak kurya dei sakuka, mutmuta deice palilamle atonun, asum-asum nirya, an amutam unyak yin talin kam nang arye, 'Nun ni ap neika malye nang ati olbinamap' tenen, an damak tuba-tuba yanganamake. Na Allah arye melisinirye, an amutam yin talin nang ap, an ap mikip kipdeipsiniba, an oldan ninye ati, mal olbinamlume.

⁴Dipkoprop Allah Yahweh arye, na deiyoknye ati nyabuk. Na Allah Yahweh arye, akunum nyapkisa ati, anyapkise ning ara, tonap tenepnirye, yuk ning ton kum punubuka nyapnamne. Ara, na Allah ap, ninye ap, teleb ubuka neika una ati, ansinilina deiyoknye fil talibuka fia donamlyame. Ara, minop talak ulamuknye, el si ara Melkisedek birye, afil uk talibuka dolamuk touk, an babye, afil uk talibuka fia donamlyame. ⁵Anda Ninye Deiyoknye umince, Allah el sirik tam ulyama anya arye, sik malye unyak ninye nirya ati, yu upkiliba, tukwak ninye wenebuka opnalam talak ara, Allah arye an ti melipkiliba, tukwak mutuku noutamak, ninye weik deiyok talibuka unyak Raja-Raja nang, ayala-yala nirya obuka sirya daknamlyame.

⁶Tonda, mutuku-mutuku nirya malye unyak ninye wenena ati, opminba dibicop ura, adipnamak nang, sik nong dobuka, sik bidamang nong deice uk, taplakuka deibuka welepnamle. Atalak ara, tukwak mutuku im sirya, mutuku sirya nirya ninye deiyok talibuka, unyak nang nirya opnamlyame.

⁷Winipnamlum talak ara, mutuku-mutuku nirya ninye deiyok kibuka talinyak nang ara, obuka bisipmince, kum kipdeipnalame. Sik anang nirya kum upnamak bukni, na Weik Deiyoknye bira, el banamle bisik damak nirya ara, fia teleb mek abaliba, kwebuka dinamle. Aweik Deiyoknye bira, aning-aning nirya el weik mikip deice arye, obuka bisibliirye, yuk ninye nirya deice tam erebuka unamle.

Daud arye ayupu nirya nyabuk.ⁿ

[Minop talak sekik buku ara, pasal 111 sampai 114 ton aubuk bukni, aning kum sekuba ati, otam pasal 115 arye dukdongobuka nyapnin banamlulume.]

^m 110:2 *Sion mutuku* Sion mutuku nyalamik ning ara, Yerusalem mutuku ati nyalamik. Amtuku ara, si bitinye bukni, amutuku ara, tonok mutuku dem uka. ⁿ 110:7 *Ninye Deiyoknye* – Daud birye Ninye Deiyoknye nyabuk ning ara, Yesus ati nyabuk. Yesus ara, Allah el sirik tam bulbiyukba, Allah arye Yesus el olan ninye ati opbisiplirye, Yesus el yan amutam deipnamle. Tukwak mutuku noutamak, weik deiyok talibuka unamak Raja-Raja nang nirya ara, Yesus arye obuka sirya daklirye, sik ap, sik amutam ulamikce, malye winin ninye ap, sik nong deice yanipnamle.

Mazmur 115

**‘Allah, el mikip deice arye, aning-aning nirya talibuka
ululnye, el si uk erebuka kinamap’ tenen, mot sebik yupu**

¹Nun ni Allah Yahweh, an tibuk si erebuka kinamkiyabe. Ara, nun tibuk, kibuka kum erelanamabe. Bukni, nun ni Allah, ance nun ti bico tenepsimince, melisilyama ati, nun adib aryuk an ti, si erebuka kinamkiyabe. Tonda, ance nun ti, ‘Wininamsine,’ nyabuka, nyalin yupu nyapdeiyamsulum ning nirya ara, tonok ning babye kum bataksulumce, aning nirya winilamsilama ati, an si uk fia erekinyabe.

²Tonda, yata ning deiyok ati, sik yuk mutuku ninye mutuku-mutuku nirya, “Israel ninye sik Ni Koprop Allah ara, dan tam ulul do?” nyabuka nalisinyak do? ³Nun kele. Nun Ni Koproba Allah ara, im deice ulirye, ‘Aning ara winipnune,’ tenepmalye ning ara, adib aryuk aning uk winilule. ⁴Bukni, sik yuk mutuku daunyak ninye ara, sikce talibuka, si erenyak ning ara, urasin fia teleb kat ning, el si ara emas ap, perak ap, ninye taruk deice arye dobuka, ninye urasin atonun ubuka, puturubuka deibikirye, “Nun ni koprop ani,” nyabuka erebuka si donyake.

⁵Sikce talibuka, si erenyak ning nirya ara, sitang aubuk bukni, yupu ara, kum nyanyake. Asing aubuk bukni, kum elinyake. ⁶Aning ara, amol babye aubuk bukni, yupu ara kum kekenyake. Atonun, u aubuk bukni, nintong ning ara, kum kekenyake. ⁷Tonda, sik taruk aubuk bukni, talin ning ara, kum talinyake. Atonun, sik yan babye aubuk bukni, yanibuka kum banyake. Atonun, si bam bol aubuk bukni, yupu nyana ap, isin panana ap, si maka kum dilkwetenyake.

⁸Yata ninye do nirya, atalye ning puturubuka delinyak nang ara, atalye ning kanye bona kumce ulul touk, sik babye talye kanye bobuka unamake. Sik babye taruk mikip adib aryuk, fil donyak ning nong ulye touk, sik babye atonun unamake. Tonda, atalye ning ati, “Nun ni koprop,” nyabuka, dib tenebikirye, si erenyak ninye babye, talye kanye bobuka unamake. Teleb un ning, fia kum unamake. Talye uk unamake. ⁹Wininamaka ati, se anggun Israel yala ninye ara, atalye nang unyaka atonun kum unamlume. Nun ni Allah Yahweh, el tibuk dib tenebuka unamlume. Winipmunyop ura, elcuk anggun ti, melibuka kalikinamsile.

¹⁰Se, Harun arye, deibukba dadeipdanin, yangalamik ani, deipsik nang, anggunce Allah el si eren aik fum tam talibuka, fil dolulum nang nirya ara, nun ni Allah Yahweh atibuk dib tenebuka unamlume. Allah elcuk anggun ti, melibuka kalikinamsile. ¹¹Se, ninye nirya arye Allah Yahweh ati, ilil upsiliba, dib tenebuka unamlulume. Winipmunyop ura, nun ni Allah elcuk ton, melibuka kalikinamsile.

¹²Nun ni Allah Yahweh arye, nun Israel yala ninye nirya ati, tuba tenesilya deice, teleb uk kilinamsile. Allah arye Israel yala ninye ap,

Harun yala ninye ap nirya ati, fia tuba melipsilirye, teleb uk kilinamsile. ¹³Allah ati ilil tenebuka unyak ninye ara, weik nang babye, mitik ninye babye nirya ara, Allah elcuk tuba melisilirye, teleb uk kilinamsile.

¹⁴Winibuka melipsilirye, Allah Yahweh el kil-kil kanye un ning aripsilyop ura, mapu weik arye deipdanin binamlulume. Ara, anggun ap, anggunce deipmunba dadeipdanin, banamak ninye nirya ati unamsile.

¹⁵Aning ara, Allah Yahweh im deice ap, tukwak ap kwepdeibuknye, elcuk anggun dam ulirye, melibuka teleb uk ulinamsile. ¹⁶Im deice ara, Allah Yahweh el babye, na tenen ning uk kwepdeibukba ulule. Bukni, tukwak mutuku ara, nun tukwak ninye ‘Talibuka unamak’ tenen, kwepdeipsuke.

¹⁷Tonda, akunum dibikiba, ninye wein damak weilbice talak ara, tuba tonap tamubuka yakirye, Allah Yahweh el si erena ati, kanye lon mot kum senyake. Sikda, talye tunimabuka dabinuka unyake. ¹⁸Wininyak bukni, nun tuba kam unmap ninye tonok ara, kam unmap talak aryuk, Allah ati telebe nyabuka, kibuka erebibirye, el si uk erenamabe. Winitalak arye dipdongobuka, yuk talak nirya ara, fia ati, el si uk erenamabe. Allah Yahweh ati, telebe nyapne.

Mazmur 116

Dipmanto ubuk bukni, lyeprobuk ati mot sebuk yupu

¹Na ara, Allah Yahweh ati tuba kanye delinamne. Ara, na kanye imun upnilye talak nirya ara, Allah ati moropnye ura, el kekeplirye, elce na ti moubuka melinulule. ²Na ikin weik ulamnuk talak ara, na ni Allah ati, malye nyabuka moropse talak ara, el kekep nukce, melyamnuka ati, na kam unamne talak nirya ara, el tibuk moronamne.

³Tapu koubikiba, kum lopmanto ulamle touk, upnukbuk, na ara dipmanto wamse bukni, Allah arye lobuka lyepropnukba, kam unune. Depmanto upse talak ara, ‘Dipnun do?’ tenen, ilil weik upnukce, na kanye talima weik arye uk dipnukce. ⁴Dipmanto upse bukni, winipnuk talak ara, na ni Allah Yahweh ati moropsirye, “Na ni Allah Yahweh ance na ti melibuka lyepropnilyame,” nyabuka moropse.

⁵Nun ni Allah Yahweh, elda ninye ati bico tenena ap, melina ap deiyoknye ulule. Allah elda, malye un ning tonok ning babye kum ulirye, diksukumuk ulula anya arye, nun ti kum batakasulule. ⁶Ninye kanye talima erelana kumce, kanye lamapdongobuka ululnye bira, Allah Yahweh arye melilule. Ati ara, na mikip fia kum wamnuk talak ara, Allah arye na ti, melibuka lyepropnukce. ⁷Allah el si Yahweh arye akunum melipnuka ati, na kanye talima lamapdongobuka arye, el amutam uk unamne. Ati winipnirye, fia kum teniltonamne.

⁸Na ni Allah Yahweh, na dipmanto ulamse talak ara, ance lyepdeipnulume. ‘Na dipnun do?’ tenepse talak ara, kanye imun upnukba, weik arye ngalukuka engenmasebuk, na ni Allah Yahweh ance melibuka lyepropnulume. Tonda, na yan dum duknukba, sakmanto ubsibuk, Allah ance talibuka Allah atibuk, tuba-tuba dib tenelamsa anye arye, na ikin weik ulamnuk talak ara, an ti morolamkise. ⁹Morolamkesiba, ance lyepnuluma ati, winitalak ara, kam tuba unyak ninye kan-kan, tuba kam uk unirye banune. Na ara, na Ni Koproba Allah el si Yahweh dam balamneba, elce elinulule.

¹⁰Na ikin kanye bobuka ulamse talak ara, ‘Se, yata wiripnamnil do?’ tenen, ilil weik ulamnukba ulamse. Atalak noutamak ara, “Se, na ara, ikin weik unune,” nyabuka engelumse. ¹¹Na imun kanye bobuka ulamse talak ara, ‘Yata wiripnamnil do?’ tenen, ilil weik ulamnukba, ulamse. Atalak ara, “Yuk tukwak ninye nirya arye, na ati ara, tilila yupu uk nyaltakaninyake,” nyapkise.

¹²Allah Yahweh ance, aning-aning nirya ara, na ti weik arye teleb ubuka, arelamnulume. Ati ara, na arye yata teleb ning tamubuka, Allah an ti arepkitinye do? ¹³Allah ance ninye lyena ati, teleb yupu nyapdeiplum ning ara, na arye, ‘Yuk nang kekebikirye, dib tenenamak’ tenen, fia laka nyabuka peterenamne. Tonda, ‘Allah ance fia melipnamnilam’ tenen, an si uk kibuka moronamkine. ¹⁴Na ni Allah, an mapu nirya wekmekak arye, an Allah ati, “Wininamne,” nyabuka, nyalin yupu deice arye, nyapdeiyamkise touk, dipkoprop wininamne. Kum bataknamkine.

¹⁵Allah Yahweh ati dib tenenyak nang ara, tonoknye do, ton dibikcop ura, sik anang ati fia bico tenelule. Allah arye wipdeiyamuk ninye dibicop ura, ‘Aninye ara fia weik mambule,’ tenelule. ¹⁶Diba, na ni Allah Yahweh, na ara an amutam fil donanye unune. Ara, na deiyamnuk kil ara, Allah an amutam ulamuk kil arye deiamnuke. Tonda, malye ning arye tapu koubuka, wenenak atonun deiyamnuk bukni, ance lopdeipnuluma ati, na ara an fil uk donamkine. ¹⁷Winipnulum ati, na arye an si erena ati, ining ning obuka boyaniryne, adib aryuk an ti, “Telebe,” nyabuka, an si erenamkine.

¹⁸Tonda, an mapu weik wekmeka noutamak arye, “Na nong nirya ara dobuka, Allah Yahweh an ti arenamkine,” nyapkisa ati, aning uk tuba unamne. ¹⁹Ara, Yerusalem mutuku, Allah el si erena aik domikce, anyaik damak wekelbana ati, bai tam memepdeiyamikak, tikniryne, ninye fia weik wekmacak arye, “Na nong nirya ara, Allah ati

arenamne,” nyapnamne. Allah Yahweh ati telebe nyanamne. Daud mot deice arye nyabuk.

[Minop talak sekik buku ara pasal 117 ton aubuk bukni, nunce aning kum sekuba anya arye, otam pasal 118 arye dukdongobuka nyapnin banamlulume.]

Mazmur 117

¹ Anggun tukwak mutuku ululum ninye, mutuku sirya im sirya nirya arye, nun ni Allah si Yahweh ati, “Se, nun Allah, anda fia teleb uk ulyame,” nyabuka, el si ati erenamlulume. Yata yala ninye do nirya, nun ni Allah ati, “Nun nun ni Allah, anda aning-aning deice tam ulyamce, fia teleb uk ulyame,” nyabuka, el ti si erenamlulume.

² “Allah el si erenamlume,” nyapmasina ara, urtalya ati kum nyapsine. Deiyok ara, ani. Nun ni Allah arye, tukwak mutuku im sirya mutuku sirya, unyap kili sal ati, fia weik arye bico teneslirye, weik arye melisulule. Tonda, Allah arye ‘Wininamsinirye, melinamsine,’ nyabuka nyalin yupu arye nyasilye ning nirya ara, tonok ning babye kum batakalule. Nun ni Allah, el si Yahweh arye nyasilye yupu nirya ara, dipkoprop usulule. Elce nyasilye touk winisulule. Winitalak arye dipdongobuka, doryanamle talak nirya babye, Allah arye nyasilye touk, dipkoprop unamsile. Ati ara, el si fia weik arye kibuka, si erenamlulume.

Nun ni Allah el si Yahweh ati, “Haleluya^o nyanamlulume. Ayupu deiyok ara ani. “Se, nun ni Allah anda fia teleb uk ulyame,” nyabuka, el si ati fia weik arye erenamlulume.

Mazmur 118

Allah arye melyamukba, akunum winibuk ning ati, telebe nyapdeibuk yupu

¹ Allah Yahweh el tibuk, “Fia telebe,” nyabuka el si erenamabe. ‘El teleb una deiyoknye ulirye, kanye delisulule. Tonda, elce nun ti weik arye bico tenepsilirye, melisulule. Aning ara, kum kum danamle, fia aunamle,’ tenebuka, nun Israel yala ninye nirya arye, el si uk erenamabe. ² Winisilya ati ara, sik Israel yala ninye nirya ara, “Allah arye nun ti, talima areliba, bico tenepsilirye, kanye delisulule. Aning ara, kum kum danamle, fia ati unamle,” nyabuka, nun Israel yala ninye nirya arye, el si erenamlume.

^o 117:2 *Haleluya* Aypu ara, Ibrani yupu bukni, ayupu deiyok ara ani. Ara, ‘Se nun ni Allah, anda fia tebeb uk ulyame’ tenena ati, Ibrani ninye arye ayupu nyalamik.

³Atonun, Harun birye deibukba, dadeipdanin, yangalalum nang ara, Allah el si erena aik noutamak talibuka, fil dolulum nang imam-imam nang, sik nirya ara, “Allah arye nun ti talima areliba, weik arye bico tenesulul ning ara, kum kum danamle. Aning ara, fia ati aunamle,” nyabuka el si erenamleme. ⁴Tonda, Allah el tibuk, pi deibuka dib tenekirye, el ti lilil tenenyak ninye nirya ara, “Allah arye talima areliba, weik arye bico tenesulul ning ara, fia ati aunamle,” nyabuka, el si uk erenamleme.

⁵Na ton kanye imun wamnuk talak ara, Allah Yahweh atibuk malye nyabuka ngaluksirye, moropse. Moropse ning ara, elcuk kekepukce, na kanye imun upmanuk ning nirya ara, elcuk lyepropukce, teleb ubdeipnuk. ⁶Aning ati ara, na ilil upniliba, yok sirim kum talipnamnile. Ara, Allah Yahweh aryuk, fia tuba melinilyame. Ati ninye yuk nang sik mikip deice arye, na damak yanuka asilden ning ton kum winipninge. Ara, Allah arye tuba melinulula ati nyapne.

⁷Na ni Allah Yahweh, elda na damak ulirye, ton melinulula anya arye, na ti on nang, na damak yanuce talak ara, ‘Anye bira, el nong deice weik ikin ning deipnamap’ tenen, yanganyak bukni, Allah arye, “An mal olan nang akunum yanganmaka ati, kalikuka fia dinamlyame,” nyaniliba, na ara dina uk unune. Na mal olan nang ara, Allah elcuk obuka, sirya dakanamle. Na oldan nang obuka bisinamle ning ara, na ara asing aryuk dinamne.

⁸Winipnamle ati, teleb ning ara, ‘Allah Yahweh el amutam binuka una ara, fia telebe. Allah elcuk melinamnile’ tenen, el tibuk moronamne. Bukni, ‘Sik ninye tukwak ninye atibuk, sikce melipninge,’ tenena ning ara, fia kum tenenamne. Ara, nun tukwak ninye nirya ara, mikip kumce mitang ninye uk unyap bukni, Allah elda weik mikipnye ulula ati nyapne.

⁹Atonun, ‘Ninye deiyok kibuka unyak nang, sik amutam upniba, melinamniyake,’ kum tenenamne. Bukni, teleb ning ara, ‘Allah Yahweh el amutam uk, kanye lamapdongobuka mitang asa arye unamne. El dem aryuk melinamnile,’ tenena uk unamne. Nun tukwak ninye nirya ara, aning atonun tenebuka unamabe.

¹⁰Minop talak ara, na olan nang weik yangalamikce, yanuka weik arye, wareklamnik bukni, Allah Yahweh el weik mikip deice arye melyamnukba, Allah Yahweh el si deice arye, sik aolyangalamnik nang nirya ati, obuka sirya daklamse. ¹¹Ara, tonok bisik aryuk kum yangalamik. Dana-dana bisik ap, itam bisik ap, outam bisik ap nirya yangalamikce, yanuka wareklamnik. Bukni, winilamnik talak nirya ara, Allah Yahweh el weik mikip deice arye melyamnukba, Allah Yahweh el si deice arye, sik aolyangalamnik nang nirya ati, olbisilamse.

¹²Winipmanto ara, na olan nang arye, yanuka wareklamnik talak ara, ‘Mong arye ninye si topnuyap’ tenen, amubuka dobolkiriklamak

touk, ulamnike. Tonda, winipmanto ara, sik anang nirya ara, mutmuta kel-kel alamle ning, uku dinipdongobikiba, uku dingum abuka paplirye, uku buk dilamle touk, ulamnike. Ara, obuka sirya dakmanto ulamnik. Winibuka ulamnik bukni, winilamnik talak nirya ara, Allah Yahweh el weik mikip deice arye melyamnukba, Allah Yahweh el si deice arye, sik aolyangalamnik nang nirya ati, olbisilamse.

¹³Na ara, na oldan nang, sikce weik mikip arye yaribuka, ‘Dopkwetepnamap’ tenen, dopkwetebnikba, kote sakmanto ulamse bukni, atalak-atalak nirya ara, Allah Yahweh el weik mikip arye, na ti melyamnukba, aolyangalamnik nang nirya ati, olbisilamse. ¹⁴Allah Yahweh elcuk melinulula anya arye, elda na mikip kilinanye ulule. Ati na arye el tibuk, “Telebe,” nyabuka kinamabe. Ara, talye ati kume. Allah elcuk, na ara akunum lyepromnuka ati nyapne.

¹⁵Kekepedelulume. Allah Yahweh el mapu koprop, sik diksukum unyak ninye ara, sikce asik dobuka unyakak nirya, “Nun Ni Koproba Allah arye nun ti, melipsilirye, nun oldan ninye nirya akunum obuka bisilule. Ara, Allah el weik mikip deice arye, mambul fil domsukce, nun oldan ninye nirya ati, obuka bisilamsuke. Allah arye nun melina ati, el sirik taruk deice arye, weik mambul fil dosulule,” nyabuka el si atibuk kinyake. ¹⁶Tonda, “Allah Yahweh el weik mikip arisilya deice arye, weik mikip upsilye deice arye, nun oldan nang nirya obuka bisinyabe. Allah arye nun melina ati, el sirik taruk arye, weik mambul fil dosulule,” nyabuka, el si atibuk kinyake.

¹⁷Na ara kum dipnamne bukni, fia tuba kam uk unamne. Akam tuba unamne talak ara, na ni Allah Yahweh, elce weik mambul fil dolul ning nirya ati, na arye sik yuk ninye kekena ati laka nyanamne. ¹⁸Allah el si Yahweh arye, na malye ulamse ning nirya wenena ati, weik ikin ning, na nong deice deiyamnukba, kanye imun ulamnik. Bukni, Allah arye na ti, ‘Elda dipturye, ninye dibikirye banyak sukumuk bitue,’ kum tenelamnuka. Melipnukba, el mikip deice arye tuba kam unune.

¹⁹Aning ati ara, Allah Yahweh el si erena aik, bisik bublan wekelbanak yanyop ura, minopce anyaik bisik bublan kukdeipnululume. Winipnumunye ura, na arye Allah el si erena aik wekuka binirye, Allah Yahweh ati “Telebe,” nyabuka erebuka kinamne. Winipnirye el si uk fia erenamne. ²⁰Allah Yahweh el si erena aik wekelbana ati, bisik bublan ara, atia. Abisik bublan wekelbana ati ara, diksukumuk teleb uk ubuka unyak ninye ara, abisik bublan wekelbinamake. Bukni, malye winin ning uk talibuka unyak ninye nirya ara, fia kum weknamake.

²¹Ati na ara, Allah an si uk fia erenamkine. Ara, talye ati kume. Na ni Allah, na morokunun ning nirya ara, kekebuka melinilyama atia. Tonda, na olan nang nirya, obuka bisilalumce, na ti fia lyelonilyama ati, “Telebe,” nyapkine.

²²Tonda, sik asik teleb ubuka dolamik nang arye, 'Akeil urasin malye keil' tenen, dobuka bai tam donokik. Akeil ara, bataklamik bukni, akeil dobuka bai tam donokik keil uk, weik mambul keil akunum upmale. Winipmanto ara, keil aik donyak nang arye, 'Akeil aik abilinga nirya, fia teleb diksukumuk upnamle' tenen, minopce delilamak keil atonun, sik bai tam donokik keil ara, weik mambul keil akunum ulule. Winipmanto ara, yuk keil nirya ara, mitik mambul bukni, akeil tonok ara, weik mambul aik dona deiyok keil akunum ulule.

²³Aning ara, Allah Yahweh elce, 'Akeil ara weik mambul keil unamle' tenen, akeil dobuka, erepdeibuk. Allah elcuk afil nirya dobuk. Ati dipkoprop, nun aninye nirya arye, aning eibibiry, 'Se, ara weik mambul' tenen, kel bikibiry, ngalukunamabe. ²⁴Allah Yahweh arye tenebuka, kintinipdeiamuk talak ara, akunum upmala ati, nun nirya arye, atalak nirya ati ara, weik kanye deibibiry, parabuka Allah el si uk erebuka, si erenamabe.

²⁵Diba, nun ni Allah Yahweh, nunce an ti moropkiyabe. Ara, "Allah ance, nun moropkiyap ning, adib aryuk kekepsimince, lyelonamsilame," nyabuka morokinyabe. Tonda, "Allah Yahweh, an mikip nun deice deipsiminba, nun olan nang nirya, obuka sirya daknamabe. Tonda, nun fil donamap ning nirya ara, teleb ubuka fil dobipy ura, teleb uk unamle," nyabuka, an ti morokinyabe.

²⁶Allah Yahweh el si deice arye, dopkweteplibuk, yanamlanye ati ara, nunce el ti, Allah Yahweh el si erenyap aik noutamak wekibiry, el ti si erenamabe. ²⁷Allah Yahweh elda, Allah uk ulule. Winilirye, nun kanye talima noutamak ara, kel bikna deiyok ning ap, kanye dirina kin ning ap aresulule. Winisilya deice arye melisulule.

Ati, 'Na ti arin ning ara, sik aninye arye arenamkiyake' tenen, kintinipdeibuk talak akunum uplyop ura, Allah el si erena ati, imbik yo bok bobuka, wekelbimunce, Allah Yahweh el si erena ati, keil yangabuka, taplakuka kintinipdeibik ning dam, binamlulume. Ara, akeil yangabuka, taplakuka kintinipdeibik ning dana-dana tam, sapi kisok yang dana-dana belelamle atonun ning, puturulilamak ning dam binulume. Ara, Allah el si erena ati binulume.

²⁸Anda, na Ni Koproba Allah unilyame. Aning ara, na arye na ni Allah an tibuk, "Telebe," nyabuka, na arye Allah an si uk, weik arye erenamkine. ²⁹Allah Yahweh el si atibuk erenamabe. 'Elda teleb una deiyoknye uliry, kanye delisulule. Tonda, elce nun ti kanye arisiliba, weik arye bico tenepsilirye, melisulule. Aning ara, kume kum danamle, fia aunamle,' tenebuka, el si uk erenamabe. Na Raja Daud arye nyapne.

Mazmur 119

"Allah Yahweh arye, nyapdeiyamsuk yupu talibuka, el amutam uk ulamipyop ura, fia kam unamabe," nyabuk yupu

¹Kanye deibuka, teleb ubuka ulamice ninye nirya ara, malye un ning talibuka, fia kum unyake. Tonda, Allah Yahweh elce, "Aning ara wininamlume, aning ara

fia kum wininamlulume,” nyalisilye yupu nirya ara, fia moubuka kekenyakce, aning uk talibuka, el amutam unyakce, dobolbanyak ninye ara, fia kam uk unamake. ²Allah arye, “Wininamlulume,” nyalisilye yupu atibuk, talibuka umunce, aning uk melibuka, dobolbanamlum ninye nirya ara, kanye deibuka teleb ubuka ululume. Aning atonun, winibuka ululum ninye nirya ara, anggun kanye talima nirya, el deice uk deipmunce, el tibuk piriubuka, elkirikinamlume.

³Allah Yahweh elce tenelul touk, aning uk talibuka dobolbanamak ninye nirya ara, kanye deibuka teleb uk unamake. Tonda, sik aninye banamak sukum nirya ara, malye un ning tonok ning babye, talibuka fia kum unamake. Winibuka unyak ninye nirya ara, kanye deibuka, teleb ubuka unyake. ⁴Diba nun ni Allah, ance, “Aning ara wininamlulume, aning ara fia kum wininamlulume. Teleb una ara ani,” nyapdeiyamsulum yupu nirya, aripsulum deiyok ara ani. Ara ance, ‘Ayupu nirya kekebakiryee, talibuka dobolbakiryee, fia diksukumuk upnin banamak’ tenen, ayupu aryamsulume.

⁵Diba na ni Allah, na ara ance nyapdeiyamsulum touk, fia moubuka uniryee, na kanye talima nirya an deice uk deipniryee, ance, “Aning ara wininamlulume, aning ara fia kum wininamlulume. Teleb una ara ani,” nyapdeiyamsulum touk, ‘Na Ni Koprop Allah arye, meliniliba, ayupu uk moubuka tenepniryee, aning uk melibuka, dobolbanamne’ tenen, morokunune. ⁶Se, na ni Allah, ance nyapdeiyamsulum yupu nirya, moubuka talepniryee, teleb winin ning uk, winipnin banamne. Winibuka unyop ura, na ara lilil una ap, alye dakna ap ara, fia kum unamne.

⁷Ance, “Aning ara wininamlume, aning fia kum wininamlulume,” nyapdeiyamsulum yupu uk, kel kipniryee, ayupu talibuka uniryee, teleb ubuka unamne. Winibuka unamne talak nirya ara, na kanye talima nirya arye, an nong deice uk deipniryee, an tibuk telebe nyabuka, an si uk erenamkine. ⁸Tonda ance, “Aning wininamlume, aning ara fia kum wininamlume. Teleb una ara ani,” nyapdeiyamsulum yupu uk, talibuka ulamniryee, an amutam uk dobolbanamne.

Ayupu talibuka dobolbanamne talak nirya ara, ‘Na Ni Koprop Allah arye, na ti fia kum bataknamnile’ tenen, morokunune. Ara, ance na ti, ‘Anye bira teleb ubuka kum ulula anye arye, el ti bataknamne, tenebuka, kum bataknamnilam’ tenen, morokunune na ni Allah.

Allah Yahweh arye, “Aning ara wininamlume, aning ara fia kum wininamlume,” nyapdeiamuk touk, winina ati, nyabuk yupu

⁹Kam nang, sik unamak talak nirya ati, teleb ubuka una ati, moubuka kalikdakcop ura, yuk malye ning ton, sikce talibuka fia kum unamake. Ara, nun Ni Koprop Allah ance, “Aning ara wininamlulume, aning ara fia kum wininamlulume,” nyapdeiyamsulum touk, sik aninye arye aning uk moubuka tenebakiryee, ayupu talibuka upnin bacop ura, malye un ning ton talibuka kum unamake. ¹⁰Tonda, na kanye talima nirya arye, an deice uk deipkiniryee, asum-asum nirya an tibuk piriubuka enamkine. Aning atonun ance meliniminba, ‘Ance nyapdeiyamsulum yupu moubuka

tenepnirye, fia dobolbanamne' tenen, morokunune. Ara ance, "Aning wininamlulume, aning ara fia kum wininamlulume," nyapdeiyamsulum yupu nirya ara, 'Moubuka dobolbanamne' tenen, nyapne.

¹¹Na ni Allah ance peteresilyam yupu nirya ara, na kanye noutamak uk, fia moubuka deipnirye, aning uk tenebuka unune. Winibuka unyop ura, na arye an dam ton, malye ubuka kum kilinamne. ¹²Diba, na ni Allah Yahweh, anda fia teleb uk ulyama anya arye, na ara an si uk erenamkine. Winikiniba ance nun ti, "Teleb una ara ani," nyabuka, nyalisiminye yupu nirya ara, na ti melibuka peterenamnilame.

¹³Na Ni Koproba Allah ance, "Wininamlulume," nyapdeiyamsulum yupu nirya ara, 'Yuk ninye ton kekenamak' tenen, weik yupu deice arye nyanamne. ¹⁴Winibuka unamne talak nirya ara, na kanye deipnirye ance, "Aning wininamlulume, aning ara kum wininamlulume," nyalisilyam yupu uk, talibuka dobolbanamne. Winipmanto ara, ninye arye, 'Ara weik mambul ning' tenen, sik 'Na' tenen ning ati, moubuka talilamak touk, na arye anyapdeiyamsulum yupu nirya ara, fia talibuka unamne.

¹⁵Ance, "Aning wininamlulume, aning ara fia kum wininamlulume. Teleb winina ara ani," nyalisilyam yupu nirya ara, 'Deiyok noutam ning dan do?' tenen, na arye fia moubuka tenepnirye, talibuka unamne. Aning atonun, ance, "Aning ara wininamlulume," nyapdeiyamsulum ning ati, fia teninamne. Malye un ning tenena kumce, an yupu uk moubuka tenena uk unamne. ¹⁶Ance, 'Winibuka unamake' tenen ati, nyapdeiyamsulum yupu nirya ara, aning atonun wininyop ura, na kanye deilinamne. Winibuka unamna anya arye, ance, "Aning wininamlyame. Teleb winina ara ani," nyalisilyam yupu ara, fia kum batakanamne.

Allah Yahweh arye, "Teleb ubuka unamlume," nyapdeiyamsuk yupu

¹⁷Na ara, 'Allah el fil donanye birye teleb uk unamne,' tenenun ati, ance weik arye melipnininba, na kanye talima namin kilinamnilame. Winipnininnyop ura, na upnin banamne talak nirya ara, ance nyalilalum yupu uk, kekebuka winipnin banamne. ¹⁸Tonda, ance na asing teleb kibuka lapdeipnininba, teleb upnilya deice arye, ance, "Aning wininamlume, aning ara fia kum wininamlulume," nyapdeiyalum yupu nirya, moubuka dinirye, teleb ubuka kel kipnamne. Ara, an yupu noutamak arye, ninye kum winipmanto ning nirya, moubuka kel biknamna ati, nyapne.

¹⁹Na tukwak mutuku noutamak tia unamne talak ara, ninye asik nang ulamak touk unamna anya arye, an yupu deice arye, "Aning ara winibuka wininamlulume," nyapdeiyamsulum yupu nirya ara, ance fia kum duknunamnyame. Ance nyasiminye yupu fia fatanulul anya arye, ayupu nirya ara, lak uk kilinamnyame. ²⁰Tonda ance, "Aning ara wininamlulume, aning ara fia kum wininamlulume," nyalisilyam yupu nirya ara, na fia tenenun deice arye, na kanye talima noutamak nirya, wekuka langdipnilirye, na kanye fum tam tenen ning nirya ara, uk

dinulule. ‘Aning wininilya deice arye, asum-asum nirya ara, tuba atonun uk wininamnye,’ tenenune. Asum-asum nirya ara, an yupu fia fatanulul ati nyapne.

²¹ Ance nyasiminye yupu kum kekebice ninye arye, kwalinyak deice malye unamak ninye ati, ance wenepnamlyame. Ance, “Aning ara wininamlulume, aning ara fia kum wininamlulume,” nyapdeiyamsulum yupu nirya ara, amalye winin ning uk, talibuka unyak ninye arye yaniltanyake. Ance nyalisimin yupu yanibuka batakikirye, malye upnin banyake. Winibuka unyak ninye ati ara, sik anang nong deice, sulongonamlyame. ²² Ance nyasiminye yupu yaniltalamak ninye noutamak ununa anya arye, sikce na ti, “Elda walwalnye ulula anya arye, talye ning uk talibuka ulule,” nyabuka, na ti yep-yep aninyake. Sik aninye arye, malye ulamaka noutamak arye, na ni koprop ance lyenamnyame. “Ance nyalilamsulum yupu uk, moubuka talinune anya arye, ancuk lyenamnyame,” nyabuka moropkine na ni Allah.

²³ Tonda, amutuku noutamak talibuka unyakce, weik ninye deiyok nang nirya arye, bulubuka wekikirye, na ti on, yupu talinamniak. Sikce winibuka yupu talinamnyak talak nirya babye, na ara an fil donanye ununa anya arye, ance, “Teleb una ara ani,” nyapdeiyamsulum yupu uk, talibuka dobolbaniryte, fia tuba tenebuka unamne. ²⁴ Ati ance, “Aning ara winina kume, aning ara winina telebe,” nyapdeiyamsulum yupu noutamak nirya ara, na kel bikna yupu uk ulule. Winipliryte, na kanye talima noutamak nirya, teleb kilinulule. Na arye, ‘Se, yata winiptinye do?’ tenen, teniltona uk unilye talak noutamak nirya ara, ance nyasiminye yupu deice arye, ‘E teleb upnin banamne bisik ara, ani,’ tenebuka bikinune.

Allah Yahweh arye nyapdeiamuk yupu, moubuka kekena ati nyabuk yupu

²⁵ Ara, na talima uk diniliba, ‘Dipnamne do?’ tenen, ikin weik unilye talak ara, tuku deice uk manune. Winibuka ikin uniliba, tuku deice mapmanye bukni, na Ni Koprop Allah ance, nyapdeiyamnulum touk, kam bukipnininba, teleb uk unamne. ²⁶ Na arye an ti, “Na Ni Koprop Allah, na unamne ning ara ani,” nyabuka laka nyapdeiyamkisiba, ance na ti tamubuka, “Winibuka unamlyame,” nyapdeiyamnulum. Aning atonun, winitalak babye, ance, “Winibuka unamlyame. Teleb una ara ani,” nyabuka, laka nyalinilyam yupu nirya ara, ance na ti, lakak uk laka nyapnimince, moubuka peterenamnyame.

²⁷ Winibuka, ayupu laka nyanamnilam talak ara, ance ninye ati, “Aning ara wininamlulume, aning ara fia kum wininamlulume. Teleb winina ara ani,” nyabuka, nyapdeiyamsulum yupu uk, tenebuka unamne. Na ara, ‘Allah arye nyapdeiamsuk yupu nong noutam ning deiyok dan do?’ tenen, ‘Moubuka kel kipnamne,’ tenenuna anya arye, na ni koprop ance moubuka melilamnininba, ayupu uk fia tenepniryte, tenebuka unamne.

²⁸Tonda ikin ning na dam yaniliba, kanye imun weik unulule. Na kanye uk dinilye talak nirya ara, na ni Allah ance nyalisimin yupu, melibuka peterepnimince, na talima kwadinamnilame. Ance nyasiminye yupu deice arye, melibuka peterepnimince, na talima fia mikip kipdeipniminba, na arye teleb uk unamne. ²⁹Aning atonun, na diksukum bisik batakuka, malye bisik kirikuka banmanye talak ara, ancuk na dobuka yuk pera kilinamnilyame. Winipniminya deice, ance fia teleb ubuka winin ning uk peterepniminba, ance, “Aning wininamlulume, aning ara fia kum wininamlulume,” nyapdeiyamsulum yupu uk, talibuka unamne. Ara, ancuk bico tenepnimince, ‘Teleb un ning uk peterenamnilam’ tenen, morokunune.

³⁰Na ara fia teleb ubuka uniry, diksukum bisik uk, wibuka dipdeniry, dobolbanamne. Allah ance, “Aning wininamlulume, aning ara fia kum wininamlulume,” nyapdeiyamsulum yupu ara, kum bataknamne. Ayupu ara, na tuba-tuba, tenena arye, nukuka unamne. Asum-asum nirya noutamak ara, ayupu diniry, moubuka dobolbanamne. ³¹Na ni Allah Yahweh, ance, “Winibuka unamlume. Teleb winina ara ani,” nyaliniminye touk, aning uk melibuka dobolbanamne. Diba, na ni Allah Yahweh ance fia kum bataknamnilame. Ati ara, malye ninye arye, na nong deice malye yupu nyapnica babye, alye dakna ap, ilil una ap, fia kum unamne.

³²Na Ni Koprop Allah, ance na ti teleb ubuka, kel bikna deiyok ning areniminba, ance nyaliniminye yupu nong noutam ning uk, kekebuka dobolbanune. Aning ati ara, ance na ti, “Aning wininamlyame,” nyaliniminye yupu, ‘Aning uk kekebuka dobolbaniry, kanye deibuka unamne’ tenen, an dam bik-bik abuka banune. An yupu uk moubuka taliniry, dobolbanamne.

“Kel bikna deiyok ning aripnutume,” nyabuka morobuk yupu

³³Diba, na ni Allah Yahweh, ance na ti an weik mambul yupu, “Winibuka unamlume, teleb winina ara ani,” nyapdeiyamsulum yupu uk, peterenamnilame. Winibuka peterelamniminbuk, atalak arye dipdongobuka, an yupu uk talibuka dobolbanamne. Dobolbalamnya ani, sirya akunum dakanamne. ³⁴Ance, “Aning wininamlulume, aning ara kum wininamlulume,” nyalisiminye yupu nirya peterepnimince, kel bikna deiyok ning aripniminba, na arye, an yupu uk tenebuka unamne. Winibuka unamne talak nirya ara, na kanye tenen ning nirya ara, an deice uk delinamkine. Ance nyasiminye yupu uk, talibuka dobolbanamne.

³⁵Na kam unamne talak nirya ara, ance, “Wininalyame,” nyapdeiyamsulum yupu nirya ara, peterepniminye ura, ayupu uk talibuka uniry mikip arye unamne. Ara, talye ati kume. Deiyok ara, na arye, ‘An yupu uk talibuka unamne’ tenen, fia patanulule. ³⁶Allah ance na kanye

talima noutamak fil dopniminye ura, ance, “Aning ara wininamlume. Teleb una ara ani,” nyapdeiyamsulum yupu nirya ara, aning uk pataniliba, an yupu talibuka unamne. Na kanye talima noutamak, an yupu uk fia pataniliba, aning uk talibuka unamne talak nirya ara, yuk talye ning nirya ati, ‘Aning weik arye doproptiniba, bona weik talinanye unamne’ tenen, kum patanamnile. Na kanye aryuk tenen ning, talibuka kum unamne.

³⁷Tonda, ance na ti, fia moubuka kalikinamnilyame. Ance na batakniminba, ‘Mangkau arye talye-talye yuk malye un ning uk eipnirye, melibuka dobolbinyak’ tenen, moropkine. Ara, na Ni Koprop Allah an fia kam uminye birye, ‘Wininamake,’ nyasiminye yupu uk areniminba, ayupu uk talibuka unamna deice arye, kam fia unamne. ³⁸Na Ni Koprop Allah, yata ninye do nirya, an ti, ‘Se, nun Ni Koprop Allah elda weik mambule’ tenen, ilil unamak ninye nirya ati, ance, ‘Sik ti fia melinamsine,’ nyabuka nyalilamsulum yupu uk talibuka unamake. Na ara, an amutam uniryte, an fil uk talibuka ununa anya arye, ‘Ance nyalisimin yupu nirya ati, dib tenebuka fia dobolbanamne, tenebuka unamne’ tenen, morokunune. Ara, na kanye noutamak teniltona uniliba, ‘An yupu ati dib tenebuka kum unpun’ tenen, ‘Na Ni Koprop Allah melipnilyame,’ nyabuka morokunune.

³⁹Na Ni Koprop Allah, ance, “Wininamlulume,” nyabuka nyalisilyam yupu ara, dipkoprop fia teleb uk ulule. Ati ara, ‘Na arye, malye un ning talibuka unyop ura, alye dakdanyak’ tenen, na ilil fia weik unulula ati, ance kalikuka melininimba, ‘Teleb un ning uk talibuka unamne’ tenen, morokunune. ⁴⁰Dipkoprop ance, “Winibuka unamlulume. Teleb una ara ani,” nyabuka nyalisilyam yupu nirya ati ara, fia pataniliba, ayupu ati na arye, fia kanye delinune. Ati ara, malye ning tonok ning babye talibuka kum umince, anda fia diksukumnye ulyama anya arye, ance na ti winiryuk kam un ning arenamnilam deice arye, ‘Kam fia unamne’ tenen, morokunune.

“Allah Yahweh elce nyalisilye yupu dam uk unamlyame,” nyabuk yupu

⁴¹Diba, na Ni Koprop Allah Yahweh ance na ti, batakanina fia kum dib aryuk, bico tenebuka melinilyame. Tonda ance na ti, “Winibuka lyebuka delinamkine,” nyabuka, ‘Nyaliniminye touk ubuka lyepnamnilam’ tenen, moropkine naio. ⁴²Ance melibuka lyepniminyop ura, na arye ayupu bobuka, na ti, ‘Nun like,’ tenenikirye, nyilikininyak ninye, sik dam laka nyalbinamne. Ayupu ara, talye ati kum nyapne. Deiyok ara, na Ni Koprop Allah, ance nyasilyam yupu ati ara, ‘Ayupu nirya ara, fia dipkoprop yupu anya arye, aning uk talibuka unamne’ tenen, unune. Ance nyalyam yupu nirya, dib tenenuna anya arye, na ti nyilikininyak ninye ati laka nyalbinamne.

⁴³Tonda ance, “Wininalulume, aning ara fia kum wininamlulume,” nyabuka nyapdeiamsulm touk, ‘Ayupu talibuka uniryte, an amutam uk teleb ubuka winipnin banyop ura, ayupu arye teleb ulinamnil’ tenen, dib

tenenune. Ati ara, ance na si fum bisik arye, an teleb nyasilyam yupu dolona kume naio. Allah arye nyanulul yupu ara, fia dipkoprop yupu tenenuna ati, 'Adipkoprop yupu doproprnimize, na kum bataknamlam' tenen, moropkine naio. ⁴⁴Na ara ance, "Aning ara wininamlulume, aning ara fia kum wininamlulume," nyapdeiyamsulum yupu, 'Batakna kum dib aryuk talibuka fia upnin banamne,' tenenune.

⁴⁵Kam unamne talak nirya ara, ance nyalilamsulum yupu nirya atibuk, fia pi dobuka doproptinirye, 'Deiyok ani' tenen, elsusunune. Winibuka ununa anya arye, na teniltona kumce, talye uk luba kibuka kam uk unamne. Yata malye un ning arye do, tonok ning babye, na talima tapu koubuka kum winipnamle bukni, teleb uk kilinilyamba, teleb uk unamne.

⁴⁶Tonda ance, "Wininamlulume, aning ara kum wininamlulume. Teleb winina ara ani," nyapdeiyamsulum yupu dobuka, na arye ninye deiyok talibuka unyak nang, kekena ak nirya laka nyalbinamne. Ayupu bobuka weik ninye deiyok nang, sisin nang kekena ati, laka nyalbinamne talak ara, alye ton fia kum dakanamne. ⁴⁷Ance, "Wininalulume, aning ara fia kum wininamlulume," nyapdeiyamsulum yupu kekebuka una ati, na kanye deilnamne. Aning ati ara, an yupu bobuka yuk ninye dam laka nyalbinamne talak ara, alye kum dakanamne.

⁴⁸Na arye ance, "Wininalulume, aning ara fia kum wininamlulume. Teleb winina ara ani," nyapdeiyamsulum yupu ati, kanye deipnirye, ayupu ap, an ap ati, fia telebe nyabuka, si erekunune. Tonda, ance nun ti nyapdeiyamsulum yupu ati, 'Deiyok noutam ning ara dan do?' tenen, ayupu nirya ara, nuknirye moubuka tenenamne.

**Allah arye, "Wininalulume, teleb una ara ani," nyapdeiyamsuk
yupu, yanibikirye, "Ikin ning nun nong deice deilisinjak
bukni, Allah arye lyepnamsile," nyabuk yupu**

⁴⁹Ance na an amutam uniryte, an fil uk donunye biti, "Wininamkine," nyabuka, nyalin yupu nyapdeiamnulum ning moubuka tenenamnlulume. Na arye ayupu dobukapnirye, 'Dipkoprop na Ni Koprop Allah arye, melibuka lyepnamnil talak ara, dan talak do?' tenen, kanye bokoltona kumce, kanye deipnirye kintinibuka, dina uk unune. ⁵⁰Na kanye imun ning unulul talak, ikin unilya babye, kanye deibuka fin-fina asa arye ununa deiyok ara ani. Ance, "Na yupu kekepminyop ura, na arye teleb ubuka melipnamkine," nyabuka, nyalilamnuluma anya arye, ance ayupu nyapdeiamnulum deice arye, na kanye kwa dipnululume.

⁵¹Ninye ton malye ubuka, kwalina uk ukirye na ti, "Elda mambul kum, talinye uk ulule," nyabuka, yep-yep abikirye, fia malye teneninyake. Utenenyak bukni ance, "Wininamlulume, aning ara kum wininamlulume," nyapdeiyamsulum yupu ara, talibuka unamne. Ayupu ara, batakuka talye kanye bobuka kum unamne. ⁵²Na Ni Koprop Allah

Yahweh, ance nun ti, “Wininalulume, aning ara kum wininamlulume,” nyalisilyam yupu nirya ara, na arye fia moubuka tenenamne. Ara, na kam unye talak nirya ara, na kanye talima noutam, ayupu moubuka tenenuna anye arye, na kanye kwa dinlyame.

⁵³Tonda, na arye sik malye winin ning uk talibuka unyak ninye ati, weik arye derenune. Sik aninye ati, lik weik unuluk deiyok ara, ance, “Wininamlulume, aning ara kum wininamlulume,” nyapdeiyamsulum upu nirya, amalye wininyak ninye arye, ayupu batakuka banyaka atia.

⁵⁴Na tukwak mutuku noutamak unamne talak nirya ara, tia talak uk unun bukni, lo mitikanun aripniminba, ance, “Wininamlulume, teleb winina ara ani,” nyabuka, nyapdeiyamsulum yupu nirya tenepnirye, ayupu deice arye, kanye teleb mot senmanirye, kanye deibuka unamne.

⁵⁵Diba, na ni Allah Yahweh na lukunyan manamne talak nirya ara, an tibuk fia teninamkine. Ati, na unamne talak nirya, ance, “Wininalulume, aning ara kum wininalulume,” nyapdeiyamsulum yupu moubuka tenepnirye, ayupu nyasilye touk unamne. ⁵⁶Minop talak arye diprongobuka, winitalak babye, ance, “Wininamlulume, aning ara fia kum wininamlulume. Teleb una ara ani,” nyaiyalum yupu nirya, ayupu uk talibuka unune.

Allah Yahweh arye, “Winibuka unamlulume. Teleb una ara ani,” nyapdeiyamuk yupu kekebuka una ati, nyabuk yupu

⁵⁷Diba, na ni Allah Yahweh, na kam tuba unamne talak nirya ara, an tibuk tenepnirye, fia talibuka unamne. Ance, “Wininamlulume,” nyapdeiyamsulum yupu nirya ati, fia tenepnirye, ayupu uk talibuka unamne, nyapkine. ⁵⁸Na kanye talima nirya, an deice uk deipnarye moropkine. Ara, ‘Ance na ti bico tenepnimince, fia teleb uk ulinamnilame’ tenen, moropkine. Abico tenenamnilam deiyok ara, ance, “Winibuka melipnamkine,” nyabuka, nyalina yupu deice arye nyapnulum touk, ‘Aning uk wininamnilam’ tenen, moropkine naio.

⁵⁹Na kam uniryte banamne talak nirya ara, na arye fil dobuka unamne ning nirya ara, fia moubuka tenelamsa deice arye, wininamne. Ara, na kam unamne talak nirya ara, ance, “Wininamlulume. Teleb una ara ani,” nyapdeiyamsulum yupu moubuka tenepnirye, na arye unamne ning ati, moubuka tenena arye, teleb uk unamne. ⁶⁰Na arye winitalak aryuk, ayupu nirya bobuka banamne. ‘Winitalak kum bukni, aminyan yuk talak teleb unamne,’ kum tenenamne. Ati ance, “Wininalulume, aning ara fia kum wininamlulume,” nyapdeiyamsulum yupu bobuka banamne. Ayupu batakuka talye kanye bopmaniryuk, kum unamne. Ayupu ara, fia ati talibuka unamne.

⁶¹Tonda, malye winin ning uk, talibuka unyak nang arye, na ti, ‘Anye bira nun like. El opnamap’ tenen, tapu koubuka deipnitinga babye, ance, “Wininamlulume, aning ara fia kum wininamlulume,” nyapdeiyamsulum

yupu nirya, na fia kum batakanamne. Aning uk fia talibuka banamne.

⁶²Aning atonun, na mapmanye ani, lukunyan noutamak bukuknye talak ap, dangulongonye talak nirya ara, na Ni Koprop Allah ance, “Wininamlulume, aning ara fia kum wininamlulume,” nyapdeiyamsulum yupu, diksukum una ati, aripsulum yupu nirya ati tenepnirye, an tibuk, “Telebe,” nyabuka an si uk erenune.

⁶³Na ara, ance nyapdeiyamsulum yupu nirya ati, ilil uplirye, an yupu uk moubuka talinyakce, dobolbanyak ninye nirya ati, na arye, ‘Sikda na kayapu ninye koprop unyake,’ tenebuka unune. Ance nyapdeiyamsulum yupu uk, kekebuka dobolbanyak ninye ati, na kanye delinune. ⁶⁴Diba, na ni Allah Yahweh, ance nun tukwak mutuku im sirya mutuku sirya noutamak unyap ninye ati, fia bico tenesimince, melisilyame. Bico tenesiminye ning nirya ara, tukwak mutuku noutamak fia weik ulule. Se na ni Allah, ance, “Wininamlulume, aning ara fia kum wininamlulume. Teleb una ara ani,” nyapdeiyamsulum yupu nirya ara, ance na ti moubuka peterenamnyame.

Ikin ning, nun nong deice usilya deice arye, nun kanye talima wisipsiliry, adeice arye Allah arye nyasilye yupu, moubuka kel kinyaba ati, nyabuk yupu

⁶⁵Se, na ni Allah Yahweh, ‘Ance na an amutam fil donanye ati, fia teleb kilinamnilam’ tenen, moropkine. Ance, “Winipnamsine,” nyapdeiyamsulum yupu nyasilye touk, ‘Ance na ti melibuka teleb kilinamnilam’ tenen, moropkine. ⁶⁶Ati ance weik kel kina deiyok ning areniminba, kel kibuka unamna deice arye, ninye yupu teleb kibuka, bokuka deilinamne. Tonda, na babye diksukumuk upnin banamne. Aning ara talye ati kum nyapne. Deiyok ara, nara ance, “Wininamlulume, aning ara fia kum wininamlulume,” nyapdeiyamsulum mem yupu nirya ara, fia dib tenepnirye, ayupu talibuka dobolbanune.

⁶⁷Tonda, minop talak ara, talye kanye bobuka malye un ning talibuka, malye upra balamse bukni, aminyan talak ara, ance na malye winilamse ning ati, wenepnulumba ikin ulamse. Bukni, winitalak ara, ance nyapdeiyamsulum yupu nirya ara, kum batakanamne. Fia atibuk talibuka unamne. ⁶⁸Na ni Allah, na akunum bikamse. Anda fia teleb winin ning uk talibuka ulyamnye anya arye, ance winilyam ning nirya babye, diksukumuk ulyame. Ati, ance, “Wininamlulume, aning ara fia kum wininamlulume. Teleb winina ara ani,” nyapdeiyamsulum yupu nirya ara, peterenamnyame.

⁶⁹Ara, sik kanye talima erebuka kwalinyak nang arye, na ti malye yupu nyalininyakce, lululin yupu weik nyaninyake. Tilila yupu nyaninyak bukni, ance, “Wininamlulume, aning ara fia kum wininamlulume. Teleb una ara ani,” nyapdeiyamsulum yupu nirya ara, na kanye talima

noutamak nirya arye, ayupu tenepnirye, talibuka unamne. ⁷⁰ Amalye tilila yupu nyaninyak ninye nirya ara, teleb un ning moubuka kum kel bikamica arye, sik kanye talima noutamak, ‘Teleb ning ani, malye ning ani,’ kum tenepmanto ninye unyake. Bukni ance, “Wininamlulume, aning ara fia kum wininamlulume,” nyapdeiyamsulum mem yupu nirya ati ara, kanye deipnirye, na talima noutamak deibuka unamne.

⁷¹ Dikpoprop malye weik ulamse ati, ance na ti wenepnulumce, ikin ning weik, na nong deice deiyamnulum bukni, winipnuluma deice arye, ance, “Wininamlulume, aning ara fia kum wininamlulume. Teleb winina ara ani,” nyapdeiyamsulum yupu nirya ara, moubuka bikamse. Ati ikin ning aripnulung ning ara, teleb kililamnuk. ⁷² Na ni Allah, ance, “Wininamlulume, aning ara fia kum wininamlulume. Teleb una ara ani,” nyapdeiyamsulum yupu, na ti bokuka arinilyam ning ara, tukwak mutuku noutamak, talibuka unyak urasin teleb ning, el si ara emas ap, perak ap, dekna weik ulamle.

Bukni, na kanye ara, adekna weik ning ara, mitik mambul uka. Ance nyanilyam yupu nirya ati ara, ‘Ayupu ara weik mambul,’ tenenune. ‘Ayupu ara, weik dekna weik ning atonun ulule,’ tenepnirye, ayupu ati kanye delinune.

“Allah Yahweh arye peteresilye yupu ara, fia teleb uk ulule,” nyabuk yupu

⁷³ Allah ancuk kwepdeiyamnulumce, an taruk aryuk na ti, teleb kipdeiyamnulum. ‘Winitalak ara, weik kel bikna deiyok ning areniminya deice arye, ance, “Wininamlulume, aning ara kum wininamlulume,” nyalisilyam yupu nirya, moubuka kel kipnamne’ tenen, morokunune.

⁷⁴ Allah ance, “Aning wininamlulume, teleb winina ara ani,” nyapdeiyamsulum yupu nirya ara, kum bataknamne. ‘Ayupu ara, na tuba-tuba tenena arye, ayupu deice arye, teleb ubuka ulinamnile’ tenen, moubuka dobolbanamne. An nyasiminnye yupu ati, kanye delinuna anya arye, an ti ilil upliba, ‘Nun ni Allah weik mambul ulul’ tenen, unyak ninye arye na ti eipnicop ura, kanye delinamniyake.

⁷⁵ Diba, na ni Allah Yahweh ance, “Aning wininamlulume, aning ara kum wininamlulume,” nyapdeiyamsulum mem yupu nirya ara, fia diksukum yupu uk ulule. Aning ara, akunum bikamse. Tonda, ance na ti, ‘Na mi ulula anya arye, malye ulamuk bukni, fia kum bataknamna anya arye, teleb ubuka unamle,’ tenelamnulumce, bico teneluluma deice arye, na wenena ati, ikin ning na nong deice deililamnulum. Aning babye na bikinune.

⁷⁶ Ati ance na ti bico tenebuka kanye deipnimize, fia batakana kumce, teleb kilinamnilam ning ara, ikin unilye talak noutamak babye, ‘Na talima kwadinamnile’ tenen, moropkine. Ara, na an amutam uniry, an fil donanye ati, ‘Ance, “Winibuka teleb kilinamkine,” nyabuka nyalilamnulum touk, wininamnilam’ tenen, moropkine.

⁷⁷ Na ni Allah, na kam unamne talak nirya ara, na kanye deipnirye ance, “Aning wininamlulume, aning ara kum wininamlulume,” nyalisilyam

mem yupu uk tenepnirye, na kanye talima nirya teleb uk unilirye, kanye deibuka ayupu dobolbanune. Ati ara, ance na ti bico tenebuka upnimbana, na ton fia teleb ubuka kam unamne. ⁷⁸Deiyok kum upmanile bukni, na ti, ‘Anye bira nun like,’ tenepnikirye, sik talima erebuka, kwalibuka unyak nang arye, na ti malye kililamnilce, ikin ning na nong deice delilamnik.

Ati ara, ‘Ance sik ti wenepminyebuk, alye daknamak’ tenen, moropkine. Ance sik anang ati, wenepminba, alye dakdanamak bukni, na ara ance, “Aning wininamlulume. Teleb winina ara ani,” nyalisilyam yupu nirya ara, ‘Deiyok noutam ning dan do?’ tenen, na arye fia moubuka tenepnirye, talina uk unamne.

⁷⁹Tonda sikce an Allah ati, ‘Se, nun ni Allah ara, weik mambulnye ulule,’ tenebikirye, an ti ilil upmalye ninye nirya ara, tuba tamubuka na damak yakirye, ‘Nun kwit aulule, tenenamnyak’ tenen, moropkine. Ara, aninye arye, ance nyasiminnye yupu nirya ati, kekebikirye, ‘Ayupu ara el deiyok ani’ tenen, moubuka kel bikinyak ninye ara, ‘Na dam tamubuka yanganamak’ tenen, nyapne.

⁸⁰Na kanye talima nirya, an deice uk deipnirye, ance, “Aning wininamlulume. Teleb winina ara ani,” nyalisiminnye yupu nirya ara, ‘Moubuka kekepnirye, diksukumuk unamne’ tenen, moropkine. Tonda, malye un ning fia kum winipnyop ura, yuk ninye eipnikirye, “El malye ubuk ning ara ani,” nyabuka, ‘Malye yupu na deice nyapmanto kum unamake’ tenen, moropkine. ‘Winibuka melipnutumba, teleb uk utinyop ura, na arye ilil uniliba, alye fia kum dakdanamne’ tenen, moropkine na ni Allah.

**‘Allah arye, na ikin unilye talak, na damak yalirye,
melibuka lyepnamnil’ tenen, nyabuk yupu**

⁸¹Se, ‘Na ni Allah arye na damak yaturye, na ti lyeproprnamnil talak ara, dan talak arye yanuka lyelonamnil do?’ tenen, na kanye talima noutamak fia pataniliba, na mikip ara, mitang uk akunum upmanile. Bukni, ance, “Wininamlulume, teleb un ning ara ani,” nyabuka nyapdeiamsulum touk, ‘Ayupu talibuka uniryne, an amutam uk teleb ubuka winipnin banyop ura, ayupu arye teleb ulinamnil’ tenen, dib tenenune. ⁸²Ance, “Winipnamkine,” nyapdeiyamnulum yupu ati, fia tuba-tuba tenena arye, ‘Se, na ni Allah nyalilamsuk ning ara, dan talak arye yanuka melipnamnil do?’ tenen, kanye deibuka, na asing arye fia dinuna ati, na asing akunum malye kipnin banulule. Tonda, na arye an ti nyapkine, “Se, ance na ti, dan talak yanuka melibuka lyepnimince, na talima kwadinamnilam do?” nyabuka morokunune.

⁸³Winipmanto ara, aling deiplomikiba, dawamlya ani, akunum lyupliba, ninye eibikirye, “Anye aling ara dauplye, fia malye ubukba, akunum lyubuka anye arye, batakabe,” nyalamak touk, na babye atonun unune. Ara, ikin weik

ulam nukba, na nong bol nirya ara, lyulsaklam nukba, kum winipmanto unune. Winibuka unmanil bukni, ance, “Winibuka unamlume. Teleb winina ara ani,” nyapdeiyamsulum yupu ara, fia kum luba kipnamne. Na kanye talima noutamak tuba aunamnile. ⁸⁴Na an amutam uniry, an fil donanye unun bukni, ‘Na ni Allah arye, dan talak arye yanuka lyepnamnil do?’ tenen, dina uk unune. Yata wiribukap talak tonap dina uk unamne do? Ara, sikce, ‘Anye bira nun lik’ tenen, na nong deice ikin ning, weik deiliniyak ninye ati, ‘Allah dan talak arye yanuka sik ti wenepliry, sik nong deice ikin ning delinamle do?’ tenen, dina uk unune.

⁸⁵Winipmanto ara, ninye arye, ‘Bura tam kam ulul ning tuku fum bisik sakliba, opnamabe’ tenen, tuku falibuka, lumulamak touk, malye ninye arye, na ti, ikin ning weik, na nong deice deiliniyake. Ara, sik talima erepdakiry, kwalibuka banyak nang arye, na nong deice ikin ning weik deiliniyake. Winibuka unyaka deice arye, Allah ance, “Aning ara wininamlulume, aning ara fia kum wininamlulume,” nyapdeiyamsulum mem yupu ati, yaniltana uk unyake. ⁸⁶Deiyok kum upmale bukni, malye nang arye, na nong deice ikin ning weik deiliniyake. Ati ara, ancuk na ti moubuka melinamnilyame. Tonda, ance, “Winibuka wininamlulume, aning ara fia kum wininamlulume. Teleb winina ara ani,” nyapdeiyamsulum yupu nirya ara, dipkoprop fung yupu ulula anya arye, ayupu nirya dib tenenyabe. Ayupu nyasilye touk ulule.

⁸⁷Sik malye nang arye na ti, ‘Anye bira, obuka kum danaiptibye,’ tenenmaniyak bukni, ance, “Winibuka unamlume. Teleb winina ara ani,” nyapdeiyamsulum yupu nirya ara, moubuka talina uk unune. Fia kum batakanamne. ⁸⁸Ance na ti, bico tenenimince, melipniminya deice arye, lyepdeipnimince, teleb ulinamnilame. Lyepniminyop ura, ance, “Winibuka unamlulume, aning ara fia kum wininamlulume. Teleb winina ara ani,” nyapdeiyamsulum yupu nirya ara, kekepniry, ayupu amutam uk moubuka unamne.

**Allah Yahweh arye, “Wininamlulume,” nyapdeiamuk yupu ara,
kum danmanto kum yupu anya arye, “Fia aunamle,” nyabuk yupu**

⁸⁹Diba, na ni Allah Yahweh, ance nyapdeiyamsulum yupu nirya ara, min kum danmanto kum yupu ati, fia aunamle. Im deice ap, im noutamak ulul ning ap, fia aunamla touk, ance nyapdeiyamsulum yupu babye, fia aunamle. An yupu ara, min kum danmanto kum ulule. ⁹⁰An fia teleb ubuka uminya deice arye, ance nyasiminye touk dipkoprop usulule. Ninye arye mapu deibikiba, dadeipdanin banamak ninye babye, ance aninye ati, bico tenepsimince, teleb ubuka melisilyame. Fia kum bataknamsilyame. Tonda ance tukwak mutuku nirya kwepdeiplumce, moubuka talilyama deice arye, winitalak babye tuba kat ulule.

⁹¹Ance, “Aning ara wininamlulume, aning ara kum wininamlume. Teleb winina ara ani,” nyapdeiyamsulum yupu, winitalak babye atonun, fia dib yupu uk ulule. Deiyok ara, yata ning do nirya, Allah

ance, ‘Wininamne,’ tenyاملumtoug, aulul ning nirya ance tenelyam touk, aning uk ulule. Aning ati, ara ance nyasiminye yupu nirya ara, fia dipkoprop yupu uk ulule. ⁹²Tonda na imun kanye bobuka ulamse talak noutamak arye, ikin arye dipmatinye bukni, an yupu melyamnuka deice arye kum dipse. Deiyok ara, kam unye talak nirya ara, na kanye deipnirye ance, “Aning wininamlulume, aning ara kum wininamlulume. Teleb winina ara ani,” nyalisilyam yupu nirya talinirye, na kanye talima nirya teleb uk uliniliba, kanye deibuka ayupu dobolbanune.

⁹³Ance, “Aning wininamlulume, aning ara kum wininamlulume. Teleb winina ara ani,” nyalisilyam yupu nirya deice arye, melibuka kam kilininimba, na tuba kam unune. Aning ati ara, ance nyapdeiyamsulum yupu fia luba kum kinamne. ⁹⁴Ance nyapdeiyamsulum yupu nirya ati, ‘Deiyok dan do?’ tenen, piribuka kel kiamsa ati, na ni Allah ance na ti, lyeproprnamnilame. Na ara an mi unune.

⁹⁵Sik malye unyak nang arye na ti, ‘Anye bira nun lik anya arye, optibye’ tenen, kintinibuka dininyake. Bukni, na ara Allah ance, “Winibuka wininamlulume,” nyalisiminye yupu atibuk, ‘Deiyok ani’ tenen, moubuka kel biknin banamne. ⁹⁶Tonda, na arye dilamnibuk, aning-aning nirya, fia teleb ubuka diksukumuk ulul ning nirya babye, ton fia kum langdilule. Mitik touk ulule. Tonda aminyan talak kum upnamle. Bukni, ance nyalisilyam yupu tonok ara, fia langdiplirye, fia aunamle. Anyuk fia teleb ulya ara, kum nukmanto ulirye, kum tunim apmanto ulule.

“Allah arye, ‘Wininamlulume, aning ara kum wininamlulume,’ nyamsuk yupu uk, kanye deibuka kekenune,” nyabuk yupu

⁹⁷Dipkoprop nara, Allah ance, “Wininamlulume, aning ara kum wininamlulume. Teleb una ara ani,” nyapdeiyamsulum yupu atibuk, kanye deibuka unune. Asum-asum nirya noutamak, ayupu moubuka tenepnirye unune. ⁹⁸Na ara, Allah ance nyapdeiyamsulum yupu moubuka tenepnirye, batakana kumce, fia talibuka ununa anya arye, adeice arye weik kel bikna deiyok ning weik arye unulule. Na oldan nang, sikce ayupu moubuka tenena kum deice malye wininyake. Sikda mitika arye kel bikinyak bukni, na arye an yupu kel bikinun deice arye, weik kel bikna deiyok ning unulule. Ati, fia moubuka tenepnirye unamne.

⁹⁹Dipkoprop nara, Allah ance, “Wininamlulume, aning ara kum wininamlulume. Teleb winina ara ani,” nyapdeiyamsulum yupu atibuk, kanye deibuka unirye, asum-asum nirya noutamak, ayupu moubuka tenepnirye talinune. Ati ara, na moubuka teninun ning ara, weik arye teninun bukni, na peterena deiyok nang ara, ‘Deiyok ani’ tenen, sik mitika aryuk kel bikinyake. Sik tenelamik atonun kum tenenune. Na ara fia weik arye tenebuka bikinune. ¹⁰⁰Na mutuku wisi nang arye, aning-aning nirya ati, mitika arye kel kinyake. Na ara, sik ulamik atonun kum unune. Na ara moubuka dipdenirye, deiyok noutam ning

babye weik arye bikinune. Deiyok ara ani. Ara, Allah ance, “Wininamlulume, aning ara kum wininamlulume. Teleb winina ara ani,” nyapdeiyamsulum yupu niry kekebuka, talinirye melinuna ati nyapne.

¹⁰¹Na ara, malye un ning ayala-yala niry, ‘Mankau kanye bobuka malye upnun’ tenen, amalye un ning damak arye, kwarabuka leipropnirye, an nyaplum yupu uk, dukdongobuka unune. Ara, ‘Allah ance nyapdeiyamsulum yupu moubuka kekenamne’ tenen, unune. ¹⁰²Allah ance, “Wininamlulume, aning kum wininamlulume. Teleb winina ara ani,” nyapdeiyamsulum yupu niry ara, ancuk peterelamnulume. Ati ara, an yupu tonok ning babye ton, kum batakanune. Aning uk moubuka eipnirye, diksukumuk unune. Ara, talye ati kume. Allah ancuk peterepnuluma atia.

¹⁰³Allah ance nyapdeiyamsulum yupu ati ara, kanye deilinune. Winipmanto ara, ninye arye mong mek dipmakiba, si bam bol dam, min-min teleb lelamle ning ara, mitik teleb ulul bukni, ance nyapdeiyamsulum yupu ara, fia weik teleb yupu nyapsuluma anya arye, ayupu ati weik arye kanye deilinune. Mong mek dipniba mitikto lelamnil bukni, an yupu kekepnye talak ara, weik arye kanye deilinune.

¹⁰⁴Allah ance, “Wininamlulume, aning ara kum wininamlulume. Teleb una ara ani,” nyapdeiyamsulum yupu niry ara, moubuka kekenye deice arye, moubuka tenepnirye, moubuka kel kinune. Ati, an yupu nyasilye touk kum bukni, yuk kirikuka malye bisik uk balamak nang ara, na like. Yuk ninye arye, “Nun teleb uk unmabe,” nyaplobuka, malye ning unyak ning niry ati ara, na yu unulule.

“Allah arye nyapdeiamsuk yupu ara, fia teleb ulya deice arye, ninye kanye talima noutamak dirina kilisulule,” nyabuk yupu

¹⁰⁵Allah ance nyasilyam yupu ara, na kanye talima noutamak dirina kilinulule anya arye, upna atonun unulule. Ati, na bisik banamanyak ara, an dirina arye lapdeipniliba banune. ¹⁰⁶Na arye an damak, “Aning ara, fia dipkoprop unamne,” nyabuka nyalin yupu nyapse ning ara, kum bataknamne. Aning uk wininamne. Ara, ance nyapdeiyamsulum yupu niry ara, fia dipkoprop diksukum yupu anya arye, aning uk moubuka kekepnye, talibuka binamne.

¹⁰⁷Na ni Allah Yahweh, na ara fia weik kanye imun deice uk ununye. Ati ara, Allah ance melibuka kalikinamnilyame. Ara, ‘Minop talak ance na ti, “Winibuka melibuka kaliklamkiniba, kam unamlame,” nyabuka nyalilamnulum touk, wininamnilam’ tenen, moropkine. ¹⁰⁸Na ni Allah Yahweh, na arye an ti, “Anda fia teleb ulyame,” nyabuka, nyakunun yupu ara, kekenamnilame. Tonda, Allah ance, “Aning wininamlulume, aning ara fia kum wininamlulume. Teleb winina ara ani,” nyapdeiyamsulum yupu niry ara, ‘Fia moubuka peterepnilyame’ tenen, moropkine.

¹⁰⁹Tuba-tuba, yu nang ap, ikin ning ap arye, na nong opmanto unulule. Opmanto unulul bukni, Allah ance, “Aning wininamlulume, aning ara fia kum wininamlulume. Teleb winina ara ani,” nyapdeiyamsulum yupu niry ara, na arye fia kum luba kinune. ¹¹⁰Malye un nang arye na ti,

‘Anye bira nun lik’ tenen, na damak, ‘Wena wepmakiba yulamle atonun, upnamle’ tenen kalikeninyak bukni, Allah ance nyapdeiyamsulum yupu nirya ton kum batakanune. Aning uk talibuka upnin banamne.

¹¹¹Allah ance, “Aning wininamlulume, aning ara fia kum wininamlulume,” nyapdeiyamsulum yupu ara, fia moubuka talinamne. Ara, minop talak arye, an yupu aripnulumba, aning uk talibuka uniry, ayupu ara fia ati aupnamle. Tonda ance nyasilyam yupu ara, weik mambul yupu ulula anya arye, adeice na ara, fia kanye tenepniry, fin-fina asa uniliba, teleb uk unamne. ¹¹²Na kanye talima noutamak tuba fia tenenun ara, ‘Ance nyapdeiyamsulum yupu uk moubuka tenepniry, dukdongobuka unamne,’ tenenune. Winilamnya ani, dipnye ura bataknamne. Sisinye Raja Daud arye nyabuk.

[Minop talak sekamik buku ara, ayat 113-120 ton aubuk bukni, nunce aning kum sekuba ati, otam ayat 121 dukdongobuka nyapnin banamlulume.]

**‘Na olan nang arye oplopnick’ tenen,
“Lyeppnamnilame,” nyabuka morobuk yupu**

¹²¹Se na ni Allah, na ara malye una kum aryuk, akunum teleb ubuka uniry, dipkoprop diksukum winin ning uk, talibuka ulamse anya arye, ance dobuka, ‘Na nong deice ikin ning deilininyak nang, sik taruk deice fia kum deipnamnilam’ tenen moropkine. ¹²²Na ara, an amutam uniry, an fil uk melibuka donuna anya arye, ‘Ance melipnimince, teleb uk kilinamnilam’ tenen, moropkine. Allah ance na batakniminba, na ti, ‘Elda nun like,’ tenebuka, na nong deice ikin ning weik deilininyak nang, ‘Sik talima erebuka, kwalibuka banyak nang, sik damak fia kum bataknamnilam’ tenen moropkine.

¹²³Tonda ance, ‘Na ti melibuka lyeppnamnil’ tenen, kintinibuka dikini bukni, min kum yalum anya arye, na asing uk dipnin banulule. Ara, an nyalin yupu deice arye, “Lyeppkiniry, teleb kipdeipnamkine,” nyapdeiyamnulum ning ati, ‘Se, yata talak upnamnil do?’ tenen, kintinibuka dina uk unune. ¹²⁴Na Ni Koprop Allah, ance, “Wininamlulume, aning ara kum wininamlulume. Teleb winina ara ani,” nyalisilyam yupu dobuka, na ti peterenamnyame. Tonda, na an amutam uniry, an fil uk donanye ununa anya arye, ‘An weik arye bico teneniminya deice arye, teleb ubuka melinamnilam’ tenen, moropkine.

¹²⁵Na ara, an amutam uniry, an fil uk donanye ununa anya arye, ance, “Wininamlulume, aning ara kum wininamlulume. Teleb una ara ani,” nyalisilyam yupu nirya ara, kel kipnamne. Ance nyalisimin yupu nong deiyok noutam ning babye, ‘Fia dipkoprop moubuka kel biktinye’ tenen, fatanulul ati, ‘Moubuka kel bikna deiyok ning aripnamnilame’ tenen, moropkine naio. ¹²⁶Na ni Allah Yahweh ance, ‘Malye unyak ninye nirya bulubuka deipniry, wenepnamna,’ teneplum sum akunum dam upmale. Ara, talye ati kume. Deiyok ara, ance, “Wininamlulume, aning ara kum

wininamlulume,” nyapdeiyamsulum mem yupu nirya ara, fia malye unyak ninye arye, ayupu talye mangkau kibuka yaniltana uk unyaka anye arye, ‘Winitalak aninye ati, wenebnalyam’ tenen, nyapkine naio.

¹²⁷Ance, “Winibuka wininamlulume, aning ara fia kum wininamlulume,” nyapdeiyamsulum yupu ati, weik arye kanye deibuka unune. Urasin teleb kat ning, el si ara emas, fia teleb dekna weik ning uliba, aning mitikanun patanulul bukni, ance nyapdeiyamsulum yupu ara, fia teleb ulula ati, ayupu ara weik arye patanulule. ¹²⁸Aning ati ara, na kam unamne talak nirya ara, ance, “Winibuka unamlume, aning ara, fia kum wininamlulume. Teleb una ara ani,” nyabuka nyalisiminye touk, na babye, ‘Ayupu ara fia dipkoprop teleb yupu,’ tenenirye, aning uk talibuka unamne. Tonda malye un ning ayala-yala nirya ap, malye unyak ninye arye, malye unyaka ap ati, ‘Na like,’ tenebuka unamne.

**Allah Yahweh arye, “Aning wininamlulume, aning ara fia
kum wininamlulume,” nyapdeiyamuk yupu patasiliba,
“Moubuka tenebibirye unamabe,” nyabuk yupu**

¹²⁹Allah ance, “Aning ara wininamlulume, aning ara kum wininamlulume. Aning nirya talibuka unamlume,” nyapdeiyamsulum yupu ara, fia teleb uk ulule. Ayupu ara, dib dipkoprop ning atibuk, nyapdeiyamsulume. Talye yupu kum nyapdeiyamsulume. Ati nara, Allah ance nyapdeiyamsulum yupu uk, dukdongobuka tenepnirye, moubuka na talima noutamak deipnirye unamne.

¹³⁰Allah ance nyapdeiyamsulum yupu ara, fia duknuna yupu atonun unulul bukni, ance kel bikna deiyok ning areniminya deice arye, an dirina ara, na talima noutamak arye laka kiliniliba, kel bikinune. Mince kum kel kipmanto ulamse ning ara, an yupu deice arye dirina areniminya deice arye, ‘Deiyok anye’ tenen, moubuka kel bikinune. Tonda, aning-aning nirya kum kel bikamik nang daukirye, ‘Ayupu ara deiyok dan do?’ tenen, tuba walwal ulul ninye ati ara, an nyasiminye yupu deice arye, laka kipdeipminba, an duknuna yupu nirya ara, sikce moubuka kel kipnamake.

¹³¹Ance nyasiminye yupu weik arye fatanulul anye arye, na kanye talima noutamak ayupu ati tenipdenirye, ‘Se ayupu ara weik tonun ton kel biktinye’ tenen, talima uk dinulule. Winipmanto ara, kam ara mek pataliba, si akuka kang-kang alamle tonun unune. Ara, talye ati kume. Na ni Allah ance, “Aning ara wininamlulume, aning ara kum wininamlulume,” nyapdeiyamsulum yupu nirya ati ara, ‘Ayupu kel biktinye’ tenen, fia patanilya deice arye unune. ¹³²An si erebikirye, an deice uk sik kanye deilinyak ninye ati, minopce wana kum dib aryuk, ance bico tenesimince, fia teleb ubuka melipsilyame. Aning kel kipse anye arye, na arye Allah an ti, ‘Na ni koprop’ tenen, na kanye an deice uk delikununa anye arye, ‘Ance na ti bico tenepnimince, melinamnilam’ tenen, moropkine.

¹³³Tonda, na ni Allah, ‘Na mangkau arye, an yupu bisibuka yaniptapnerye, malye upnun’ tenen, an nyalin yupu deice arye nyapdeiyamsulum touk, kalikuka melinamnyame. Tonda, na ara mitangnye ununa anya arye, ‘Malye una deiyok ning, na talima lildoniliba, malye un ning arye, tapu kouna atonun upniliba, malye weik upnyak’ tenen, ‘Naio, ance kalikuka melipnimince, malye una noutamak arye lopdongopniminba, teleb uk unamne’ tenen, moropkine. Ati na ni Allah, ‘An mikip arye melibuka kalikinamnilam’ tenen, moropkine.

¹³⁴Aning atonun, na ti, ‘Elda talinye,’ tenenikirye, na nong deice ikin ning weik deilinyak ninye ara, ‘Sik damak arye dobuka lyopropnimince, teleb kilinamnilam’ tenen, moropkine. Ara, urdem ati kume. Bukni, ance lyepropniminba, Allah ance, “Aning wininamlulume, aning ara kum wininamlulume. Teleb winina ara ani,” nyapdeiyamsulum yupu uk, ‘Ance melininba, na arye ayupu moubuka tenepniry, dukdongobuka diksukum unamne’ tenen, moropkine naio.

¹³⁵Allah an fia kurun teleb arye ulyam dirina ara, na deice delinamnilame. Tonda, ‘Na fatapnil ning dimnimince, na melina ati melibuka arenamnilam’ tenen, moropkine. Tonda, Allah ance, “Aning uk wininamlulume, aning ara kum wininamlulume. Teleb winina ara ani,” nyapdeiyamsulum yupu uk, ‘Moubuka peterininba, teleb uk unamne’ tenen, moropkine.

¹³⁶Allah ance, “Aning uk wininamlulume, aning ara kum wininamlulume” nyapdeiyamsulum yupu nirya ara, yuk ninye batakikiry, yanibicop ura, na eipniry weik arye, engenmanye talak ara, na asing maka ara, mek pu dobuka balamle tonun unulule. Yuk ninye arye, an yupu yaninyaka anya arye, engena weik arye engenune. Ara, ‘Se, yata deiyok ati, Allah el nyalye yupu yaniltanyak do?’ tenen, engenune.

“Allah arye, ‘Wininamlulume,’ nyapdeiyamsuk yupu ara, fia diksukum un yupu nyapdeiyamsulume,” nyabuk yupu

¹³⁷Na ni Allah Yahweh, anda malye un ning tonok ning babye, ton kum ukulule anya arye, dipkoprop anda fia telebnye umince, diksukum winin ning uk ulyame. Tonda, ance, “Aning wininamlulume, aning ara kum wininamlulume,” nyapdeiyamsulum yupu deice arye, ninye ati teleb ubuka, yupu lipsisikuka bokolisilyama anya arye, anda dipkoprop fia telebnye ulyame. ¹³⁸Allah ance nun ti, nyalina yupu deice arye, “Aning wininamlulume, aning ara kum wininamlulume. Na arye nyasinye touk, ubuka upmunyop ura, na arye kalikuka melinamsine,” nyapdeiyamsulum yupu ara, fia diksukum nyalin yupu uk ulule. Ayupu nirya ara, nun tukwak ninye arye, fia pi deibuka, dib tenenamabe. Ance nun ti tenelamsulum touk, tonok ning babye kum bataknalame. Ance tenelamsulum touk, aning nirya dipkoprop fil dobuka unamsilame.

¹³⁹Na ni Allah, na arye an ap, an yupu ap ati, ‘Aning ara fia teleb uk ulule’ tenen, fia pataniliba, tenina uk ununa anya arye, malye unyak ninye nirya

arye, an yupu yanikirye, malye winin ning uk talibuka unyaka anya arye, aninye ati na yu ara, na damak uku buk dilamle touk unulule. Ara, talye ati kume. Deiyok ara, Allah ance nyapdeiyamsulum yupu ara, na oldan ninye niryra, moubuka kum tenekiry, talye luba kina uk unyaka ati nyapne.

¹⁴⁰ Allah ance, “Winipnamsine,” nyabuka nyalin yupu deice arye nyapdeiyamsulum ning ara, dipkoprop ning uk nyapdeiyaluma anya arye, ayupu uk moubuka talibibiry, aning uk dobolbapyop ura, nun un ning niryra ara, teleb uk unyabe. Winibuka unyaba deice arye bikinyabe. An nyapdeiyamsulum ning uk, ‘Fia dipkoprop teleb uk ulule’ tenen, bikinyabe. Ati ara, na ara an amutam uniry, an nyapdeiyamsulum yupu uk talibuka uniry, kanye deibuka unamne. ¹⁴¹ Na ara fia mitik mambulnye unune. Tonda yuk ninye arye na ti, ‘Elda talinye ulule. Elda mambulnye kume, talinye koproba ulule,’ teneninyake. Na ara mambulnye guma bukni, ance, “Aning ara wininamlulume, aning ara kum wininamlulume. Teleb una ara ani,” nyalisilyam yupu ara, fia kum luba kinune. An yupu ara, fia tenina uk unune.

¹⁴² Ance nun ti, “Aning ara wininamlulume, aning ara fia kum wininamlulume,” nyalisilyam yupu ara, fia diksukum yupu uk ulule. Atonun, an yupu niryra ara, dipkoprop yupu uk ulule. Tonda, an malye ning tonok ning babye kum ukilye touk, fia diksukumuk unalame. Anda diksukum telebnye ulalum atonun, fia teleb ubuka, diksukumuk fia unalame. An diksukumuk ulyam ning ara, fia kum danamle. Winitalak diksukumuk ulyam touk, fia aunalame.

¹⁴³ Tukwak mutuku noutamak unamne talak ara, fia kanye imun ning na damak yanganamnile. Bukni, ikin ning na damak yanganamnile babye, ance, “Aning ara wininamlulume, aning ara fia kum wininamlulume,” nyapdeiyamsulum yupu niryra ati ara, na kanye deibuka unune. Ayupu ara fia patanulule. ¹⁴⁴ Ance, “Aning ara wininamlulume, aning ara kum wininamlulume,” nyapdeiyamsulum yupu niryra ara, fia diksukumuk aunamle. Ati ance kel bikna deiyok ning uk areniminba, aning uk talibuka, unamne talak ara, teleb ubuka kam uk unamne.

‘Allah Yahweh arye melibuka lyepnamnil’ tenen, morobuk yupu

¹⁴⁵ Na kanye talima niryra ara, an deice uk deipniry, na ni Allah Yahweh an ti, “Na melipnilyame,” nyabuka morokunune. Diba, na ni Allah Yahweh an ti nyapkin, na ara dipkoprop ance, “Aning wininamlulume, aning ara fia kum wininamlulume. Teleb winina ara ani,” nyapdeiyamsulum yupu uk, talibuka amutam uniry kekebuka dobolbanamne. ¹⁴⁶ Na ara an amutam uk ubuka unamne talak ara, na ni an ti, malye nyabuka tuba-tuba morona uk unamne. Ara, na ni koprop, ‘Ance na ti lyepnamnil’ tenen, moronamkine. Tonda na ni koprop ance, “Aning ara winina meme, aning ara winina telebe,” nyapdeiyamsulum ning uk, ‘Na arye tenepniry unamne,’ tenenune.

¹⁴⁷ Ati na mapmanya ani, bereknulye talak, berentam bukuknye talak niryra ara, ancuk, “Melipnilyame,” nyabuka moronamkine. Ara, ance nyalisimin yupu

nirya ati fia, “Melipnilyame,” nyabuka moronamkine. Ara ance, “Winibuka melinamsine,” nyaiyalum yupu ati, ‘Winipnamnilca’ tenen, fia kintinibuka dina uk unamne. Ance nyasiminye yupu deice arye, na kanye deilinune. ¹⁴⁸ Aning atonun, inipmaliba lukunyan noutamak ninye arye mapmace talak nirya babye, ance nun ti, “Winibuka melibuka, teleb updeipnamsine,” nyabuka, nyalina yupu deice nyapdeiyamsulum yupu ati, moubuka nuknirye, ‘Deiyok dan do?’ tenen, fia teninuk unune.

¹⁴⁹ Diba, na ni Allah Yahweh, ance na nyapkin yupu nirya ati, an kekepniminya arye, bico tenebuka melinamnilyame. Ara, ance bico tenesiminya deice arye, melinamnilyame. Aning atonun, na teleb ubuka uniry, kam uk unamna ati, ance, “Aning unamlume, aning ara fia kum wininamlulume,” nyapdeiyamsulum yupu ulye touk, moubuka kalikinamnilyame. ¹⁵⁰ Ninye malye unyak nang arye, an ulyam ning nirya ati, ‘Nun like,’ tenebuka unyak nang ara, na damak aunmake. Sik anang arye tenenyak ning ara, ‘Nunda fia malye winin ning uk, upnin balamtibye,’ tenekirye, ance, “Aning wininamlulume, aning ara fia kum wininamlulume,” nyapdeiyalum yupu ara, aninye arye, ‘Nun like,’ tenebuka yaniltana uk unyake.

¹⁵¹ Sik aninye ara, wininyak bukni, diba na ni Allah Yahweh, na unamne sukum ara, an aunalame. Tonda, ance, “Aning wininamlulume, aning ara fia kum wininamlulume,” nyapdeiyamsulum yupu nirya ara, fia dipkoprop ning uk ulule. ¹⁵² Ance nyapdeiyamsulum yupu bikamse talak noutamak ara, minop talak arye dipdongobuka, anoutamak talak nirya bikamse. Ara, ance, ‘Na nyapnamsin yupu nirya ara, tia yanuka una ning ati, kum ulyame. Na arye nyalisunun yupu nirya ara, fia aunamle,’ tenyalumce, ayupu nyapdeiyamsulume. Aning ara, na ton bikamse.

**“Na ikin unilye talak noutamak ara, na ni Allah
melinilyame,” nyabuka morobuk yupu**

¹⁵³ Na ni Allah, ance, “Aning wininamlulume, aning ara fia kum wininamlulume,” nyapdeiyamsulum yupu nirya ara, kum lubakinuna anya arye, na imun kanye bobuka wininye ning nirya ara, ‘Ance dinimince melibuka lyelonamnilam’ tenen, moropkine. ¹⁵⁴ Na ni Allah, ance, “Winibuka melibuka teleb kilinamkine,” nyabuka nyalilamnulum touk, ‘Ance lyelonamnilam’ tenen, moropkine. Yuk nang arye, ninye ati yupu bokolinyak talak ara, “Elda malye ulule,” nyabuka lululininyak talak ara, na ni Allah, ‘Ance na damak yanimince, “Anye bira, malye kum ulule,” nyabuka, melinamnilam’ tenen, moropkine.

¹⁵⁵ Ninye yuk ninye ton, yu tenena ap, ‘Malye winin ning uk uptibye’ tenena ap, aning uk upra banyak ninye ati, ance anang lyebuka kum melinamlame. Deiyok ara, ance, “Aning wininamlulume, aning ara fia kum wininamlulume. Teleb winina ara ani,” nyapdeiyamsulum yupu nirya ara, sikce, ‘Se, ayupu kekebuka amutam unamabe,’ tenena kumce, an yupu ati, ‘Nun like,’ tenebuka, batakanyaka ati nyapne. ¹⁵⁶ Diba

na ni Allah Yahweh, ance na ti dipkoprop weik arye bico tenebuka, weik arye melinilyam ning ara, kum nukmanto ulule. Na ti lyebuka delinamnilame. Na ni Allah, ance, “Aning wininamlulume, aning ara fia kum wininamlulume,” nyapdeiyamsulum yupu aulye touk, ‘Ance lyebuka meliniminba, ton kam unamne’ tenen, moropkine.

¹⁵⁷Ninye weik arye na ti, yu tenebuka dobolkirikininyakce, na nong deice ikin ning weik deilininyak bukni, ance, “Aning wininamlulume, teleb winina ara ani,” nyapdeiyamsulum yupu nirya ara, na arye fia kum batakanamne. Aning uk talibuka dobolbanamne. ¹⁵⁸Sik malye winin ning uk talibuka unyak ninye arye, an ti dib tenena kumce, an ti yanikinyake. Ati, aninye eipnyop ura, na arye sik ti, ‘Se, amalye unyak ninye ara, na fia like’ tenen, unune.

¹⁵⁹Diba, na ni Allah Yahweh, na ara ance, “Aning wininamlulume, aning ara fia kum wininamlulume. Teleb winina ara ani,” nyapdeiyamsulum yupu nirya ati, na arye fia kanye deilinune. Winibuka ununa ara, ance elinilyame. ‘Ance na ti dipkoprop weik arye bico tenenimince, weik arye lyebuka meliniminba, tuba kam unamne’ tenen, moropkine. ¹⁶⁰Ance dipkoprop yupu arisilyam ning nirya ara, fia diksukum yupu uk ulule. Aning atonun, an yupu noutamak arye, malye un ning fia kum upmalibuk, ance, “Aning wininamlulume, aning ara fia kum wininamlulume,” nyapdeiyamsulum yupu nirya ara, fia aunamle. Ayupu nirya min kumu kum danmanto ulule.

“Allah Yahweh, ance nyapdeiyamsulum yupu nirya ara, kanye deibuka kekepnirye, fia talibuka unamne,” nyabuk yupu

¹⁶¹Se, na ni Allah, sik amutuku noutamak talibuka unyak weik ninye deiyok nang arye, deiyok ton kum upmalibuk, na ti, ‘Elda malinye,’ tenebuka, ikin ning weik, na nong deice deibikirye, na ti dobolkirikininyake. Winininyak bukni, na ara ance, “Wininamlulume,” nyapdeiyamsulum yupu atibuk, na kanye talima noutam arye, ilil tenebuka unune. ¹⁶²Ati ance na ti, “Winibuka melibuka teleb kilinamkine,” nyabuka, nyalin yupu deice nyapdeiyamnulum yupu nirya ati, na fia kanye delinune. Winipmanto ara, ninye arye, ‘Bona weik doproptepye’ tenen, elkiriklamica ani, eibikirye, weik kanye deibuka ulamak touk, na arye an nyalinilyam yupu ati, kanye deibuka unune.

¹⁶³Na ara, tilila yupu nyana ap, tenepce nyana ap, lululina yupu ap nirya ati ara, na arye, ‘Aning ara, na like’ tenen, fia like unulule. Bukni, na ni Allah ance, “Aning ara winina telebe, aning ara winina meme,” nyapdeiyamsulum yupu ati, na arye fia kanye delinune.

¹⁶⁴Tonok sum noutam bukni, tuba tonap, like tek barye deice arye, an tibuk, “Se, na ni Allah, ance nyapdeiyamsulum yupu ara, fia teleb uk ulule,” nyabuka, an si erekunune. Ance, “Aning wininamlulume, aning

fia kum wininamlulume,” nyapdeiyamsulum yupu noutamak nirya ara, malye yupu tonok ning babye, kum ulula anya arye, ayupu ara dipkoprop fia diksukum yupu uk ulule.

¹⁶⁵Tonda, yata ninye do nirya, ance, “Aning ara wininamlume, aning ara fia kum wininamlulume,” nyapdeiyamsulum yupu ati, kanye deibuka dobolbanyak ninye nirya ara, malye kanye bona kum dib aryuk, lamapdongobuka namin asa arye unyake. Sik adarapdongobuka unamak ninye ara, ikin ning weik aupmatu babye, malye una kum dib aryuk, teleb uk upnin banyake. Winipmanto ara, sik yan dum dukne keil ton, bisik noutamak aupmalye babye, keil yan dum dukliba, kum sakuka olule.

¹⁶⁶Na Ni Koprop Allah Yahweh, ‘Anda ninye weik arye lyenamlam sum ara, yata sum do?’ tenen, na ara kintinibuka dina uk unune. Winibuka kintinibuka dina uk unamne talak noutamak ara, ance, “Aning ara wininamlulume, aning ara fia kum wininamlulume,” nyapdeiyamsulum yupu uk moubuka tenepnirye, talibuka unamne. ¹⁶⁷Allah ance, “Aning ara wininamlulume, aning ara kum wininamlulume. Teleb winina ara ani,” nyapdeiyamsulum yupu ara, fia teleb uk ulule. Ayupu nirya ati, na kanye delinune. Ati ara, na ara Allah ance nyapdeiyamsulum yupu uk, amutam unirye, ayupu uk tenepnirye, moubuka unamne.

¹⁶⁸Na ni Allah, na arye wininun ning ayala-ayala nirya ara, ancuk eibuka kel kinilyame. Ati ara, ance, “Aning ara wininamlulume, aning ara fia kum wininamlulume,” nyasiminye yupu ap, “Aning ara telebe, aning ara malye. Teleb winina ati, ban bisik ara ani,” nyapdeiyamsulum yupu uk talibuka dobolbanune.

Allah ati, “Melipnilyame,” nyabuka morobuk yupu

¹⁶⁹Diba, na Ni Koproba Allah Yahweh, na arye an ti na malye nyabuka morokunun ning nirya ara, ‘Kekepnamnilam’ tenen, dobuka, an dam uk delikunune. Ara, ance, “Weik kel bikna deiyok ning arepkiniba, na yupu moubuka kel kipnalame,” nyabuka nyalin yupu deice nyapnulum touk, “Na kel bikna ati aripnilyame,” nyabuka moropkine. ¹⁷⁰Aning atonun, na arye an ti malye nyabuka morokunun ning nirya ara, ‘Kekepnamnilam’ tenen, dobuka, an dam uk delikunune. Ara, ance, “Ikin ning noutamak unalam talak nirya ara, na aryuk lyeproprnamkine,” nyabuka nyalin yupu deice nyapnulum touk, “Ance lyeproprnilyame,” nyabuka moropkine.

¹⁷¹Allah anda fia aumince, ance nyasiminye yupu nirya, na ti peterenilyame. Ati ara, na ara asum-asum nirya, “Se, anda fia teleb ulyame,” nyabuka, an si uk fia erenamkine. ¹⁷²Na ni Allah, ance, “Aning ara wininamlulume, aning ara fia kum wininamlulume,” nyapdeiyamsulum yupu nirya noutam ara, malye yupu tonok ning babye kum ulule. Ayupu nirya, fia diksukum yupu uk ulule. Ati ara, na arye, “Se, Allah el yupu ara fia teleb uk ulule,” nyabuka, kanye lon mot deice arye fia senamne.

¹⁷³Ance, “Aning ara wininamlulume, aning ara fia kum wininamlulume. Teleb winina ara ani,” nyapdeiyamsulum yupu nirya, na arye, ‘Ayupu uk moubuka kel kipnirye, aning uk fia talibuka unamne’ tenen, akunum dobuka dobolbanune. Ati, ‘Anda dinimince, kintinipbuka na tibuk, fia bico tenebuka melinamnilam’ tenen, moropkine. ¹⁷⁴Se, na ni Allah ance ninye weik arye lyepsimince, talibuka teleb kilinamsilam ning ara, ‘Dan talak arye lyepnamsilam do?’ tenen, fia kintinibuka dina uk unune. Tonda, ance, “Aning ara wininamlulume, aning ara fia kum wininamlulume,” nyapdeiyamsulum mem yupu nirya ati, na kanye talima noutam nirya arye, ‘Ayupu ara fia telebe,’ tenenune.

¹⁷⁵Na ni Allah, ance, “Aning ara wininamlulume, aning ara fia kum wininamlulume,” nyapdeiyamsulum mem yupu nirya doproprirye, talibuka dobolbanamne deice arye, mikip kiliniliba, na teleb ubuka kam unamne. Tonda, ance meliniminba, kam fia unamne talak ara, talye kum unamne. Na arye an tibuk, weik arye kanye deipnirye, “Anda fia teleb ulyame,” nyabuka, an si uk fia erenamkine.

¹⁷⁶Se, na ni Allah, na ara an amutam uniryte, an fil uk donun bukni, domba basam tonok wangamliba, el weina deiyoknye birye, ‘Na domba basam dan mutuku ulul do?’ tenen, elamle touk, na ara teleb ban bisik wangapnukba, malye kanye bobuka ununa anya arye, ance elyanamnilame. Ara, talye ati kum bukni, ance, “Aning ara wininamlulume, aning ara fia kum wininamlulume,” nyapdeiyamsulum yupu nirya, luba kum kinune. Ayupu ara, moubuka tenina uk unune. Ati melibuka elyanamnilame naio.

Raja weik Daud arye, Allah morona deice arye nyabuk.

Mazmur 120

Daud arye, “Melipnilyame,” nyabuka morobuk yupu

¹Na ara, imun kanye bobuka, unye talak noutamak nirya arye, ‘Na ni Allah Yahweh arye, na damak yanuka melibuka lyepnamnil’ tenen, “Na ni koprop, ance yanuka melibuka lyeproprilyame,” nyabuka moronune. Na arye Allah ati, moronye talak nirya ara, kekeplirye melininulule.

²Diba na Ni Koprop Allah Yahweh, “Ance sik talye yupu nyaltakanyak nang ap, minina yupu nyaltakanyak nang nirya ap, sik aunyaka noutamak arye, na lyeproprilyame,” nyabuka moropkine.

³Se, sik tilila yupu nyanyak ninye wenena ati, Allah arye, sik nong deice ara, yata ikin ning aripnamle do? Tonda, elce sik tilila yupu nyanyak ninye ati, ‘Weika arye tonap tabakuka wenepnamne,’ teneplyop ura, yata ning

deice arye sik ti, wenena ning dobuka, sik nong deice deipnamle do? ⁴Na kanye ara, elce lo areplibuk, yu nang arye, mal tace lubuka deibikirye, ‘Sik tilila yupu nyanyak ninye nirya opnamak’ tenen, mal dohicop ura, opnamsiake. Tonda, ninye arye, kat yo uku dapmakiba, dipropmalirye, uku kalum dem lolamle ning dobuka, anggun anang nong deice deipnamsiyake.

⁵Se, nara, bico tenena kumce, fia yu upliba, yuk nang ati oltakana uk unyak ninye noutamak ununa anya arye, na malye kanye bonune. Ara, sik yu weik ninye, Mesek mutuku nang ap, Kedar mutuku nang ap atonun, ubuka unyak ninye noutamak neika ununa ati, na malye kanye bobuka unune. ⁶Na ap neika unyap ninye ara, yuk ninye nirya ati, ‘Neika kanye talima lamapdongobuka arye dukdongobuka unamabe,’ tenebuka fia kum unyake. Sikda, ‘Yuk ninye nirya ara, nun like,’ tenen, ona uk unyake. Ayu ninye ap, neika ulamse talak ara, keteng tamun weik ulamse anya arye, na lik weik unulule. Ati, na patanulul ning ara, ‘Sik kanye bobuka unyak ninye ap, na ap, neika fia kum unamabe,’ tenenune.

⁷Ara na arye, “Yuk ninye ap, neika talima dukdongobuka un ning ara, teleb uka,” nyalamne talak nirya ara, na ap neika unyap ninye ara, yu weik ninye anya arye, sikce, “Kume, yuk ninye ap, kanye talima dukdongobuka namin asa arye neika un ning ara, nun like. Teleb ning ara, nunda mal olana uk unamabe,” nyanyake. Ati ara, na lik weik unulule. Daud arye nyabuk.

Mazmur 121

Allah arye Israel ninye meilyamuka ati, mot nyabuk yupu

¹‘Allah el si erenamap’ tenen, Yerusalem mutuku welebuka balamik talak, nyalamik mot ara ani. Na arye mutuku-mutuku nirya dinmanirye, ‘Se, na melipnamnilnye bira, dan mutuku arye yalirye, melipnamnil do?’ tenen, dinune. ²Na melilyanganilinye bira, na ni Allah Yahweh ulule. Elda, im deice ap, tukwak mutuku ap, kintinibuka deibuka deiyoknye bira, Allah el tonok ulule. El dem aryuk melinamnile. ³Tonda, elce nun ti kum bataknamsile. Teleb ubuka kaliksiliba, nun yan babye, ton alap pitikuka kum opnamsile. Allah arye nun Israel ninye ati, fia kalikisululnye bira, ton fia kum malule. Elce tuba-tuba nun damak ulirye, kalikuka melinamsile.

⁴Dipkoprop nyapne, Allah el si Yahweh arye, nun Israel ninye ati melibuka kalikinamsile anya arye, elda wi dukna ap, mana ap atonun, kum unamle. ⁵Allah Yahweh arye, nun damak ausilirye, melibuka dinamsile. Tonda, nun ni Allah Yahweh aniryuk, nun dobukapsilirye, nun diksukum tam uk kalikinamsile. Ara, winipmanto ara, keteng deiplye talak weik yo tikamlyak, amutam keteng koak bulamaka atonun, Allah Yahweh arye erebuka deice tam uliba, nunda el amutam unamabe.

⁶Wininamsila ati ara, keteng noutam talak ara, keteng deiplirye, nun nong deice, keteng fia kum dinamsile. Lukunyan talak babye, wala dirina uplye talak ara, arukuna nun nong deice kum yanganamsile.

⁷Allah Yahweh arye, nun nirya ati, kalikuka melisilya deice arye, nun opmanto ning nirya ara, nun damak ton fia kum unamsile. Elce teleb ubuka melisilyeba, kam uk unamabe. ⁸Allah Yahweh arye, nun ban talak babye, yangan talak babye, fia teleb ubuka kalikinamsile. Ara, winitalak arye dipdongobuka, yuk dotalak babye, fia ati kalikinamsile.

Mazmur 122

Yerusalem mutuku welebana ati, kanye deibuka mot sebik yupu

¹Daud birye kanye deibukce, mot sebuk.

Yuk nang arye nyapnik. “An ap nun nirya, Allah Yahweh el si erena aik neika binuyabe,” nyapnikba, kanye weik deipse. ²Winitalak nun nirya arye, Yerusalem mutuku aik bublan dam yanuka yanibuka, tiknamaba ati, “Se, Yerusalem mutuku yanmabe. Ati, kanye deipnuyabe,” nyababe. ³Se, Yerusalem mutuku aik dobik ning ara, nirya tonok dukdongobuka dobikba, weik asik noutamak ara, ton malye una kum aryuk, fia urasin teleb ubuk.

⁴Amutuku ara, Israel ninye ayala-yala nirya yanganamake. Tonda, Allah el si Yahweh arye wipdeiyamuk nang, Israel yala ninye ati, “Winibuka umunce, anggun nirya ara na si uk erenamnululume,” nyaiamuk touk, yangakirye, Allah ati telebe nyabuka, kibuka si ereyanganamake. ⁵Yerusalem mutuku noutamak ara, Daud el yala nang uk, ninye deiyok nang kibuka ukirye, sik buna teleb ning deice bukikirye, Israel ninye nirya ati, yupu lipsisikuka bokolinamak. Ara, Daud el yala nang uk, afil talibuka donamake.

⁶Tonda, sik Yerusalem mutuku unyak ninye ara, yata wiribuka unyak do? ‘Oldan kum aryuk, kanye deipdanuka teleb unamak do?’ tenen, Allah moronamabe. Ati, nunce anang nirya ati, kanye deibuka Allah morobiba, sik nirya tonok kanye bobuka, teleb uk unamake. Yata ninye do nirya arye, Yerusalem mutuku unyak ninye ati, bico tenenyak ninye ara, sik babye teleb uk unamake. ⁷Nun nirya arye, Allah morobiba, Yerusalem mutuku keil foka antanabuka, dobika noutamak unamak ninye ara, teleb uk unamake. Tonda, Allah morobiba, Yerusalem mutuku noutamak talibuka unamaka deiyok nang, sik yala nang nirya ap, sik bona nirya ap, teleb uk unamake.

⁸Aning ati ara, nun kayapu ap, nun kwit capu ap, nun du yapu ap nirya arye, ‘Yerusalem mutuku unyak ninye nirya, kanye deipdakirye, tonok kanye bobuka, teleb uk unamak’ tenen, Allah moronamabe. ⁹Tonda,

‘Nun ni Allah Yahweh el si erena aik ara, fia teleb uk unamle’ tenen, Yerusalem mutuku unamak ninye ati, Allah morobibiba, sikce amutuku teleb ubuka talibikirye, unamake. Daud arye nyabuk.

[Minop talak sekamik yupu ara, pasal 123 ton aubuk bukni, nunce aning kum sekuba ati, otam pasal 124 dukdongobuka nyapnin banamlulume.]

Mazmur 124

Israel ninye nirya bulubuka, Allah el si erena aik, Yerusalem mutuku damak, welebuka balamik talak nyalamik mot

¹Daud kanye deibuka, mot sena deice arye nyabuk.

Na kayapu, Allah Yahweh arye nun Israel ninye ati, ‘Melinamsine,’ nyabuka, kum nyasulula anya arye, nun dam ara, yata ikin ning yasutu do? ²Tonda, yu mutuku nang nirya arye, nun Israel ninye ati, ‘Anang opnamap’ tenen, nun dam yanamsik talak ara, nun Ni Koprop Allah Yahweh arye, kum meilyamsuk do? Kume, melyamsukba, ikin ning nun damak kum wamsuk bukni, Allah arye kum meilyamsutop ura, yata ikin ning ton nun damak wamsuk do?

³Tonda, sik yu nang arye nun ti sik yu ara uku buk dilamle touk, nun deice deililamsik talak ara, nun ni Allah Yahweh arye, nun kum meilyamsutop ura, nun olan nang arye, akunum oplomsitinge. Allah arye nun kum melyamsutop ura, anang arye nun ti, kam kipman obuka, dipkweicamsitinge.

⁴Winipmanto ara, Allah arye nun ti kum meilyamsutop ura, sik yu nang arye, obuka sirya dakamsitinge. Winipmanto ara, weik mek oplirye, aning-aning nirya bobuka balamle touk, winyamsitinge. ⁵Nun olan nang arye, olyasik talak ara, yin talin nang ara, yupa fia weik yanamika anya arye, aninye arye, ‘Israel ninye opnamabe’ tenen, yanuka onmasitinge, mek olamle touk winyamsitingba, asukum uk diyamtibye bukni, nun Ni Koprop Allah arye meilyamsuka anya arye, kum obuka binamsike.

⁶Winipmanto ara, bai tam ulamle yu kus, el si ara singga kus arye, yuk kam ulul ning opnulya ati, si topdongobuka bolbolok alamle tonun, yu nang arye nun yanuka, talibuka opsiting bukni, nun Ni Koprop Allah arye, nun ti meilyamsuka anya arye, aning ara kum winyamsike. Ati, Allah el si kibuka, si erenamabe. ⁷Aning atonun, winipmanto ara, maka wena wepmacak, maka mangkau arye wekelbiliba, yupliba, loplobuka balamle touk, Allah arye nun ti lyepdeiamsuke. Tonda, maka wemica fum bisik biliba youpli bukni, tapu seklobuka kuplo balamle touk, nun ni Allah arye nun ti, winibuka lyepdeipsuke. Ara Allah arye, nun oldan nang kan-kan arye, lyepsuke.

⁸Ati ara, nun melina deiyoknye bira, Allah Yahweh el tonok ulule. Nun ti melilyanamsilanye bira, Allah Yahweh el tonok ulule. Allah elda, weik

kwemdina deiyoknye ulula anya arye, tukwak mutuku, im sirya mutuku sirya ap, im deice ulul ning nirya ara, elcuk kwepdeibuk.

[Minop talak sekamik buku ara, pasal 125 ton aubuk bukni, nunce aning kum sekuba ati, otam pasal 126 dukdongobuka nyapnin banamlulume.]

Mazmur 126

**Yerusalem mutuku welebuka balamik talak ara,
Allah el si erena ati, amot nyalamik**

¹Kanye delina deice arye, amot nyabik.

Minop talak Babel mutuku nang arye, Israel ninye weik arye tomobuka bobinamik bukni, Allah Yahweh arye tamubuka, Sion mutuku yanuka deipsuke talak ara, ninye arye lengdar deice eipmace ning ati, kanye lopliba, sik ninye kanye deililamak touk, ubuka kanye lopsuke. ²Atalak ara, fia kil-kil upsukba, aku tububurye, nun ni Allah ati, kanye lon mot nyalamupu. Allah arye tamubuka Sion mutuku yanuka deipsuk talak ara, sik dana-dana tam ulamik ninye nirya arye, nun ti nyalamsike. ‘Se, Allah el si Yahweh arye, sik Israel ninye ati, weik mambul fil akunum dopsuke,’ nyalamik.

³Anang nirya arye nyalamik touk, dipkoprop nun babye atonun nyanyabe. Allah el si Yahweh arye, nun Israel ninye ati, fia mambul fil akunum dopsuke. Ati ara, nun fia kil-kil kanye bobuka, teleb uk unyabe. ⁴Winipmanto ara, mok ap, mek ap kum ati, bupu weik arye ninye kum ulamik mutuku noutamak bukni, Allah arye areplibuk, mek panabuka balirye, tamubuka tuku teleb kililamle touk, nun ni Allah el si Yahweh arye, nun kanye imun ulamsuk ning ati, punubuka teleb kilinmasil tenepmabe. Ara, mek fia kum mutuku, amutuku si ara Negeb mutuku noutamak ara, mek panabuka balamle tonun, Allah arye winipdeipmasile.

⁵Winipmasil ning ati ara, nunce ayupu ton nyapnamabe. Ninye nirya engebuka, asing maka adib aryuk bakirye, wa wibuka yala dokamiki bukni, ayala paplirye, nong upliba, linamice talak ara, weik arye kanye deibikirye, sik kanye lon mot senamake. ⁶Aning atonun, ninye asing maka aryuk engebuka bakirye, yala ning dokice ura, tuba tamubuka bikirye, kanye deibuka mot senamake. Ara, kouamice ning wisiplye ura, libuka deibikirye, bobuka yanganyak talak ara, kanye lon mot nyabikirye, boyanganamake.

Mazmur 127

**Allah el si erena aik bana ati, Yerusalem mutuku
welebuka balamik talak ara, amot nyalamik**

¹Sisinanye Raja Salomo birye, kanye deibuka mot sena deice arye nyabuk. Allah Yahweh aryuk, tonok aik kum dobika ara, anyaik

dopnamak nang ara, urdem atibuk talye aik donamake. Aning atonun, Allah Yahweh arye, tonok weik kota ati, kum kaliklyop ura, sik weik asik kalikinamak nang babye, talye atibuk kalikinamake.

²Yata nang do nirya, fia berentam koprop arye bukuka, fil donmaca ani, iniplya babye, talye fil atibuk donamake. Tonda atonun tonoknye ton, ‘Na din ning dopropropanme’ tenen, tonok sum fia pi dobuka donmalya babye, talye atibuk donamle. Deiyok ara, sik ni Allah Yahweh arye sik ti, din ning ayala-yala nirya aresulule. Allah arye nun ninye nirya, akunum kwepdeipsuka anya arye, elce nun ti bico tenepsiliry, nun patapsilye touk, arenamsile. Allah Yahweh arye, nun ninye nirya ati, bico tenepsiliry, nun mana ati, lo aripsiliba, manyabe. Winisilya ati ara, Allah ati kum dib tenebiry, fia pi dobuka talye fil uk doltakana kume. ‘Allah arye melisilya deice aryuk unyabe,’ tenebuka fil donamabe.

³Dipkoprop nun ninye arye deilinyap mapu nirya ara, Allah el bidamnye aryuk, talye aresulula anya arye, amapu nirya ara, ‘Allah arye nun mapu nirya ara, dekne ning arilamak touk aresulule,’ tenenamabe. ⁴Kam talak aniryuk, sal mapu weik arye delinyak ninye ara, winipmanto ninye tonoknye birye, mal weik arye wamlibuka talilamle atonun, unyake.

⁵Yatanye do nirya, sal mapu weik arye delilamlanye bira, el anye bira, ‘Allah arye sal mapu weik arye wamlibuka arenulule’ tenen, kanye fia delinamle. Winipmanto ara, mal weik wamlibuka talilamlanya birye, kanye delilamle touk, ubuka kanye delinamle. Tonda, yatanye do nirya, sal mapu weik arye delilamlanye bira, el oldan nang, yakce talak ara, kum ilil unamle. El oldan nang, yanganmaca ani, keil foka bublan dam yaica babye, ilil kum upnamle.

[Minop talak sekamik buku ara, pasal 128 sampai 129 ton aubuk bukni, nunce aning kum sekuba ati, otam pasal 130 dukdongobuka nyapnin banamlulume.]

Mazmur 130

Israel ninye arye, ‘Allah el si erenamap’ tenen, Yerusalem mutuku welebuka balamik talak ara, amot nyalamik

“Kanye imun un ning, nun dam yalyop ura, Allah arye yanuka lyelonamsile,” nyabuka morolamik yupu

¹Se, na ni Allah Yahweh, weik ikin ning, na dam yanmanilba, imun kanye bobuka unmane. Ati, ‘Na ni Allah arye, yanuka melipnilyame,’ nyabuka, weik yupu deice arye ngalukunmance, na ni Allah Yahweh an ti moropkine. ²Na ni Allah, ance na kanye imun upmanila ati, “Melipnilyame,” nyabuka moropmakin ning ara, kekepnilyame. Winipmanto ara, ninye arye, ‘Nun kayapu nang weknamak’ tenen, aik bublan kukulilamak tonun, na arye, “Melipnilyame,” nyabuka moronamne yupu nirya ara, ance moubuka kekenamnilame. ‘Na

ikin unilye ning ati, moronmakin ning ara, moubuka kekepnimince dilyanamnilame. Na moropkin touk, melinamnilam' tenen, moropkine.

³Atonun nun ni Allah Yahweh.^p Nun malye weik unyap ning nirya ati, 'Aninye wenepnamne do?' tenen, tuba kum tenenamsilame. Naio ance nun malye wininyap ning tuba tenepsiminyop ura, yatanye birye an damak yanuka, kanye deibuka tiktuo do? Kume nun tukwak ninye nirya arye, 'Se, Allah arye wenebuka opsilyak' tenen, alye dakdanuka duknupdatibye. An damak kum yanmanto uptibye.

⁴Se naio, nun malye unyap ning ati, wenena uk ulamsutum bukni, anda, 'Sik malye unyak ning nirya ara, namin kipnirye, aninye lyeponyop ura, sik malye unyak ning kum kilinamne' tenen, patakilibuk, bico tenesilyamnye, ulyama anya arye, ninye nirya arye an ti ilil asa unamabe. Ara, 'Allah elda weik mambulnye ulule. Tonda, Allah elda fia telebnye ulule,' tenen, an si uk, fia erena uk unamkiyabe.

⁵Aning atonun, na nong ap, na kanye talima ap nirya ara, an ti kintinipnirye, 'Allah Yahweh, yata talak yanuka melibuka lyepronnamnil do?' tenen, dina uk unamne. Na ni Allah an yupu ara, fia teleb yupu ulula anya arye, Allah arye "Winipnamsine," nyabuka nyalin yupu deice arye nyapsuk ning atibuk, 'Dan talak arye wiripnamnil do?' tenen, dina uk unamne. 'Ayupu moubuka tenepnirye, teleb uk unamne' tenen, an yupu deice na kanye deilinune.

⁶Na talima noutamak arye, Allah Yahweh ati, fia tuba tenena arye, kanye deilinune. El tibuk fia patanulule. 'Na ni Allah, dan talak yanuka lyepronnamnil do?' tenen, na kanye talima noutamak ara, an ti kintinibuka dina uk unamne. Ninye aik kalikina deiyok nang arye, lukunyan noutam, 'Yu nang arye yanuka opsikirye, nun talenyap ning, dalubuka dopropsicak' tenen, fia dina uk ulamake. Aning atonun, na arye, 'Allah dan talak arye, yanuka lyepronnamnil do?' tenen, an ti, fia kintinibuka dina uk unune. Lukunyan kalikina deiyok nang arye, 'Se, minopce berektue,' tenelamak touk, sikda mitikanun aryuk tenenyak bukni, Allah ati tenikunun ning ara, fia weik arye pataniliba, tuba tenenune. Na arye an ti, fia moubuka dina uk ukunune. Inipmalye babye, berekmalya babye nirya, an ti, an si uk erepkinirye, fia kintinibuka dina uk ukunune.

⁷Se, sik Israel ninye nirya babye, Allah el dam uk yanganamlume. 'Nun ni Allah Yahweh arye, dan talak yanuka melibuka lyepronnamnil do?' tenen, anggun Ni Kopro Allah Yahweh ati, fia moubuka dina uk unamlulume. Winilamunye ura, Allah arye bico tenepsilirye, tuba-tuba

^p 130:3 *Yahweh* – Allah el si koproba ara, Yahweh ulule. Indonesia Alkitab noutam ara, Allah el si Yahweh ulul sukum ara, TUHAN sekenyake. Ayupu bikna ati ara, laka nyan yupu nomor 49 dipdelulume.

melibuka lyelonamsile. Allah arye nun tukwak ninye nirya ati, fia bico tenesulule anya arye, fia kum bataknamnsile. Allah arye, ‘Na tenena ninye ati, melibuka lyelonamne’ tenen, tuba-tuba kintinilisulule. Tonda, Allah elda fia mikip weiknye ulula ati, fia ikin ning noutamak utipya babye, melibuka lyesulule. Elda ikin kum uptue.

⁸Allah elcuk nun Israel ninye arye, malye unyap ning nirya namin kipsilirye, kum kipdeipsilyop ura, lyepnamnsile. Lyebuka dopropsilirye, fia teleb ulinamsile. Nun malye wininyap ning ati, wenebuka oplopsutu bukni, bico tenepsilirye, amalye unyap ning nirya ati, namin kipsilirye, lyesulule.

[Minop talak sekamik buku ara, pasal 131 sampai 133 ton aubuk bukni, nunce aning kum sekuba ati, otam pasal 134 dukdongobuka nyapnin banamlulume.]

Mazmur 134

Israel ninye arye, ‘Allah el si erenamap’ tenen, Yerusalem mutuku welebuka balamik talak ara, amot selamik

¹Nun ni Allah, el si Yahweh, el amutam umunce, el si eren aik fum tam fil dolulum nang nirya ara, Allah Yahweh ati, “Nun ni, anda fia teleb uk ulyame,” nyabuka, el si uk fia erenammlulume. Ara, lukunyan noutamak bukni, Allah si erena aik fum, Allah ati teleb ning aribuka, el ti kibuka si eremunya deiyok nang nirya arye, Allah Yahweh ati, “Nun ni, anda fia teleb uk ulyame,” nyabuka, el si fia erenammlulume. ²Allah el si eren aik damak, Israel ninye nirya arye, ‘El si erepnamap’ tenen, bulubuka yanganupyak ara, el si eren aik fil dona deiyok nang nirya arye, nun ni Allah Yahweh ati, “Se, nun ni, anda fia teleb uk ulyame,” nyabuka, el si fia erenammlulume.

³Nun ni Allah, el si Yahweh arye, yata ning do nirya, im deice ulye ning nirya ap, tukak mutuku ulye ning nirya ara, elcuk kwepdeiyamak deiyoknye ulule. Allah Yahweh arye, el si erenyak ninye nirya ati, ‘Teleb kipdeipsilirye, fia teleb uk unamlum’ tenen, Allah moronamabe. Ara, el si deiyamak mutuku, weik mambul mutuku si, Sion⁹ mutuku noutamak arye, ‘Fia teleb kipdeipnamsil’ tenen, Allah moronyabe.

[Minop talak sekamik buku ara, pasal 135-136 ton aubuk bukni, nunda aning kum sekupu ati, ortam pasal 137 dokdngobuka yinipnin banamlulume.]

⁹ 134:3 Sion mutuku nyalamika ara, kota Yerusalem mutuku ati nyalamik. Amutuku si ara, bitinye sisinyak bukni, amutuku ara tonok ulule.

Mazmur 137

Babel mutuku bobinamik ninye arye, mek kup- kup ulamik talak engebikce, nyabik yupu

¹Ara, nun Israel ninye nirya ara, Babel mutuku bobinamsikba, amutuku noutamak ulamupu talak ara, amutuku balamuk mek lilunak bukmance, Sion mutuku ati tenipdenop ura, fia weik arye engena uk ulamupu. Ara, minop talak, nun mutuku koprop, Yerusalem^r mutuku ati, tuba tenina uk ulamuburye, engelamupu. ²Amutuku noutamak palamuk yo, el si gandarusa yo tikamuk. Ayo kan-kan bukmapu talak ara, yupu len ning, el si ara kecapi, ‘Kanye lon mot ton kum senamabe’ tenen, nun kecapi dobuka, ayo deice girikilkwetelamupu.

³Nun mot len ning, el si ara kecapi, girikilkwetelamika deiyok ara, ani. Ara, Babel mutuku noutamak unmapu talak ara, sik yu nang arye nun ti, “Mot nyamunba kekenusiyabe,” nyabuka nalinmeke. Ara, “Anggun minop talak Sion mutuku ulamlumce, nyalamlum mot uk nyapmunce, kanye teleb kilinamsilyame,” nyabuka dilamsikce, yupu mikip arye nyapsik bukni, mote sepmanto kum unmapu. Ara, minop talak, nun mutuku yanuka obisipsikce, tapu koubuka bobinamsikce, ikin fil dilamsik nang arye, ‘Mot senmakiba kekebibirye, aku tunamabe’ tenen, yu asa arye nyanmasike. “Kanye deipdanamabe ati, mot selulume,” nyanmasike.

⁴Bukni, nunda ‘Kume, fia imun kanye bobuka unmabe anya arye, yata wiribuka Sion mutuku atibuk teniptibirye, kanye deibuka teleb ulin mot nyaptibye do?’ tenenmapurye, mot kum senmapu. Nun Babel mutuku noutamak ulamupu talak, ‘Amutuku noutamak ara, nun ninye asik nang atonun ubuka, unmaba ati, nun ni Allah Yahweh ati, kanye deibuka sen mot nyaptibye kuma,’ tenenmapurye, mot kum senmapu.

⁵Atalak ara, kanye lon mot kum nyalamupu bukni, utenenmapu. ‘Kume, minop talak ulamupu mutuku, Yerusalem mutuku ati kum luba kiptibye. Yerusalem mutuku ati, luba kiptibyeto ura, nun sirik mikip taruk ara, sesal sepsutuba, fil kum dopmanto utibye,’ tenelamupu. ⁶Aning atonun, Yerusalem mutuku ati, luba kiptipyop ura, nun sitang deice namin kum arye sesal lebuka taplaksutue. Nun sitang sesal lepsutuba, yupu nyapmanto kum uptibye. Ara, ‘Nunce Yerusalem mutuku ati, fia tuba kum tenibipyop ura, ikin weik upsilyak,’ tenena ati nyababe. Tonda, nun wininyap ning nirya ati, mitikanun arye kanye deiptibye bukni, Yerusalem mutuku ara, weik mambul weik ulula anya arye, kota Yerusalem mutuku ati ara, weik arye kanye delinyabe. Kota Yerusalem mutuku ati, lik fia kum unamsile. Nun nirya ara, kanye deibuka unamabe.

^r 137:1 *Yerusalem* – Yuk Allah yupu buku noutamak ara, mutuku si Sion sekamik. Amutuku ara, si bitinye, Yerusalem ap, Sion ap nyalamik bukni, amutuku ara, tonoka.

⁷Diba, nun ni Allah, ance Edom mutuku ulamik ninye, sik malye winilamik ning ati, luba kina kume. Fia teninamlyame. Sik Edom mutuku ninye arye, fia malye ulamik ning ara, kum luba kinamlame. Ara, sik Edom yala ninye arye, Yerusalem mutuku noutamak dobuka ulamupu aik, uku dongopnuyik talak, malye nyanmek ning ara ani. “Anyaik nirya batakana kume. Asik-asik nirya dakuka bataknlume.

Daknin banmamunya ani, aning nirya babye batakana kume, akunum nirya daklopnamlume,” nyapdeiyamuk. “Anyaik-anyaik nirya ara, dakuka uluplobibiba, keil pala deice deibik ning ara, lakak upnamle. Anyaik nirya dakuka uluplobibiba, aik oldem upnamle,” nyalamik. Nyabikba, aik deiya deibuka domupu ning nirya dakuka uluplobik. Winibika ati, aning ara Allah ance fia kum luba kinamlame. Nun ni Allah, anda awinibik ning ati, weik arye wenenamlyame.

⁸Se, anggun Babel mutuku noutamak umunye ninye nirya, Allah arye lo areplibuk, anggun ti wenebuka opnamsiak ninye ara, weik arye kanye delinamake. Sik Babel mutuku ninye arye, nun Israel ninye ati, malye weik ulisumunya deice arye, kanye imun ning fia weik upmasile anya arye, anggun Babel mutuku ninye wenena ati, kwang daknamsiyak ninye ara, weik arye kanye delinamake. Ara, ‘Nun Israel yala ninye nirya ati, malye ulisumunya dekna ati, tamubuka opnamsiake.’ Ati ara, aning uk tenebuka unamlulume.

⁹Tonda, teneipdenamlulume. Winiryuk delilalum mi moum dilamice mapu nirya ara, yuk mutuku ninye arye, anggun dam yanuka sirya opsikirye, ninye arye sik mitik mapu bobuka, weik keil deice donokice deice arye opnamake. Sik amapu oplopnamak nang aryuk, ‘Merekuka winipmabe’ tenen, weik kanye deibuka unamake. Aning nirya ara, nun Israel ninye arye tenenyabe.

[Minop talak sekamik yupu ara, pasal 138 ton aubuk bukni, nunce aning kum sekuba ati, otam pasal 139 dukdongobuka nyapnin banamlulume.]

Mazmur 139

“Allah elda weik kel bikna ap, aning-aning nirya kalikuka dina ap, deiyoknye ulule,” nyabuk yupu

¹Sisinanye Raja Daud mot sena deiyoknye birye nyabuk. Diba na ni Allah Yahweh, ancuk na talibuka unun ning nirya ati, fia moubuka dinimince, kel kinilyame. ²Tonda, na buknye talak do, mapnye talak do, bukuka banmanye talak do nirya? Na wininun ning aning-aning babye, na ni ancuk kel kinilyame. Ara, Allah anda fia yukak ulyam bukni, na teninmanye kanye ap, na kanye talima noutamak tenenun ning ap ara, ancuk eibuka kel kinilyame.

³Aning atonun, na fil donye talak babye, dikdik senun talak babye, banmanye talak babye nirya ara, ancuk dinimince, kel kinilyame.

Na unman ning ap, fil donun ning ayala-yala nirya ara, ancuk kel kinilyame. ⁴Se, na ni Allah Yahweh, anda na kabul tenepnirye yupu kum nyapmanye talak arye na, 'Anyapnaman' tenepmanye yupu nirya ara, minopce ance kekebuka eipnimince, kel kinilyame.

⁵Aning atonun, Allah ance na ti, atalak-atalak nirya, 'Malye ning arye, na mi ati malye kipdeiplyak' tenen, warikuka antanapdongopnimince, kalikinilyame. Tonda Allah an weik mikip deice erebuka umince, na melina ati, an taruk arye na nong deice talipnulumba, na ara an amutam, teleb ubuka unune. ⁶Allah ance tenebuka, kel kilyam ning ara, na arye aning nirya kum tenebuka kel kipmanto. Allah an tenelyam ning, 'Kel biktinye' tenen, tenipdetinya babye, dipkoprop fia kum kel biktinye.

⁷Allah an weik mikipnye umince, mutuku-mutuku nirya dilyama anya arye, na arye, 'Na ara dungnubuka yuk mutuku binune' tenen, an dam arye batakuka bitinya babye, dan tam dungnubuka bitinye do? Kume, aning ara kum winipmanto. Tonda Allah an dam arye, 'Kwarabuka yukak binune,' teneptinirye, bitinya babye, yata wiriptinye do? Kume. Anda mutuku-mutuku nirya moubuka dilyamnye ulyama anya arye, aning ara fia kum winipmantoe. ⁸Aning atonun, 'Im deice tam welebuka dungnulbinune,' teneptinirye, bitinye mutuku babye, Allah an babye tuba asukum uk aulyame. Tonda, ninye dibikirye banyak sukum, 'Na dipnyop ura bitinirye, dungnubuka binuka mapnamne,' tenebuka bitinye mutuku babye, na ni Allah anda amutuku noutamak aulyame.

⁹Tonda, na maka pol atonun ning deice arye lakukaptinirye, keteng yangan tam mutuku bitinya babye, keteng wekelban tam weik pera mutuku dabitinya babye, amutuku noutamak babye, an fia aumince, dinamnilame. ¹⁰Amutuku noutamak ara, binuka unmatinya babye, an taruk mikip adib aryuk melinamnilame. Atonun, an sirik taruk adib aryuk talipnimince, teleb kilinamnilame.

¹¹Tonda winipmanto, ikin ning na dam yalye talak ara, na arye imun kanye bopnirye, 'Se, kunuknak arye lelipdongopnamnil' tenen, "Ilil fia weik unmanile," nyaptinye. Tonda, 'Winitalak ara, na dirinak unun bukni, aminyan talak ara, ikin ning na nong deice yaniliba, kanye imun upnilyop ura, kuna ak uk unamne,' teneptinye. Aning nirya teneptinya babye, ance tuba melipnutume. ¹²Ara, talye ati kum nyapne. Deiyok ara, an dam, kunukne ning ton fia kum ulule. Tonda kunukne noutamak babye, anda keteng noutam talak atonun upliba, moubuka elilyame. Aning-aning nirya eililyamnye anya arye, lukunyan noutamak babye, dirina atonun ululnye ulyame.

¹³Tonda, Allah ancuk na nong noutamak wamnuk ning nirya ara, kwepdeipnulume. Tonda, ancuk na nin mun fum kum bomnuk talak arye, ance minopce kwepdeiamnulume. ¹⁴Ati ara, na arye Allah an ti, weik kanye deibuka kibuka si erenamne. Ara, talye ati kume, na ni Allah

ance, na nong deice upnuk ning nirya ara, ‘Winipnamle’ tenen, fia teleb ubuka deiyamnuluma atia. Tonda, na ni Allah an fil dolyam ning nirya ara, ninye arye kum winipmanto fil dolyama ati, na arye an si atibuk mambule tenebuka, na arye kibuka si erenamkine. Tonda, ance na ti fil dopnulum deice arye, na moubuka kel kipnirye, namin asa arye, an amutam uk unamne.

¹⁵Allah ance, na yok nirya kwepdeipnulum talak ara, moubuka dinmanulumce, dukdongobuka darapdongamnulume. Ara, na nin mun fum tam, min kum ulamse talak arye, afil dopnulum. Winibuka kwepdeiyamnulumba, na nin mun fum arye dungnubuka nelamse. Na adungnubuka nelamsak ara, Allah ance dina ara, kum duknupmanto ulamuke. Adip aryuk eibuka, kel kiyamnulumce, akwamnulume.

¹⁶Na min mun fum tam ulamse talak ara, ance minopce eibuka kel kiyamnulumce akwamnulume. Akwamnulumce, ‘Anye bira el kam unamle talak noutamak ara, winibuka-winibuka unamle,’ tenelamnulum ning nirya ara, an kam una buku deice, na si sekuka deiyamnulume. Tonok sum noutamak akunum winipnuk ning ap, aminyan talak winipnamniyake ap babye, min kum deiyok koupnuk talak arye, atalak-atalak wininamse ning nirya ara, minop talak, ance akunum tenebuka kel kiamnulum. Tonok fil ara, min kum deiyok kiamlum talak arye, atalak-atalak winipnamuk ning nirya ati ara, na ni ance minop talak tenebuka akunum kel kiamlume.

¹⁷Allah Yahweh ance teneniyam ning ara, na arye anirya kum bikmanto, fia weik mambul tenenune. Tonda aning nirya, na arye nuktinya babye, fia weik anya arye, anirya nukuka kum sirya daktinye. ¹⁸Tonda, mek wininga weik batakmok nirya ara, na aryuk nukdetinya babye, fia kum nukmanto ulule. Atonun, ance tenelyam ning ara, fia kum nukmanto ulule. Na mapmanya buknye talak babye, an tibuk fia tuba tenikunun ati, an ap neika ansinibuka dukdongobuka unyame.

¹⁹Na ni Allah, na patapnilye ning ara, nyapnamkine. Ara, ance tenepmince, malye winin ning uk, talibuka unyak ninye nirya ara, obuka bataknulame. Tonda, sik ninye on nang ara, ‘Ninye weik arye, tonap tabakuka optibye’ tenen, fatalul nang nirya ara, na ni Allah ance sik anang arye, ‘Ninye opnamak,’ tenenyak nang nirya ara, na damak arye dobuka, yuk tam fia pera mutuku dadobuka bobinamlame. ‘Se, na ni Allah elce winiptue’ tenen, fia patanulule. ²⁰Sik amalye winin ning uk talibuka unyak nang nirya arye, Allah an si ati, fia malye nyalikinyake. Tonda, Allah an kanye deiplum mutuku si deice arye, fia dipkoprop malye nyabuka, tilila yupu uk nyaltakanyake.

²¹Diba na ni Allah Yahweh, an ti sikce an nong deice malye yupu nyalikinyak nang nirya ara, na arye sik aninye ati, yu unulule. Tonda, Allah an damak malye yupu nyalikinyak ninye, sikce, ‘Allah ara nun like’

tenen, yaniltakinyak nang ati ara, ‘Yata deiyok ati malye yupu nyabuka, fia malye weik unyak do?’ tenen, na kanye talima fum tam nirya ara, fia imun kanye bonune. Aning ara, na ni Allah an kele. ²²Sik amalye winin ning uk, talibuka unyak ninye nirya ati ara, na arye sik ti fia yu kanye bonune. Sik anang ati ara, mitiktonun arye, ‘Sikda teleb unyake,’ fia kum tenenune. Tonda, sik anang nirya ara na olan nang atonun ubuka unyake.

²³Na ni Allah ancuk, na talima noutamak teninun kanye nirya ara, wibuka dipdenimince, kel kinilyame. Tonda, Allah ance na tenenye kanye nirya ati, fia moubuka dipdemince kel kipnilyame. ²⁴Malye un ning nirya ton, na talima noutamak malye tenen ning awamniliba, eipniminye ura, na ni Allah ance amalye un ning nirya dobuka, diksukumuk kipdeipnamnilyame. Tonda, na banamne bisik nirya babye, ance na ti, “Fia teleb winin bisik, fia diksukum kam una bisik ara ani,” nyabuka talibuka bobinamnilame.

[Minop talak sekamik yupu ara, pasal 140 sampai 144 ton aubuk bukni, nunce aning kum sekuba ati, otam pasal 145 dukdongobuka nyapri banamlulume.]

Mazmur 145

Daud arye Allah el si erena ati mot deice arye nyabuk yupu

¹Na ni Allah, anda na ninye deiyoknye Sisinanye, Raja unilyame. Ati, ‘Na arye an si erena ati mot senmanirye, fia tuba-tuba kibuka si erenamkine. Fia kum bataknamne,’ tenenune. ²Asum-asum nirya, na arye Allah an tibuk, “Anda fia teleb uk ulyame,” nyanamkine. Winipnirye fia ati, “Anda fia mambulnye ulyame,” nyabuka, ‘An tibuk kipkinirye, si erenamkine,’ tenenune.

³Ara, talye ati kume, na ni Allah Yahweh, anda Weik Erenanye uminya ati, an tibuk, “Telebe,” nyabuka, kibuka si erenamne. Allah an weik mikip arye tenebuka, fil dolyam ning ap, weik mambul winilyam ning ap ara, anirya moubuka kel kibuka sirya kum daktibye. An uminye ning nirya ati, ninye nirya arye, kanye deibuka an si uk erenamkiyake.

⁴Aning ati ara, Allah ance kintinibuka deiplum ning nirya ap, weik mambul fil domlum ning ap, ninye arye eibuka ngalukikirye, an tibuk kibuka, si erenamkiyake. Ati, ninye arye sik mapu deibikiba, dadeipdanin banamak ninye nirya ati, wisi nang arye sik mapu nirya kel bikna ati, an si uk fia erenamkiyake. Erepkikirye, “Allah ara, weik mikip deice arye, ninye kum winipmanto mambul fil dolule,” nyabuka nuknin bakiba, aminyan talak daunamak ninye nirya babye, kekenamake. Aning ara, fia laka nyabuka, nyapdanin banamake.

⁵Na kanye ara, wisi nang arye, sik delinamak mapu ati, Allah an weik mambul ulyama deice arye, teleb ubuka fil dolalum ning ap, fia

teleb ulamlum ning ap ati, kibuka an si erebikirye, laka nyanamake. Na arye, ‘Allah anda mambul fil ap, ninye arye kum winipmanto ning ap, fil dolulnye ulule’ tenen, fia moubuka tenena uk unamne. ⁶Allah ance weik mambul fil, ninye arye kum winipmanto fil, weik mikip deice arye, dobuka winilyam ning nirya ara, ninye kel bikikirye nukuka laka nyapnin banamake. Sikce yuk ninye ati, nyabikibuk kekebikirye, ayupu bobuka, yuk nang dam nyapdanin bakiryne, an si uk fia weik arye erenamkiyake.

⁷Allah ance aning-aning nirya, fia teleb ubuka fil dolyam ning ap, ninye ati fia teleb ubuka melisilyam ning ap, malye una fia kum dib aryuk, diksukum ubuka ulyam ning ap ati, nukuka laka nyapnin banamake. Winicop ura, ninye nirya arye, “Allah ara weik mambul fil doliryne, diksukumuk ululnye bira, el uk ulule,” nyabuka, an si erena ati, kanye deibuka mot senamake.

⁸Allah Yahweh, anda tukwak ninye nirya ati, weik arye kanye talima arekiliba, bico tenenanye ulyame. Ati, nun malye unyap ning ati ara, adib aryuk wenebuka oplopsutum bukni, an adib aryuk, minopce yu tenebuka kum osilyame. ‘Malye unyak ninye arye, sik malye un ning batakikirye, na dam uk tamubuka yatinge,’ tenesilyame. Ance nun tukwak ninye nirya ati, bico tenesimince, fia tuba-tuba melisiminye ning ara, fia kum batakasilyame. Ance tenelamsulum touk, asum-asum nirya, fia melisilyame. ⁹Allah Yahweh, ance ninye nirya ati, kanye talima arikulule. Tonda, Allah arye kwepdeiamuk ning nirya ati, ‘Na tenen ning uk ulule’ tenen, an talima namin ubuka bico tenesimince, fia moubuka kalikisilyame.

¹⁰Diba, na ni Allah Yahweh, ance kwepdeialum ning nirya arye, an si uk erenamkiyake. Tonda, an ti dib tenebikce, batakana fia kumce, an yupu uk, talibuka dobolbanyak ninye nirya arye, an tibuk telebe nyabuka, an si uk erenamkiyake. ¹¹Sik aninye nirya arye yuk ninye ati, “Nun ni Allah el mikip deice arye, aning-aning nirya talibuka, weik erenanye ulya ara, fia teleb uk ulule,” nyanamake. Tonda, “An tibuk, nun ninye deiyoknye Sisinanye, Raja usulule,” nyabuka, teleb yupu nyakiryne, an si uk erenamkiyake. Wininyakce, “Allah anda weik mikip deice arye, ninye kum winipmanto mambul fil dolyamnye,” nyabuka, asum-asum nirya nukunmakiryne, an si uk erenamkiyake.

¹²Ance kum winipmanto fil, minop talak arye domlum ning atibuk, nukunmakiba, mutuku-mutuku nirya unyak ninye nirya arye, ‘Se, Allah elda weik mikipnye ulule’ tenen, kel kipnamake. Ara, ninye kum winipmanto ning, winilyam ning nirya, sik eibikirye, kel kipnamake. “Nun ni Allah el mikip deice arye aning-aning nirya talibuka, Weik Erenanye ulula anye arye, fia teleb uk ulule,” nyabuka laka nyanamake.

¹³Allah ance aning-aning nirya talibuka, Weik Erenanye ulyamnye, winitalak arye diprongobuka, doryanamle talak nirya ara, fia ati

aunamle. Aning nirya kum kum danamle. Fia ati aupnamle. Allah ance aning-aning nirya talibuka unalam ning ara, keteng tamun fia weik arye unamle. Ninye arye mapu deibikirye, dadeipdanin, banamak ninye babye, ancuk aninye ap, aunamle ning nirya ap, talimince, Weik Deiyouknye unalame. Allah Yahweh ance tenelyam ning ara, asum-asum nirya fil teleb ubuka, dopnin banamlame.

Allah Yahweh, ance “Winipnamsine,” nyabuka nyalina yupu deice arye nyapdeiyamsulum yupu ara, fia sirya dakanamle. Tonok ning babye kum batakalyame. Ara, Allah ance, ‘Wininamne,’ tenelyam ning nirya ara, dipkoprop an tenyamsulum touk, winilyame. Tukwak ninye nirya ap, yuk kam ulul ning nirya ap, Allah ance kwepdeialum ning ayala-yala nirya ati, Allah ance fil dosilyam ning nirya ara, bico tenesimince, fia teleb ubuka melisilyame.

¹⁴Weik ikin ning ninye sik nong deice yaliba, imun kanye bobuka unyak ninye nirya ati ara, Allah Yahweh ance eipsimince, adib aryuk melisilyame. Tonda, Allah ancuk ninye talima uk diliba, imun kanye bobuka unyak ninye ara, an taruk arye talibuka tikilisilyame. ¹⁵Aning ati ara, ninye nirya ap, kam ulul ning nirya ap arye, Allah an ti, ‘Din ning arenamsilarya. Tonda, nun patasilye ning ati, dipkoprop fia melinamsil’ tenen, kintinibuka dinmaki bukni, din ning patan talak akunum dam uplyop ura, sik din ning ayala-yala nirya, ance arelyame. Tonda, sik ikin kanye bopmace ninye ati teleb kibuka melilyame.

¹⁶Allah ancuk ninye ap, yuk kam ulul ning, ayala-ayala nirya ap, sik patan ning nirya ara, kintinibuka arisilyame. An taruk aniryuk, tukwak ninye nirya ap, yuk kam ulul ning aning-aning nirya ap, nun patan ning nirya ara, ancuk arisilyame.

¹⁷Allah Yahweh, ance tenebuka, winiminye ning nirya ara, fia diksukumuk winilyame. Malye un ning tonok babye, fia kum winilyame. Ninye nirya sik wininyak atonun, moubuka tenemince, diksukum yupu uk, nyabuka lipsisikuka bokolisilyame. Tonda, tukwak ninye nirya ap, kam ulul ning nirya ap, Allah ance kwepdeialum ning nirya ati, Allah ance fil dosilyame. Winisiminye ning nirya ara, ance fia bico tenesiminya deice arye, teleb ubuka fil domince, melisilyame.

¹⁸Allah Yahweh ati, “Se naio, nun ti melinamsilame,” nyabuka moronyak ninye, sik dam ara, Allah el tuba ulule. Ara, sik kanye noutamak arye, kanye bokoltona ap, malye tenena ap, yupu talye nyana kum dib aryuk, dipkoprop teleb unyaka deice arye, Allah ati moronamak ninye ara, Allah sik dam ulirye, sik moronyak yupu kekebuka fia melinamle.

¹⁹Allah an ti ilil tenebuka, nimalye arye kanye dakedongobuka unyak ninye arye, “Se, nun ni melipsilyame,” nyabuka morokinyak ninye ara, sik ti melipmince, teleb kililyame. Aninye arye, “Se, yatanye birye melipsute do? Kume, Allah elcuk melipsutue,” nyabuka morokinyak ninye ara, an

kekepmince aninye nirya ati, melibuka lyelyame. ²⁰Allah ati dib tenebikirye, el ti kanye deibuka unyak ninye nirya ati ara, Allah Yahweh ance melipminba, an amutam uk, kanye namin asa aryuk unamake. Bukni, malye winin ning uk, talibuka unyak ninye nirya ara, wenebuka oplopmince, sirya daknamlyame.

²¹Ati, na ara asum-asum nirya Allah Yahweh, an tibuk si erenamkine. Aning atonun, Allah ance kwepdeiyalumba, kam unyak ning ayalaya niry a arye, Allah Yahweh an si atibuk asum-asum nirya, an si uk fia erenamkiyake. An si erepnamak ning ara, fia kum bataknamake. Sisinye Raja Daud, el mot sena deice arye nyalamuk.

[Minop talak sekamik yupu ara, pasal 146 sampai 147 ton aubuk bukni, nunce aning kum sekuba ati, otam pasal 148 dukdongobuka nyapnin banamlulume.]

Mazmur 148

Im deice ap, tukwak ap nirya arye, Allah Yahweh ati, “Telebe,” nyabuka, el si uk erenyak yupu

¹Nun nirya arye Allah Yahweh ati, “Anda fia teleb uk ulyame,” nyabuka, el si erenamabe. Sik im deice ululum ning ap, malaikat ap, sik nirya arye, Allah Yahweh el tibuk, “Se, Allah anda, fia teleb uk ulyame,” nyanamlulume. Aning atonun, sik im alip tam erebuka ulamlum ning nirya arye, Allah Yahweh ati, “Elda fia teleb ululnye,” nyabuka, el tibuk si erenammlume. ²Se, sik im deice talye daunyak malaikat ap, tonda im deice yin talibuka unyak malaikat nirya ap, tonda im noutamak Allah el ti melibuka unyak nang nirya ap arye, Allah ati, “Anda fia teleb uk ulyame,” nyabuka, el si uk erepmunce, el ti si erebuka donamlulume.

³Im deice ulul ning ara, keteng ap, wala ap arye, Allah ati, “Anda fia teleb uk ulyame,” nyabuka el si erenammlume. Tonda kurya im deice ikamliba, dirina weik ulamle kurya ap, anggun nirya arye kanye deibuka, Allah el si uk erenammlume. ⁴Se, im deice itam erepdeiyamuk ning nirya arye, Allah el si uk erebuka, kibuka donamlulume. Tonda im deice alip tam deibuk mek ap, dua ap nirya arye, el uk si erenammlume.

⁵Yata un ning do nirya, Allah arye kwepdebuk ning aning-aning nirya arye, “Allah Yahweh anda fia teleb uk ulyame,” nyabuka, el si fia erenammlume. El si erenammluma deiyok ara, ani. Allah Yahweh arye, el yupu nyabuka deice arye, aning nirya kwepdeiamuk. Ati, Allah el si uk erenammlume. ⁶Aulye ning ayala-yala nirya ara, Allah aryuk, ‘Asukum ara, aning unamakak ani. Sik nong ap, urasin ap ara, winibuka unamake’ tenen, kintinibuka deiamuk asukum uk unyake. Allah arye, ‘Afia unamake,’ nyapdeiamuk touk, atalak arye dipdongobuka fia ati anyuk unamake. Allah arye nyalye yupu ara, yuk nang arye yupu kum sektinge, elce nyalye touk afia unamle.

⁷Se, Allah Yahweh, elce kwepdeibuk ura, tukwak mutuku noutamak unyak ning ayala-yala nirya arye, elcuk si erebuka donamlulume.

Tonda, “Allah anda fia teleb uk ulyame,” nyabuka, el si erenamlume. Tonda, weik laut mekwen noutamak ara, ulamle kwatima, el si ara Naga kwatima ap, yuk weik mekwen fum bal ayala-yala nirya ap arye, Allah el si atibuk fia erenamlume. ⁸Se, bebea lakliba, uku lalamle ning ap, weik mok purwu saklamle ning ap, dua ap, weik mikip arye balul kumanya ap, mok ap, dou ulamle talak ap, aning-aning nirya ara, Allah arye, “Winipnamlulume,” nyabuka nyalilye touk, Allah Yahweh el yupu uk kekebuka unyake.

⁹Tonda, weik mutuku-mutuku nirya ap, mutuku dup nirya ap, yo duk moulul yo, ayala-yala nirya ap, aras yo ap, talye yo ayala-yala nirya ap arye, Allah el si uk erenamlume. ¹⁰Aning atonun, kam ning ayala-yala nirya, Allah arye kwepdeiamlumba, talye bai tam noutamak, kam unyak ning ayala-yala nirya ap, ninye arye weinyak ning ayala-yala nirya ap, tonda pol deice arye lakuka balalum maka, ayala-yala nirya ap, tonda bai tam kam ukirye mun deice balul ning ayala-yala nirya ap, anggun nirya arye, Allah el si uk erenamulume.

¹¹Se, Allah elce kwepdeiamukba, tukwak mutuku noutamak, weik ninye deiyok talibuka ululum Raja, weik nang nirya ap, yuk weik deiyok kibuka ululum nang nirya ap, tukwak mutuku noutamak talibuka ulamlum pemerintah nang nirya ap arye, Allah Yahweh el tibuk, si erebuka, el si uk erenamulume. ¹²Se, anggun kam nang babye, kam kilapu babye, mitik mapu babye, wisi nang babye nirya arye, Allah Yahweh el tibuk, “Anda, fia telebe,” nyabuka, el si uk erenamlume.

¹³Telebe, sik nirya arye, Allah Yahweh el si uk erebikirye, “Allah anda fia teleb uk ulyame,” nyabuka el ti si erenamake. El si erenamaka deiyok ara, ani. Ara, Allah weik erenanye uliba, tukwak mutuku unyak ninye nirya arye, ‘Se, el si ara, weik mambul si ulule. Elda fia mikip weiknye,’ tenenyake. Im deice ap, tukwak mutuku im sirya, mutuku sirya ap ara, mitik teleb ulul bukni, Allah el fia teleb ubuka ulye ning ap, dirina weik ulya ap ara, aning nirya deice tam uk, erebuka ulule.

¹⁴Allah elcuk im sirya, mutuku sirya unyak ninye ati tenelule. Tonda, elce awamuk ninye, sik Israel yala ninye ati, mikip deiyok ning arelamukba, sikda mikip weik ninye ulamik. Ara, Allah arye, “Aning ara telebe, aning ara malye,” nyabuka laka lelamuk touk, ayupu moubuka talinyakce, diksukum unyak ninye ati, kanye deliliry, aninye dobuka, ‘Sikda na tenen ninye’ teneliry, el dam uk delilule. Ati, aning-aning nirya arye, Allah el si uk erenamake. Nun nirya arye, Allah Yahweh el si uk erenamabe. Sisinye Raja Daud arye, mutuku deice arye nyabuk.

[Minop talak sekamik buku ara, pasal 149 ton aubuk bukni, nunce aning kum sekuba ati, otam pasal 150 dukdongobuka nyapri banamlulume.]

Mazmur 150

Allah Yahweh ati telebe nyanamap yupu

¹Nun tukwak unyap ninye nirya arye, nun Ni Koprop Allah el si Yahweh^s ati, “Anda fia teleb uk ulyame,” nyabuka, el si atibuk erenamabe. Allah Yahweh el aik ara, im deice ulula anya arye, malye ning tonok ning babye kum ulul ati, fia teleb uk ulule. Ati, el mapu nirya bulubikirye, el ti, “Anda fia teleb uk ulyame,” nyabuka, el si fia erenamabe. Im deice fia ulirye, im deice alip tam nirya, el weik mikip deice arye, talilula anya arye, el tibuk, “Telebe,” nyabuka, kibuka si erenamabe. Ara, el mapu nirya babye, mikip arye, “Telebe,” nyabuka, el si uk erenamabe.

²Allah el tibuk kanye deibuka si erenamabe. Ara, ‘Allah ara el weik mikip adib aryuk aning-aning nirya talibuka ululnye ati ara, el tibuk, “Telebe,” nyanamabe. Yuk nang nirya ara, el mikip weik ulye touk, ton kum unyake’ tenen, el tibuk, “Anda weik erebuka mikip fia weiknye ulyama anya arye, telebe nyapkiyabe,” nyabuka, el tibuk kibuka fia si erenamabe. Tonda, ‘Allah elda weik erebuka ululnye birye, fia mambul weik fil dolule’ tenen, nun nirya arye, el si uk weik arye erenamabe.

³Allah el si erebuka kina ati, pong-pong ana, el si ara terompet deice arye, pong-pong abuka, mot sebuka, el ti si fia erenamabe. Tonda yuk mot sena ati, lelim nyalul ning, el si gambus ap, kecapi ap, weik lelim lenmalya deice arye, Allah el si uk fia erenamabe.

⁴Allah el ti si eren mot sen talak, lelim nyalul ning, el si ara rebana bopmapya deice arye, mot wibibirye, senamabe. Tonda, kanye lon mot sena ati, lelim lelul ning, el si ara kecapi ap, seruling ap bobuka, mot senamaba deice arye, el si uk fia erenamabe. ⁵Aning atonun, el si erebuka, mot sena ati lelim lelul ning, el si ara ceracap ap, tonda canang ap, sik abitinye ning bopmapya deice arye, mot moubuka wibibirye, Allah el si uk erenamabe.

⁶Tonda, Allah elce kwepdeiamukba, tukwak mutuku noutamak kam ulul ning ayala-yala nirya arye, Allah Yahweh el tibuk kanye deibuka, kibuka erebikirye, el si uk erenamake.

Nun Ni Koprop Allah, el si Yahweh ati, “Anda fia teleb ulyame,” nyabuka, el si uk erenamabe.

Akunuma. “Tukwak mutuku noutamak kam ulul ning nirya arye, Allah ati, “Telebe,” nyapnamak’ tenen, Haleluya nyapne.

Na Sisinye Raja Daud arye akunuma nyapne.

^s 150:1 *Yahweh* – Allah el si koproba ara, Yahweh ulule. Indonesia Alkitab noutam ara, Allah el si Yahweh ulul sukum ara, TUHAN sekenyake. Ayupu bikna ati ara, laka nyan yupu nomor 49 dipdelulume.